

Salmos

Libr nech

(Salmos 1—41)

Salmo 1

¹ Chakomba beena' bi chzenague' che ben' malka',
na' bi chone' ka chongake',
ni bi chonlene' txen ben'ka' chtitji Chioza',
² san chibaile' chone' ka, chzajni cho'a xtill' Chioza'ne',
na' zie'n wneyi ka tella ka wal.
³ Na' beena' chon ka', nake' ka to yag dii zoa cho'a nis,
na' chbian dii zix kat' chllin lla kwian,
na' bi chllib xlaguiinna'.
Na' yog'loł daa chone' chchejan wen.

⁴ Per ben' malka' bi chak chegake' ka',
san chak chegake' ka yix beb daa choa' be'na'.
⁵ Daan aga wiyesh'lallii Chioza' legake' llana'
wchogloe' chegake'.
Ni bi gag gonlengake' txen ben'ka' nak ben' li ben' shao'.
⁶ La' Chioza' chap chwie' ben'ka' zej shli lawe'na',
per ben' malka' zejgake' lo nez daa wlliyai'n legake'.

Salmo 2

¹ Bi llabia' biche chdop chllagzə ben' zit'ka' na'
cheengakile' no wshagdilgake'.
Na' chgoozgake' xnezi to dii bi so sakgakile' gongake'.
² Ben'ka' chnabia' yellka', chakgake' toz
chgoogake' xnezin yizoshiyigake'
Xancho Chioza' len beena' ba nzoe' kwenche inabi'e.
³ Na' nagake': "Li da til-lencho'gake' na' yiyell
yila'cho lo neeka'.
Bich we'cho latj inabia'gake' cho'."

⁴ Xancho Chioza', beena' chnabia' yabana',
chxill-lile' legake'.

⁵ Na' ye! chllaa che'na'zə gall illebgake',
na' inie' legake' znia, yee:

⁶ “Nad' ba bzoa' beena' inabi'e
lo yaa Siónna', daa nak latj cha'.”

⁷ Na' wi'a dill' daa ba wna Xancho Chioza'.

Le' ba wne' nad': “Lin' nako' xiin',
na' naa daa solo inabi'o inezi ben' nadaan nak' Xo'.

⁸ Wnabi nad' gon' lall' no' yog'!o! ben' lle' doxen yell-lioni,
na' gon' ka gagake' lall' no'.

⁹ Na' inabi'o legake', na' bi si'xeno' che nottez ben'
bi chzenag cho',
na' wxoxj wtingako'ne' ka ben' chxoxj chtin to yes' yo.”

¹⁰ Ka le' ben' wnabia', li shajni dga,
ina' li gon ka nan!

¹¹ Li yiba yizaki we'la'ole Xancho Chioza'
na' li gall illebe'.

¹² Li koo Xiine'na' balaan
kwenche ki illee na' wlliyee le',
la' ye! chllaa che'na' tolbe' shep chazan.

¡Chakomba yog' ben'ka' nxenilall'gake' gap wwie' legake'!

Salmo 3

¹ Chios cha', ben' zan wal ba nak ben'ka' chwiyi nad'.
Ben' zan wal ba nak ben'ka' chizoshi' nad'.

² Ben' zan nagake' cha':
“Aga wisla Chioza' le' lawi daa chak che'.”

³ Per li' Chios cha', chkweejo' nad' lao dii nxollka';
chono' ka cho'a balaan na' chtipo' lallaa.

⁴ Besya'id' wnab' ye! goklenna' lao Chioza',
na' bzenague' cha' lo yaa che'na' gana' zoe'.

⁵ Nad' chataa ches', na' chiban',
la' Chioza' chap chwie' nad'.

⁶ Na' bi chlleb' ben' be ben' zilki nechj nad',
ben'ki cheengakile' til-lengake' nad'.

⁷ ȷBli'gach yel' wak ȷho'na', Chios ȷha',
 na' bislagach nad'!
 Bsi'gach yel' zto' ben'ka' chakzi' chakzbangakile' nad',
 na' blej bshoshjgachgake' kwenȷche bibi gak gongakile' nad'.
⁸ Chios ȷha', lin' yislo' nad'.
 Benleeygach neto' naknto' yell ȷho'.

Salmo 4

¹ Chios ȷha', ben' chaklen nad' kat' bin chak ȷha',
 billiigach cho'a xtilaana' kat' choe'lwill' li'.
 La' kana' bti'l' dii lallja', lin' bislo' nad'.
 Biyesh'lall'gachi nad', na' bzenaggach dga chȷnabid' li'.

² Le' ben' cha'sibə, ȷbat wsanle bich wȷnit wdele balaan ȷha'na'?
 Na' ȷbat wsanle bich yibaile yel' wxiye'na' na' diika' bibi zakii?
³ Li' gakbe'i, Chioza' ba wleje' neto' nonlilall'nto'ne'
 kwenȷche naknto' lall' nee.
 Na' Chios ȷha'na' wzenague' ȷha' kat' we'lwilllee.

⁴ Li' gall illeb Chioza' na' bi gonle mal.
 Shlak dele lo xtaa lo xlaglena' waȷa',
 li' yiyakbe'i ka nak diika' ba benle.
⁵ Do yȷchj do lall'le li' we' Xancho Chioza' diika'
 chiya'l' we'lene',
 na' li' wxenilallee.

⁶ Ben' zan nagake': “ȷNora gon ka gak wen ȷchecho?”
 Chios ȷha', ble'shi'gachi neto'.
⁷ Ba beno' ka chiba chizakchid'
 aga ka ben'ka' zoayaa zoallin daa cheej chaogake'.

⁸ Mbalaz gataa gues',
 la' lin' chap chwio' nad', Chios ȷha'.

Salmo 5

¹ Chios ȷha', bzenaggach cho'a xtilaani.
 Biyesh'lallii nad' daa chbellyeshaa.
² Bzenaggach dga chat'yoid' li',
 la' lin' chȷnabi'o nad' na' nako' Chios ȷha',
 na' lin' choe'lwill'.

- ³ Chios cha', yog' zil choe'lwill' li',
na' yog' zil choe'len' li' dill' daa chak cha',
na' non' lez gakleno' nad'.
- ⁴ La' li', Chios cha', bi choolalloo no gon dii mal,
na' beṅ'ka' chon dii mala' bi gak ibig'gake' lawo'na'.
- ⁵ Ni beṅ'ka' nak beṅ' cha'sibə bi gak segake' lawo'na',
la' chakzbanilo' yog' beṅ'ka' chon dii mala'.
- ⁶ Na' chliayoo beṅ' wxiye'ka'.
Na' chle'zbanilo' beṅ' wen xyaka', na' beṅ'ka' chde beṅ'
lo na' beṅ'ka' chakzbangakile'ne'.
- ⁷ San nad', daa chiyesh'lallilo' nad', wak sho'a
lesh' lill xlatjo'na',
na' do yichj do lallaa we'lawaa li' cho'a lillo'na'.
- ⁸ Chios cha', bli'gachi nad' kwenche gon' daa nak shli lawo'na',
la' zoa beṅ' cheengakile' gak mal cha'.
Wloogach nad' lo nez li' cho'na'.
- ⁹ Cho'a lolli' beṅ' malka' aga bi dill' bal chchejan,
na' loo yichjlall'do'eka' lle' llan' dii malka'.
Ka chla' to ba dii nyaljə
ka' nak dill' wxiye'ka' chchej cho'a lolleeka'.
- ¹⁰ ;Bchogbia' chegake' kwenche sak'zi'gake', Chios cha'!
Na' gakshga chegake' daa chza'lall'gake' gongake' che beṅ'.
Wlej yichjo' legake' daa naklikzgake' beṅ' saaxya,
na' daa biyechj bibiigake' bizoshiyigake' li'.
- ¹¹ Per yog' beṅ'ka' chxenilall' li' yiba yizakshgagakile',
na' goḷ inegake' li' toshiizi daa chap chwio' legake'.
Na' yiba yizakgakile' lawo'na' daa chakgakile' li'.
- ¹² La' li', Chios cha', chonleeyo' beṅ'ka' zej shli.
Na' yel' goklen cho'na' nakan ka to daa chkweejan
legake' lao dii nxolla'.

Salmo 6

- ¹ Chios cha', bi wsheshlengacho' nad', daa chshaa li'.
Ni bi wsak'zi'gacho' nad' daa chlloo nad'.
- ² Biyesh'lall'gachi nad', Chios cha', naa bi shawaa.
Biyongach nad', la' doxentia' ba nsis.
- ³ Na' le ba chakshejlall' yichjlall'dawaani.
Chios cha', ;batra gakleno' nad'?

⁴ Bile'shi'gachi nad', Chios cha', na' bislagach nad' lo yel' wita';
bislagach nad' daa nako' ben' chiyesh'lallii.

⁵ La' shi ba wit' aga willjadinchid' li'.

Aga no gakch we'la'o li' kat' ba yo'e loo bana'.

⁶ Ba bidolallaa daa chbellyeshaa.

Yog' yel chlalj' nis xhell cha'ni gani dia',

na' chisbisan blag cha'ni.

⁷ Ba chchol jalaw'ki daa le chbell',

na' ba chde chegakin ni che ben'ka' chakzi' chakzbani nad'.

⁸ Li ikwas kwitii, ka le' chonle dii mala',

la' Chios cha'na' ba bzenague' ka chbellyeshaa.

⁹ Chios cha'na' ba bzenague' daa chnab' yel' goklen che'na'.

Ba bzenague' daa wñabidee.

¹⁰ Ben'ka' chakzi' chakzbani nad' yiyii yidogakile'

na' le gakshejlall'gake'.

Na' do chiyii chido'zgakile' yixonjdogake'.

Salmo 7

¹ Chios cha', lin' nxenilallaa.

Bislagach nad' lo ni'a na' ben'ka' chino nad' kwenche
witgake' nad'.

² La' shi bi gakleno' nad', na' wxoxj wtingake' nad'

ka chon bell zniaka',

na' kono zoa yisla nad', shi naa.

³ Chios cha', shi nap' dol' lawo'na',

wa shi bi dii mal ba ben' che ben',

⁴ shi ba bsak'zi'a beena' zoalen nad' wen,

wa shi ba bsak'zi'a beena' chakzi' chakzbani nad'

la'kzi aga bi bene' cha',

⁵ wlagdoshga ben'ka' chakzi' chakzbani nad' axt

ki yidol'gakile' nad',

na' wlej wshoshjshgagake' nad',

na' yisol yinitshgagake' balaan cha'na', shi naa.

⁶ Chios cha', bi sha'gachilo' wlliyooogake' lo yel'

chllaa cho'na'.

Btilgach ben'ka' chllaa chlok nad'.

Bli'gach yel' wak cho'na', na' bengach yel' joschis cha'ni,

la' ba bllio' bia' wchoglo' che ben' kon ka chiyal' gak che'.

⁷ Ben kwenche ben'ka' lle' yog' yell yidop yillaggake' lawo'na',
na' wñabia' legake'.

⁸ Chios cha', lin' chchogbi'o che yog' ben' lle' yell-lioni.
Bchogbia' gak wen cha' daa chon' daa nak shli,
na' zoa' do yichj do lallaa lawo'na'.

⁹ Chios cha', toshiizi chono' daa nak shli,
na' chiya chiyiljo' daa yoo loo yichjlall'do to to ben'.
Bi wi'o latj gon ben' malka' daa nazan chegake',
na' ben ka gak wen che ben'ka' chon daa nak shli lawo'na'.

¹⁰ Chios, beena' chkweeje' nad',
chisle' ben'ka' zoa do yichj do lallin.

¹¹ Chioza' chchogbi'e che yog' ben' kon ka chiyal',
na' toshiizi chlee ben'ka' chon dii mala'.

¹² Na' shi ben'ka' chon dii mala' bi yiyaj yilengakile',
na' yiloe' spad che'na' na' wkaadeeje' xis wixit' che'na'.

¹³ Ba nxoashawee diika' gonlene' xyana'.
Na' ba nzeshawee xis wixit' che'na' na' ba nzoe'
yi'na' lao xisa' wza'a'n.

¹⁴ Ben' mala', loo yichjlall'do'ena' wya wbiñ dii
mala' chyilj chzane',
na' chen chle'i ben' ye!' wxiye'na' goljlallee.

¹⁵ Na' ba bene' to yech zitj,
na' yecha' bene', lekze' ibixe' lo'inna'.

¹⁶ Dii mal che'na' chone', lekze' yidobile'n;
na' ye!' ben' zesh' ben' zban che'na'kzə wlliyai'n le'.

¹⁷ We'lawaa Xancho Chioza' daa nake' ben' chon
daa nak shli toshiizi.

Na' gol inia'ne' daa nake' liizelozi ben' choo ben' xen.

Salmo 8

¹ Chios, ben' nak Xannto',
doxen yell-lioni zeyi cho' nako' liizelozi ben' choo ben' xen,
na' tolla' nak xan yabana' balaan xen cho'na'.

² Chchino' cho'a loll' bi' xkwid'do'ka' na' bdo'ka' ni
chall' chxop choj chnegakb' li',
kwenche kwekllin ben'ka' chakzi' chakzbani li' na'
ben'ka' chizoshi' li'.

³ Kat' chwia' xan yabana' daa bxe bsilo',
 na' beo'do'na' len beljdo'ka' bllio'n,
⁴ na'ch nia': ¿Nora naknto', neto' beṅ' yell-lío,
 chi' yichjzo' neto',
 na' zezo' wṅeyi che neto' naknto' xiin benech?
⁵ Na' zi lat'zə ki beno' neto' ka anjl cho'ka',
 na' nono' neto' to balaan xen wal.
⁶ Na' bzo' neto' inabia'nto' lao yog'te diika' bxe bsilo',
 na' beno' yog'loṭten lall' na'nto':
⁷ no xil', no goon, na' yog'loṭ ba lle' yaa yao,
⁸ no baka' chzo xan yabana', no belka' lle' loo nisdona',
 na' yog' baka' chesh chalj lo'inna'.

⁹ Chios, beṅ' nak Xannto',
 ;doxen yell-lioni zeyi cho' nako' liizelozi beṅ' choo beṅ' xen!

Salmo 9

¹ Do yichj do lallaa we'lawaa li', Chios cha'.
 Wi'a dill' che yog' diika' ba beno' diika' chon ka chibani beṅ'.
² Chiba chizakid' daa nombi'a li'.
 Goṭ' inia' li' daa nako' liizelozi beṅ' choo beṅ' xen.

³ Beṅ'ka' chakzi' chakzbani nad' chixonjgake' daa
 chakbe'gakile' lin' chakleno' nad',
 na' to ka chjsoatishzgake' chbiayi'tegake'.
⁴ Lin' chṅabi'o, na' chchogbi'o che beṅ' kon ka
 chiyal' gak chegake';
 ba biya biyiljo' nad' na' wno' bibi xtoṭaa de.
⁵ Ba wdil'-leno' beṅ'ka' bi chall chlleb li'.
 Ba blliyoo legake' daa nakgake' beṅ' mal,
 na' kochno lljadini legake' shlas.
⁶ Ba wlliyai' beṅ'ka' bwiyi cho',
 na' blliyoo len yell che'ka',
 na' ni bich nxe gana' wlligakan.

⁷ Xancho Chioza' chṅabi'e zejli kani,
 na' gone' yel' joschis che yog'loṭ beṅ'.
⁸ Na' wchogloe' che beṅ' yell-lioni kon ka chiyal';
 na' ka'kzə gone' yel' joschis che yog'loṭ beṅ' lle'
 zbii zkaan yell-lioni.

⁹ Xancho Chioza' chkweeje' beṅ'do'ka' chḫi'
 chsak' beṅ' ḷegake',
 na' chaklene' ḷegake' kat' bi chak ḫegake'.

¹⁰ Yog' beṅ'ka' nombia'gake' li' nḫenilall'gake' li'.
 La' li', Chios ḫa', bi chbejyichjo' beṅ'ka' chiyilj li'.

¹¹ Li goḷ ine Xancho Chioza', beena' chṅabia' yell Siónna'.
 Li ḫixje'i yog'loḷ beṅ' lle' yell-lioni dii wenka' ba bene'.

¹² Chioza' chizi'e wzon ḫe beṅ' wen xyaka',
 na' bi chbej yichje' beṅ'ka' chonyesh' chṅabgake' yisle'
 ḷegake' lao beṅ'ka' chsak'zi' ḷegake'.

¹³ Chios ḫa', biyesh'lallii nad'.

Bwiagach ka chsak'zi' beṅ'ka' chakzi' chakzbani nad'.
 ḷBislagach nad' lao yel' wita',

¹⁴ kwenḫe we'lawaa li' gana' chdop chllag beṅ'ka' lle'
 Jerusalénna', daa llia lo yaa Siónna'.

Na' wi'a dill' lawe'ka' lin' chidoḷoo goḷ inento',
 na' yiba yizakid' daa ba bislo' nad'.

¹⁵ Beṅ' yellka' bi nonḷilall' li', ḷekzgake' bixopgake'
 ḷoo yecha' daa wdengake' kwenḫe nan
 ixop beṅ' yoblə lo'inna'.

Na' yalja' daa bzegake' senan beṅ',
 ḷetezan bizenan ḷegake'.

¹⁶ Xancho Chioza' ba bli'e nake' beṅ' chḫoglo ḫe
 beṅ' kon ka chiyal'.

Na' yalja' daa bze beṅ' malka' senan beṅ', ḷetezan
 bizenan ḷegake'.

¹⁷ Beṅ' malka', beṅ'ka' bi chzenag ḫe Chioza', kwiayi'gake'.

¹⁸ Per bi chbej yichje' beṅ'ka' chyallj chḫini,
 ni bi gak ka'zə daa nongake' lez.

¹⁹ ḷBli'gach yel' wak ḫo'na', Chios ḫa'!

Bi wi'o latj gon beṅ' yell-lioki daa nazan ḫegake'.

Yitop yishagshgo' beṅ' yellka' lawo'na', beṅ'ka' bi nonḷilall' li',
 kwenḫe wḫoglo' ḫegake'.

²⁰ Ben ka gall illebgake' li', Chios ḫa'.

Ben ka gakbe'gakile' nakgake' beṅ' bishte yell-liozə.

Salmo 10

- ¹ Chios c̄ha', ꞥberaꞥhe n̄laala'ozo' nad',
na' bi chakleno' nad' lawi daa chak c̄ha'?
- ² Beṅ' malka' lo yeḷ' chep cha'lall' c̄he'ka'
chsak'zi'gake' beṅ' yesh'ka'.
Na' yidobshgagakile' daa cheengakile' gongakile' beṅ'.
- ³ Beṅ' malka' chshalj chshongake' c̄heyi diika'
chzelall'gake' gongake'.
Chṅegake' wen c̄he beṅ'ka' chzelall' bi de c̄he beṅ',
na' chṅegake' zban c̄he Chioza'.
- ⁴ Chep cha'lall'gake' na' chakgakile' aga chyaljgakile' Chioza',
na' ni lat' bi yooyichjgake'ne'.
- ⁵ Yog' daa chongake' toshiizi chchejan wen,
na' bi zegake' wṅeyi daa chꞥhoglo' c̄he beṅ'.
Chxill-ligake' beṅ'ka' chwiyi ḷegake'.
- ⁶ Na' chakgakile' aga no gak bi goni ḷegake';
ni biga bi gak c̄hegake'.
- ⁷ Lillinzə chyishjgake' bia' blag' c̄he beṅ',
leyi choe'gake' dill' wxiye' na' chwall chshebgake' beṅ'.
Na' dill'ka' xoa cho'a ḷolleeka' chzoazi'yaan na' chsak'zi'n beṅ'.
- ⁸ Na' cho'a yellka' chkwash'gake' chbe'nogake' beṅ'do' bibi
chone' c̄hegake' kwenꞥhe witgake'ne'.
Na' toshiizi chbe'nogake' beena' bi gak soshiy' ḷegake'.
- ⁹ Ka chon to bell zṅia, chbezḅ sem bana' gaob,
kan' chon beṅ'ka' chinogake' gat' latj witgake' beṅ'do'na'
bi gak soshiy'e ḷegake'.
- Na' ka chzapgake'ne' na' chongakile'ne' kon ka nan c̄hegake'.
- ¹⁰ Na' chbe'losh'gake' kwenꞥhe tokonganzi chzapgake'
beṅ'do'ka' bi gak soshiy' ḷegake'.
- ¹¹ Na' beṅ' malka' chakgakile' bi chakbe'i Chioza'
diika' chongake',
ni bi chle'ile' bin chongake'.
- ¹² Bli'gach yeḷ' wak c̄ho'na', Chios c̄ha', na' be'gach
yeḷ' zak'zi' c̄he beṅ' malka'.
Na' bi kwey yichjo' beṅ'do'ka' chsak'zi'gake'.
- ¹³ ꞥBeraꞥhe chṅez beṅ' malka' zban c̄he Chioza'?
- Na' chakzgakile' aga bi xya gao Chioza' c̄heyi diika' chongake'.
- ¹⁴ Per li' chle'ilo' ka chongakile' beṅ',

na' ngoo yichjo'n, na' gonilo' legake' kon ka chiyal'
gak chegake'.

Lin' n̄xenilall' ben'do'ka' bi gak soshyi' legake',
na' lin' chakleno' ben' wizebka'.

¹⁵ Ben ka bich bi gak gon ben' malka'.

Bsak'zi'gake' axt ki yiyoll yido koo chixj dii mal che'ka'.

¹⁶ Xancho Chioza' ch̄nabi'e toshiizi.

Ben'ka' bi non̄lilall'gake'ne' yiyol yinitgake' na' bich
soagake' yell che'ni.

¹⁷ Chios cha', li' chzenago' che ben'do'ka' chsak'zi' ben'
legake' kat' choe'lwillgake' li'.

Li' chtipo' lall'gake' na' zio' w̄neyi chegake'.

¹⁸ Li' chakleno' ben' wizebka' na' ben'ka' ch̄chi'
chsak' ben' legake',

kwenche beena' wya' w̄bini bishte yell-lioni, bich
wwall wshebe' legake'.

Salmo 11

¹ Xancho Chiozan' n̄xenilallaa gaklene' nad'.

ǰBīche nazle: “Bxon̄jlatii dga chak cho',

ka chon bȳindo'ka' lle' yaa yaoka' chizogakb kat' chllebgakb?

² Bwiakachi ka chkaadeej ben' malka' xis wixit' che'ka',
kwenche do ngash'zə w̄chel'gake'n ben'ka' ngoosh̄lilalii.

³ Kat' bich wzenag ben' na' sologake' biz chegake' gon,
bich bi de gak gon ben' li ben' shao'ka'.”

⁴ Xancho Chioza' zoe' yabana' gana' nak lill x̄latje'.

Xancho Chioza' llie' yabana' ch̄nabi'e.

Na' zoe' chwie' ben' yell-lioni na' nez n̄e'ile' ka
chon to togake'.

⁵ Xancho Chioza' chwiayenee daa chon ben' li ben'
shawaa na' daa chon ben' mala';

na' chle'zbanile' ben'ka' nak ben' zesh' ben' zban.

⁶ Gone' ka sak'zi' ben' malka' kon ka chido'l' gak chegake'.

Na' w̄letje' yi'na' xan yabana' n̄chixan azúfrena',

na' gak chegake' ka chak che no yagdo' dii chdobə be' la wal.

⁷ La' Xancho Chioza' nake' ben' li ben' shao',

na' le chazlallee gon ben' daa zej sh̄li.

Na' ben'ka' ngoosh̄lilalii yillingake' lawe'na'.

Salmo 12

- ¹ Goklen neto', Chios cha', la' kochno beṅ'ka' chzoa
xtilloona' lle'.
Ba binitlo beṅ'ka' zoa do yichj do lall'gake' ladj beṅ' yell-lioki.
- ² Yog'zə beṅ' chziye' ljwelle',
na' chonzgake' ka cho'ela'o cho'e dill' beṅ', na'
naktegake' beṅ' chop cho'a.
- ³ Xancho Chioza' wlliyee yog'loḷ beṅ'ka' chonz ka
cho'ela'o cho'e dill' beṅ'
na' beṅ'ka' chshalj chshon che kwingake',
⁴ beṅ'ka' nagake':
“Ni che cho'a loll'nto'nin gak ka cheeninto',
la' lennan' gaklenan neto'
na' kono gak inabia' neto'.”
- ⁵ Na' Xancho Chioza' ne':
“Chle'id' ka chak che beṅ' yesh'ka', ka chsak'zi' beṅ' legake',
na' chenid' ka chbellyesh'gake'.
Daan wli'a yeḷ' wak cha'na' gaklen' legake',
yislagakee lo na' beṅ'ka' chchi' chsak' legake'.”
- ⁶ Cho'a xtilḷ' Xancho Chioza' nakan dowalj dii li dii shao'.
Nakan ka plat daa ba wde gall shii lo yi'na'
kwenche chzeyan daa bi nakə dowalj.
- ⁷ Chios cha', li' gap wwio' neto'
na' wsej wllono' neto' lao beṅ' malka' toshiizi.
- ⁸ Beṅ' malka' chechj chdagake' gattezə,
na' yog'te beṅ' yell-lioni chziḡ chziagakile' dii mala'.

Salmo 13

- ¹ ¿Batra lĵadinilo' nad', Chios cha'?
¿Atoshiizin kwej yichjo' nad'?
¿Batra yili'lawo' nad' dii yoblə?
² ¿Batra yiyoll yido yeḷ' chakshejlall' cha'ni
na' yiyoll yido gakyeshii yichjlall'dawaani yog' lla?
¿Batra yiyoll yido wsak'zi' beena' chakzi' chakzbani nad'?
³ Bzenaggach cha', Chios cha'.
Goklen nad' kwenche bi wsi wchog yeḷ' wita' nad'.

⁴ Bi wi'o latj in̄a beena' chakzi' chakzbani nad': "Ba benee gan."
Na'ch yiba yizakile' shi ba wlliyaa.

⁵ La' non' lez gakleno' nad' daa nako' beṅ' chiyesh'lallii.
Na' chibaid' daa neṅid' yislo' nad' lawi daa chak cha'.

⁶ Gol in̄ia' X̄ancho Chioza', daa le wen ba bene' cha'.

Salmo 14

¹ Beena' bi nteyi, ne' loo yichjlall'do'ena':
"Aga no Chios zoa."

Yog'zə beṅ' ba wxinj yichjlall'do'eka',
na' dii zban inleeb chongake'.

ḡNi sto kochno chon wen!

² Yabana'te zoa' X̄ancho Chioza' chwie' beṅ' yell-lioni,
shi ga zoa beṅ' nteyi,
beṅ' yiyilje' Chioza'.

³ Per yog'z beṅ' ba wlaagake' lo nez lina',
na' yog'zgake' nxinj yichjlall'do'eka'.
ḡKokzno zoa chon daa nak wen,
niga tlišee!

⁴ Beṅ'ka' chon dii mala', yog'ze' bi chajni.
Chisya chislengake' bi de che beṅ' yell cha'ka',
ka beṅ' chisbill chisto to yeḷ' waw,
na' bi choe'lwillgake' X̄ancho Chioza'.

⁵ Na' yeḷ' chall chleeb che'ka' gonan ka ixiztitgake',
daa zoalen Chioza' beṅ'ka' chon daa nak shli.

⁶ Beṅ' malka' chtitjgakile' daa ngoo beṅ' yesh'do'na'
x̄nezin gone',
per Chioza' chaklene'ne'.

⁷ ḡSheḷ' Chioza', beena' zoa yaa Siónna',
yidsle' cho' beṅ' Israel lo na' beṅ' malka'!
Na' kat'ka' Chioza' gone' ka yiyak wen checho sto shii,
yibachgaicho cho' nakcho beṅ' Israel, cho' nakcho
xiin̄ dia che dii Jacoba'.

Salmo 15

¹ Chios cha', ḡnoran gak soa latj cho'na' gana' chajlawo'?

Na' ḡnon gak soa lo yaana' gana' zoa lill xlatjo'na'?
 2 Zeelo beena' nsa' cheyin wen na' chone' daa nak shli,
 na' cho'e dill' li do yichj do lallee;
 3 beena' bi chbell chne che ben',
 ni bibi chone' che bish' ljwelle'na',
 ni bibi chiyiljallee che ben' wlill che'na';
 4 beena' chle'zbanile' ben' malka',
 na' chape' balaan ben'ka' chall chleb Chioza';
 na' chone' yog'te daa chchebe',
 la'kzi chle'ile'n lallj wal;
 5 beena' cho'e blej xmeche'na' na' bibi yichjin chnabe';
 ni bi chkee bi dii chshabi ben' le' kwenche gone' yoa'
 yag che ben' bibi dol' nap.
 Beenan', nezganzə ixope' gone' dii mala'.

Salmo 16

1 Chios cha', wdap bwiagach nad',
 la' lin' nxenilallaa gap wwio' nad'.
 2 Nad' ba wnia' li:
 "Lin' nako' Xan'.
 Bibi de cha' dii zak'chi ka li'."

3 Ben'ka' chibayi choe'la'o diika' bi nak dowalj chios,
 chakgakile' napgakan yel' wak.
 4 Dii zan dii yen ile'i ben'ka' chibayi choe'la'ogake'
 diika' nak yaj yag.
 Bi len' wlalj' xchen bayix'ka' lawinka',
 ni bi wzetj' leinka'.

5 Chios cha', lin' nako' ben' llialote lo yel' mban cha'ni,
 li' chono' yog' dii chyallj chchinid',
 na' nezid' lin' gono' ka gak wen cha'.
 6 Ka mbalaz chak che beena' chdol' to yell-lio wen,
 ka'kzan chak cha' daa chono' wen cha'.

7 We'lawaa Xancho Chioza', beena' chzajonii nad'
 ka chiya' gon'.
 Na' wal'ka', chzajonii yichjlall'dawaani nad'.
 8 Toshiizi yoo yichj' Xancho Chioza'.
 Na' daa zoalene' nad' na' chaklene' nad',

bibi de dii wchixan nad' gon' dii mala'.
 9 Na' daan chiba chizaki loo yichjlall'dawaani.

Na' nezid' bibi dii nxoll zoa'.
 10 La' aga wsanlalloo nad' toshiizi ladj ben' wetka'.
 Aga wi'o latj gooll' iteb beli chen cha'ni, daa nak' lall' no'.
 11 Ba bliilo' nad' nez daa nsa' ye! mbanna'.
 Gana' zo' de to ye! xaba xen,
 na' toshiizi soa' mbalaz kwito'na'.

Salmo 17

1 Bzenaggach dga chnabid' li', Chios cha',
 la' dga chat'yoid' li' gono' nakan dii wen.
 Bzenaggach cha' naa choe!will' li',
 la' dill' lin cho'a, aga chziyaan.

2 Lin' non' lez wchogbi'o bibi dol' cha' de;
 la' lin' nez nle'ilo' daa nak shli.

3 Lin' nombi'o yichjlall'dawaani, na' wal'ka' chiya chiyiljo'n.
 Ba biya biyiljo' nad'
 na' ni to dii mal bin' yillelilo' loo yichjlall'dawaani.

Na' ni to dii mal bi chchej cho'a lollaani.

4 Daa chzenag' cho'a xtilloona',
 bi chon' txen dii malka' chon ben'ka' nak ben' zesh' ben' zban.

5 Toshiizi ba wzoachech' lo xnezo'na',
 na' ni shlin bigan' yilaalawaan.

6 Choe!will' li', Chios cha',
 la' nezid' chilli'o cho'a xtillaana'.
 Bzenaggach dga nia' li'.

7 Bli'gachi nad' ka nak ye! chaki cho'na' daa nak dii xen wal,
 la' lin', chislo' ben'ka' non lez gakleno' legake'
 kon ye! wak cho'na'.

Chislo' legake' lo na' ben'ka' chaklallii wlliyi' legake'.

8 Wdapshiigach nad' ka chon ben' chapshi'e ben' jalawe'na'.
 Bkwash' bkweej nad', ka chon jeda' chkwash' chkweejb
 xiindo'bka' xan xilba'.

9 Bkwash' bkweej nad' lao ben' malka' chdi-len nad',
 ben'ka' cheeni witgake' nad'.

10 Bikzə chiyesh'gakile' ben',

na' le cha'sibə chnegake'.

¹¹ Chinogake' nad' gattezə chda',
zekwasgake' kwenche wlliyi'gake' nad'.

¹² Chongake' ka chon to bell znia
chbe'nob kwenche sem bana' gaob.

¹³ Bli'gach yel' wak cho'na', Chios cha'!
Wdil-lengach ben' malka' na' blliyi'tegagake'.

Bisla nad' lo ni'a neeka' kon yel' wak cho'na'.

¹⁴ Bisla nad' lo ni'a neeka' kon yel' wak cho'na',
lo ni'a na' ben' yell-lioki, ben'ki non lez zeelo yel'
shawaa de yell-lioni;

ben'ki le chat' chbe'yi daa si'gake' banez,
na' nelj nlla'yi xiin che'ka' na' axt xsoe'ka'.

¹⁵ San ka nak nad', nezid' wiyed' lawo'na' daa
chon' daa zej shli.

Na' mbalaz soa' gana' zo' kat' yisbano' nad'.

Salmo 18

¹ Le chakid' li', Chios cha'. Li' chono' nad' ben' wal.

² Chios cha', li' nako' ka to yaj xen dii chkwash'
chkweejan nad',

na' nako' ka to yoo dii nakchech ga sho'a kwenche
kono bi goni nad'.

Chios cha', lin' chislo' nad', na' lin' nxenilallaa.

Lin' chkweejo' nad', na' kon yel' wak cho'na' chislo' nad'.

Na' lin' nako' ka to latj gana' zeelo nak sibə gana' gak
wkwashaa kwenche kono bi goni nad'.

³ We'llwill' Chioza', beena' chidoj' we'la'ocho,
na' yisle' nad' lao ben'ka' chakzi' chakzbani nad'.

⁴ Yel' wita' bzapan nad' kwenche nan wsi wchogan nad';

na' gokan ka to yao xen dii chchinj chsell na' nan
wchix wlojan nad'.

⁵ Yel' wita' bzapan nad' kwenche nan wsi wchogan nad',

na' gokan ka to yalj dii bzap nad' kwenche nan kwiayaa.

⁶ Lo yel' zak'zi'na' ben ble'id', be'llwill' Chios cha'na',
wnabidee gaklene' nad'.

⁷ Na'ch yel' chllaa che'na' benan ka wxo' wñib
yell-lioni dii wal inleeb,

axt do leni yaa yaoka' wxo' wñibgakan.

⁸ Bsho' bchezee yaa yelka' na' wzoagakan llen
na' bchejgakan yi' daa chlliayi' chlliade,
na' bzal'gakan yi' galj.

⁹ Bsalje' xan yabana' betje',
na' xñi'ena' wze bej bzaka'.

¹⁰ Na' wllie' to anjl zoa xilin:^a
na' wzolene'ne' lo llazə.

¹¹ Na' yel choḷa' bkwashaan le',
na' bej bzaka' yoll nis yeja' wyeçhjyoban le'.

¹² Na' yel' chey cheeni' che'na' gokan ka yi' wziw'
na' bchej lo bejka' yaj yaba na' yi' galj.

¹³ Na' goshj wtin yabana' ka wñe Xancho Chioza',
beena' nak lizeelozı ben' choo ben' xen,
na' bxop yaj yaba na' yi' galj.

¹⁴ Na' yi' wziwaa bzalee, gokan ka daa chzal' xis wixıtaa,
na' bisheshlese' ben'ka' chakzi' chakzbani nad',
bilague' legake'.

¹⁵ Ka wñe Xancho Chioza', na' gok nısdona' chopḷə
bli'lao yell-liona' daa de xanınna',
axt gana' chi' len yell-lioni bli'lawin ka bchej bishbe che'na'.

¹⁶ Chioza' goklene' nad' gana' lliatie'
na' bisle' nad' kana' gok cha' ka chak che to ben' chbe'
yel loo nısdona' gana' nak zitj.

¹⁷ Bisle' nad' lo ni'a na' ben' walka' bi chle'shii nad',
ḷa' bi wzo wzakid' ben'ka' chakzi' chakzbani nad'
daa nakgake' ben' zan.

¹⁸ Bidtil-lengake' nad' llana' bi chak wen cha',
per Xancho Chioza' goklene' nad'.

¹⁹ Bibeje' nad' ladj ben'ka' wllagdia nad'.
Na' bisle' nad' daa chazlallee ka nsa' cha'.

²⁰ Xancho Chioza' ba bene' to dii wen cha'
daa chon' ka chazlallee,
na' daa nezile' bibi doḷ' cha' de.

²¹ ḷa' toshiizi zoatip' lo xnez Chioza';

^a 18:10 *To anjl zoa xilin:* xtila' nan un querubín.

na' bigan' wlaalawaa Chios cha'na'.

²²Nad' ngoo yichj' yog' diika' nllie' bia' gon',
na' ni shlin bigan' kwejyichjgaka'n.

²³Ni to dol' cha' bi de lawe'na',
na' chapshi'a kwin' kwenche bi gon' dii mala'.

²⁴Na' Xancho Chioza' ba bene' to dii wen cha'
daa chon' ka chazlallee,
na' daa bibi dol' cha' de lawe'na'.

²⁵Chios cha', toshiizi chakleno' beena' chon ka cheenilo',
na' chono' wen che beena' chon wen.

²⁶Mbalaz chonilo' beena' zoa do yichj do lallee,
san zibia' chonilo' ben' wxiye'na'.

²⁷Lin', chislo' ben'ka' chchi' chsak' ben' legake',
na' chsi'o yel' zto' ben'ka' nak ben' cha'sib.

²⁸Chios cha', lin' nako' ka beeni'
daa chzeeni' lo yel cho'a' gana' chda'.

²⁹Daa chakleno' nad' wak wlliyaa ben'ka' chdil-len nad',
na' shep chaz' lo zeeka' nechj yell che'ka'.

³⁰Chioza' nake' ben' li ben' shao';
na' cho'a xtilleena' nakan dowa'lj dii li.
Na' chkwash' chkweeje' ben'ka' nxenilall' le'.

³¹Kochno zoa sto ka Xancho Chioza'.
Kochno nak ka Chios chechona' beena' nak ka to yaj
xen dii chkweejan cho'.

³²Len' chone' nad' ben' wal,
na' chaklene' nad' nsa' cha' wen.

³³Ka chzoachech ni'a bllin'yixaa kat' chep chazb,
kan' chzoacheche' nad' kat' chtil' dii lalljka'.

³⁴Na' chli' chsedile' nad' kwenche gak sha' lo wdi'a'
na' chone' nad' wal kwenche gak wkaadeej' xis wixit' de yana'.

³⁵Lin' chkwash' chkweejo' nad' na' chislo' nad',
na' yel' wak cho'na' chaklenen nad'.
Na' yel' chiyesh'lallii cho'na' chonan ka chak wen cha'.

³⁶Ba bsaljo' to nez xen cha' gana' chechj chda',
na' ni'aki bi chbilangakan.

³⁷Jalag' ben'ka' wdi-len nad',
na' bi bibi'a ax't ki blliyaagake'.

38 Blej bshoshjgakee ga zeelo
kwenche bich biyagake'.

39 Li' beno' nad' ben' wal kwenche wyaa lo wdila',
na' gokleno' nad' ben' gan lao ben'ka' chdil-len nad'.

40 Beno' kwenche ben'ka' chdil-len' bixonjgake',
na' got' latj bliiyaa legake'.

41 Wnabgake' yel' goklen na' kono goklen legake';
wnegake' Xancho Chioza', na' bi goklene' legake'.

42 Na' biyongakee ka bishte yo daa choa' be'na',
na' blej bshoshjgakee ka benja' daa chi' yawi nez.

43 Ba bislo' nad' lo wdił wishesh che ben' yell cha'ki;
na' ba bzo' nad' inabi'a ben' yellka' bi nombia' li';
na' ben' zit'ka' ben'ka' bi nombi'a, chzoagake' xtilaa.

44 Kate bi chepgakee gongake', li chontegake'n,
na' chzexj yichjgake' lawa'ni.

45 Na' daa chiyakblan'gake',
do chall chllebzgake' chilleshgake' gana' nkwash'gake'.

46 jXancho Chioza' nake' ben' yaa ben' ban!
jChoe'lawaa beena' nak ka to yaj xen dii chkwash'
chkweejan nad'!

jShajlaoshga Chios cha'na' beena' chisle' nad'!

47 Chioza' chaklene' nad' chizi'a wzonna' lao ben'ka'
chakzi' chakzbani nad',
na' chone' kwenche ben'ka' lle' yellka' chzexj
yichje'ka' lawa'ni.

48 Len' chisle' nad' lo ni'a na' ben'ka' chakzi' chakzbani nad',
ben'ka' chzoshiyi' nad'.

Chios cha', lin' ba bislo' nad' lo ni'a na' ben' zesh' ben' zbanka'.

49 Na' ni cheyi daan we'lawaa li' ladj ben'ka' lle' yog'te yell,
na' gol inia' we'lawaa li'.

50 Daa nzo' nad' chnabi'a, chakleno' nad' kwenche chon'
gan lao ben'ka' chdil-len'.

Na' toshiizi chiyesh'lallilo' nad' len yog' xiin dia cha'ka'.

Salmo 19

1 Yabana' chli'n yel' wak choo yel' wak xen che Chioza',
na' cho'en dill' cheyi diika' bene'.

2 Lla kon lla chyixje'in cho' ka nak yel' wak xen che'na',
na' wal'ka' chli'n ka nak yel' sin' che'na'.

³La'kzi bi yoo xtiliin,
 ni bi de bishbe cheyin,
⁴daa chyixje'n chllinan doxen yell-lioni
 axt gana' zeelo chiyoll chidon.
 Na' xan yabana' bene' lill xlatj wbillla',
⁵na' mbalaz chchejan ka mbalaz chchej beena' zi' bshagna'
 gana' ches chnalene' nool che'na'.
 Na' chibain ngoon nez
 ka chibayi to ben' chxonj kwenche idolee daa lialallee.
⁶Wbilldo'na' chla'n shlaa xan yabana',
 na' chillinten daa zi shlaa gana' chxoan,
 na' aga bi de lo yell-lioni dii bi chen chle'i wba cheyinna'.

⁷Daa chzajonii cho'a xtil' Chioza' cho' nakan dowalj dii wen,
 na' chonan ka chiyakshao' yichjlall'do' ben'.
 Na' daa nllia Chioza' bia' goncho nakan dii wxenlall'cho,
 na' chonan ben' sin' beena' bi chajonii.
⁸Diika' nllia Chioza' bia' goncho nakgakan dii li dii shao',
 na' chongakan ka chiba chizaki yichjlall'do' ben'.
 Diika' non Chioza' mandad goncho nakgakan dowalj dii li,
 na' nakgakan to beeni' xen checho.
⁹Daa gall illebcho Chioza' nakan wen,
 na' toshiizi gall illebchone'.
 Na' daa na Chioza' chiyal' goncho, nakan dii li,
 na' nakan ka chiyal'.
¹⁰Zak'chan aga ka zan or daa nak dowalj,
 na' zix siachan aga ka shin' basera' daa nak dowalj.
¹¹Lekzka' nakan dii chzajonii nad';
 na' daa chon' ka nan, sia' banez cheyin.

¹²¿Gatg zoa ben' chiyakbe'i kat' nxinj nlene'?
 Chios cha', wxi'xengach dii malka' bin' yiyakbe'id' ba ben'.
¹³Bkwasgach yel' cha'sib cha'ni,
 bi we'gacho' latj inabia'n nad'.
 Na' gak' ben' bibi nda' nchen,
 na' biga wlaalawaa li'.

¹⁴Ixi' ilebgach xtilaani lawo'na'
 len daa chza'lallaa loo yichjlall'dawaani, Chios cha'.
 Li' nako' ka to yaj xen dii chkwash' chkweejan
 nad' na' chislo' nad'.

Salmo 20

¹ Xancho Chioza' wzenagshgue' cho' llana' bi chak wen cho'.
Chioza' beena' be'la'o dii Jacoba', gap wwiashgue' li'.

² Lo Yaa Siónna' gana' zoate lill xlatje'na'
wzenague' na' gaklene' li'.

³ Chioza' lljadin lljaza'lall'shgue' ka nak yog' diika'
chzaniilo' choone',
na' chazlall'shgue' bayix'ka' chito', baka' chzeyo' lawe'na'.

⁴ Na' gongshgue' ka gak yog' diika' chzelalloo,
na' gak diika' ba ngoo xnezin gono'.

⁵ Neto' yiba yizakinto' kat' ba beno' gan lao ben'ka'
chdil-len li',
na' we'la'onto' Chioza' wlisnto' banderka' kwenche gakbe'i
ben' ba beno' gan lo wdiła'.

Xancho Chioza' gonshgue' yog' diika' chnabilo'ne'.

⁶ Na' naa ba nezid' Xancho Chioza' chisle' beena'
nzoe' chnabi'e.

Chzenague' che' yabana' gana' zoatie'
na' chisle'ne' kon yel' wak xen che'na'.

⁷ Zoa ben' nxenlall'gake' karretka' chchingake' lo wdiła',
na' lekzka' zoa ben' nxenlall'gake' kabayka',
san cho', Xancho Chiozan' nxenilall'cho.

⁸ Na' ben'ka' nxenlall'gake' diiki, aga chzibia'gake',
san cho', chzo chzakichon na' bikzbi chakicho.

⁹ Chios cha', bislagach beena' nzo' chnabi'e,
na' goklengach neto' kat' chnabnto' yel' goklen cho'na'.

Salmo 21

¹ Chios cha', beena' nzo' chnabi'e chibachgaile' daa
beno'ne' ben' wal;

na' daa gokleno'ne' bene' gan lo wdiła' le chiba chizakile'.

² Ba beno' ka gok diika' lliallalee,
na' bi bsej bllonilo'ne' diika' wnabile' li'.

³ Ba blebo'ne' na' benleeyo'ne' dii xen;
na' bllino' yichje'na' to corona de or.

⁴ Wnabile' li' wi'one' yel' ga' yel' mban,
na' bi'one' to yel' mban xen.

⁵Le zeyi che' daa chakleno'ne',
na' ba beno' kwenche koo ben' le' balaan na' nono'ne'
to ben' wñabia' xen.

⁶Ba benleeyo'ne' toshiizi,
na' daa zoaleno'ne' le' chiba chizakile'.

⁷Daa nxenilall' ben' wñabia'na' Xancho Chioza',
beena' liizelozi nak ben' choo ben' xen, daan chiyesh'lallile'ne',
na' aga no so saki yikwas ye! wñabia' che'na'.

⁸Na' daa napo' ye! wakan', wzapo' yog' ben'ka'
chakzi' chakzbani li',

na' wsak'zi'o ben'ka' chwiyi li'.

⁹Na' wliayoo legake' lo yi'na'

llana' wchoglo' chegake'.

Xancho Chioza' wliayee legake' daa chlee legake',

na' kwiayi'gake' lo yi'na'.

¹⁰Na' yisol yinito' xiin che'ka' lo yell-lioni,

na' yisya yisleno' dia che'ka'.

¹¹La'kzi chiyiljlall'gake' bi gongakile' li'

na' chgoogake' xnezin bi gongake' cho',

aga waklat' ka cheengakile'.

¹²La' gono' ka yixonjdogake'

ka wzio' xis wixit' cho'na' lawe'ka'.

¹³Shajla'oshgo' daa nako' ben' ye! wak xen, Chios cha'.

Na' go! inento' li', we'nto' dill' che diika' chonleno'

ye! wak xen cho'na'.

Salmo 22

¹Chios cha', Chios cha', ¿biçe ba wlej yichjzo' nad'?

¿biçe bi chido' yislo' nad',

ni bi chzenago' ka chonyeshaa?

²Chios cha', ka tella ka wal chñabid' li' ye! goklen cho'na',

per bikzə chono' daa chñabid' li',

na' bibi ye! wixi'lall' cha' de.

³Lin' zeelo nako' dowalj ben' li' ben' shao',

na' chñabi'o, na' lin' choe'la'onto' neto' ben' Israel.

⁴Dii xoz'xto'nto'ka' bengake' li' lez,

na' bislo' legake' daa bñenilall'gake' li'.

⁵ Wnabgake' ye| goklen cho'na', na' bislagako'ne';
bxenilall'gake' li', na' bi bgaangake' ye| zto'.

⁶ Per yog' be| nagake' cha' aga no nak' ni bibi zakaa.
Chtitj chtangakile' nad' na' chongakile' nad' nakzi.

⁷ Yog'te be|ka' chle'gakile' nad' chnelegake' cha',
na' chnegake' zibia'laz, nagake':

⁸ "Beenin nxenilallee Chioza';
yishlashki Chioza'ne' naa shi leile' chakile'ne'."

⁹ Li'kzan beno' kwenche wxan xna'na' nad';
na' ba chap chwiakzo' nad' kana' ni chwall' chxoptie' nad'.

¹⁰ Kana' zi' galjtia', ba nak' lall' noo;
kana' ni yootia' loo lee xna'na', ba nakkzo' Chios cha'.

¹¹ Bi wkwaan'o' nad' toz',
la' ba za' daa idil illag',
na' kono zoa gaklen nad'.

¹² Be|ka' chwiyi nad' llagdia'gake' nad'
chongake' znia ka no goon wilag, baka' lla' lo yell-liona'
gana' mbani Basanna'.

¹³ Na' chosyaagake' ka no bell znia wal,
cheengakile' gas' xejgake' nad'.

¹⁴ Ba chde che ye| mban cha'ni, chak cheyin ka nis dii chlalj.
Llitki yo'a bich ndil nllaggakan,
na' yichjlall'dawaani ba chsisan.

¹⁵ Ba bidolallaa na' ba bexj fuerz cha'ni,
na' lollaani da'billan loo cho'ani.
Ba choe'tekzo' latj ile'id' ye| wita'
na' yiyak' bishte yell-lio.

¹⁶ Be| zbanka', be|ka' nak ka bekw' znia, ba nechjgake' nad',
na' bido we'zi ba nongake' ni'a na'ki.

¹⁷ Ba biles yidxa'ni axt ba nla' llitki yo'a.
Na' be|ka' chwiyi nad' kon lle'gake' chwiagake' nad'.

¹⁸ Bilaagakile' xa'na',
na' bengake' to wyitj kwenche bchej be|ka' wkaan.

¹⁹ Na' li', Chios cha', li' nako' be| chaklen nad',
;bi wlaalawoo nad'!

;Bi shagachilo' yidyakleno' nad'!

²⁰ Bislagach nad' kwenche bi witgake' nad';

bi wi'o latj yikaa beṅ'ka' nak ka bekw' zṅia yel' mban ča'ni.

²¹ Bisla nad' lo ṅi'a na' beṅ'ka' nak ka bell zṅia,
beṅ'ka' chon ka gooṅ wilag.

²² Na' wi'a dill' čho' lao bish' ljwell'ka',
na' goḷ inia' li' ladj beṅ'ka' chdop chllag choe'la'ogake' li'.

²³ Ka le' chall chlleble Xancho Chioza',

ḷi goḷ inie'!

ḷi kwee balaan, ka le' nakle xiin dia čhe dii Jacoba'!

ḷi we'lawee, ka le' nakle xiin dia čhe dii Israela'!

²⁴ La' le' bi chonile' nakzi beena' chakyeshii,

ni bi chdegone' gaklene'ne' kat' chzak'zi'e,

ni bi chbej yichje'ne'.

San chzenague' čhe' kat' chṅabile'ne' yel' goklen.

²⁵ We'lawaa li' lao lkwe' beṅ' be beṅ' zilka' chdop
chllag choe'la'ogake' li'.

Lao beṅ'ka' chall chlleb li' goṅ' diika' ba nčheb'.

²⁶ Na' yeej gao beṅ' yesh'do'ka' axt ka yelj sha'gakile';

na' beṅ'ka' chiyiljgake' Xancho Chioza', we'la'ogake'ne'.

²⁷ Axt gana' zeelo chiyoll chido yell-lioni

lljadin lljaza'lall'gakile' Xancho Chioza',

na' we'la'ogake'ne'.

Beṅ'ka' lle' to to yell doxen yell-lioni

wčhek' yichj wčhek' laogake' lawe'na' we'la'ogake'ne'.

²⁸ Doxen yel' wṅabia'na' naki čhe Xancho Chioza';

na' chṅabi'e yog'loḷ beṅ' lle' doxen yell-lioni.

²⁹ Na' beṅ'ka' čaj chde wen, yeej gaogake' na' we'la'ogake'ne'.

Na' beṅ'ka' bi naki čegake' yel' mbanna',

beṅ'ka' yiyak bishte yell-lion,

wčhek' yichj wčhek' laogake' lawe'na'.

³⁰ Xiin dia ča'ka' we'la'ogake' Xancho Chioza';

na' shnon mbangake' we'gake' xtilleena'.

³¹ Axt len lao beṅ'ka' zi' galjə,

we'gake' xtilleena' nake' beṅ' li beṅ' shao' daa bisle' legake'.

Salmo 23

¹ Chioza' chap chwie' nad', ka beṅ' chap chwia xil'do' čheyin,
na' bibi chyallj chčhinid'.

²Ka chon beena' chjwa' xil'do' che'na' gana' nak shi'a shga',
na' chjweeb gana' llia nis yaa nis banna' yeejb,
ka'kzan chon Chioza' cha',
chone' ye! wixi'lall' cha' na' zoa' mbalaz.

³Chtipe' lallaa,
na' ngwee nad' lo neza' gana' chiyal' shaa
daa nake' ben' wen ben' shao'.

⁴La'kzi zyaa lao dii nxoll dii nsa' ye! wit,
bibi gall illebkz',
la' lin', zoaleno' nad', Chios cha'.
Na' daa napo' ye! wak, nxenlallaa gap wwio' nad'
lao bittezə dii nxoll.

⁵La'kzi lle' ben' chakzi' chakzbani nad',
chwiategake' ka chzaj chdio' nad'.
Choe'lawo' nad' daa chle'shiilo' nad',
na' dii wenka' chono' cha' axt chakan ka dii chochj chlaj.

⁶Na' ye! ben' wen cho'na' len ye! chiyesh'lallii cho'na'
soalenan nad' shnon mban',
na' toshiizi soa' lill xlatjo'na', Chios cha'.

Salmo 24

¹Che Xancho Chioza' nak doxen yell-lioni
na' yog'lo! dii de lawinni,
len yog'lo! ben' lle' lla' lawinni.

²La' len' bxe bsile'n na' bzoacheche'n loo nisa'.

³¿Noran gak shaj lo yaa che Xanchona'?

¿Noran gak soa lill xlatje'na'?

⁴Beena' bibi dii mal chone',
na' nxi nyech yichjall'do'ena';
beena' bi choe'la'o lwaa lsak' diika' bi nak dowalj chios,
ni bi chziyee kat' chchebe' bi gone'.

⁵Beena' chon ka', Xancho Chioza' chisle'ne'
na' gone' ka' gak wen che', na' ka wchogbi'e che',
ine' bibi xtolee de.

⁶Kan' nak ben'ka' nxenilall' Xancho Chioza',
ben'ka' choe'la'o beena' be'la'o dii Jacoba'.

7 ĵLi wsalj puertka' zoa kani'teyi!
 ĵLi wsalj chop laategakan
 kwenche sho' beena' zeelo chnabia'!

8 ĵNora beena' zeelo chnabia'!
 Len' Xancho Chioza', beena' zeelo nak ben' wal na' ben'
 yel' wak choo yel' wak xen.
 Len' Xanchona', beena' chone' gan lao yog'lo! ben'ka'
 chdil-lengake'ne'.

9 ĵLi wsalj puertka' zoa kani'teyi!
 ĵLi wsalj chop laategakan
 kwenche sho' beena' zeelo chnabia'!

10 ĵNora beena' zeelo chnabia'!
 Len' Xancho Chioza', beena' zeelo nak ben' yel' wak
 choo yel' wak xen.
 Len' nake' beena' zeelo chnabia'.

Salmo 25

1 Choe'lwil' li', Chios cha'.

2 Chios cha', lin' nxenilallaa.

Bi wi'o latj si'a yel' zto' kwenche
 ki wxilli ben'ka' chakzi' chakzbani nad'.

3 Dii licha ni to ben'ka' nxenilallii li' biga si'gake' yel' zto';
 san beena' chechje' gone' mal che bish' ljwelle'na' la'kzi bibi
 chone' che', beenan' si'e yel' zto'.

4 Bli'gachi nad' nez cho'na', Chios cha',
 wloogach nad' lo nez cho'na'.

5 Wloogach nad' lo nez li cho'na' na' bzajni'gachi nad',
 la' lin' nako' Chios cha' na' chislo' nad' lao bittez dii nxoll.
 ĵNa' lin' non' lez toshiizi!

6 Chios cha', jadingachi yel' chiyesh'lallii cho'na'
 na' yel' chaki cho'na' daa ba bliilo' neto' toshiizi.

7 Wxi'xengach daa bi ben' ka cheenilo', na' che saaxyaka'
 ben' kana' nak' ben' xkwid'.
 Biyesh'lallii nad', Chios cha', daa nako' ben' wen.

- ⁸ Ben' wen na' ben' li ben' shao' nak Chioza',
na' chliile' ben' saaxyaka' nez wen che'na'.
- ⁹ Na' chgwee ben' gaxjall'ka' lo nez li che'na',
na' chli' chsedile' legake' ka chiya' gongake'.
- ¹⁰ Toshiizi chakile' ben'ka' chon diika' nllie' bia';
na' toshiizi chone' ka chchebe' lawe'ka'.
- ¹¹ Chios cha', si'xengacho' saaxyaka' ba ben' la'kzi
nakkakan dii zan
kwenche seyi cho' nako' ben' chiyesh'lallii.
- ¹² Chioza' wliile' beena' chall chllebe'ne' neza'
daa chiya' sho'e.
- ¹³ Na' gak wen che',
na' xiin dia che'ka' yigaanlengake' yell-lioni dga be' Chioza'ne'.
- ¹⁴ Chioza' chle'shiile' ben'ka' chall chlleb le',
na' chzajniile' legake' ka nak diika' cheenile' gongake'.
- ¹⁵ Toshiizi nxenilallaa Chioza',
la' le' chisle' nad' lao yog'lo' dii nxoll.
- ¹⁶ Chios cha', bwiagach ka chak cha', na' biyesh'lall'gachi nad'
daa chllagloa' ye' zak'zi'ki na' kono zoa gaken nad'.
- ¹⁷ Zizikli chan diiki chonyesh'gakin yichjlall'dawaani.
Bisell bila'gach nad' lao diiki chllagloa'.
- ¹⁸ Bwiagach ka chllagloa' diiki chak cha',
na' wxi'xengach yog'lo' saaxyaka' ba ben'.
- ¹⁹ Bwiagach ka ba wyan ben'ka' chwiyi nad',
na' ka chakzi' chakzbanlikzgakile' nad'.
- ²⁰ Wdap bwiagach nad' na' bislagach nad'!
Bi wi'o latj wsi'gake' nad' ye' zto',
la' lin' ba nxenilallaa.
- ²¹ Bkwash' bkweejgach nad' daa zoa' do yichj do
lallaa na' chon' ka no',
la' lin' nxenilallaa.
- ²² Chios cha', bislagach neto' ben' Israel
lao yog'lo' diika' chak chento'.

Salmo 26

- ¹ Chios cha', wchogbia'gacho' cha' kon ka chido'laa,
la' do yichj do lallaa chon' ka cheenilo',

na' bi chakchoplallaa nxenilallaa li', Chios cha'.

² Biya biyilj yel' mban cha'ni, Chios cha',

na' bembia'gach yog'loj daa yoo loo yichjlall'dawaani.

³ La' toshiizi yoo yichj' le chakilo' nad'

na' toshiizi chon' daa chazlalloo.

⁴ Bi chon' txen ben' wxiye'ka',

ni ben'ka' chonz ka ben' wen.

⁵ Chakzbanid' gon' txen ben'ka' nshagui ljwellin chongake' mal;

na' bigan' yillaguid' ben' saaxyaka'.

⁶ Ba bixis biyib na'ki lawo'na' daa nezid' bibi saaxya

nda' nchen yichjlall'dawaani.

Na' naa, Chios cha', wak shechj ta' gana' chzeynto'

bayix'ka' lawo'na',

⁷ na' goj inia' li' ka yeni ben',

na' wi'a dill' che yog' diika' chonleno' yel' wak choo

yel' wak xen cho'na'.

⁸ Chios cha', le chakid' lill xlatjo'na' gana' zo',

latja' gana' chle'i ben'ka' ka nak balaan xen cho'na'.

⁹ Bi wsi wchogo' yel' mban cha'ni txen kon che ben' saaxyaka',

na' bi wi'o latj guet' ka chet ben' wen xyaka',

¹⁰ ben'ka' shinchizozu chonlen ni'a neeka' dii mala',

na' chkaagake' bi dii chshabi ben' legake' kwenche

gongake' daa bi chiya! gongake'.

¹¹ San nad' do yichj do lallaa nsa' cha' wen lawo'na';

bisla nad' na' biyesh'lallii nad'.

¹² Toshiizi zoachech' chon' daa nak wen.

We'lawaa Chioza' ladj ben'ka' chdop chillag choe'la'ogake'ne'.

Salmo 27

¹ Xancho Chioza' nake' beeni' cha',

na' chisle' nad' lao bittez dii nxoll,

daan, kono gall illeb'.

Xancho Chioza' chkwash' chkweeje' yel' mban cha'ni,

daan, kono gak wwall wsheb nad'.

² Kat' chbiadi'a ben'ka' chakzi' chakzbani nad'

axt shel' dii wxegakile' guet',

lelgake' chidobgakile'n.

³La'kzi ben' zan wal gal' kwe'nogake' nad',
 bi gall illebkz'.
 La'kzi zaakgake' tiḷ-lengake' nad',
 bibi dii nxoll koo yichj'.

⁴Stozə dii chḡabid' Chioza', na' ḷennan' lialallaa:
 soa' ḷoo lill xlatje'na' shnon mban',
 kwenche we'lawaane'
 na' wwia' ka mbalaz nake'.

⁵Llana' zaak diika' wtiḷ',
 Chios cha'na' wkwash' wkweeje' nad' ḷoo lill
 xlatje'na', gana' zoe'.
 Na' wzoe' nad' ka to lo yaj sib wal gana' kono gak bi goni nad'.
⁶Na' gontip goncheche' nad' lao ben'ka' chinaḷ' chino nad'.
 Na' lesh' lill xlatje'na' wit' bayix'ka' we'lawaane',
 na' axt gosya'id' daa ḷe chibaid' na' goḷ inia'ne'.

⁷Bzenaggach, Chios cha', dga nia' li'.
 ḷBiyesh'lallii nad' na' bengach daa chḡabid' li'!

⁸Lall'dawaani nan:

“Biyilj Chioza'.”

Na' lin' yiyilj', Chios cha'.

⁹Bi wllonilo' nad' yeḷ' goklen cho'na'.

Bi choonlalloo nad' daa chshaa li',

ḷa' li'chgan chakleno' nad'.

Bi wsanlalloo nad' ni bi kwej yichjo' nad',

Chios cha', ḷa' lin' yislo' nad'.

¹⁰La'kzi xaxḡa'na' choonlall'gake' nad',

lin' gak lall' noo nad', Chios cha'.

¹¹Bli'gachi nad' nez cho'na', Chios cha'.

Wloogach nad' lo nez ḷi cho'na',

daa lle' lla' ben' chakzi' chakzbani nad'.

¹²Bi we'gacho' latj gongakile' nad' daa nazan chegake';

ḷa' ba bshag ḷjwellgake' chyiljall'gake' bizə chon

chnagake' cha',

na' cheengakile' gongakile' nad' zibia'.

¹³Nakla ba gok cha' sheḷ' ki nxenlallaa gakleno'

nad' shnon mban'.

¹⁴ḷBxenilalloo Xancho Chioza'!

¡Gok wal na' btip lalloo!
 ¡Bx̄enilalloo X̄ancho Chioza'!

Salmo 28

¹ Chios ɕha', ch̄nabid' li' gakeno' nad'
 daa nako' ka to yaj xen daa chkweej nad'.
 Bzenaggach dga nia' li'.

L̄a' shi bi wzenago' ɕha',
 wdekz ɕha' nadaan, shi n̄aa, na' ba nakten yiyaa
 ladj ben' wetka'.

² Bzenaggach ɕha' kat' chat'yoid' li' gakeno' nad'
 na' ch̄lis na'na' chwia' ka de gana' zoalə lill x̄latjo'na'
 choe'l̄will' li'.

³ Bi wsi wɕhogo' ye! mban ɕha'ni txen kon ɕhe ben' saaxyaka',
 ben'ka' chon dii mala'.

L̄egake' chonzgake' ka choe'len ben' dill' goll-lall',
 per loo yich̄jlall'do'eka' chza'lall'gake' gongake' mal ɕhegake'.

⁴ Bengach ɕhegake' kon ka nak daa bengake';
 be'gake' daa chido!gake' kon ka nak dii malka'
 benlen n̄i'a neeka'.

Bsak'zi'gachgake' kwas̄lo! kon ka chido!gake'.

⁵ Daa bi ngoo yich̄jgake' diika' chon X̄ancho Chioza',
 ni diika' bx̄e bsile' kon n̄i'a neena',
 lekze' wliayee l̄egake' na' bichga yillia yilengake'.

⁶ ¡Choe'lawaa X̄ancho Chioza',
 daa bzenague' diika' w̄nabidee!

⁷ X̄ancho Chioza' nape' ye! wak na' chkweeje' nad'
 lao bittezə dii nxoll;

len' n̄xenilallaa do yich̄j do lallaa na' lekzen' chaklene' nad'.
 Na' ni ɕheyinnan' chibayi lall'dawaani, na' go! in̄ia'ne'.

⁸ X̄ancho Chioza' nape' ye! wak na' chaklene'
 ben'ka' nak yell ɕhe';

na' zaklebile' to yoo dii nakɕheɕ ga chkwash' ben'
 kwenɕhe kono bi goni le', na' chkweeje' beena'
 nzoe' ch̄nabia' na' chisle'ne'.

⁹ Bislagach ben'ka' nak yell ɕho', Chios ɕha',
 na' benleeygachgake'.

Wdap bwiagachgake', ka chon beena' chap chwia xil'ka',
na' goklengachgake' toshiizi.

Salmo 29

¹Li we'la'o Xancho Chioza', le' nakle anjl che',
li we' dill' che' daa nake' ben' zakii, na' nape' yel'
wak choo yel' wak xen.

²Li koo Xancho Chioza' balaanna' chidolee.
Li we'la'o Xancho Chioza' loo lill xlatje'na' gana'
nak mbalaz nleb.

³Ka chne Xancho Chioza' chiyoo be lo nido'na';
na' axt chashj chtin lawinna' ka chne Chioza', beena'
nak ben' choo ben' xen.

⁴Ka chne Xancho Chioza' axt chnin,
na' chli'n yel' wak choo yel' wak xen che'na'.

⁵Ka chne Xancho Chioza' axt choxj chtin yag xenka',
na' chashj chlaa yag cedroka' lle' gana' mbani Líbanona'.

⁶Na' chta chnibe' yaaka' lle' gana' mbani Líbanona'
na' Yaa Siriónna',
na' chxit'gakan ka chxit' to me'do', na' ka to goon chbando'.

⁷Ka chne Xancho Chioza' axt chak ka ga chaz yi' wziw'.

⁸Ka chne Xancho Chioza' axt chxo' chnib gana'
bibí chashj chleb.

Xancho Chioza' chone' ka chxo' chnib yell-lío che'
Cádeza' gana' bibí chashj chleb.

⁹Ka chne Xancho Chioza' axt chyok chlew yag zilljka',
na' chdesh chloa gana' lle' lla' yagka'.

Na' lill xlatje'na' gana' zoe', yog'lolzə ben'
chgoogake'ne' balaan.

¹⁰Xancho Chioza' ngoo lall' nee nis yeja',
na' zoe' chnabi'e toshiizi.

¹¹Xancho Chioza' chone' wal ben'ka' nak yell che',
na' lekze' gonleeye' legake' kwenche soagake' mbalaz.

Salmo 30

¹Choe'lawaa li', Chios cha', la' lin' ba bislo' nad',
na' bi bi'o cho'a xba ben'ka' chakzi' chakzbani nad'.

² Chios ɕha', wɔnabid' li' gakleno' nad'
na' bizo' nad' shi'a shao'.

³ Chios ɕha', bislo' nad' lao yel' wita',
na' biyono' yel' mban ɕha' sto shii kwenɕhe bi billin'
gana' lle' ben' wetka'.

⁴ Li goɭ ine Xancho Chioza', le' nakle lall' nee.
Li we'la'o beena' nak dowalj ben' li ben' shao'.

⁵ La' toldezə te yel' chllaa ɕhe'na',
san yel' goklen ɕhe'na' zoalenan cho' shnon mbancho.
La'kzi do yel' kwi'a kwell',
ka sheeni' llana' sto yiba yizakid'.

⁶ Ka wzoa' mbalaz, na' wnia':
"Bibi de dii wwall wsheban nad'."

⁷ La' li', Chios ɕha', kon yel' goklen ɕho'na'
bzoaɕheɕho' nad' ka to yaa xen daa kono gak wxiz wta.
Per ka gokid' ba wlej yichjo' nad', gokshejlallaa.

⁸ Chɔnabid' li' gakleno' nad', Chios ɕha',
na' chat'yoid' li' yiyesh'lallilo' nad'.

⁹ ¿Bitgui de gono' gan shi guet'
na' wletjgake' nad' loo bana'?
¿Awak we'lawaa li' kat' ba biyak' bishte yell-lio?
¿Awak we' bishtena' dill' daa chontio' diika' chɕhebo'?
¹⁰ Bzenaggach ɕha', Chios ɕha', na' biyesh'lallii nad'.
Goklengach nad', Chios ɕha'.

¹¹ Ba bishoo yel' chakyeshii ɕha'na'
na' ba biyono'n to yel' chiba chizaki.
Ba bikwaso' lech' zeshaa gokw' llaka' gokyeshid',
na' ba biwako' nad' lech' wenna' daa chli'n zoa mbalaz.

¹² Daan, goɭ inia' li', Chios ɕha',
na' biga zoa to lla ki goɭ inia' li'.
Chios ɕha', toshiizi we'lawaa li'.

Salmo 31

¹ Chios ɕha', lin' nɕenilallaa;
biga wi'o latj si'a yel' zto'.
Bislagach nad', daa nako' ben' li ben' shao'.

²Bzenaggach cha', na' bi shailo' yislo' nad'.
 Bkwash' bkweejgach nad' na' bisla nad'
 la' li' nako' ka to yaj xen dii chkwash' chkweejan ben',
 na' ka to yoo dii nak chech ga kono gak sho' bi goni le'.
³Lin' zaklebilo' to yaj xen dii chkwash' chkweejan nad',
 na' ka to yoo dii nak chech ga kono gak sho' bi goni nad'.

Wloogach nad' lo nez li cho'na' na' wdap bwiagach nad'
 kwenche shoo balaan.

⁴Bislagach nad' lawi daa ba ngoo ben' malka'
 xnezin gongake' cha',
 la' lin' chap chwio' nad'.
⁵Chon' kwin' lall' no', Chios cha'.
 Bislagach nad', daa chono' kon ka ba bchebo'.

⁶Le chakzbanid' ben'ka' nxenilall'gake' diika' noni chios
 chegake', diika' bibi chak gon,
 san nad' nxenilallaa li', Chios cha'.

⁷Chiba chizakid' daa chiyesh'lallilo' nad',
 la' nezilo' bi chak wen cha'
 na' chakbe'ilo' ka nyesh' zoa yichjlall'dawaani.
⁸Bi bi'o latj gak' lall' na' ben'ka' chakzi' chakzbani nad',
 san bislo' nad' lao dii nxollka'.

⁹Biyesh'lall'gachi nad', Chios cha',
 la' le chakshejlallaa ni cheyi diika' chen chle'id'.
 Axt ba chde che jalaw'ki daa le chbell',
 na' do ka naktia' bi zoa wen.

¹⁰Zeidozi chde cha' daa toshiizi chibanid'
 ni cheyi diika' chen chle'id'.
 Na' ba chsis' daa le chakyeshid',
 na' axt llitki yo'a ba chde chegakin.

¹¹Ben'ka' chakzi' chakzbani nad' chle'gakile' nad' ka nozə,
 na' axt zi'techlə chle'i ben' wlill cha'ka' nad'.
Ben'ka' nombia' nad' axt chall chllebgake' chle'gakile' nad'.
 Na' yog' ben' chze cho'a chze lawe'ka chle'gakile' nad' tneza'.

¹²Ba gol-lall'gake' nad' ka chal-lall'gake' to ben' ba wit;
 na' chle'gakile' nad' ka to xwag dii ba chi'beb.

¹³Na' chiyenid' daa chnegake' cha',
 na' ngoosheban nad' gattezə chechj chda'.

Na' nshagui ljwellgake' chgoogake' x̄nezin wsi
w̄choggake' yel' mban ̄cha'ni.

¹⁴Per nad' n̄xenilallaa li', Chios ̄cha',
na' nia': "Lin' nako' Chios ̄cha'."

¹⁵Lo n̄i'a noona' zoa yel' mban ̄cha'ni.
Bislagach nad' lo n̄i'a na' beṅ'ka' chakzi' chakzbangakile'
nad' na' chinogake' nad'.

¹⁶Ble'shiigachi nad',
na' bislagach nad' daa nako' beṅ' chiyesh'lallii.

¹⁷Chios ̄cha', bi wi'o latj si'a yel' zto',
la' ba w̄nabid' li' gakleno' nad'.

San beṅ' malkan' si'shagake' yel' zto',
na' yillingake' gana' lle' beṅ' wetka'
gana' bich yida ȳnegake'.

¹⁸Yidakwshga cho'a loll' beṅ' wxiye'ka',
beṅ'ka' nak beṅ' cha'sib
na' chbell ch̄negake' zibia' ̄che beṅ' li beṅ' shao'ka'.

¹⁹Dii choo dii xen nak yel' wen ̄cho'na' daa ngooshawoo
̄che beṅ'ka' chall chlleb li',

na' chwiate beṅ' choon beṅ'ka' n̄xenilall'gake' li'.

²⁰Daa zoaleno' legake' chkwashoo legake'
kwen̄che kono bi goni legake',
na' chkweejo' legake' lao beṅ'ka' chbell ch̄ne ̄chegake'.

²¹Choe'lawaa Chios ̄cha'na',
daa le chakile' nad' na' dii xen dii ba goklene' nad'
llana' wllagdia' yel' zak'zi'ka' nad'.

²²Kana' gokshejlallaa wnia':
"Ba wlej yichjo' nad'";
Per li' bzenago' ka w̄nabid' li' gakleno' nad'.

²³Li gaki X̄ancho Chioza', yog'le le' nakle lall' nee.
Le' chap chwie' beṅ'ka' n̄xenilallii le' do yichj do lall'gake',
san beṅ' cha'sibka', wsak'zi'e legake' kon ka chiyal'
gak ̄chegake'.

²⁴Li gondiplall' na' li' gak wal
yog'le le' nonle lez X̄ancho Chioza'.

Salmo 32

¹ Chakomba beena' ba biyakxen xtoleena',
na' ba biyol binit saaxya che'na'.

² Chakomba beena' ina Xancho Chioza' bichbi xtolee de,
beena' bibi yel' wxiye' yoo loo yichjlall'do'ena'.

³ Shlak bi bixoadola saaxyaka' ben',
beli chen cha'ni zejch bsisan
daa wchellyeshaa toshiizi.

⁴ La' ka wal' ka tella bdio' nad' lo yel' zak'zi'na'.
Na' zejch bsis', gok cha' ka chak che yejdo'na'
chkwedan lo bana'.

⁵ Na'ch bixoadola lawo'na' saaxyaka' ben',
na' ni ton bi bkwashid' li'.
La' wnia': "Yixoadola lao Chioza' saaxyaka' ben'."
Na' li', bizi'xeno' saaxya cha'ka'.

⁶ Daan, ben'ka' nonlilall'gake' li',
we'llwillgake' li' shlak ni de latj yiyiljgake' li';
na' la'kzi ka to yao xen iyalj diika' wtilgake'
aga bi gonin legake'.

⁷ Lin' nako' ka to latj ga sho'a kwenche kono bi goni nad';
na' chkwash' chkweejo' nad' lao bittezə dii nxoll,
na' go! inia' li' daa chislo' nad'.

⁸ Xancho Chioza' ne':
"Nad' wzajniid' li',
na' wliid' li' neza' daa chiya! sho';
na' we'len' li' dill' daa chiya! gono',
na' gap wwia' li'.

⁹ Bi gono' ka chon kabaya' wa bllin'na', baka' bi nteyi;
baka' chonan byen kwee docho'ab
kwenche gak koyoe'b."

¹⁰ Ben' malka' dii zan yel' zi' yen ile'gakile',
san yel' chiyesh'lallii che Xancho Chioza'
zoalenan ben'ka' nxenilall' le'.

¹¹ Li yiba yizaki lao Xancho Chioza'
ka le' nakle ben' li ben' shao'.

Na' le' ngooshlilall'le,
li gol ine daa chiba chizakile.

Salmo 33

¹ Li yibayi, li gol ine Xancho Chioza', ka le' nakle
ben' li ben' shao',
la' lannan' chido!le gonle, le' zoale do yichj do lall'le.
² Li we'la'o Xancho Chioza', li gol inie',
na' li wchin diika' llia kwerd cheyin.
³ Li gol to dii kob kat' gol inelene'.
Li wsill diika' xochi axt ga zeelo chakle kat' gol inelene'.

⁴ Cho'a xtill' Xancho Chioza' nakan dii licha,
na' diika' chone' chli'gakan chone' ka nchebe' gone'.
⁵ Xancho Chioza' chazlallee daa nak wen na' daa nak dii licha;
na' doxen lo yell-lioni chli'lao yel' chaki che'na'.
⁶ To ka wnezə Xancho Chioza', wya' wbin yabana',
na' bishbe che'na' benan ka wya' wbin beljdo'ka'.
⁷ Le' nllie' nisdona' tozga,
ka ben' ngaashawaan.

⁸ Li gall illeb Xancho Chioza', le' lle'le doxen lo yell-lioni;
yog'lol-le lle'le lo yell-lioni, li kwee balaan.
⁹ Ka wnie', na' wxw wzil yog'lolte.
Bene' mandad gakkakan, na' wya' wbingakan.

¹⁰ Xancho Chioza' bi cho'e latj gak
ka ba yoo xnezi gon ben'ka' bi nxenilall' le'.
¹¹ San yog' diika' ngoo Xancho Chioza' xnezin, bi
te bi gakkakan.
¹² Chakomba ben'ka' lle' yella' gana' nonlilall'gake'
Xancho Chioza',
ben'ka' ba wleje' gaggake' lall' nee.

¹³ Xancho Chioza' zoe' yabana'
na' chwie' yog'lol ben' yell-lioki.
¹⁴ Na' gana' llie' chnabi'e
chwie' nak chon ben'ki lle' lo yell-lioni.
¹⁵ Len' bxe bsile' yichjlall'do'eka',
na' nez nle'ile' yog'lol bin chongake'.

- 16 Ben' wṇabia'na', aga daa nape' ben' zan wen wdilkan'
gone' gan lao ben'ka' chdil-lene',
na' ni ben' walka', aga wilagake' ni che yel' wal che'ka'.
17 Na' aga ni che daa lliagake' koll' kabaykan' yilagake',
la' aga wzaki kabayka' yislagakb legake' la'kzi nakgakb ba wal.
- 18 Per Xancho Chioza' toshiizi chap chwie' ben'ka'
chall chlleb le'
na' nongake' lez yel' chaki che'na',
19 na' chisle' legake' lao yel' wita',
na' we'che' yel' mban chegake' la'kzi chi' wbinna'.
- 20 Cho' nṅenilall'cho Xancho Chioza',
beena' chaklene' cho' na' chkwash' chkweeje' cho'
lao bittez dii nxoll.
- 21 Do yichj do lall'cho yiba yizakicho daa nombia'cho
Xancho Chioza',
la' nṅenilall'cho beena' nak dowalj ben' li ben' shao'.
22 Yel' chiyesh'lallii cho'na' soalengachan neto', Chios cha',
kon ka nonnto' lez gono'.

Salmo 34

- 1 Toshiizi we'lawaa Xancho Chioza',
na' toshiizi gol inia'ne' kon cho'a lollaani.
2 Wi'a dill' ka ben' wen nak Xancho Chioza',
na' yeni ben'ka' kono zoa gaklen legake' na' yiba yizakgakile'.
3 Li da, gakcho toz we'la'ocho Xancho Chioza',
na' we'cho dill' ka ben' choo ben' xen nake'.
- 4 Wṇabid' Xancho Chioza' gaklene' nad', na' bzenague' cha',
na' bisle' nad' lao yog'loḷ diika' chall chlleb'.
5 Ben'ka' nṅenilall' Xancho Chioza' dii xen chiba chizak'gakile',
na' biga igaangake' yel' zto'.
6 Nad' ka bi gok wen cha', wṇab' to yel' goklen lao
Xancho Chioza' na' bzenague' cha',
na' bisle' nad' lao yog'loḷ diika' gok cha'.
7 Anjl che Xancho Chioza' chkweeje' ben'ka' chall chlleb
le' na' chisle' legake'.
8 Li wnix wllia ka nak Xancho Chioza',
na' gakbe'ile ka ben' wen nake'.

¡Chakomba beena' n̄x̄nilalleene'!

⁹Li gall illeb X̄ancho Chioza', le' nakle lall' nee,
la' aga bi chyalj ch̄chini ben'ka' chall chleeb le'.

¹⁰Bellka' chbīl chdongakb daa bi chleel dii gaogakb,
san ben'ka' ch̄n̄abgake' ye! goklen che X̄ancho Chioza'
aga bi iyallj ichingakile'.

¹¹Li da, xīndawaa, na' li wzenag dga in̄ia' le',
na' wli' wsedid' le' gall illeble X̄ancho Chioza'.

¹²Beena' cheeni idie' lo yell-lioni na' gakte wen che',

¹³Chiyal' wsakee kwell in̄ie',
na' bi wi'e latj ichej dill' wxiye' cho'a lolleena'.

¹⁴Chiyal' yilaalawee dii mala',
na' gone' daa nak wen.

Chiyal' sie' w̄neyi soalene' ben' mbalaz.

¹⁵X̄ancho Chioza' chap chwie' ben'ka' nak ben' li ben' shao',
na' chzenague' kat' ch̄n̄abgake' ye! goklen che'na'.

¹⁶Per bi chle'shiile' ben'ka' chon mal,
san chsol ch̄nite' legake' yell-lioni.

¹⁷X̄ancho Chioza' chzenague' kat' ben'ka' nak ben' li ben'
shao' ch̄n̄abgake' ye! goklen che'na',

na' chisle' legake' lao yog'lo! diika' chak chegake'.

¹⁸X̄ancho Chioza' zoalene' ben'ka' chakyeshii,
ben'ka' bich nongake' lez gak wen chegake',
na' chisle' legake' lawi daa chak chegake'.

¹⁹La'kzi dii zan dii chen chle'i beena' nak ben' li ben' shao',
X̄ancho Chioza' chisle'ne' ladj yog' diika' chak che'.

²⁰Chap chwie' do ka nake',
na' bi gaile' bi gaki.

²¹Ben' malka', chbiayi'gake' ye! wen dii mal che'ka';
na' ben'ka' chakzi' chakzbani ben'ka' nak ben' li ben' shao',
w̄chogbia' Chioza' chegake' tegake' lo ye! zak'zi'na'.

²²Per X̄ancho Chioza' chisle' ben'ka' chon ka cheenile',
na' w̄chogbi'e bibi ye! zak'zi' tegake' daa n̄x̄enilall'gake'ne'.

Salmo 35

¹Chios cha', wzoshiyigach ben'ka' cheeni wit nad';
wdīl-lengach ben'ka' chdīl-len nad'.

²Bex'gach daa wkweejilo' nad' lo wdila'
na' da, gakleno' nad'.

³Bex'gach yana' ntosh' lawinna'
na' btilgach ben'ka' chino nad'.
Wnagach nad' nan li'kzan yislo' nad'.

⁴Ben'ka' cheeni witgake' nad'
si'shgagake' yel' zto' na' gakklej gakangakile';
ben'ka' cheeni wlliyi' nad' yiyi yidogakile'
na' yixonjdogake'.

⁵Gakshga chegake' ka yix beba' daa choa' be'na',
na' anjl che Xancho Chioza' wlagdoe' legake'.

⁶Gakshga xneze'ka' shgasj shchol' na' kwil
sa'shgagake' lawinna',
na' wlagdo anjl che Xancho Chioza' legake'.

⁷La'kzi aga bi ben' chegake' chgoogake' xnezin
gongake' mal cha',
na' wdengake' to yech gana' cheengakile' ixop'.

⁸Kwiayi'shgagake' tokonganzi!
Ixopshgagake' loo yecha' wdengake' daa nan senan nad',
na' kwiayi'tegake'.

⁹Na'ch yiba yizakid' lao Xancho Chioza'
daa ba bisle' nad' lawe'ka'.

¹⁰Do yichj do lallaa inia':
"Kochno zoa sto ka li', Chios cha'."
La' lin' chislo' ben' yesh'ka', ben'ka' chyallj chchini
lo ni'a na' ben'ka' chchi' chsak' legake', ben'ka' chzi'
chkaa bi de chegake'.

¹¹Chas chda ben' wxiye'ka' chyilj chzangake' cho'a xtilaa,
na' chtobgakile' nad' dii bi nak ka'.

¹²Lwaayi dii nan yiyongakile' nad' wen ka ba ben'
chegake', chchi' chsak'ləgake' nad',
na' le chakyeshid' daa chongakile' nad' ka'.

¹³Kana' bi shao'gake', nad' gokyeshid'
na' gokw' lech' zesh'ka' daa chli'n chakyeshid' na' wzoa' wbas',
na' loo yichjllalldawaani be'lwill' Chioza' ni chegake'.

¹⁴Wzoa' nyesh' na' bibi wnan gon',
gok cha' ka inacho xna'nan' wit,
wa to ben' nllaguid', wa to ben' bishaan.

15 San legake', ka ble'gakile' bi chak wen cha',
na' gokgake' toz bibagakile'.
Bengakile' nad' ka ben' zit' ben' bi nombia'gake',
na' toshiizi bzoazi'yaagake' nad'.

16 Bsa'zi'gake' nad' na' btitjgakile' nad',
na' axt chaoyaaxaxj leye'ka' chwiazi'yaagake' nad'.

17 Chios cha', zi ka'k' si'xeno' na' wwiazo' ka chak cha'?
Bislagach nad' lo ni'a na' ben'ki nak ka bell znia
kwenche bi witgake' nad'.

18 Na' gon' li' ye' choxken lao lkwe' ben' be ben'
zilka' choe'la'o li'.
Na' we'lawa li' ladje'ka'.

19 Bi wi'o cho'a xba ben'ka' chakzi' chakzbani nad', ben'ka'
chwiyi nad' la'kzi bibi ben' chegake'.
Bat wxillgakile' nad'.

20 La' legake' bi cheengakile' no soalengake' mbalaz,
san choe'gake' dill' wxiye' che ben'ka' bi nak wishagdil.

21 Kadezi chxa' cho'eka' chnegake' cha', nagake':
"Asi naa, ba ble'teinto' ka bene'."

22 Li'kz nez nle'ilo' dga chak cha', Chios cha',
na' bi soagacho' llizə.
Chios cha', bi wkwaano' nad' toz'.

23 Chios cha', bwiagach ka chak cha', na' goklengach
nad', la' lin' nako' Xan'.

Wzoagach cha' na' bengach ye' joschis cha'.

24 Chios cha', li' nako' Xan',
be'gach dill' bibi xto'laa de daa nako' ben' li ben' shao'.
Bi wi'o latj wxillzgakile' nad'.

25 Bi wi'o latj sa'lall'gake' cha', inagake':
"Bachga gok che' ka cheeninto'.
Bachga bsol bnitnto' le'."

26 Yog' ben'ka' chiba chizaki bin chak cha', si'shgagake'
ye' zto' na' gakklej gakangakile',
na' axt ga zeelo yiyii yido'shgagakile'
daa chon kwingake' ben' choo ben' xen lawa'ni.

27 Na' yiba yizakshgayi ben'ka' nongake' nad' txen,
na' axt gosyaayigake' daa le chibagakile' ben' gan.

Na' toshiizi inagake':
 "Sho'shga Xancho Chioza' balaan,
 beena' chazlall' gak wen che beena' chon ka cheenile'."
 28 Na' wi'a dill' nako' ben' li ben' shao';
 na' toshiizi we'lawaa li'.

Salmo 36

1 Loo yichjlall'do' ben' mala' chza'lallee gone' dii mala'.
 Na' bi chall chllebe' gon Chioza' xya che'.
 2 Na' daa chle'i kwine' ben' wen,
 bi chakbe'ile' chone' dii mala' ni bi chakzbanile'n.
 3 Na' cho'a dill' che'na' nakan dill' wxiye' na' dii bi yejni'alallii,
 na' bich nteyile' ni bich chone' daa nak wen.
 4 Kat' die' lo daa lo blag che'na' chyiljlallee naklə sho'
 xnezi dii mala' chza'lallee;
 na' daa toshiizi yoon yichje', bikzə chichejlalleen.
 5 Per yel' chaki cho'na', Chios cha', nakan dii xen wal inleeb ka
 yabana' daa bi nakbia' gate chiyoll chido;
 na' toshiizi chono' yog' diika' chchebo'.
 6 Na' yel' li yel' shao' cho'na' nakan dii xen wal
 ka yaa yelka' diika' zeelo nak dii xen.
 Na' yel' sinna' daa napo' kwenche chchogbi'o che
 ben' nakan dii xen inleeb,
 ka niso'na' daa nak dii xen na' zitjan nall inleeb.
 Chios cha', li' chap chwio' ben' yell-lioni na' yog' bayix'do'.
 7 Le mbalaz inleeb nak yel' chaki cho'na', Chios cha'
 Ka chon bado'ka' chkwash'gakb xan xil xna'bka',
 kan' chon ben' yell-lioki nongake' li' lez gap wwio' legake'.
 8 Na' nesh neljgakile' daa chono' chochj chlalj
 daa choe'gako'ne'.
 Na' dii wen dii shao' cho'na' nakan ka to yao xen dii
 cheejgake' na' nis cheyinna' nakan zix sia.
 9 La' li' choo yel' mban che yog'lol' dii yoo bishbe,
 na' beeni' cho'na' chzeeni'n lo yel' mban chento'ni.
 10 Bli'gachi yel' chiyesh'lallii cho'na' na' yel' li yel' shao'
 cho'na' ben'ka' nombia' li' na' ngooshlilall'gake'.
 11 Bi wi'o latj wlej wshoshj ben' cha'sibka' nad',
 ni bi goni ben' malka' nad' ka to cheengakile'.

¹²Li wwiakachi ka ba gok che ben' malka',
ba wliayi'gake' na' bichga yillia yilengake'.

Salmo 37

¹Bi illaa yichjo' ni cheyi daa chon ben' malka',
ni bi ino' le wen chak chegake'.

²La' shlollzan soagake', ka chak che yixa',
na' chde chegake' ka chak che to yix' kwan daa chkwed.

³Bxenilaloo Xancho Chioza' na' ben dii wenna'.
Wzoa lo yell-lioni dga bchebe' gone' checho na'
ben ka cheenile'.

⁴Biba bizaki daa nombi'o Xancho Chioza',
na' le' gone' ka gak diika' zelaloo.

⁵Ben lall' na' Xancho Chioza' yel' mban cho'na'.
Bxenilallee, na' le'kze' gaklene' li'.

⁶Na' gone' ka wli'lao yel' ben' li ben' shao' cho'na'
ka beeni' che wbilldo'na' kat' chna'titan.

⁷Wdap yel' chxenlall'
na' ben lez Xancho Chioza' gaklene' li'.
Bi illaa yichjo' daa chak wen che ben'ka'
chgoo xnezin gongake' dii mala'.

⁸Bi wi'o latj shep chaz yel' chllaa chlok cho'na'
ni che ben' malka',

la' shi ka' gono', le nxoll gono' to dii mal.

⁹La' ben' malka' yiyol yinitgake',
san ben'ka' nxenilall' Xancho Chioza'
gaki chegake' yell-lioni.

¹⁰Aga chllach kochno ben' mal soa;
la'kzi tlaploł yiyiljgako'ne', kochno yen ile'ilo'.

¹¹San ben'ka' nak ben' gaxjlall' gaki chegake' yell-lioni,
na' soagake' mbalaz inleeb.

¹²Ben' mala' chgwee xnezin wzoazi'yee ben' li ben' shawaa,
na' kon chwiazi'yee'.

¹³Per Xancho Chioza' chxill-lile'ne'

daa nezile' ba zoa illin lla kwiayee.

14 Ben' malka' chniagakile' yesya che'ka' na' chkaadeejgake'
x̄is wix̄it' che'ka'

kwenche witgake' ben' yesh'do'ka' chyalj chchini,
na' ben'ka' nsa' cheyin wen.

15 Per yesya che'ka'tezə yiyitgakan legake',
na' x̄is wix̄it' che'ka' goxj itingakan.

16 Zoachlə ben' wenna' mbalazch la'kzi lat'zə dii de che',
aga ka ben' malka' nap yel' wni'ana'.

17 La' X̄ancho Chioza' wnitloe' yel' wak che ben' malka',
per gap wwie' ben' li ben' shao'ka'.

18 X̄ancho Chioza' chap chwie' ben'ka' zoa do yichj do lallin,
na' yell-lioni gakin chegake' toshiizi.

19 Aga wzi'gake' yel' zto' llana' zaak dii lalljka',
na' kat' kwe' wbinna', lekze' wzesh wzeljile' legake'.

20 San ben' malka', ben'ka' chakzi' chakzbangakile'
X̄ancho Chioza', yiyol yinitgake'.
Kwiayi'gake' ka yix bill, na' yinitlogake' ka llenna'.

21 Ben' mala' chjanabe' bi de che ben' na' bi chiyo'en;
san ben' wenna' nake' ben' chiyesh'lallii na'
chzanile' daa de che'.

22 Ben'ka' chonleey X̄ancho Chioza', gaki chegake' yell-lioni;
san ben'ka' chyishje' bia' blag' cheyin, kwiayi'gake'.

23 X̄ancho Chioza' chaklene' beena' nsa' cheyin wen,
na' chzoacheche'ne' lo nez wen che'na'.

24 Na' la'kzi lljachewee aga wgoone',
la' X̄ancho Chioza' noxee neena'.

25 Nad' gok bi' wew' na' naa ba nak ben' gol,
na' ni shlin biga ble'id' wsanlall' Chioza' ben' li ben' shawaa,
ni biga ble'id' xiine'ka' tazgake' inabgake' dii yeej gaogake'.

26 San tlizi chiyesh'lall'gakile' ben', na' chaklengake'
ben' chyalj chchini;
na' lekzka' xiine'ka' chaklengake' ben'.

27 Biḷaala'o dii mala' na' ben daa nak wen,
 na' toshiizi gaki cho' gani zo'.
 28 La' Xancho Chioza' chazlallee daa nak dii ḷicha,
 na' bi chbej yichje' ben'ka' chon ka cheenile'.
 Toshiizi gap wwie' ḷegake'.
 San chlliyee ben' malka', na' chsol chn̄ite' dia che'ka'.
 29 Ben' li ben' shao'ka' gaki chegake' yell-lioni,
 na' soagake' lawinna' toshiizi.

30 Ben' li ben' shawaa cho'e dill' ḷega ben' sin',
 na' cho'a ḷolleena' chchej daa nak dill' li.
 31 Loo yichjllal'do'ena' ngooshawee daa nllia Chios
che'na' bia' gone',
 na' biga wḷaalaween.

32 Ben' mala' chinaḷ' chinoe' ben' li ben' shawaa
 kwengche wite'ne';
 33 per Xancho Chioza' bi wi'e latj idil illague'ne',
 ni bi wi'e latj wtobgakile'ne' daa bi nak ka'.

34 Bx̄enilalloo Xancho Chioza', na' bzoa xtilleena',
 na' kwee li' balaan na' gaki cho' yell-lioni gani zo'.
 Na' ile'teilo' kat' kwiayi' ben' malka'.

35 Ba ble'id' ben' mala', beena' naklikzə ben' cha'sib,
 na' ḷa'kzi wlejlawe' ka chbejlao to yag xen dii
 lliachga xoz' xka'in,
 36 xtitchga wzeyi che' na' biyol binite';
 na' biyiljee, na' bich billelidee.

37 Li gakbe'i ka gak che beena' zoa do yichj do lallee
 na' nake' ben' li ben' shao',
 ḷa' ḷe wen gak che' daa zoalene' ben' mbalaz.

38 San yog' ben' malka', ben'ka' chx̄inj chḷen, kwiayi'gake'
 na' yiyl yinitgake'.

39 Xancho Chioza' chaklene' ben' li ben' shao'ka',
 na' chkweeje' ḷegake' lao dii lalljka'.
 40 Xancho Chioza' chaklene' ḷegake' na' chisle' ḷegake'.
 Chisle' ḷegake' lo n̄i'a na' ben' malka'
 daa n̄xenlall'gake' gap wwie' ḷegake'.

Salmo 38

¹ Chios cha', bi wsheshlengacho' nad' lo yel' chllaa cho'na'
ni bi wsak'zi'gacho' nad' daa bshaa li'.

² Yel' zak'zi'ka' bse_loo lawa' gokan ka xiska' chchoon xis
wix_itaa, diika' chaz zibia';

na' dii wal ba bzoazi'yoo nad'.

³ Daa le chlloo nad' bikzə gayid' zoa' shi'a shao',
na' do ka naktia' bi zoa wen daa bxinj blen' lawo'na'.

⁴ Dii malka' ba ben' ba bidop billaggakan lawii;
na' naggakan to dii zii zshab dii bi so sakid'.

⁵ Daa bi bzenag' cho',
we'ka' llia beli chen cha'ni ba chalj chleban.

⁶ Toshiizi zoa' nyesh',
bikz bi nan gon' na' bikz zoa' yell-lío.

⁷ Loo lsinaani chey chlachgan,
na' bikzə gayid' zoa' shi'a shao'.

⁸ Dii wal inleeb ba bsis' na' nashj noxjchga';
na' chbellyeshaa daa chjeli loo yichjlall'dawaani.

⁹ Chios cha', li' nez nle'ilo' daa chzelallaa,
na' aga ngashilo' dga chak cha'.

¹⁰ Nall inleeb chxit' chda lall'dawaani,
na' ba chiyoll chido chde cha',
na' axt jalaw'ki ba chde chegakin.

¹¹ Ben'ka' nllaguid' ba wchoonlall'gake' nad' ni che
yillwe' dga che'id';

ni ben' dialla cha'ka' bi chidwiagake' nad'.

¹² Ben'ka' cheeni guet' chiyiljlall'gake' nak gongake'
wzapgake' nad'.

Ben'ka' china' chino nad' chgoogake' xnezin nak
gak wlliaiyi'gake' nad',
na' bi chbe'lligake' chiyiljlall'gake' naklə gongake'
witgake' nad'.

¹³ Per chon' ka beena' bi cheni
na' bi chzenag' dill'ka' choe'gake';
chon' ka beena' bi chak ine,
na' bi chilli'a xtilleeka'.

¹⁴ Chak cha' ka chak che beena' bi cheni,
ni bi chak yilli'e dill'.

¹⁵ Lin', Chios ɕha', non' lez gakleno' nad',
na' lin', yilli'o xtilleeka'.

¹⁶ Toz dii ɕn̄abid' li': "Bi wi'o latj wxillgakile' nad',
ni bi yiba yizakgakile' shi ba gok mal ɕha'."

¹⁷ Ba zoa yiyoll yido bishbe ɕha'ni,
na' ni zi' shloll bich chbez daa chey chla'.

¹⁸ Yiɕoadoɭaa saaxya ɕha'ka',
daa chao chdiagakan nad'.

¹⁹ Ba wyanlikzə beŋ'ka' chakzi' chakzbani nad'.
Beŋ' zan chwiyi nad' la'kzi aga bi ben' ɕhegake'.

²⁰ Lwaayi dii nan yiyongakile' nad' wen ka ba ben'
ɕhegake', chɕhi' chsak'ləgake' nad',
na' ɕn̄it chdeləgake' nad' daa cheenid' gon' daa nak wen.

²¹ Chios ɕha', bi ɕhoonlall'gacho' nad'.

Bi wlaala'ogacho' nad', Chios ɕha'.

²² Bi shagachilo' yidyakleno' nad', Chios ɕha',
la' lin' chislo' nad'.

Salmo 39

¹ Nad' wnia': "Gon' to dii byen wsa' ɕha' wen,
na' bi wx̄inj wlenlen' cho'a lollaani,
na' wsakaa bibi gon in̄ia' shlak cheɕhj chda beŋ'
malka' lawa'ni."

² Na' wzoa' llizə, bibi wnia',
ni dill' daa nak wen bi bi'a.

Per shlak bibi dill' bi'a zizikchli bi wzoa' wen.

³ Na' wdao bdian loo lall'dawaani.

Shlak zia'n wneyi, gokan ka to yi' xen loo lall'dawaani
na' benan byen wñeshaz' wnia':

⁴ "Chios ɕha', bzajni nad' aga toshiizin soa' lo yell-lioni,
kwenɕhe gakbe'id' yeɭ' mban ɕha'ni nakan de xtit shlollzə.

⁵ Nono' nad' to yeɭ' mban dii nak toldezə;
yizka' beŋo' iban', biz daa lawo'na'.

Dii liɕha, yeɭ' mban ɕhe beŋ' yell-lioni nakan ka to
be'lesdo' dii chde toldezə.

⁶ Yog'loɭ beŋ' yell-lioki nakgake' ka to xol dii chde toldezə;
na' bibi zjanayin chkwaa chti'agake' yeɭ' wni'a ɕhe'ka',

ni bi ne_zgakile' no yigaan_lengakan.

⁷Na' naa, Chios cha', bich bi de dii gon' lez.

Tozo' lin' ba non' lez.

⁸Bislagach nad' lao ye_l' zak'zi'na' nsa' saaxyaka' ba ben'.

Bi wi'o latj wxilli be_n'ka' bi nteyi nad'.

⁹“Wzoa' llizə, bibi wnia',

la' lin' chono' ka chzak'zi'a ni che saaxya cha'ka'.

¹⁰Bich wsak'zi'gacho' nad';

bich soid' ye_l' zak'zi' cho'na'.

¹¹Li' chzak'zi'o be_n' yell-lioni ni che saaxyaka' ba bene',

na' chlliyoo yog' daa le chakile',

ka chon be_l zidaa chlliyai'b bi dii ngooshao' be_n'.

Dii licha, ye_l' mban che be_n' yell-lioni nakan ka

be'lesa' chde toldezə.

¹²“Chios cha', bzenaggach naa choe'lwill' li',

bzenaggach daa chnab' ye_l' goklen cho'na'.

Bi gongacho' ka'z ye_l' chbellyesh' cha'ni.

La' ne_zzkzilo' toldezan zaa lo yell-lioni,

ka to be_n' zoa lall lill be_n' xtit shloll,

ka gok che dii be_n' gol cha'ka'.

¹³Bich illaagacho' nad', be'gach latj yiyakshao'lallaa

shlak naa bi_n' guet' na' bi_n' yiyol yinit' lo yell-lioni.”

Salmo 40

¹Wdap' ye_l' chxenlall' na' ben' lez Xancho Chioza',

na' bzenague' ka benyeshaa lawe'na'.

²Na' bisle' nad' kana' gok cha' ka be_n' bxop to loo yech

na' ka be_n' wyaz to loo guull' ga bich nak lez ye_l' mbanna'.

Na' bizoache_{che}' nad' ka to be_n' ze to lo yaj.

³Na' bxoe' cho'a lollaani to dii kob dii gol inia',

to dii we'lawid' Chios chechona'.

Be_n' zan ile'gakile' ka gol inia'ne' ni cheyi daa bene' cha',

na' koogake' balaan Xancho Chioza'

na' wxenilall'gake'ne'.

⁴Chakomba beena' nxenilallee Xancho Chioza',

na' bi chone' txen be_n'ka' chep cha'lall'

ni bi choe'lawee diika' bi nak dowalj chios.

⁵ Chios cha', ba beno' dii zan dii chon ka chibani ben',
na' diika' ngoo xnezin gono' chento'.

Aga wzakinto' we'nto' dill' lawo'na' che yog' daa
chono' chento'.

La'kzi cheenid' wi'a dill' cheyi diika' chono',
aga wiyān wi'a dill'.

⁶ Ka nak daa chit' bayix'ka' lawo'na',

na' daa chon' diika' chizi' chilap',

na' daa chzey' bayix'ka' lawo'na' ni che saaxya cha'ka',
aga lennan' chazlalloo,

san lliālotech wzenag' cho' na' gon' ka cheenilo'.

⁷ Na' nia': Ni zoa',

na' lee libra' cho'en dill' cha'.

⁸ Chazlalāa gon' ka cheenilo', Chios cha';

na' loo yichjlall'dawaani ngooshawāa ley cho'na'.

⁹ Ladj lkwe' ben' be ben' zilka' choe'la'o li' ba bi'a
dill' nako' ben' li ben' shao'.

¡Na' nezkzilo' bi wzoa' llizā, Chios cha!

¹⁰ Biga chsan' wi'a dill' nako' ben' li ben' shao'.

Ba bi'a dill' nako' ben' chon ka no'

na' nako' ben' chisla neto' lao dii mala'.

Na' ladj lkwe' ben' be ben' zilka' choe'la'o li';

toshiizi cho'a dill' nako' ben' chiyesh'lallii na' wak
wxenilall'nto' xtilloona'.

¹¹ Chios cha', bi wllonilo' nad' ye!! chiyesh'lallii cho'na'.

Ye!! chaki cho'na' na' dill' li cho'na' soalenshgagakan
nad' toshiizi.

¹² La' dii zan dii ba ben ble'id',

ni bich chbabid'gakan.

Dii malka' ba ben' nakgakan zii zshab na' ntakw
nchejgakan nad',

ni bich chak wlis yichjii ile'id' gana' zyaa.

Axt nyanchlōgakan aga ka yish' yichj'ki,

na' bich non' lez gak wen cha'.

¹³ Chios cha', ¡bislagach nad' lao diiki chak cha!

Bi shagachilo' yidyakleno' nad', Chios cha'.

¹⁴ Ben'ka' cheeni wsol wnitgake' ye!! mban cha'ni
si'gachgake' ye!! zto'.

Ben'ka' cheeni wlliyi' nad', bengach ka yixonjgake'
do chiyi chido'zgakile'.

¹⁵ Ben'ki chtitji nad' si'shgagake' ye! zto'.

¹⁶ Per yog' ben'ka' chiyilj li', yiba yizakshgagakile';
na' yog' ben'ka' cheengakile' yislagako'ne', toshiizi inagake':
“Ben' choo ben' xen nak Xancho Chioza'.”

¹⁷ La'kzi nak' ben' yesh', na' bi chak wen cha',
bi kwejyichjgacho' nad', Chios cha'.
Lin' chakleno' nad' na' chislo' nad';
bi sha'gachilo' gakleno' nad', Chios cha'.

Salmo 41

¹ Chakomba beena' yoo yichje' gaklene' ben' yesh'ka',
ben'ka' kono zoa gaklen legake',

la' kat' bi gak che' Chioza' yisle'ne'.

² Xancho Chioza' gap wwie'ne', na' wi'ene' ye! mban xen,
na' gone' ka soe' mbalaz lo yell-lioni.

Na' bi wi'e latj goni ben'ka' chakzi' chakzbangakile'ne'
kon daa nazan chegake'.

³ Xancho Chioza' gaklene'ne' kat' die' che'ile',
na' gone' ka yiyakshao'lallee.

⁴ Nad' wnia': “Chios cha', biyesh'lall'gachi nad'.
Bengach ka yisha'lallaa, la'kzi ba bxinj b!en' lawo'na'.”

⁵ Ben'ka' chakzi' chakzbani nad' chnegake' zban
cha' na' nagake':

“¿Batra guete', lla, na' kochno lljadini le'?”

⁶ Na' kat' chidwiagake' nad', aga do lall'gaken'
chshaljlengake' nad',

san kwenchez chnezgakile' bi chak wen chan'
na' chjadagake' gan yoblə chjaye'gake'n dill'.

⁷ Na' kat' chidi'a chillag ben'ka' chakzi' chakzbani nad'
che' ljwellgake' nan ni che dol' cha'nan' chzak'zi'a,
na' nagake':

⁸ “Yillwe'na' chake' nakan to yillwe' wal,
na' bich nak lez yiyakile'.”

⁹ Axt beena' wzoalen' wen, na' bxenilallaane',
na' weej wdaolentie' nad' txen,
ba biyechje' chone' mal cha'.

- ¹⁰San li', Chios cha', biyesh'lall'gachi nad',
na' ben ka yiyakid'
kwenche inezgakile' ka gon' chegake'.
¹¹Na' gakbe'id' nan chle'shiilo' nad'
daa bi wi'o latj che ben'ka' chakzi' chakzbani nad'
yiba yizakgakile' cha'.
¹²Daa zoa' do yichj do lallaa biga chsanlalloo nad',
na' ba beno' ka soa' toshiizi lawo'na'.
- ¹³Shajlaoshga Xancho Chioza' toshiizi, beena' nak
Chios checho, cho' ben' Israel.
Ka' gakshgan.

Libr wchopi

(Salmos 42—72)

Salmo 42

- ¹Ka chak che bllin'yixaa chbił chdeyi
na' chdab chyiljb nisa' yeejb tyaoka',
kan' chak cha', Chios cha',
daa chzelall'chgaid' we'lawaa li'.
²Chaklikz cha' ka ben' chbił chdeyi daa chyalljchgaid'
Chioza', beena' nak Chios yaa Chios ban.
¿Batra lljaye'lawaane' loo lill xlatje'na', lla?
³Lwaa dii nan yeej gaw', chbell-l' ka tella ka wal,
na' toshiizi nagake' nad':
“¿Gan Chios cho'na', naa chyalljilo'ne'?”
- ⁴Kat' chjadinid' diiki, na' chzolochoxlə chbell'
daa le chakyeshid'.
Chjadinid' kana' lialoa' lao ben' be ben' zilka' zejnto'
gana' zoa lill xlatj Chioza'.
Chyitj chxillnto' daa le chibainto' na' choe'nto'
Chioza' ye! choxken.
¿Mbalaz inleeb wzoanto' lnina'!
- ⁵Na' nia': ¿Berachekzə chakyesh'zid'?
Na' ¿Berachekzə chakshejlall'zid'?
Chiya! gonch' lez Chioza',

na' chiyal' we'lawaane',
la' len' nake' Chios cha', na' len' chisle' nad'.

⁶Chios cha', chakyesh'chgaid'.
Na' daan, chjadinchgaid' li'
gani zoatia' lo yell-lio dga mbani yao Jordánna',
na' yaa Hermónna' len yaa Mizara'.

⁷Yel' zak'zi'ka' ba bseloo lawa'ni
chchix chlogakan nad' ka chon bli che nisdona'
kat' chas chataan,
na' ka chon yao xenna' daa chxop cho'a bnanja' na'
chninchga kat' chjchazan.

⁸Tellana' chakbe'id' chiyesh'lalii Chioza' nad',
na' wala' chxoe' dill' cho'a lollaani kwenche chol chnia'ne',
na' choe'lwillee daa nake' Xan yel' mban cha'ni.

⁹Na' yep' Chios cha'na',
beena' nak ka to yaj xen dii chkweej nad':
“¿Biche ba wlej yichjo' nad'?
¿Biche chakz cha' ki, na' zoalz' nyesh' ni che ben'ka'
chsak'zi' nad'?”

¹⁰Axt llitki yo'a ba chey chlagakan ni che ben'ka'
chakzbani nad',
na' toshiizi nagake' nad':
“¿Gan Chios cho'na', naa chyalljilo'ne'?”

¹¹Na' nia': ¿Berachekzə chakyesh'zid'?
Na' ¿berachekzə chakshejlall'zid'?
Chiyal' gonch' lez Chioza',
na' chiyal' we'lawaane',
la' len' nake' Chios cha' na' len' chisle' nad'.

Salmo 43

¹Bengach yel' joschis cha', Chios cha',
na' wzoagach cha' lao yog' diika' biz chon chna
ben' malka' cha',
na' bislagach nad' lo ni'a na' ben'ka' nak ben'
wxiye' na' ben' mal.

²La' lin' nako' Chios cha', na' li'kzan chkwash' chkweejo'
nad' lao bittez dii nxoll.

¿Berache ba wlej yichjzo' nad'?
 ¿Biचे chakz चा' ki, na' zoalz' nyesh' ni चे beन'ka'
 chakzi' chakzbani nad'?
 3 BseI'gach beeni' cho'na' na' dill' li चो'na' lawa'ni
 kwenचे bi nitid' neza'
 daa chllin lo yaana' gana' zo',
 gana' non lill xlatjo'na'.
 4 Na'ch ibigaa gana' chzeynto' bayix'ka' lawo'na', Chios चा',
 na' goI ineid' li' árpana'.
 La' lin', Chios चा', chono' ka chiba chizakid' na'
 nono' nad' yeI' xabana'.

5 ¿Berachekezə chakyesh'zid'
 na' berachekezə chakshejlall'zid'?
 ChiyaI' gonch' lez Chioza',
 na' bi wsanlallaa we'lawaane',
 la' len' nake' Chios चा', na' len' chisle' nad'.

Salmo 44

1 Chios चा', ba beninto' dill'ka' be' dii xozxto'nto'ka'
 cheyi diika' beno' kana' wzoagake'.
 2 Kon yeI' wak cho'na' bshesho' beन'ka' wlle' wlla' yellka'
 gani mbaninto' naa, beन'ka' bi bembia' li'.
 Bsak'zi'gako'ne' na' bsheshgako'ne' na' beno' yell-lio
 che'ka' lall' na' dii xozxto'nto'ka'.
 3 Aga daa bniagakile' yesya चे'kan' goki चegake' yell-lioni,
 ni aga kon ni'a neekan' bengake'n gan.
 San daa gokilo' legaken', wzoalengako'ne' na' goklengako'ne'
 kon yeI' wak choo yeI' wak xen cho'na'
 kwenचे gokin चegake'.

4 Li' nako' Chios चा' na' beन' wñabia' चा',
 lin' chono' kwenचे neto', naknto' xiin dia चे dii Jacoba',
 chzakinto' beन'ka' chdiI-len neto'.
 5 Daa chakleno' neton', chlliayi'nto' beन'ka' chakzi'
 chakzbani neto';
 na' kon yeI' wak cho'na' chlej chshoshjnto' beन'ka'
 chdiI-len neto'.
 6 Bi gon' lez xis wixit' चा'ni,
 ni yesya चा'ni yislagakan nad' lo wdila'.

⁷La' lin' gokleno' neto' kwenche wxakinto' ben'ka'
wdil'-len neto',

na' bsi'o ye'l' zto' ben'ka' gokzi' gokzbani neto'.

⁸Toshiizi we'nto' dill' ka ben' choo ben' xen nako', Chios cha',
na' toshiizi we'la'onto' li'.

⁹Per naa, ba wchoonlalloo neto';

na' ba bsi'o neto' ye'l' zto'.

Bich chakleno' ben' wen wdil' chento'ka'.

¹⁰Na' bi'o latj kwenche ben'ka' chdil'-len neto'
blagdogake' neto',

na' wxi' wkaagake' bi de chento'.

¹¹Na' beno' neto' lall' na'gake' ka xil'do'ka' ba
nzoagake' witgake';

na' bshesh bcheeno' ben' wlall cha'ka' jsoagake'
ladj ben' zit'ka'.

¹²Be'tekzo' ka'zə ben'ka' nak yell cho',

na' bikz bi laxjgake' wxi'o.

¹³Ba bsi'o neto' ye'l' zto' lao yellka' ndil' nllagnto',
na' chtitj chtangakile' neto'.

¹⁴Ba beno' kwenche ka wzetjgake' le yell chento'na'
wxillgakile' neto'.

Na' ka chle'i nottezə ben' neto', chonlegakile' neto'.

¹⁵Biga zoa lla bi chiyi chido'id',

axt chiza' chinit cho'alawaani daa le chido'chgaid'

¹⁶daa chtitj chtani ben'ka' chakzi' chakzbani nad'
na' ze kwasgake' chizi'gake' wzonna'.

¹⁷Yog' diikin ba ben ble'into' la'kzi bigan' gal'-lall'nto' li'
ni bi wdishjnto' diika' bllio' bia' gonnto'.

¹⁸La'kzi biga wlej yichjnto' li'

ni bigan' yilaala'onto' xnezo'na',

¹⁹ba bzaalo neto' gana' sak'zi'nto',

gana' bi nak lez ye'l' mban chento'ni.

²⁰Shel' neto' go'-lall'nto' li', Chios cha',

wa be'la'oznto' diika' choe'la'o ben' zit'ka',

²¹zakbe'kzilo' shel'ka'.

La' li' nombi'o axt daa zeelo chza'lall'nto' loo yichjlall'do'nto'ni.

²²Daa chozonto' xtilloona', toshiizi zoanto' dii

nxoll witgake' neto'.

Chongakile' neto' ka xil'do'ka' ba nzoagake' witgake'.

²³ Bli'gach yel' wak cho'na', Chios cha'.
 ¿Berache bi chakleno' neto'?
 Bli'gach yel' wak cho'na'.
 Bi kwej yichjo' neto' toshiizi.
²⁴ ¿Biçe chlonzilo' neto' yel' goklen cho'na'?
 Na' ¿Biçe nal-lall'zo' neto' naa chen chle'into' yel' zak'zi'ni?
²⁵ Ba gokzə to kat' naa, bich so sakinto'n.
 Bichkz zoanto' yell-lío.
²⁶ Bi sha'gachilo' gakleno' neto'.
 Na' bislagach neto' daa le chakilo' neto'.

Salmo 45

¹ To lla'cha nak loo lall'dawaani dill' xochika'
 na' wi'an dill' lao beena' chnabia'.
 Cho'a lollaani zaklebin daa chchin beena' chzej, na'
 chzejlene'n dill' dii nak mbalaz.

² ¿Li' nako' liizelozi ben' mbejlawin ladj ben' yell-lioki!
 Dill' goll-lall' chchej cho'a lolloona'.
 Daan, gon Chioza' wen cho' toshiizi.
³ Li' bi chall chllebo' shajo' lo wdila',
 bchel yesya cho'na' kwit li'ona',
 kwenche wli'n nako' ben' choo ben' xen.

⁴ Wyajlen yel' wak choo yel' wak xen cho'na' na'
 jalliayi' ben'ka' chdil-len li',
 ben'ka' bi choollall' daa nak dii li na' chchi' chsak'gake'
 ben' yesh'do'ka'.
 Na' gonleno' yel' wak cho'na' dii gonan ka yibani ben'.

⁵ Xiska' chzal' xis wixit' cho'ka' witgakan ben'ka'
 chakzi' chakzbani li'
 ka chazgakan loo lall'do'eka'.

⁶ Chios cha', zejli kani chnabi'o,
 na' yel' wnabia' cho'na' nakan dii zej shli.

⁷ Choolalloo daa nak dii li dii shao' na' chwiilo' dii mala'.
 Daan, Chios cho'na' ba wleje' li'
 na' ba bene' ka soacho' mbalaz aga ka ben'ka' nako' txen.

⁸ Do ka nak xo'na' yoon shii xla' diika' chla' zix sia;

na' loo yoonā' gana' chi'o chnabi'o daa nongake'
 xochi kon daa le marfil,
 lle' beŋ'ka' chsill diika' lliā kwerd cheyin kwenche
 chonan ka yiba yizakilo'.
 9 Ladj noolka' zakii, beŋ'ka' lle' lill xlatjo'na' gana' chnabi'o,
 lle' noolka' nak xiin beŋ' wŋabia'ka';
 na' kwito'na' gana' chi'o chnabi'o ze noola' ikoo na' non
 kwine' xochi daa nchine' or daa zeelo nak wen.

10 Bzenag, xiindawaa, bzenagyen' ka nak dga inia' li':
 Wlejyichjo' beŋ'ka' nako' txen loo yoo lillo'na' na'
 beŋ'ka' nak beŋ' wlall cho'.

11 La' beena' chnabia' chibaile' ka xochi nako';
 na' len' nake' xano', na' chiya! wzo' xtilleena'.

12 Na' beŋ' Tiroka' yidwa'gake' lawo'na' daa chzangakile',
 na' beŋ' wni'aka' yidnabgake' gakleno' legake'.

13 Noola' ikaa beŋ' wŋabia'na'
 nakwe' xe'na' daa nak xochi daa nŋengake' do de or.

14 Xochi nllēb nak xe'na' nakwe' zjwa'gake'ne' lao
 beŋ' wŋabia'na',

na' ljwell nool weweeka' nogake'ne'.

15 Na' chiba chizak'gakile' zejgake'
 gana' chi' beena' chnabia'.

16 Na' li' naa, beŋ' wŋabia', xiino'ka' inabia'gakb' ka
 wŋabia' dii xozxto'ka',

na' gono' ka inabia'gakb' doxen gana' mbanilo'.

17 Nad' gon' kwenche yog' dia dii zi' za' lljadingakile' li',
 na' yog'lol beŋ' lle' yell-lioni we'la'ogake' li' toshiizi.

Salmo 46

1 Chioza' chap chwie' cho' lao bittezə dii nxoll, na'
 chone' cho' wal;

na' chaklene' cho' kat' bi chak checho.

2 Na' daan bi illebcho la'kzi yinitlo yell-lioni,
 wa la'kzi yaaka' iyish'gakan gchol nido'na',

3 wa la'kzi chon nido'na' sshag wal na' chas
 chat' bli cheyinna',

na' ixo' inib yaa yaoka' ni cheyin.

⁴ Ka to yao dii chde to lo yell-lio na' chyilan daa,
 kan' nak ye! xaba daa de yella' gana' choe'la'ogake' Chioza',
 gana' non lill xlatjə Chioza', beena' liizelozi chnabia'.

⁵ Chioza' zoe' yell che'na', na' biga kwiayi'n.
 Chioza' gaklene'n ka solo sheeni'.

⁶ Ben'ka' lle' yell zit'ka' chosyaagake' daa chllebgake'
 yinit ye! wñabia' che'ka'.
 Na' yell-lioni chyinj chyellan kat' chne Chioza'.

⁷ jXancho Chioza', beena' liizelozi nap ye! wak choo
 ye! wak xen, zoalene' cho'!
 jChioza', beena' bñenilall' dii xoxto'cho Jacoba',
 chkwash' chkweeje' cho'!

⁸ Li da, na' li wwia ka naklikz diika' ba ben Xancho
 Chioza' yell-lioni,
 diika' chon ka chibanicho.

⁹ Ba bkweze' wdi!ka' chak doxen lo yell-lioni;
 ba wdishje' xis wixit'ka', na' bxoxx btine' ya lo tosh'ka',
 na' bzey btie' karretka' chche'gake' lo wdi!a'.
 Na' wne':

¹⁰ “Ba gokkzə to ka't' naa; bich til-le.

Li yiyakbe'i nadaan nak' Chios.

Nadaan zeelo chnabia' doxen lo yell-lioni,
 na' zeelo nadaan chido!aa sho'a balaan doxen lo yell-lioni
 daa nak' ben' choo ben' xen.”

¹¹ Chioza', beena' nak liizelozi ben' ye! wak choo
 ye! xen, zoalene' cho'.

jChioza', beena' bñenilall' dii xoxto'cho Jacoba',
 chkwash' chkweeje' cho'!

Salmo 47

¹ Ka le' lle'le yog'!o! yellka' llia doxen yell-lioni,
 jli kap' na'leka'!

jLi gol ine Xancho Chioza' lega ben' chiba chizaki!

² La' Xancho Chioza', beena' nak liizelozi ben' choo ben'
 xen, nake' ben' gall illebcho,
 na' zeelo len' chnabi'e doxen lo yell-lioni.

³ Bene' lall' na'cho yell zit'ka'

na' wṇabia'chogakan.

⁴Na' wleje' to yell-lio dii nak mbalaz wal,
na' nakin checho, cho' nakcho xiin dia che dii Jacoba',
daa le chakile' cho'.

⁵Na' daa le chiba chizakicho, cho' nakcho ben' Israel, axt
chosya'icho na' chkwellcho trompetka'
shlak zejcho lill xlatj Chioza' lljasancho yiina' gana' yoo
daa chonli daa bchebe' gone' checho.

⁶Li gol ine Chios chechona'!

li gol ine beena' chṇabia' cho'!

⁷La' Chios chechona' chṇabi'e doxen yell-lioni.

li gol to dii we'lawa'n le'!

⁸Toz Chios chechonan' chṇabi'e doxen yell-lioni,
na' llie' gana' chṇabi'e.

⁹Ben'ka' chṇabia' yog' yellka' chidop chillaglengake'
ben'ka' nak yell che Chioza', beena' be'la'o dii Abrahama'.

¹⁰La' Xancho Chioza' nzoe' ben'ka' chṇabia' lo yell-lioni;
na' le' nake' liizelozi ben' choo ben' xen.

Salmo 48

¹Ben' choo ben' xen nak Xancho Chioza',
na' zeelo len' chidolee shajlawee
gana' nak yell che', lo yaana' gana' zoe'.

²Mbalaz inlleb nak yaa Siónna'
na' le chiba chizaki ben' ka nakan.
Nakan yell che beena' zeelo chṇabia'
na' zoan sibə ka yaa Safónna'.

³Aga zeeka' nechj yellan' chkweejan daa,
san Chioza' ba bli'e len' chkweeje'n.

⁴Ben' wṇabia'ka' gogake' toz
nan lljalliayi'gake' yella'.

⁵Per ka ble'gakile' yella' bibangakile',
na' daa le bllebgake' bixonjdogake'.

⁶Na' axt chxiztitgake' daa le bllebgake',
na' wyey wlagake' ka chey chla to noolə ben' chzan.

⁷Na' bliiyoo legake' ka chon to be' wal daa chxoxj chtin
barkw xenka' za' yell Társiza'.

⁸Kon ka nak dill'ka' beninto',
kayen' nak diika' ba ble'into' yell che Chios chechona', beena'
zeelo nap yel' wak choo yel' wak xen,
na' toshiizi zoe' gap wwie'n.

⁹Chios cha', gana' nak lill xlatjo'
zento' wneyi yel' chaki cho'na' daa nak dii xen wal.
¹⁰Doxente yell-lioni zeyi cho'
na' ka'kzə doxente choe'la'ogake' li'.
Na' kon yel' wñabia' cho'na' chchogbi'o che ben'
kon ka chiya!'

¹¹Yiba yizaki ben'ka' lle' yell Siónna',
na' lekzka' ben'ka' lle' yelldo'ka' llia Judána',
daa chchogbi'o che ben' kon ka chiya!'

¹²Li shechj ta cho'a tiao yell Siónna',
na' li wlab yoo sibka' llia lo zee yelka' nechjan.
¹³Li wwiayen' ka nak zee yelka' chkweejgakan len,
na' yoo yelka' gana' zoa ben' wñabia'ka',
kwenche wxē willj we'len dill' lao xiin dia cheleka' zi' zaak.
¹⁴La' Chios, beeni choe'la'ocho,
nake' Chios checho zejli kani.
Na' le'kzen' kwee cho' lo xneze'na' toshiizi.

Salmo 49

¹Li wzekachi nagle,
ka le' lle'le yog'lol yellka' llia doxen yell-lioni,
²ka ben' wen llin, ka ben' chñabia',
ka ben' wni'a na' ka ben' yesh'.
³Ni wi'a dill' dii nak dill' sin',
dill' daa chalj loo yichjlall'dawaani daa wzajniin le'.
⁴Na' sia' wneyi che ka nak dillaa de,
na' gol-len' arpa cha'ni kwenche wzajniid' bi zejin.

⁵¿Biche gall illebz' kat'ka' biz chak cha',
kat'ka' nechjyob ben' malka' nad'?
⁶Legake' nongake' lez yel' wni'a che'ka'
na' chshalj chshongake' che yog' daa napgake'.
⁷Per bi gag yisla ljwellgake',

ni bi gak chixjgake' lao Chioza' kwenche yisle'
yeli' mban che'ka'.

⁸La' dii xen wal inleeb zak' yeli' mbanna',
na' kono so saki chixjan

⁹kwenche ibane' toshiizi
na' bi gooll' iteb beli chen che'na'.

¹⁰Nezicho kwaslol nan yog'lolz ben' chet,
ka ben' sin', na' ka ben' bi nteyi,
na' yeli' wni'a che'ka' chgaanlen ben' yoblan.

¹¹La'kzi wdapgake' yell-lioka' na' bsi'gake'n ka legake',
kat' guetgake', loo bana'chokzan gak lill xlatjgake' toshiizi.

¹²Benecha', la'kzi naptie' yeli' wni'ana', bi soe' zejli kani.
Ka chetchokzə bayixaan guete'.

¹³Kan' gak che ben'ka' n~~x~~enilall' kwingake';
na' ka'kzan gak che ben'ka' chon kwingake' ben'
choo ben' xen.

¹⁴Ka ben' zinche' xil'do' cheyin, kan' yiche' yeli'
wita' legake' loo bana'.

Na' gooll' iteb beli chen che'ka',
na' loo bana' gak lill xlatjgake'.
Na' illin to lla inabia' ben' li ben' shao'ka' legake'.

¹⁵Per Chioza' yisle' nad';
bi wi'e latj yigaana' lo ni'a na' yeli' wita' toshiizi,
san yizi' yikee nad'.

¹⁶Bi gakshejlalloo kat' chat' chbe'chga yeli' wni'a che ben',
na' chgolch yeli' shao' che'na' loo yoo lille'na'.

¹⁷La' kat'ka' guete' aga bi zinoa' zinzie',
ni aga wizjano yeli' shao' che'na' le'.

¹⁸La'kzi shnon mbane' chakile' le mbalaz chak che',
na' choe' ben' xtillee daa le wen chak che',

¹⁹wllin lla yiyake' toz dii xoxxtoe'ka',
na' bichga ile'ile' beeni'na' de yell-lioni.

²⁰Benecha', la'kzi nake' ben' wni'a, aga wbane' toshiizi,
ka chetchokzə bayixaan guete'.

Salmo 50

- ¹ Xancho Chioza', beena' zeelo nak ben' choo ben'
 xen, ba wnie',
 na' chaxe' ben'ka' lle' doxen lo yell-lioni,
 ka ben'ka' lle' gana' chla'lə wbillā' na' ka ben'ka'
 lle' gana' chxoalan.
- ² Chioza' zoe' yell Siónna', gana' zeelo nak xochi,
 na' na' chli'e balaan xen che'na' daa nak ka beeni'
 dii chzeeni' doxen.
- ³ Ba za' Chios chechona' na' zee zña,
 nkwiāloe' ye!' chllaa che'na' daa nak ka to yi' daa
 wlliyai' wlliyaden,
 na' lekzka' nakan ka to yejpe' xen wal nechjyoban le'.
- ⁴ Na' inie' yabana' len yell-lioni
 kwenche soagakan de taschiw kat' wchogloe' che ben'ka'
 nak yell che'. Na' ine':
- ⁵ "Yidi'a yillag ben'ka' chzoa xtillaana',
 ben'ka' bcheb gongake' ka nllia' bia',
 na' betgake' bayix'ka' lawa' kwenche benligake'
 daa bchebgake'."
- ⁶ Yabana' cho'en dill' che Chioza' nake' ben' li ben' shao',
 na' kwine' wchogbi'e che ben' ka chiya!'.
- ⁷ "Li wzenag, le' ben' Israel, le' nakle lall' na',
 ni wi'a dill' ka nakle.
 Nad' Chios, nak' Chios chele.
- ⁸ Aga nia' bi chonle wen daa toshiizi chzanile'
 bayix'ka' chitle lawa',
 na' baka' chzeyle lawa' kat' choe'la'ole nad'.
- ⁹ Per aga chyalljid' gonle nad' me'do' cheleka',
 ni shib ba mash cheleka', baka' nlla'le loo leej cheleka'.
- ¹⁰ La' ba cha' nak yog'lo! bayix', ka ba lle' yaa yao
 ka ba chisgol ben'.
- ¹¹ Ba cha' nak baka' chzo, baka' lle' yaa yaoka',
 na' yog' baka' chda lyixaa.
- ¹² Shel' nad' chbil' chdon', aga li' inabida'n,
 la' yell-lioni nakan cha' len yog'lo! dii de lawinna'.
- ¹³ ¿Achakilo' chaw' xpel' goonka',
 wa cheej' xchen shib mashkan'?

¹⁴ Daa llialo gono', gono' nad' yel' choxken;
na' ben daa nchebo' gono' lawa' daa nak' liizelozi
ben' choo ben' xen.

¹⁵ Be'lwil nad' kat' zo' lo yel' zak'zi'na',
na' nad' yisla' li', na' li' koo nad' balaan."

¹⁶ Per Chioza' chi'e ben' mala':
"Bi chidoḷoo goni cho' ley cha'ka',
wa wzetjo'gakan.

¹⁷ La' chakzbanilo' dii wenna' daa cheenid' gono',
na' chzo' cho'a xtilaana' ka'lə.

¹⁸ Chibailo' gono' txen beena' chzi' chban,
na' ben'ka' zoate xoolin na' chnelengake' nool yoblə.

¹⁹ Cho'a lolloona' chbell chneleno'n mal,
na' chchejan dill' wxiye'.

²⁰ Na' chyiljalloo cho'a xtill' ben' bish' goljo'na',
na' chbell chnio' che'.

²¹ Daa bwialoz' yog'loḷ diiki ba beno',
na' gokilo' nak' ka li'.
Per naa wi'a dill' ka nako'.

²² "Le' bi chzenagle cha', li shajinii dga,
kwenche ki soloa' wxoxj wtin' le', na' kono gak yisla le'.

²³ Beena' chone' nad' yel' choxken, len' chgwee nad' balaan.
Na' chisla' beena' nsa' cheyin wen."

Salmo 51

¹ Chios cha', biyesh'lall'gachi nad',
kon ka nak yel' chaki cho'na';
na' kon ka nak yel' chiyesh'lallii cho'na',
bisol binigtach saaxya cha'ka'.

² Bixis biyibgach diika' nda' nchen yichjlall'dawaani,
na' bikwasgach saaxyaka' ben'.

³ Chiyakbe'id' nak' ben' widenag,
na' dii malka' ben' toshiizi chao chdian nad'.

⁴ Ba bxinj bḷen' lawo'na';
ba ben' daa chakzbanilo'.
Daa nchogbi'o gak che ben' saaxyana' nakbia'cha zejan shli,
na' chono' yel' joschis kon ka chiyaḷ' gakan.

- ⁵ Dii l̄icha kon ka goljtia' ba nak' beṅ' mal;
 ba nakkz' beṅ' saaxya ka wya' wbin' loo lee xna'na'.
⁶ Neẓid' cheenilo' soa' do yichj do lallaa,
 na' loo yichjlall'dawaani chzajniilo' nad' yeḷ' sin' cho'na'.
⁷ Bikwasgach diika' nda' nchen yichjlall'dawaani,
 na' yiyak' beṅ' nxi nyech.
 Bixis biyib yichjlall'dawaani,
 na' yiyakan xtil walch aga ka beyaa.
⁸ Ben ka yizoa yeḷ' xabana' loo yichjlall'dawaani,
 na' yiba yizakid';
 na' yiyakshao'lallid' daa ba bdio' nad' lo yeḷ' zak'zi'na'.
⁹ Bisol binitgach saaxyaka' chon' lawo'na',
 na' bixigach yog'loḷ' dii malka' ben'.
- ¹⁰ Chios cha', bixis biyib yichjlall'dawaani,
 na' bikob yeḷ' mban cha'ni, na' ben nad' to beṅ'
 zechech zetip lawo'na'.
¹¹ Bi wzo' nad' ka'lə,
 ni bi yilaala'ogacho' nad' Espiritu Santo cho'na'.
¹² Bengach ka yiba yizakid' sto shii daa ba bislo' nad';
 na' bengach ka gak' beṅ' wizoa dill'.
¹³ Na' wliid' beṅ' widenagka' nez li cho'na'
 na' beṅ' saaxyaka' yiyaj yilengakile' lawo'na'.
¹⁴ Chios cha', bisla nad' kwenche bi ile'id' yeḷ'
 zak'zi' che xyana' ben',
 la' lin' chislo' nad'.
 Na' goḷ inia' wi'a dill' nan li' nako' beṅ' li beṅ' shao'.
- ¹⁵ Chios cha', goklen nad' we'lawaa li'.
¹⁶ Aga chnabo' wit' bayix' na' wzey'b lawo'na';
 shel' nakan ka', na' gona'n, per aga lennan' chazlalloo.
¹⁷ Daa lliarote chazlalloo, Chios cha',
 daa gakyeshii beṅ' do yichj do lallee che dii mala' ba bene'.
 Na' bi chonilo' nakzi beena' chiyaḷ' chileni do yichj do lallee.
- ¹⁸ Bengach ka gak wen che yell Jerusalenna',
 bengach ka yilisgake' zeena' nechjan.
¹⁹ Na'ch yidwa'nto' lawo'na' yog' diika' chiyaḷ' gonnto' li',
 na' witnto' bayix'ka' na' wzey'nto'gakb lawo'na'.

Salmo 52

¹ Li' beṅ' zeyi ḡeyin, ḡbiḡe chshalj chshonzo'
ḡeyi dii mala' chono'?

Yeḷ' chiyesh'lallii ḡe Chioza' toshiizi den.

² Cho'a ḷolloona' nakan ka yesya dii ṅlatit
daa chgooleno'n xṅezin wliiyoo beṅ',
na' choolalloo siye'leno'n.

³ Chakchilo' dii mala' aga ka dii wenna',
na' chakchilo' yeḷ' wxiye'na' aga ka dill' ḷina'.

⁴ Le chibailo' yog' dill' wxiye'na',
na' cho'a ḷolloona' chchejan daa chlliayi'n beṅ'.

⁵ Daan, Chioza' wliiyi'tekze' li'.

Wzape' li', na' yibeje' li' gana' nak lill xḷatjo',
na' wsi wḡogue' yeḷ' mban ḡho'na'.

⁶ Na' beṅ'ka' chon daa zej shḷi ile'gakile' ka gak
ḡho' na' illebgake';

na' wxillgakile' li', iṅagake'.

⁷ “Beenin bi bḡenilallee Chioza' kwenḡe gap wwie'ne',
san bḡenilallee yeḷ' wni'a xenna' got' wche'ile',
na' wzoayide' bene' dii mala'.”

⁸ Per nad' zoa' mbalaz ka to yag olivo dii chakshao'lallii,
daa zoa lill xḷatj Chioza'.

Na' nḡenilallaa yiyesh'lallii Chioza' nad' toshiizi na' zejḷi kaṅi.

⁹ Chios ḡha', toshiizi we'lawaa li' ni ḡeyi daa ba beno' ḡha'.

Wḡenilallaa li' daa nako' beṅ' wen,

na' we'lawaa li' ladj lkwe' beṅ'ka' nak lall' no'.

Salmo 53

¹ Beena' bi nteyi ne' ḷoo yichjlall'do'ena':

“Aga no Chios zoa.”

Yog'zə beṅ' ba wxinj yichjlall'do'eka',

na' dii zban inleeb chongake'.

ḷNi sto kochno chon wen!

² Xancho Chioza' zoe' yabana' chwie' beṅ' yell-lioni,

kwenḡe shi ga zoa beṅ' nteyi,

beṅ' cheenile' gombi'ene'.

³ Per yog'zgake' ba wlaagake' lo nez wenna',
 na' ba chxinj chlengake'.
 ;Kochkzno zoa chon daa nak wen,
 niga zi tlišee!

⁴ Ben'ka' chon dii mala' nakgake' ben' bi nteyi.
 Ka ben' chisbill chisto to ye! waw, chisya chislengake'
 bi de che ben' yell cha'ka',
 na' bi choe'lwillgake' Chioza'.

⁵ La'kzi bibi got' dii gonan ka gall illebgake', le
 bxiztitgake' daa bllebgake'.
 La' Chioza' ba bzoles bzolline' llit wet che ben'ka' wdil-len li'.
 Na' ba wxi'gake' ye! zto' lawo'na',
 daa ble'zbani Chioza' legake'.

⁶ ;She! yidgach Chioza', beena' zoa yaa Siónna',
 yisle' cho', ben' Israel, lo na' ben' malka'!
 Na' kat'ka' gon Chioza' ka yiyak wen checho sto shii
 yibachgaicho cho' nakcho ben' Israel, cho' nakcho
 xiin dia che dii Jacoba'.

Salmo 54

¹ Chios cha', bislagach nad' daa nxenilallaa li',
 na' goklengach nad' kon ye! wak cho'na'.

² Chios cha', bzenaggach dga chnabid' li',
 bzegach nago' ka nak dill'ki choe'len' li'.

³ La' ben' cha'sibka', ben'ka' nak ben' zesh' ben'
 zban, chdil-lengake' nad'
 na' cheengakile' witgake' nad'.

Na' bi chjadin chjaza'lall'gake' Chioza'.

⁴ Per Chioza' chaklene' nad';

Xancho Chioza' chap chwie' ye! mban cha'ni.

⁵ Na' le' yizi'e wzon che ben'ka' chakzi' chakzbani nad'.
 ;Chios cha', blliyi'gake', la' li' chono' ka chchebo'!

⁶ Do yichj do lallaa wit' bayix'ka' gon' li',
 na' we'lawaa li' daa nako' ben' wen.

⁷ La' ba bislo' nad' lao yog'lolte ye! zi'ka' ba gok cha',
 na' ble'teid' blliyoo ben'ka' gokzi' gokzbani nad'.

Salmo 55

- ¹ Chios cha', bzenaggach dga nia' li',
na' bi gongacho' ka ben' bi cheni dga chat'yoid' li'.
- ² Bzenaggach cha' na' goklengach nad'.
Chnabid' li' gakleno' nad', la' le chakshejlallaa
- ³ na' chall chlleb' ka chne ben'ka' chakzi' chakzbani nad',
na' daa chsak'zi' ben' malka' nad'.
La' chiya dii ba bengake' cha'
na' china!l' chinogake' nad' daa chllaa chlokgake'.
- ⁴ Le chakyeshii loo yichjlall'dawaani
na' dii nxollka' nsa' yel' wita' ba wlooshebgakan nad'.
- ⁵ Na' axt chxiztita' daa le chlleb',
na' le ba yooshebchga'.
- ⁶ Na' nia': “She!l'ka' gak soa' ka chzo paloma',
na' soa' shaa gana' bich bi gak cha'.”
- ⁷ Na' soa' shaa zit' wal;
lljasoa' gana' kono zoa.
- ⁸ Wtalallaa wxonjid' dii zedka' chak cha',
diika' nak ka yejpe' wal.”
- ⁹ Chios cha', bi wi'o latj sho' xnezi daa cheeni ben' malka'
gongake'. Benllej bengangakile'.
La' yell cha'ni, chen chle'id' ka chsak'zi'gake' ben' na'
ka chakdil-lengake' ben'l'.
- ¹⁰ Ka tella ka wal nechjyoll dii malka' yell cha'ni,
na' chi'chgan chiya dii mal.
- ¹¹ Chonchagake' daa chlliayi'n ben' wlall cha'ki,
na' toshiizi chsak'zi'gake' na' chziye'gake' ben'l'.
- ¹² She!l' to ben' chakzi' chakzbani nad' biz chon chne' nad',
wzo wzakid' daa biz chon chne', she!l'ka'.
Wa she!l' chzoshiyi' to ben' chle'zbanile' nad',
wak kwashidee, she!l'ka'.
- ¹³ Per li', naktio' bish' ljwell'
na' liizelozi nllaguicho, benzilo' nad' ka'.
- ¹⁴ Chop chopchon wdacho ladj ben'ka' lle' cho'a
lill xlatjə Chioza',
na' mbalaz billaguicho be'cho dill'.

15 ĩGox'shga yel' wita' tokonganzə ben'ka' chakzi'
chakzbani nad'!

Na' shi'a shbangake' sho'gake' loo bana',
la' lillinzi dii mala' yoo loo yichjlall'do'eka'.

16 San nad' inabid' Chioza' gaklene' nad',
na' lekze' yisle' nad'.

17 Ka shzil, ka gobill, ka shlle', chat'yoidee gaklene' nad',
na' chzenague' cha'.

18 Na' yisle' nad' lo ni'a na' ben'ka' chdil-len nad',
la'kzi ben' zan nakgake'.

19 Chios, beena' chnabia' zejli kani,
wzenague' cha' na' wchi' wsakee legake',
la' bi chsangake' daa chongake'
ni bi chall chllebgake' Chioza'.

20 Chidil-lentezgake' ben'ka' zoalengake' wen;
na' bi chongake' daa chchebgake' lawe'ka'.

21 Dill'ka' choe'gake' nakgakan dill' gull-lall',
per loo yichjlall'do'eka' chza'lall'gake' til-lengake' ben'.
Le gull-lall' chshaljgake',
per cho'a dill'ka' choe'gake' nakan ka to yesya daa
nlatit, daa chlliayi'n ben'.

22 Ben lo na' Xancho Chioza' yog' dii zed cho'ka',
na' lekze' gaklene' li'.
Biga kwey yichje' beena' chzoa xtilleena'.

23 Li', Chios cha', gono' kwenche ben' wen xyaka' na'
ben' wxiye'ka' bi idiagake',
na' wsi wchogo' yel' mban che'ka'.
San nad', lin' nxenilallaa.

Salmo 56

1 Biyesh'lall'gachi nad', Chios cha',
la' zoa ben' china' chinoe' nad',
na' toshiizi za'gake' chdil-lengake' nad' na' chsak'zi'gake' nad'.

2 Ben'ka' chakzi' chakzbani nad' toshiizi china'
chinogake' nad';

ben' zan ben'ka' za'gake' chdil-lengake' nad', na'
nakgake' ben' chep cha'lall'.

³Kat'ka' chall chlleb', non' lez lin' gakleno' nad'.

⁴Non' lez Chioza' na' choe'lawaane' daa ba b̄chebe'
gaklene' nad'.

Non' lez Chioza' na' bi gall illeb'
shi bi goni ben' yell-lioni nad'.

⁵Toshiizi chbell ch̄negake' cha';
lillin̄zə cheengakile' wzoazi'yaagake' nad'.

⁶Na' chbe'nogake' nad',
na' chwiagake' gan zyaa,
chbezgake' bat gat' latj witgake' nad'.

⁷Bengach ka sak'zi'gake' ni che dii mala' chongake';
na' blliayi'gach ben'ki chshaa li', Chios cha'.

⁸Li' nezilo' bal' shii ba gokshejlallaa,
na' nezilo' ka'k' nis x̄chell ba bxop jalaw'ki,
na' lee libr cho'na' nzejgako'n.

⁹Kat'ka' in̄ab' gakleno' nad',
ben'ka' chakzi' chakzbani nad' yixon̄jgake'.
La' kwas̄lōl̄ nezid' li' chakleno' nad', Chios cha'.

¹⁰N̄xenilallaa Chioza', na' choe'lawaane' ka mba nak x̄tilleena',
N̄xenilallaa X̄ancho Chioza', na' choe'lawaane' ka
mba nak x̄tilleena'.

¹¹Non' lez Chioza' na' bi chall chlleb'
shi bi goni ben' yell-lioni nad'.

¹²Gon' diika' n̄cheb' lawo'na', Chios cha',
na' we'lawaa li',

¹³la' ba bislo' nad' lao yel' wita',
na' bi bi'o latj bi gak cha',
kwen̄che soa kwez' lawo'na' na' lo beeni' daa
nsa' yel' mbanna'.

Salmo 57

¹Biyesh'lall'gachi nad', Chios cha'.
Biyesh'lall'gachi nad', la' lin' n̄xenilallaa.

Bengach cha' ka chon bana' zoa xilin chyellb xiinbka'
 xan xilba', la' non' lez wkweejo' nad'
 axt ka yiyoll yido te dii nxollka' zoa'.

² Chnab' ye! goklen lao Chioza', beena' nak liizelozi
ben' choo ben' xen,
 beena' chaklene' nad' lao yog'lo!te dii chak cha'.
³ Na' yabana' gana' lliatie' wselee ye! goklen che'na'
 na' yisle' nad' lao ben'ka' china! chino nad'.
 Chioza' wli'e chakile' nad' na' chone' ka ne'.

⁴ Zoa' ladj ben'ka' nak ka bell znia,
 baka' chxoxj chtin ben'.
 Na' kon ya lo tosh'ka', na' xis wixit' che'ka', na' yesya
cheka' daa nlatitə chlliayi'gake' ben'.

⁵ ;Shajla'oshgo' yabana' gana' zo', Chios cha',
 na' doxen zbii zkaan yell-lioni kooshgagake' li' balaan!

⁶ Ben'ka' chakzi' chakzbani nad' ba chinogake'
 kwenche wzapgake' nad',
 na' chakyeshid' ka chongakile' nad'.
 Ba wdengake' to yech zitj lo nez cha'na' daa
 cheengakile' ixop' lo'inna',
 per lekzgake' ba bxopgake' lo'inna'.

⁷ Chios cha', toshiizi zoachech' nxenilallaa li',
 na' do yichj do lallaa gol inia' li'.

⁸ Chiya! se kwaslen' diika' llia kwerd cheyin,
 na' ka ba chzoan xe soloa' gol inelen'gakan li'.

⁹ Chios cha', we'lawaa li' na' gol inia' li'
 lao ben'ka' za' wde wdeli yell na' yog' naciön.

¹⁰ La' ye! chaki cho'na', Chios cha', nakan dii xen wal inleeb
 ka yabana' daa bi nakbia' gate chiyoll chidon,
 na' toshiizi chono' yog' diika' chchebo'.

¹¹ ;Shajla'oshgo' yabana' gana' zo', Chios cha',
 na' doxen zbii zkaan yell-lioni sho'shgo' balaan!

Salmo 58

¹ Ka le' chñabia'le, bi chonle ye! joshis che ben'
ka chiya! gakan,

ni bi chçhoglele che ben' kon ka nakan.

² San chgooləle xnezin gak mal che ben';
na' ye! zesh' ye! zban chelena' chwall chsheban ben'
doxen gana' chñabia'le.

³ Ben' malka' loo lee xneeka'te chlaala'ogake' daa nak dii licha,
na' kate chaljkake' nogake' de wxiye'na'.

⁴ Ka yierb che bel'a' nak dill'ka' chchej cho'a lolleeka'.
Nakgake' ka bel zñiana', bana' bi chzenag che
beena' cholxile'b.

⁵ Ka bel zñiana' bi chzenag che beena' cholxile'b la'kzi
le zeyi che' cholxile' bel'ka',
ka'kzan chon ben' wxiye'ka', bi chzenaggake' che dii wenna'.

⁶ Chios cha', blej bshoshjgach ben' malka',
ben'ka' nak ka bell zniaka',
kwenche bich bi gak gongakile' ben'.

⁷ Gakshga chegake' ka nis daa chlaj lo yona' na' chinitten,
na' gashj goxjshga xiska' chzal' xis wixit' che'ka'.

⁸ Gakshga chegake' ka chak blosja' kat' chiyom';
na' ka bdo'na' net ka chalj'b, ni bi chle'ib' beeni' che wbilla'.

⁹ Axt bikz gakbe'gakile' yiyoll yido ye! mban che'ka'.
Ka chak che to yag yesh' dii lii chlall'tie'
na' chde be'na' choa'n daa, ka gakshga chegake'.

¹⁰ Na' beena' zej shli yiba yizakile' kat' ile'ile' ba
chgoo chyixj ben' malkan',
na' ba lallee lo xchene'ka'.

¹¹ Na' ina ben' yell-liona':
“Dii licha de laxj beena' zej shli,
na' dii licha zoa to Chios, beena' chçhoglo che ben' yell-lioka'.”

Salmo 59

¹ Chios cha', bislagach nad' lo ni'a na' ben'ka'
chakzi' chakzbani nad',
na' chdil-lengake' nad'.

² Bislagach nad' lo ni'a na' ben' malka',
ben'ka' cheeni witgake' nad'.

³ Bwiagach ka chinogake' nad' kwenche witgake' nad'.
Ba nshagui ljwell ben'ka' chbayi chsak'zi' ben'
kwenche witgake' nad',

la'kzi aga bi dii mal ben', Chios cha'.

⁴ La'kzi aga bi dii mal ben',
ba za'gake' kwenche til-lengake' nad'.
Bi shagachilo' yidyakleno' nad'.
Bwiagach ka chak cha'.

⁵ Chios cha', lin' nako' liizelozi ben' yel' wak choo yel' wak xen,
lin' nako' Chios che neto' ben' Israel.

Bi shagachilo' wsak'zi'o yog'lol ben'ka' bi chall chlleb li',
bi yiyesh'gachilo' ben'ka' ba chidi-lengake' nad'
daa nakgake' ben' mal.

⁶ Legake' chiyoogake' wal'ka',
na' chongake' sshag ka bekw' ba chxia,
na' chosh' chlall'gake' yella'.

⁷ Daa chbell chnegake' ka nla' ka nte
nakan ka yesya daa chzoazi'yaan ben'.
Na' nazgake': "Aga no cheni bin nacho."

⁸ Per li', Chios cha', chxill-lilo' legake',
na' chxillilo' yog'te ben'ka' bi nombia' li'.

⁹ Chios cha', lin' non' lez gap wwio' nad',
la' lin' chkwash' chkweejo' nad' kwenche kono bi goni nad'.

¹⁰ Chios cha', li' chakilo' nad'. Da gaklengacho' nad',
na' ben ka ile'id' yillino' xnez ben'ka' chdi-len nad'.

¹¹ Bi wlliyi'gako'ne',
san kon yel' wak cho'na' ben ka tagake' lall lill
ben', na' bnit bdegake',
kwenche bi gal'lall' ben' yell cha'ki ka chono' che
ben'ka' bi chzenag cho'.
Chios cha', lin' chkwash' chkweejo' neto'.

¹² Daa bibi dill' wen chchej cho'a lolleeka',
yel' chep cha'lall' che'ka' yidobshgagakilen'.
Na' daa chyishjgake' bia' blag' che ben' na' daa
choe'gake' dill' wxiye'ka',

¹³ bisya bislengachgake' daa chshaagake' li'.

;Btेश b̄loagachgake' na' ni stoe' bich igaan!
 Na' inezi beṅ' Chioza' chṅabi'e xiin dia che dii Jacoba'
 lente yog' beṅ' lle' zbii zkaan yell-lioni.
¹⁴Legake' chiyoogake' waḷka',
 na' chongake' sshag ka bekw' ba chxia,
 na' chosh' chlall'gake' yella'.
¹⁵Tagake' chiljgake' daa gaogake',
 na' gonyesh'gake' do yel daa bi nelj nlla'gakile'.
¹⁶Per nad' goḷ inia' li', daa nako' beṅ' yel' wak
 choo yel' wak xen,
 na' shzil we'lawaa li' daa nako' beṅ' chiyes'h'alliii,
 la' lin' chakleno' nad',
 na' chap chwio' nad' lao diika' chak cha'.
¹⁷Goḷ inia' li', Chios cha', daa chono' nad' wal na' chkweejo'
 nad' kwenche kono bi goni nad'.
 Lin' le chakilo' nad', Chios cha'.

Salmo 60

¹Chios cha', ba wchoonlalloo neto',
 na' ba bi'o latj bnitnto' lo wdila' daa chlloo neto'.
 ;Bile'shi'gachi neto'!
²Ba bta bnibo' yell-lioni na' ba beno' ka bxa' btinan.
 Biyongach gana' ba nxa' ntin, la' ba chyinj chyellan.
³Ba bdio' neto' naknto' yell cho' lo yel' zak'zi'ka'.
 Na' yel' zak'zi'ka' daa ba bdio' neto' nakgakan ka
 daa chsoll chṅiti beṅ'.
⁴Bsi'nilo' beṅ'ka' chall chlleb li'
 kwenche lljakwash'gake' na' yilagake' lao beṅ'ka'
 nox' xis wixit'ka'.
⁵Bislagach neto' kon yel' wak choo yel' wak xen cho'na'
 daa naknto' yell cho', beṅ' le chakilo'.
⁶Chioza' wnie' gana' nak lill xlatje', wne':
 “Yiba yizakid' gon' lall' na'le yell-liona' mbani Siquema',
 na' lekzka' gon' lall' na'le leshaa le Sucot.
⁷Yell-lio Galaada' nakan cha', na' lekzka' yell-lio
 che Manaséza'.
 Yell-lio che Efrainna' zaklebin to daa chdosaa yichjaa
 na' chkweejan daa;

na' yell-lío che Judána' zaklebin yag bar cha'na'
daa chnabia'len'.

⁸Yell-lío che ben' Moabka' zaklebin sha'na' gana' yoll
nisa' chyib chxis' na'na';
na' lo yell-lío che ben' Edomka' wzałaa xel'ka',
na' yiba yizakid' daa ben' gan lao ben' filisteoka'."

⁹¿Non lljwa' nad' til-len' ben'ka' lle' yella' nechj zee wala'?
¿Non lljwa' nad' sha' Edoma'?

¹⁰Chios cha', lin' lljoo neto' shel'ka',
per ba wchoonlalloo neto',
na' bich chakleno' wen wdil chento'ka'.

¹¹Bislagach neto' lao ben'ka' chdil-len neto',
la' aga bi de gon yel' goklen che ben' yell-lioni.

¹²Daa gaklen Chioza' cho', dii xen dii gak goncho,
na' le' wlej wshoshje' ben'ka' chdil-lencho.

Salmo 61

¹Chios cha', bzenaggach dga chat'yoid' li'.

Bzenaggach cha' naa choe'llwill' li'.

²Gani zeelo chiyoll chido yell-lioni zoa' chnia' li',
la' le chakyeshii yichjlall'dawaani.

Bzoagach nad' to lo yaj sib gana' yila',

³la' lin' toshiizi ba bkwash' bkweejo' nad',
na' nako' ka to yoo sib wal dii nakcha
gana' chkwashid' ben'ka' chdil-len nad'.

⁴Chzelallaa soa' loo lill xlatjo'na' toshiizi,
na' wkweejo' nad' ka chon bana' zoa xilin chyellb
xiinbka' xan xilba'.

⁵La' li' Chios cha' ba bzenago' diika' bcheb' lawo'na',
na' len' ba beno' ka daa chkaa yog' ben'ka' chall chlleb li'.

⁶Be'gach latj idia ben' wnabia'na' bzo',
na' bi yiyoll yido yel' mban che'na'.

⁷Wzoashgo'ne' inabi'e toshiizi,
na' ben ka yel' chaki cho'na' na' dill' li cho'na' gap
wwiagachgakan le'.

⁸Na' goł inia' li' toshiizi,
na' lla kon lla gon' ka ba bcheb' lawo'na'.

Salmo 62

¹ Toz Chios cha'na' nzo'e' nad' mbalaz;
 na' lekzen' chisle' nad' lao dii nxollka'.
² Toze' le' nake' ka to yaj xen dii chkweejan nad' na' chisle' nad'.
 Na' len' chap chwie' nad' na' biga wi'e latj ibix'.

³ ;Bat yiyoll yido til-lenle nad'?
 Daa cheenile wlliyai'le nad'
 chonle ka chon ben' chlliyee to zee dii ba chyinj
 wa to leej dii ba zoa yillee.

⁴ Cheenzile yikwasle yel' w η abia' cha'na'.
Le chibaile we'le dill' wxiye';
 kon cho'a loll'lena' ch η able gak wen cha',
 per loo yichjlall'do'leka' chza'lall'le biz gak cha'.

⁵ Toz Chios cha'nan' nzo'e' nad' mbalaz;
 na' lekzen' chisle' nad' lao dii nxollka'.
⁶ Toze' le' nake' ka to yaj xen daa chkweejan nad'
 na' chisle' nad'.
 Na' len' chap chwie' nad' na' bi wi'e latj ibix'.

⁷ Chios cha'na' chisle' nad' na' len' chone' ka sho'a balaan.
Le' nake' ka to yaj xen daa chkweejan nad',
 na' ka to latj gana' wkwashaa kwenche kono bi goni nad'.
⁸ Le' ben' yell cha', li gon Chioza' lez toshiizi.
Li yee yog'lol diika' chak chele,
la' len' chap chwie' cho'.

⁹ Ben' yell-lioki aga bi zak'gake',
laa ben' wni'a laa ben' yesh'.
 Shi yog'lolgake' kwiagake' to lo xig' libr
 ni bi nakbia' shi bi llia lawinna'.

¹⁰ Bi gakkzile wzi'le banez diika' chzi' chkaale che
 ben'ka' chsak'zi'le,
 ni bi yibaile diika' chbanle che ben'.
La'kzi shi gakkchle ben' wni'a,
 bi gonle yel' wni'ana' lez.

¹¹ To daa wna Chioza', ba gok chop shii benida'n, na' ba nezid'
 li' Chios cha', nako' ben' yel' wak choo yel' wak xen,

¹²na' lin' napchgo' yeḷ' chakina'.
Na' lin' gonilo' beṇ' yell-lioni kon ka nak daa ben to toe'.

Salmo 63

¹Chios, lin' nako' Chios cha'.
Do yichj do lallaa chiyilj' li'.
Do ka nak' chzelall'chgaid' li'.
Chak cha' ka chak che to beṇ' chda to latj ga bibi
nis de na' chbiḷ chdechgaile'.
²Cheenid' yile'id' yeḷ' wak cho'na' len balaan xen cho'na',
ka ba ble'ida'n lill xlatjo'na'.
³La' yeḷ' chiyesh'lallii cho'na' zak'techin ka yeḷ' mbanna',
daan goḷ inia' li' kon cho'a lollaani.
⁴Shnon mban' we'lawaa li',
na' wḷis na'ki lawo'na' we'ḷwill' li'.
⁵Na' yelj sha'i yichjlall'dawaani,
ka beṇ' wdao to yeḷ' wao dii ḷiizeelo sia.
Na' yiba yizakid' we'lawaa li'.

⁶Ka ba dia lo blag cha'na' chjadinid' li',
na' yoo yichj' li' do yel.
⁷La' lin' chakleno' nad',
na' chiba chizakid' daa chap chwio' nad',
daa chono' cha' ka chon bana' zoa xilin chyellb
xiinbka' xan xilba'.
⁸Yichjlall'dawaani da'chgan li',
na' chakleno' nad' kon yeḷ' wak cho'na'.
⁹Beṇ'ka' cheeni witgake' nad' kwiayi'gake'
na' yillingake' gana' lle' beṇ' wetka'.
¹⁰Na' guetgakile' yesyaka' lo wdila',
na' ba zniaka' gaogakb legake'.
¹¹San nad', nzoa Chioza' chnabi'a, yiba yizakid' lawe'na',
na' yog' beṇ'ka' nxenilall'gake'ne', we'la'ogake'ne'.
Na' yillod' cho'a loll' beṇ' wxiye'ka'.

Salmo 64

¹Chios cha', bzenaggach wi'a dill' dga chak cha',
na' bislagach nad' lo ni'a na' beṇ'ka' chakzi' chakzbani
nad' na' ngooshebgake' nad'.

²Bkwash'gach nad' lao beṅ'ka' do ngash'zə chgoogake'
 x̄nezin gongake' mal ɕha';
 bislagach nad' lawi daa chwiagake' gongake' ɕha'.
³Dill' zibia'ka' chchej cho'a lolleeka'
 nakgakan ka yesya dii n̄la'tit daa chzoazi'yaa beṅ',
 na' nakgakan ka xiska' chzal' xis wix̄itaa diika' chaz zitj.

⁴Daa chbell chṅegake' ka n̄la' ka nte ɕhe beṅ'ka'
 bibi dol' ɕheyin de,
 chongake' ka beena' do ngash'zə chzaḷee xis ɕhe xis
 wix̄it' ɕhe'na' chzoazi'yee beṅ',
 na' tokonganzə chite'ne' ni bi chall chllebe' gakbe'i
 beṅ' daa chone'.

⁵Ganga chtip lall' ljwellgake' chgoogake' x̄nezi
 dii mala' gongake'
 na' chgoogake' x̄nezin wzegake' yalja' senan beṅ'
 tokonganz ga kono ile'i,
 na' nagake' niki no gakbe'zi.

⁶Dii mala' daa chgoogake' x̄nezin chakgakile' kono yiyiljni'an.

Per beena' nombia' yichjlall'do' beneɕha',
 le' gone' ka yila'lawi daa chongake'.

⁷Chioza' wseḷee yel' zak'zi' ɕhe'ka',
 na' tokonganzə sak'zi'gake'.

⁸Dill'ka' chchej cho'a lolleeka'tezə wlliaiyi'n ḷegake',
 na' yog' beṅ'ka' ile'i ka gak ɕhegake' wxillgakile' ḷegake'.

⁹Na' yog'loḷ beṅ' lle' yell-lioni gall illebgake' Chioza'
 na' we'gake' dill' ka nak diika' ba bene',
 na' segake'n wṅeyi.

¹⁰Yiba yizakchgayi beṅ'ka' chon daa nak sh̄li lao
 X̄ancho Chioza',
 na' gongake' lez gap wwie' ḷegake'.
 Yog'loḷ beṅ'ka' ngoosh̄ilallii we'la'ogake'ne'.

Salmo 65

¹Chios ɕha', chidoloo shajlawoo yell Siónna',
 na' gonnto' yog' daa ba b̄chebnto' lawo'na'.

²Li' chzenago' kat' choe'l̄willnto' li',
 na' yog'loḷ beṅ' yidgake' lawo'ni.

³Dii malka' bennto' btakw b̄chejan neto',

per li' ba bizi'xeno' saaxya chento'ka'.

⁴Chakomba beena' ba gox wnabo' kwenche soe'
lesh' lill xlatjo'na'.

Gakshga loo yichjlall'do'nto'ki to lla' dii wenka'
de lill xlatjo'na'.

⁵Chios cha', lin' chislo' neto'.

Li' chzenago' chento' na' chakleno' neto' kon yel' wak
cho'na' daa chon ka chibani ben'.

Na' lin' nxenilall' yog'lol ben' lle' zbii zkaan yell-lioni.

⁶Lin' nzoachecho' yaa yelka'

kon yel' wak choo yel' wak xen cho'na'.

⁷Chbekllio' nisdona' daa chas chat'

len sshag daa chon bli cheyinna'

na' yel' chakleshii che ben' yell-lioka'.

⁸Na' ben'ka' lle' axt gana' nak zit' wal chall chllebgake'
ka nak yel' wak choo yel' wak xenka' chono'.

Li' chono' ka chiba chizaki yog'lol ben'

ka ben' lle' gana' chla' wbilldo'na' na' ka ben'

lle' gana' chxoalan.

⁹Li' chap chwio' yell-lioni na' chyililo'n nis yej cho'na';

na' chono' ka chiya dii chashj chleban.

Yog'lol yao cho'ka' chono'n chochj chlalj nisa',

kwenche gat' kwe' daa yeej gao ben'.

Na' ka' chonshawo' lo yell-lioni.

¹⁰Chono' ka chiyaalli lo nana',

na' chiyono'n tlap.

Chzaallilo'n nis yej cho'na',

na' chonleeyo' diika' chaz chbekgake' lawinna'.

¹¹Lin' chzio' bejka' chon chochj chlalj nis yeja',

na' chat' chbe'chga daa chizi' chilap ben'

¹²na' chashj chleb yix ga'ka' gana' nak latj llib,

na' yaa yaoka' chakgakan shi'a shga'.

¹³Lesh'ka' lli'a lo yaaka', tolla' chakan bayix'ka',

na' tlesh'ka' xoapapan daa naz ben'.

Na' daa chiba chizakgakin axt chol chnegakan.

Salmo 66

¹Li gol ine Xancho Chioza',

na' li yiba yizaki lawe'na'

yog'le le' zoale doxen yell-lioni.

²Li gol inie' daa nake' ben' zakii nlel!

Li we'lawee, li kwee balaan choo balaan xen.

³Li yee Chioza':

“iDiika' chono', chonan ka chibanchgainto'!

Na' daa napo' yel' wak choo yel' wak xen,
axt chall chlleb ben'ka' chakzi' chakzbani li'.

⁴Yog'lol ben'ka' lle' doxen zbii zkaan yell-lioni
choe'la'ogake' li',
na' chol chnegake' li'.”

⁵Li da, na' li wwia ka nak diika' ba ben Chioza',

la' dii chon ka yibanicho nak yel' wakka' ba bene' kwenche
goklene' cho' ben' yell-lion.

⁶Bsalje' neza' loo nisdona' na' loo yawa'

na' wdegake' lo yo billa'.

Yiba yizakshgaicho ka nak daa chone'.

⁷Chnabia'lene' yel' wak xen che'na' toshiizi;

na' chwie' yellka' gana' lle' ben'ka' bi nombia' le' kwenche
ki ichej ben' yizoshi'ene'.

⁸Li we'la'o Chioza', ka le' lle'le yog' yellka',

li gon ka yeni yog'lol ben' daa che'lene' kat' choe'la'olene'.

⁹La' ba wdapshi'e yel' mban chechoki,

na' bi bi'e latj biz gak checho.

¹⁰Chios cha', ba bdio' neto' lo yel' zi'na',

na' ba biyonshawo' neto' ka plata' daa chde lo yi'na'
kwenche chakan dowalj.

¹¹Beno' ka btilnto' dii lallja',

na' beno' chento' ka to ben' noa' to dii zii dii zshab.

¹²Bi'o latj blej bshoshj ben' neto';

btilnto' dii nxollka', gok chento' ka ben' wde lo yi'
na' ka ben' wde to yao xen,

per naa ba beno' ka ba chiyak wen chento'.

¹³Na' sho'a lesh' lill xlatjo'na', wzey' bayix'do'ka' lawo'na',

na' gon' yog' diika' ba bcheb',

¹⁴diika' bcheb' lawo'na'

kana' chda' lao dii nxolla'.

¹⁵Na' wzey' lawo'na' bayix'do'ka' chakshao'lallii,

na' wit' lawo'na' xil' mashka' len goonka' na' shib mashka'.

¹⁶Li da, ka le chall chlleble Xancho Chioza'

na' li wzenag ka nak diiki ba bene' cha'.

¹⁷Kon cho'a lollaani be'lwillee na' be'lawaane'.

¹⁸Shel' loo yichjlall'dawaani chzelallaan dii malka',
aga bzenag Xancho Chioza' cha' shel'ka'.

¹⁹Per ba bzenague' cha' na' ba bene' diika' wñabidee.

²⁰Choe'lawaa Chios cha'na'

daa bi bdegone' daa goshee,

ni bi blonile' nad' yel' chaki che'na'.

Salmo 67

¹Xancho Chioza' yiyesh'lall'gachile' cho', na' gonleeye' cho',
na' ile'shiile' cho',

²kwenche yog'lol ben'ka' lle' lla' yell-lioni
gombia'gake' xneze'na' na' yisle' legake'.

³¡We'la'oshga yog'lolte ben' li', Chios cha'!

¡Yog'lolte ben' we'la'oshgue' li'!

⁴Yiba yizakshgayi ben'ka' lle' yog' yellka',

la' lin' chñabi'o yog'lol ben' kon ka chiya',

na' chsi'o xñezi che yog'lol yellka' lle' lo yell-lioni.

⁵¡We'la'oshga yog'lolte ben' li', Chios cha'!

¡Yog'lolte ben' we'la'oshgue' li'!

⁶Yell-lioni gashj ileban dii yeej gao ben',

la' Chios chechonan' gonleeye' cho'.

⁷Chioza' gonleeye' cho',

na' yog'lol ben' lle' doxen yell-lioni gall illebgake' le'.

Salmo 68

¹Bli'gach yel' wak cho'na', Chios cha', kwenche ga gaz

yikaa twej twej ben'ka' chwiyi li',

na' ben'ka' chakzi' chakzbani li' yikaa xñezgake'.

²Na' yinitlogake', ka llenna' daa chinitlo lo llazø.

Na' ka chak che sera' daa chilēn lo yi'na'
kan' kwiayi' beṅ' malka' lao Chioza'.

³San beṅ' li beṅ' shao'ka' yiba yizak'gakile' lao Chioza';
na' gat' ye! xaba xen inleeb chegake'
na' axt wxit'gake' daa le yiba yizak'gakile'.

⁴Li we'la'o Xancho Chioza' na' li gol inie';
li we'la'o beena' chda lo bejka'.
Li yiba yizaki daa nombia'le Xancho Chioza'.
Li yiba yizaki lawe'na'.

⁵Chioza', beena' zoa gana' nak lill xlatje',
len' nake' xa beṅ'ka' bi zoa xaxna'yin,
na' lekzen' chaklene' nool wizebka'.

⁶Beena' kono zoa cheyin, Chioza' wi'e to lill xlatje' gana'
zoa beṅ'ka' kwell inelene';
na' chisell chilēe beṅ'ka' nak lall' na' beṅ' zit'ka', na'
chone' ka chiyak wen chegake';
san beṅ' widenagka' soagake' gana' bibi chashj chleb.

⁷Li', Chios cha', kana' bibialo' lao beṅ'ka' nak yell cho',
na' bigooleno'gake' nez gana' bibi chashj chleb.

⁸Na' wxo' wṅibə lo yell-liona',
na' byalj nis yeja' xan yabana',
na' Yaa Sina'na' wxo' wṅiban lao Chioza',
beena' nak Chios che beṅ' Israelka'.

⁹Li', Chios cha', wdil-leno' nis yej cho'na'
axt ka biyaalli yell-liona' bchebo' gono' chento',
na' biyashj bileban sto shii.

¹⁰Beṅ'ka' nak yell cho' ba bi'o to latj chegake' gana'
noni lill xlatjgake';
na' ye! beṅ' wen cho'na', Chios cha', ba bi'o daa
chyallj chchini beṅ' yeshaa.

¹¹Xancho Chioza' bi'e dill' ka gak,
na' beṅ' zan be'gake' dill' cheyin, wnagake':

¹²“iBeṅ' wṅabia'ka' na' wen wdil che'ka' ikaa xnezgake'!”
Na' yog' daa bikaagake' che beṅ'ka' bengake' gan lo
wdila' chilaa nool che'kan' lille'ka'.

¹³La'kzi bgaanle gana' lle' xil'ka',
wakwle lech' daa chey cheeni'
ka xil palom daa nazj plat,

na' ka xtob'b daa nazj or.

14 Chioza', beena' nak beṅ' yeḷ' wak choo yeḷ' wak
xen, blague' beṅ' wṅabia'ka',
na' gok ka chak kat' chxop beyaa lo Yaa Salmónna'.

15 Yaa yeḷ' nak yaaka' lle' Basánna',
na' sib wal nak lawinka'.

16 Le' nakle yaa sib wal,
¿Berache chakxe'zile yaana' wlej Chioza' goni lill xlatje'?
Dii licha Chioza' gonin lill xlatje' toshiizi.

17 Karretka' chseḷ' Xancho Chioza' lo wdila' nakan dii be
dii zil na' kono ibabgakin.
Xancho Chioza' zizee lo yaa Sinaína' kwenche soe'
gani non lill xlatje'.

18 Na' ka biyepo', Chios cha', zinchi'o beṅ'ka' beno' pres.
Na' chzi' chkoo daa chidoḷ'gake' gongake' li',
na' axt beṅ' widenagka' chyixjgake',
kwenche ka' so' ladje'ka'.

19 Choe'lawaa Xancho Chioza', beena' ba bisle' cho',
lla kon lla chaklene' cho' chkwase' dii lallj chechoka'.

20 Chios chechona' nake' to Chios beṅ' chisla cho'.

Na' wak yisle cho' lao yeḷ' wita'.

21 Chioza' wlej wshoshje' beṅ'ka' chakzi' chakzbangakile'ne'
na' lekzka' beṅ'ka' lillinzi chongake' dii mala'.

22 Xancho Chioza' ba wne':

“Gon' ka yilleshle gana' mbani Basánna',
na' gon' ka yilleshle gana' de nido'na' daa nak sitj wal,

23 kwenche yidleej ni'aleka'

loo xchen beṅ'ka' chakzi' chakzbani le',
na' xikw'leka' wleegakb xchene'ka'.”

24 Chios cha', beṅ' chṅabia' nad',
toshinla' zaak beṅ'ka' shnez gani zoa lill xlatjo'ni.

25 Beṅ'ka' chol chne li' llialogake'

na' lii note bi' nool wew'ka' chsillgakb' pandéroka',
na'tech no wikwellka'.

26 ¡Yog'loḷtele, li we'la'o Xancho Chioza'!

¡Yog'loḷtele le' beṅ' Israel ndop nllagle, li we'lawee!

27 Na' lawe'ka' llialo xiin dia che dii Benjamínna',
 ben' neshatech,
 na' no ben' wñabia'ka' nak xiin dia che dii Judána', che dii
 Zabulónna', na' che dii Neftalína'.

28 Chios cha', ¡bli'gach yel' wak cho'na',
 ka daa ba bliilo' neto' kana'!

29 Ni che lill xlatjo'na' daa zoa Jerusalénna',
 chidwa' ben' wñabia'ka' diika' chzangakile' gongake' li'.

30 Bsheshlen ben' Egíptoka', ben'ka' nak ka ba
 zniana' chda loo guulla',
 ben'ka' nak ka xonj goon znia na' nche'te xiinbka', baka'
 zaklebi ben'ka' lle' yellka' sto.

Bsheshlengake' axt ki wlexj yichje'ka', na' yidwa'gake'
 dii zakii lawo'na'.

¡Bengach kwenche ga gazə lljsoa' ben'ka' le chibayi wdiła'!

31 Na' yid ben'ka' wsel' beena' chñabia' Egíptona',
 na' ben' Etiopíaka' wlis neeka' we'lwillgake' Chioza'.

32 ¡Li goł ine Chioza', le lle'le yog' yellka' llia lo yell-lioni!
 Li goł ine Xanchona',

33 beena' chda xan yabana',

yabana' daa de kani'teyi,

na' ka chñie', shi'ena' nenan ka'kzə ga chashj chtin.

34 Li we' dill' ka nak yel' wak che Chioza',

beena' chñabia' doxen yell Israeli,

na' yel' wak che'na' nla'n xan yabana'.

35 Chios cha', li' chidołoo shoo balaan loo lill xlatjo'na'.

Chios che ben' Israelka', cho'e legake' yel' wak na' chone'
 legake' wal daa nakgake' yell che'.

¡Shajla'oshga Chioza'!

Salmo 69

1 Bislagach nad', Chios cha',

la' ba chak cha' ka ben' kwe' yel,

2 ka ben' chaz loo guull' gana' zitj,

na' bi ga de yizoachech ni'ena'.

Na' chak cha' ka chak che beena' ba bllin gchoł yawa'
 gana' nak zitj na' ba choa'n le'.

- ³ Ba chidolallaa chosyaadia',
 na' axt ba nej yen'ni;
 ba chetyaa jalaw'ki daa chwia' galə za' Chios
 cha'na' gaklene' nad'.
- ⁴ Zanchlə beṅ'ka' chakzi' chakzbani nad' aga ka yish' yichj'ki.
 Beṅ' zan chakzi' chakzbani nad' na' cheengakile' wlliyi'gake'
 nad' la'kzi bibi ben' chegake'.
 Na' chongake' byen chixj' daa bi wxi' wlan' chegake'.
- ⁵ Chios cha', li' nezilo' ba gok' to beṅ' bi nteyi na' biya dii ben',
 na' aga wak wkwashid' li' saaxyaka' ben'.
- ⁶ Chios cha', beṅ' yel' wak choo yel' wak xen,
 bi igaangach beṅ'ka' nxenilall' li' yel' zto' ni cha' nad'.
 Chios, beṅ' nak lall' na'yi neto' beṅ' Israel,
 aga ni cha' nad' gak yel' zto' che beṅ'ka' chiyilj li'
 do yichj do lall'gake'.
- ⁷ Daa nonlilallaa li', dii zan ba ben wna beṅ' cha';
 na' ba bsi'gake' nad' yel' zto'.
- ⁸ Na' nak' ka beṅ' zit' lao beṅ' bish' golj'ka',
 na' chongakile' nad' ka beṅ' bi nombia'gake'.
- ⁹ Daa le chakid' lill xlatjo'na' len wlliyi'n nad';
 na' daa wchell wne beṅ' cho' bzoan nad' zibia'.
- ¹⁰ Kat'ka' chbell' na' zoa' wbas', chtitjgakile' nad';
- ¹¹ na' shi chakw' lech' daa chakw beena' chet to bish'
 ljwellin, na' chxilli yog' beṅ' nad'.
- ¹² Kon to cho'a xtilaana' xoa cho'a loll' beṅ',
 na' beṅ' weezoka' choljgake' daa chak cha'.
- ¹³ Per nad', Chios cha', lin' chnabid' gakleno' nad'.
 Chios cha', jgoklen nad' naa!
 Daa naklikzo' beṅ' chiyeshlallii, jbengach dga chnabid' li''
 Na' daa toshiizi chono' ka no', jbislagach nad''!
- ¹⁴ Bi wsanlalloo nad' lawi daa chak cha'.
 Bislagach nad' lao beṅ'ka' chwiyi nad'
 na' lawi dii nxollka' chak cha'.
- ¹⁵ Bi wi'o latj gak cha' ka beṅ' ba noa' yao.
 Ni bi wi'o latj gak cha' ka beṅ' chxop gana' chdob
 nisa' na' cheban le',
 ni bi wi'o latj wwakwgake' nad' yona' loo bana'.

- 16 Chios cha', bengach dga chnabid' li',
 daa nako' ben' wen na' napo' yel' chaki.
 Daa naklikzo' ben' chiyeshlallii, bwiagach nad'.
 17 Bi kwejichjo' nad'.
 Btagach lalloo gakleno' nad', daa zoa' lao dii nxolla'.
 18 Da diyaklengach nad', na' bisla nad'.
 ;Bisla nad' lao ben'ka' chakzi' chakzbani nad'!
 19 Li' nezilo' ka ba wnegake' cha',
 ka yel' zto'na' ba bsi'gake' nad',
 na' ka bnit bdegake' nad'.
 Li'kz nezilo' no ben'ka' chakzi' chakzbani nad'.
 20 Diika' chbell chnegake' cha' ba bzoazi'yaan
 yichj'lall'dawaani;
 na' bich bi nan gon' daa le nyesh' zoa'.
 Ni tlish'ga ben' bi bchej yiyesh'lallile' nad',
 ni togagake' bi biyonxenlall'gake' nad'.
 21 Bwaogake' nad' yel' wawa' nchxigake' yierba'
 na' ka wbilid' bweejgake' nad' daa nak zichj' zla'.

 22 Yiyakshga lni che'ka' daa chakgakile' wen
 ka to yalj dii wzapan legake' na' wlliyai'n legake'.
 23 Bengach ka icholgake'
 na' isis ni'eka' toshiizi.
 24 Bsak'zi'gachgake' daa chllaagako'ne';
 na' yel' chllaa cho'na' yidolin legake'.
 25 Yidesh yiloashga' lill xlatje'ka',
 na' ni stogake' bich soan
 26 daa chlagdogake' beena' ba bsak'zi'o,
 na' chxillgakile'ne' daa ba bsak'zi'one'.
 27 Bsak'zi'gachgake' ka ba bsak'zi'gake' ben',
 na' bi si'xeno' chegake'.
 28 ;Bsol bnit lie'ka' lee libr cho'na' gana' da' le ben'ka'
 de yel' mban cheyin!
 Na' bi ta' lie'ka' gana' da' le ben'ka' nak ben' li ben' shao'.
 29 Na' nad', bi zoa' wen na' zoa' nyesh',
 goklengach nad', Chios cha', na' bisla nad'.

 30 Gol inia' we'lawa Chioza';
 na' we'lawaane' wi'ane' yel' choxken.
 31 Na' Xancho Chioza' wibachilen
 aga ka daa wi'ane' to goon wa to me'do' do ka nakb.

- 32 Na' beṇ'ka' zoa nyesh' yiba yizakgakile' ka ile'gakile'
 ba goklen Chioza' nad',
 na' wtiplall' beṇ'ka' choe'la'o le'.
- 33 La' Xancho Chioza' chzenague' che beṇ' yesh'do'ka'
 na' bi chonile' nakzi beṇ'ka' nak lall' nee, beṇ'ka' zoa nyesh'.
- 34 Yaba, yell-lío na' nisdó', na' yog'lo-le le' lle' lla'le lawinka',
 li we'la'o Xancho Chioza'.
- 35 La' Chioza' yisle' beṇ'ka' lle' Jerusalénna' daa
 llia lo yaa Siónna',
 na' yilise' yellka' mbani Judána',
 na' soagake' na', na' gakin chegake'.
- 36 Xiin dia che beṇ'ka' beṇ'ilall'gake'ne' gakin chegake',
 na' beṇ'ka' chakgakile'ne' soagake' lawinna'.

Salmo 70

- 1 Chios cha', jbtagach lalloo, yidslo' nad'!
 Bi sha'ilo' yidyakleno' nad', Chios cha'.
- 2 Beṇ'ka' cheeni wit' nad'
 si'gachgake' ye! zto'.
 Beṇ'ka' cheeni gon mal cha'
 yikaa xnezgake' do chiyi chidozgakile'.
- 3 Beṇ'ka' chtitj chxilli nad'
 yikaa xnezgake' na' si'shgagake' ye! zto'.
- 4 Na' yog' beṇ'ka' chiyilj li', yiba yizakgakile'.
 Na' yog' beṇ'ka' cheengakile' yislagako'ne' toshiizi inagake':
 "Beṇ' choo beṇ' xen nak Xancho Chioza'."
- 5 Nad' nak' beṇ' yesh'do', na' bi chak wen cha'.
 Chios cha', btagach lalloo gakleno' nad'.
 Lin' chakleno' nad' na' chislo' nad';
 bi sha'ilo' gakleno' nad', Chios cha'.

Salmo 71

- 1 Chios cha', lin' nxenilallaa gap wwio' nad';
 bi we'gacho latj sia ye! zto'.
- 2 Bislagach nad', la' lin' chono' daa nak shli.
 Bzenaggach cha' na' bisla nad'.
- 3 Gokgach ka to yaj xen

gana' gak wkwashaa bat'tez kwenche kono bi goni nad'.
 Bislagach nad', la' lin' nako' ka to yaj xen daa chkweejan nad',
 na' ka to yoo dii nak cha gana' kono gak sho' bi goni nad'.

⁴ Chios cha', bisla nad' lo ni'a na' ben'ka' bi chall chlleb li',
 ben'ka' nak ben' mal, na' naktegage' ben' zesh' ben' zban.

⁵ La' kana' naktia' ben' wew' non' li' lez, Chios cha',
 na' lin' nxenilallaa.

⁶ Kana' ni yootia' loo lee xna'na', ba chakleno' nad',
 na' li'kzan ba wdap bwio' nad' ka goljtia'.
 Toshiizi we'lawaa li'.

⁷ Ben' zan ba bibani ka diika' ba gok cha',
 per li', toshiizi ba bkwash' bkweejo' nad'.

⁸ Kon ka chzoa xena' axt ka chal, choe'lawaa li'
 kon cho'a lollaani,
 na' chgwaa li' balaan.

⁹ Bi choonlalloo nad' kat'ka' ba nak' ben' gol;
 ni bi kwey yichjo' nad' kat' bich bi gak gon'.

¹⁰ Ben'ka' chakzi' chakzbani nad', cheengakile'
 gongake' mal cha',
 ba nshagui ljwelle' na' chgoogake' xnezin witgake' nad'.

¹¹ Na' che'gake': "Li ljaye'le' na' li goxee,
 la' Chioza' ba wchoonlalleene'
 na' kochno zoa yisla le'."

¹² iBi wlaala'ogacho' nad', Chios cha';
 bi shagachilo' yidyakleno' nad'!

¹³ iBen'ka' chakzi' chakzbani ye'l' mban cha'ni
 si'gach'gake' ye'l' zto' na' kwiayi'tegake'!
 iBen'ka' cheeni gak mal cha',
 si'gachgake' ye'l' zto'!

¹⁴ San nad' toshiizi gon li' lez
 na' zizikli' we'lawaa li'.

¹⁵ Kon ka chzoa xena' axt ka chal, wi'a dill' daa ba bislo' neto',
 na' che dii wenka' ba beno' chento',
 la'kzi bi chbabgakida'n.

¹⁶ Wi'a dill' che ye'l' wak choo ye'l' wak xenka' ba
 beno', Chios cha';
 na' wi'a dill' lin' nako' ben' li' ben' shao'.

17 Chios cha', lin' ba bli' bsedilo' nad' kana' naktia' ben' wew',
na' axt naa ni cho'a dill' che yog' diika' chonleno' yel' wak
cho'na' diika' chon ka chibani ben'.

18 Chios cha', bi choonlalloo nad' kat' ba nak' ben'
gol na' ba wbezaa.

La' ni de wi'a dill' ka nak yel' wak choo yel' wak xen cho'na'
lao ben'ki zoa naa na' lao dia che'ka' zi' za'.

19 Na' yel' li yel' shao' cho'na', Chios cha',
nakan dii choo dii xen ka yabana'.

Li' ba beno' yel' wak choo yel' wak xenka',
na' koch no zoa ka li'.

20 La'kzi bi'o latj wdia' lao dii zedka' diika' bi
bzoa nad' wen,

li'kz gono' ka yiyak wen cha' sto shii,
na' yislo' nad' lao yel' wita'.

21 Na' gono' ka shooch' balaan xen
na' yiyonxenlalloo nad' sto shii.

22 Chios cha', daa toshiizi chono' ka no',
we'lawaa' li' kon diika' lia kwerd cheyin.
Chios cha', lin' nako' Chios che neto' ben' Israel.

23 Yiba yizakid' we'lawaa li' kon cho'a lollaani
na' do ka naktia', daa ba bislo' nad'.

24 Na' lekzka' kon ka chzoa xena' axt ka chal,
wi'a dill' daa nako' ben' li ben' shao',
la' ben'ka' goklall' gak mal cha' ba wxi'gake' yel' zto'.

Salmo 72

1 Chios cha', bli'gachi beena' ba bzo' inabi'e neto'
kwenche gone' daa nak shli, ka chono'.

2 Na' ka' wchogbi'e ka chiya' gak che to to neto'
naknto' yell cho'
na' che ben' yesh'do'ka'.

3 Doxen gana' chnabi'e soashgagake' mbalaz
na' gat' daa nak yel' li yel' shao' ladje'ka'.

4 Na' beena' chnabia' gaklene' ben' yesh'ka',
na' yisle' ben'ka' kono zoa gaklen legake',
na' wlliaeye ben'ka' chchi' chsak' ben'.

⁵Toshiizi inabi'e.

Shlak ni chzeeni' wbillá' len beo'do'na' inabi'e.

⁶Gongache' ka gak wen che yell che'na',

ka chon nis yeja' na' xelj zaga', chyilgakan lo yell-lioni
len diika' chashj chleb lawinna'.

⁷Na' soa ben'ka' chnabi'e mbalaz

na' gat' daa nak yel' li yel' shao' ladje'ka' shlak inabi'e,
axt ni ka te che beo'do'na'.

⁸Na' inabi'e dezd gana' chxe niso'dna' axt gana'

zeelo chiyollan,
na' lekzka' gana' chxe yao Éufrateza' axt gana' zeelo
chiyoll chido yell-lioni.

⁹Na' ben'ka' chakzi' chakzbangakile'ne', ben'ka' lle'
gana' bibi chashj chleb,

wchek' xibe'ka' lawe'na' yiyonyesh'gake'.

¹⁰Na' beena' chnabia' Társiza' na' beena' chnabia'

ben'ka' lle' cho'a niso'dna',
len ben'ka' chnabia' Sabána' na' Sébana',
yidwa'gake' lawe'na' daa chzangakile'
na' daa chido!gake' chixjgake'.

¹¹Yog'lol ben' wñabia'ka' wchek' xibe'ka' lawe'na',

na' ben'ka' lle' yog'lol yellka' wzoagake' xtillee.

¹²La' len' yisle' ben' yesh'ka', ben'ka' chñab yel' goklenna',

na' ben'ka' kono zoa gaklen legake'.

¹³Yiyesh'lallile' ben'ka' chyalji yel' goklenna'

na' yisle' yel' mban che'ka'.

¹⁴Yisle' legake' lo na' ben' zesh' ben' zbanka'

chsak'zi' legake',
la' yel' mban che'ka' nakan to dii zakii lawe'na'.

¹⁵Beena' chnabia' ibanshgue' ssha!

We'shgagake'ne' ora' daa za' Sabána'.

Na' bi wsangake' inabgake' che' lao Chioza'

kwenche gak wen che' toshiizi.

¹⁶Gat' kwe'shga daa yizi' yilapgake' doxente gana' mbanile';

gashj ilebgachan lo yaaka',

ka chashj chleb diika' chazgake' gana' mbani Líbanona';

na' seshga do zan inleeb lawinka' ka lle' lla' yix'ka' lyixaa.

¹⁷Lljadinshgagakile' toshiizi beena' chnabia',

na' seshgayi che' toshiizi axt kat' te che wbillá'.

Yog'lo! ben' lle' doxen zbii zkaan yell-lioni gak
 wen chegake' ni che',
 na' inagake' che': “¡Chakomba beeni!”

¹⁸We'la'oshga yog' ben' Chioza', beena' nak Xancho,
 cho' ben' Israel,

beena' zeelo chon diika' chon ka chibani ben'.

¹⁹Toshiizi we'la'oshga ben' Xancho Chioza',
 beena' nak ben' choo ben' xen,
 na' doxen yell-lioni wli'lao balaan xen che'na'.
 Kan' gakan.

²⁰Ni chiyoll xtill' dii Davína', xiin Isaína', daa
 be'lwille' Chioza'.

Libr wyoni

(Salmos 73—89)

Salmo 73

¹Dii licha, wen inleeb choni Chioza' neto' ben' Israel,
 neto' chzenagnto' che' do yichj do lall'nto'.

²Per ka nak nad', zi lat'zə ki wlaa lo xnez Chioza',
 na' ixop' lao dii mala',

³daa wzelallaa gak wen cha' ka chak che ben' cha'sibka',
 ka ble'id' le wen chak chegake', len naktegage'
 ben' wen dii mal.

⁴Bibi de dii nzoazi'yaan legake';
 na' mbalaz zoagake' shi'a shao'.

⁵Aga bi dii zed chen chle'gakile' ka chak che ben' yoblə,
 ni bibi yel' zak'zi' nombia'gake'.

⁶Chli' chze chegake' nakgake' ben' cha'sib,
 na' bi chiyii chidogakile' chli' chzegake' yel' zesh'
 yel' zban che'ka'.

⁷Loo yichjlalldoe'ka' lle' llan' dii mala' axt llian cho'alawe'ka',
 na' wdeteli lawin nakgake' ben' mal.

⁸Chtitj chtangakile' ben', na' chbell chnegake' zban chegake';
 nakgake' ben' cha'sib na' chgooshebgake' ben'
 gongake' mal chegake'.

⁹ Chbell chnegake' che Chioza', beena' llia yabana',
na' lekzka' chbell chnegake' che ben'.

¹⁰ Na' le chak che ben' yell-lioki chegake'
na' chajle'tezgake' daa che'gake'.

¹¹ Na' ben' malka' nagake': Chioza', beena' nak liizelozi
ben' choo ben' xen,
bi nez nle'ile' dga choncho ni bi chakbe'ile'.

¹² Ben' malki,
aga bi yel' zak'zi' chen chle'gakile',
na' zizikli chgol yel' wni'a che'ka'.

¹³ Na' nad' chakid' bikz bi zejın nxi nych yichjlall'dawaani,
na' chon' daa nak wen.

¹⁴ La' toshiizi chen chle'id' yel' zak'zi'ka'.

¹⁵ Shel' nad' wnia' ka chnegake',
na' bxinj blen' yichjlall'do' ben'ka' nak xiino', shel'ka'.

¹⁶ Ka ben' to dii byen shajniid' dga, lallj inleeb gokidaan,

¹⁷ axt galjch wyo'a gana' choe'la'ocho Chioza',
kana'ch wyajniid' ka gak che ben' malka'.

¹⁸ Dii lıcha ba bzo' legake' lo neza' gana' ibixgake',
na' ba bdegako'ne' gana' kwiayi'gake'.

¹⁹ Tokonganzi illin lla kwiayi'gake',
na' dii wal inleeb gall illebgake' ka guetgake'.

²⁰ Ka to yel dii wneyi ben' na' bi chjtınile' bin nan,
ka' gak ben' malka' lawo'na', Chios cha', bi lljadinilo' legake'.

²¹ Le zi' goki yichjlall'dawaani daa chwia' chak wen
che ben' malka',

na' le gokyeshiin.

²² La' daa bi wyajniid' gok' ka bayix',
ba bi nteyi lawo'na'.

²³ Per toshiizi zoaleno' nad' na' chakleno' nad'.

²⁴ Li' ngoo nad' lo nez li cho'na',
na' wllin lla koo nad' balaan.

²⁵ ¿Noran zoa yabana' gaklene' nad' shi aga lin'?
Na' daa zoaleno' nad' bichbi de lo yell-lioni dii chzelallaa.

²⁶ La'kzi chax' chde che beli chen cha'ni,
Chioza' chtipe' lallaa, na' len' zoalene' nad' toshiizi,
na' bich bi chyalj chchinid'.

27 Ben'ka' chlaala'o li' kwiayi'gake',
 na' wlliyoo ben'ka' bi chzoa xtilloona'.
 28 San nad', goni Chios cha'ne',
 la' lennan' zeelo nak dii wen.
 Non' lez gap wwia Xancho Chioza' nad',
 na' wi'a dill' che yog' diika' ba bene'.

Salmo 74

1 Chios cha', ¿biche ba wchoonlall'zo' neto'?
 ¿Atoshiizin illoo neto' naknto' lall' no'?
 2 Jadini daa ba zejteyi wlejo' neto' kwenche naknto' lall' no',
 na' bislo' neto' kwenche gaknto' yell cho'.
 Jadini yaa Siónni gani non lill xlatjo'.
 3 Dakachi wi'o gana' gok lill xlatjo', ba bido bilenan wlliyai'.
 Ben'ka' chakzi' chakzbani li' ba bchinjgake'n.
 4 Na' besyaagake' gana' wche' lill xlatjo'na' daa
 chibagakile' ba bengake' gan,
 na' ba bzoagake'n bander che'ka'.
 5 Bengakile' lillo'na' ka ben' chxoxj chtin yag wag
 ga lle' lla' yag.
 6 Kon yowag na' kon marr bcoxj btingake' yog' diika' nak de
 yagla', diika' bli'n xochi loo lill xlatjo'na'.
 7 Bzey btegage' lill xlatjo'na',
 na' bnitgake' balaan che latja' gana' zo'
 na' bido bilenten bchinjgake'.
 8 Na' bchoglall'gake' yisol yinitgake' neto';
 na' bzeygake' yog'lojte latjka' gana' chdop chllagnto'
 choe'la'onto' li' gani mbaninto'.
 9 Bich bi de dii chli'n zoakzo' ladjnto'ni;
 ni sto ben'ka' chyixjee daa chi'o legake' bich zoa,
 na' ni bi nezinto' bat yiyoll yido diiki chak chento'.
 10 Chios cha', ¿bat yiyoll yido wtitji ben'ki chakzi'
 chakzbani neto'?
 ¿Bat yiyoll yido kwell inegake' zban cho'?
 11 ¿Biche ki chli'o yel' wak choo yel' wak xen cho'na'
 na' gakleno' neto'?
 ¿Biche bikz bi chono'?
 12 Kani'teyi lin' chnabi'o nad', Chios cha';

na' lin' chislo' ben' yell-lioni.

¹³ Lin' beno' nisdo'na' choplə kon yel' wak choo
yel' wak xen cho'na',

na' bliayoo ba zniaka' chda loo nisdo'na'.

¹⁴ Blej bshoshjo' yichjbka',

na' bzaalo legakb lao ba zniaka' lle' gana' bibi chashj
chleb na' wdaogakb legakb.

¹⁵ Li' beno' ka gol nisa' loo bejdo'ka' na' byalj yaoka',
na' bzeejo' yao xenka'.

¹⁶ Lin' wloo tellana' na' wala'
na' lin' bzo' bewaa na' wbillla'.

¹⁷ Lin' wloo bia' gana' zeelo biyoll yell-lioni
na' lekzka' wloo la'o bana' na' beo'ka' chbe' dii zaga'.

¹⁸ Bi gal-laloo, Chios cha', ka bitiji ben'ka' chakzi'
chakzbani li',

na' ka zban wne ben'ka' bi nteyi cho'.

¹⁹ Bi we'gacho' latj gaknto' lall' na' ben'ka' nak ka bell znia,
daa naknto' ben' gaxjlall' ka to ngolbex.

¡Bi gal-laloo ka chzak'zi'nto', neto' naknto' yell cho'!

²⁰ Jadini daa bchebo' gono' chento',
la' gani mbaninto', axt gana' zeelon,
lle'chgan ben' zesh' ben' zban.

²¹ Bich wi'o latj beena' chzak'zi' si'e yel' zto'.

Ben kwenche ben' yeshaa na' beena' chzak'zi' we'la'ogake' li'.

²² ¡Bli' yel' wak cho'na', Chios cha'!

Wzoshyi' ben'ka' chllaa li'.

Jadini ka chon ben'ka' bi nteyi chbell chnegake' cho' yog' lla.

²³ Bi gal-laloo belbanna' chgoo ben'ka' chakzi' chakzbani li',
na' diika' zekizezi chbell chnegake' cho'.

Salmo 75

¹ Chonnto' li' yel' choxken, Chios cha'.

Chonnto' li' yel' choxken daa zoaleno' neto'.

Na' choe'nto' dill' che yog' diika' chono', diika'
chon ka chibani ben'.

² Xancho Chioza' ne':

“Llana' wllia' bia',

wchogloa' che to to beṅ' kon ka chiyaḷ' gakan.

³Nad' chzoaḷcheḷ' yell-lioni lo leninna' kat' chxo'
chṅiblenan beṅ'ka' lle' lla' lawinna'."

⁴Na' chep' beṅ' llaljka' na' beṅ' malka': "Bi gakte beṅ' cha'sib;

⁵ni bi gonlenle yeḷ' wak chelena' llalj
na' ni bi shep sha'lall'le kat' chshaljle."

⁶La' kono beṅ' zoa gana' chla'lə wbillā' ni gana' chxoalan,
ni gana' bibi chashj chḷeb,

beṅ' gak gone' beṅ' choo beṅ' xen sto beṅ' yoblə.

⁷San Chiozan' chḷogbi'e che beṅ':

baḷe' chsi'e yeḷ' zto' na' zi baḷe' chone' beṅ' choo beṅ' xen.

⁸Yeḷ' zak'zi' daa wseḷ' Xancho Chioza'

zaklebin vinona' daa ba golcha, daa yoll loo kopa' noḷee.

Na' kat' wlaḷje'n lo yell-lioni, yog'loḷ beṅ' malka' lle'
lawinna' sak'zi'gake' aḷt ga zeelo.

⁹San nad', toshiizi wi'a dill' che Chioza', beena'

be'la'o dii Jacoba',

na' goḷ inia'ne'.

¹⁰La' len' wlliyee yeḷ' chep cha'lall' che beṅ' malka',

san beṅ' wenka' zizikli gone' ḷegake' beṅ' choo beṅ' xen.

Salmo 76

¹Xancho Chioza' le zeyi che' gana' mbani Judána';

na' beṅ'ka' lle' yell Israela' choe'gake' dill' nan nake'

beṅ' choo beṅ' xen.

²Lill xlatje'na' zoan lo Yaa Siónna',

daa zoa yell Jerusalénna'.

³Na' nan' bxoḷj btine' yog'loḷ yesyaka' bñiayi

beṅ'ka' wdil-len le'.

⁴Chios cha', le zeyi cho' napo' balaan xen inleḷ,

na' nakcho' beṅ' choo beṅ' xench ka yaa yeḷka' zoa kani'teyi.

⁵Beṅ'ka' nak liizelozi beṅ' wal bikzbi gok gongake'

na' bliiyoo ḷegake',

na' zeelo wbangake'.

⁶Chios cha', beṅ' be'la'o dii Jacoba', ka bwall bshebo' ḷegake'

bich gok sa' ni karret che'ka' ni kabay che'ka'.

⁷ ĴYog' beṅ' chall chllebgake' li!
 Kokzno chzo chzaki li' kat' chlloo.
⁸ Yabana' gana' lliatio' b̄choglo' che beṅ'.
 Na' yog' beṅ' yell-lioni bllebgake' na' wzoagake' llizə,
⁹ ka wzolo' b̄chogbi'o che beṅ'
 na' bislo' beṅ'ka' wxak'zi' lo yell-lioni, Chios cha'.

¹⁰ Daa chbekwllio' yeḷ' chllaa chlok che beṅ' malka',
 choe'la'o beṅ' li';
 na' beṅ'ka' chila lao yeḷ' zak'zi' cho'na' koogake' li' balaan.
¹¹ Li w̄cheb bin we'le' X̄ancho Chioza'
 na' li we'tie'n;
 na' yog' beṅ' yellka' ṅdil nllag yell che'na'
 chiyaḷ' we'gake' daa chidoḷ' ikaa beena' chiyaḷ' gall illebcho.
¹² La' len' chsi ch̄chogue' yeḷ' mban che beṅ'ka' ch̄nabia';
 na' chwall chshebe' beṅ' w̄nabia' xenka' lle' lo yell-lioni.

Salmo 77

¹ Ch̄nabid' X̄ancho Chioza' wzenague' cha'
 kwenche gaklene' nad'.

² Llana' zoa' nyesh', choe'ḷwill' X̄ancho Chioza',
 na' toshiizi ch̄lis na'ki choe'ḷwillee waḷka',
 na' yich̄jlall'dawaani biṅ' yiyakshao'lalliin.

³ Ch̄jadinid' X̄ancho Chioza' na' chbell';
 na' zia' w̄neyi dga chak cha' na' chidin̄jid'.

⁴ Chios cha', bikz choo latj gues';
 na' daa le chakshejlallaa, ni bi chak wshalj'.

⁵ Ch̄jadinid' llaka' na' yizka' ba wde.

⁶ Ch̄jadinid' ka chol ch̄nia' li' waḷka'.

Na' yich̄jlall'dawaani zen w̄neyi, na' nia':

⁷ ĴAtoshiizin illaa X̄ancho Chioza' cho', lla?

ĴAbichga yile'shikzile' chon', lla?

⁸ ĴAnti bich chakile' chon', lla?

ĴAnti daa b̄chebe' gone' checho bichga gone'n, lla?

⁹ ĴAnti ba goḷ-lall' Chioza' yeḷ' beṅ' wen che'nan', lla?

ĴAnti daa zi'telə chleen, bich chiyesh'lallile' cho', lla?

¹⁰ Na' nia':

“Le ch̄jelid' daa chakbe'id' beena' nak beṅ' choo beṅ' xen
 bich chaklene' cho' ka goklene' cho' kana'.”

¹¹ Yisa'lallaa ka nak yel' wak choo yel' wak xenka'
ben Xancho Chioza' daa ba zeji.

¹² Na' sia' wneyi che yog' diika' ba benlene' yel'
wak xen che'na'.

¹³ Dowalj dii li dii shao' nak diika' chono', Chios cha';
kochno zoa nak ben' choo ben' xen ka li'.

¹⁴ Lin' nako' beena' chon yel' wak choo yel' wak xenka';
bliilo' ben'ka' lle' to to yell ka nak yel' waka' napo'.

¹⁵ Kon yel' wak cho'na' bislo' ben'ka' nak yell cho',
ben'ka' nak xiin dia che dii Jacoba' na' dii Joséna'.

¹⁶ Chios cha', ka ble'i nido'na' li', blleban,
na' lo nido'na' axt gana' zeelo zitj wxiztitan.

¹⁷ Na' bej bzaka' bengan chochj chlalj nis yeja',
na' goshj wtin xan yabana'
na' doxenz wyep yes.

¹⁸ Loo be' bdoonna' goshj wtin ka wzoa yi' wziwa',
na' bzeeni'n doxen lo yell-lioni,
na' yell-lioni wxo' wñiban.

¹⁹ Bsaljo' neza' gchol nido'na'
na' wdio' lawinna',
per kono billeli gana' bxo' xnezo'na'.

²⁰ Beno' ben'ka' nak yell cho' lall' na' dii Moiséza'
len dii Aarónna',
na' biçi'ogake' ka ben' zinche' xil'do' cheyin.

Salmo 78

¹ Le' ben' Israel, le' nakle lall' na', li se wneyi dga wzajniid' le';
na' li wzenag dill'ki we'len' le'.

² Ni wchin' cho'a dill'ka' de,
na' wi'a dill' ka nak diika' kono wnezi daa ba zeji.

³ diika' ba benicho na' ba wnezicho,
diika' bseesii dii xozxto'choka' cho'.

⁴ Na' chiyal' we'chon dill' lao xiinchoka',
na' dia chechoka' zi' zaak.

We'lenchogake' dill' che yel' wak che Chioza',
na' che yel' wak choo yel' wak xenka' ba bene'.

- ⁵ Chioza' bllie' bia' daa chiyal' gon ben' Israelka' ben'ka'
 nak xiin dia che dii Jacoba';
 Na' golle' dii xozxto'choka' wli' wsedgakile'n xiin dia che'ka',
⁶ kwenche dia che'ka' zi' zaak inezgakile'n
 na' xiine'ka' zi' galj yili' yisedgakile'n xiine'ka',
⁷ na' wxenilall'gake' Chioza',
 na' bi gal-lall'gake' diika' ba bene';
 na' gongake' daa bllie' bia' gongake'.
⁸ Na' bi gongake' ka ben dii xozxto'eka',
 ben'ka' gok ben' widenag na' ben' bi nteyi;
 na' gokchoplallii yichjlalldoe'ka'
 daa gongake' to dia ben' bi benilall' Chioza'.
- ⁹ Ben'ka' nak xiin dia che dii Efraínna'
 la'kzi le bwal'lengake' xis wixit' che'ka',
 to bixonjzgage' ka zej chak wdila'.
¹⁰ Bi bengake' daa bchebgake' lao Chioza'
 ni bi goklall'gake' gongake' daa bllia Chioza' bia' gongake';
¹¹ san gol-lall'gake' yog'lo' daa ben Chioza' chegake'
 na' yel' wak choo yel' wak xenka' ble'gakile' bene'.
¹² Chioza' bliile' dii xozxtoe'ka' yel' wak choo yel' wak xenka'
 yell Zoánna' gana' mbani Egíptona'.
¹³ Bene' nisdona' choplə, na' bzoe'gakan ka zee chop laa,
 na' bidie' legake' gcholinna'.
¹⁴ Chioza' bzie' to bej daa bibialo lawe'ka' tellana',
 na' wal'ka' bzie' to bel' yi' daa bzeeni' gana' ziyajgake'.
¹⁵ Gana' bibi chashj chleb bene' yaja' choplə
 na' gol nis zil weejgake';
¹⁶ bsalje' lee yaja'
 na' gol nis zil wal ka to yao.
- ¹⁷ La'kzi ben Chioza' chegake' ka', legake' zizikli
 bxinj blengake' lawe'na';
 na' shlak wdagake' gana' bibi chashj chleb, biyechj bibiigake'
 beena' nak liizelozi ben' choo ben' xen.
- ¹⁸ Bzoagake' Chioza' gone' daa nazan chegake'
 daa wñabgake' daa chzelall'gake' gaogake'.
¹⁹ Na' wnəgake' che', wnagake':
 “¿Awaktgui gon Chioza' daa yej gaocho gani bibi
 chashj chleb, lla?
- ²⁰ Dii licha bene' yaja' choplə;

na' gol nis zil wal ka to yao,
 per ꞥawaktgui goṇe' ye! wawa' gaocho, Ila?
 ꞥawaktgui goṇe' belaa gaocho cho' nakcho yell ꞥhe', Ila?"

- 21 Na' ka beni Xancho Chioza' daa wnagake' le bllee.
 Na' daa le bllee bselee to yi' wal
 na' blliyee xiin dia ꞥhe dii Jacoba',
 22 daa bi wyajle'gake' ꞥhe Chioza'
 ni bi bꞥenilall'gake' gaklene' legake'.
 23 Na' la'kzi bengake' ka', Chioza' bselee bejka'
 na' bsalje' xan yabana';
 24 na' bletje' daa wdaogake' daa le maná ka chetj nis yej,
 na' bwawe' legake' ye! wawa' daa za' yabana'.
 25 Na' wdaogake' ye! wawa' chao anjlka';
 na' be' Chiozan' ka belj blla'gakile'.
 26 Be'na' da za' gana' chla'lə wbillal' na' daa za' lli'lə
 wzen xan yabana';
 la' Chioza' blis bte'n kon ye! wak ꞥhe'na'.
 27 Na' bzoles bzolline' belaa lao ben'ka' nak yell ꞥhe';
 bzoles bzolline' bto' zan inleeb ka yoxa' daa chi'
 cho'a nido'na'.
 28 Chioza' bene' kwenꞥhe bꞥopgakb gana' chengake',
 na' cho'a tlawi gana' non xol bishna' ꞥhe'ka'.
 29 Na' wdaogake'n axt ka belj blla'gakile',
 la' ben Chioza' ka goklall'gake'.
 30 Per ni chaotegake' belaa wnabgake'
 na' ni yooten loo cho'eka',
 31 ka ble'gakile' ye! chllaa ꞥhe Chioza',
 na' bete' ben' byoka' nak ben' walch
 na' ben'ka' mbejlawin ladj ben' Israelka'.
 32 Na' la'kzi ble'gakile' daa gok ꞥhe ben'ka', ka'kz
 bꞥinꞥj bꞥenꞥgake',
 ni bi wyajle'gake' ꞥhe ye! wak choo ye! wak
 xenka' ben Chioza'.
 33 Daan Chioza' bsak'zi'e legake' na' bsi bꞥhogue'
 ye! mban ꞥhe'ka'
 na' gokan ka to be' dii chde toldez.
 34 To to ka bet Chioza' balgake', ben'ka' bgaan wzegake'
 wneyi nleeb biyiljgake'ne',
 na' wbig'gake' lawe'na'.

35 Na'ch jadingakile' nan Chios, ben' choo ben' xennan',
chap chwie' legake' na' chisle' legake'.

36 Per kon cho'a lolleeka' benzgake' ka choe'la'o
cho'e dill' Chioza',

na' dill'ka' be'gake' gokan shgal' dill' wxiye'.

37 Na' biga b̄xenilall'gake'ne' do yichj do lallgake',
ni bi bengake' ka b̄chebgake' lawe'na'.

38 Per biyesh'lalii Chioza' legake',
na' bizi'xene' xtoleeka' na' bi bliiayee legake'.

Zan shii benxenlallee chegake'

na' bi bliiayee yog'lolgake' lo yel' chllaa che'na'.

39 Chioza' jadinile' nan ben' de beli chenzan nakgake';
na' nakgake' ka be'na' daa chde toldez daa bichga chibii.

40 Zan shii bi bzenaggake' che Chioza',
na' benyesh'gakile'ne' gana' bibi chashj chleb.

41 Na' zekizezi bzoagake'ne' gone' daa cheenzgakile',
na' benyesh'gakile' Chios chechona', cho' ben' Israel,
beena' nak dowalj ben' li ben' shao'.

42 Bikz ga jadingakile' llana' bisla Chioza' legake' kon
yel' wak choo yel' wak xen che'na'

lo ni'a na' ben'ka' bsak'zi' legake',

43 llana' bliile' legake' yel' wakka'

na' diika' chon ka chibani ben', gana' mbani

Egíptona', gana' le Zoán,

44 kana' biyone' yaoka' chen,

na' ben' Egíptoka' bi gok yeejgake'n.

45 Na' bselee bochjka' na' blollka'

baka' bsak'zi' legake' na' bliiayi'gakb bi de chegake'.

46 Na' bselee bish' zoka' bliiayi'gakb diika' goz wlekgake'.

47 Na' bselee yaj yabana' na' bliiayi'n yag uva che'ka'

na' beyaa bliiayi'n yag yixwew che'ka',

48 na' yaj yabana' len yi' wziwaa

bliiayi'n bayix' che'ka'.

49 Na' daa blaa Chioza' legake',

bselee anjlka' jalliayi'gake' legake'.

50 Na' daa le blee, bene' kon ka goklallee gone' chegake'.

Bi wxi'xene' chegake',

san bene' legake' lall' na' yel' wita'.

51 Bene' ka wit xiin nech ben' Egíptoka',

yog'lo| bi' nech che'ka' lle' to to yoo.

⁵² Na' bibeje' beṅ' Israelka' ka beṅ' chishesh xil'do',
na' bidie' legake' gana' bibi chashj chleb.

⁵³ Na' daa zinchi'e legake', bibi dii nxoll got' chegake',
na' bibi bblebgake';

na' bwakw nisdona' beṅ'ka' gokzi' gokzbani legake'.

⁵⁴ Chioza' bigwee legake' lo yell-liona' naki che',
na' bi'e legake' yaa yaoka' bikee kon yel' wak che'na'
lao beṅ'ka' wlle' lawinna'.

⁵⁵ Bsheshe' beṅ'ka' bi nonlilall'gake'ne' kwenche bikaa
beṅ' Israelka' yell-lio che'ka'.

Na' bgone' yell-lio che shkwen wej dia che beṅ' Israelka'
na' ben lill xlatje'ka' lawinna'.

⁵⁶ Per legake' goklall'gake' gon Chioza' daa nazan chegake',
na' bi bzenaggake' che beena' nak liizelozi beṅ' choo beṅ' xen,
na' bi bengake' daa blilie' bia' gongake'.

⁵⁷ Na' bengake' kon ka ben dii xozxtoe'ka'

daa wlejiychjgake'ne' na' bi bengake' ka cheenile'.

Gokgake' ka xis wixit' dii nyok nlew na' bi chchoonan shli.

⁵⁸ Na' bshaagake' Chioza' daa bengake' lill xlatj diika'
be'la'ogake' lo yaaka';

na' daa be'la'ogake' yaj yagka', zizikli bshaagake'ne'.

⁵⁹ Chioza' bllaachgue' ka ble'ile daa chongake',
na' wchoonlall'tekze' legake'.

⁶⁰ Na' bizee gana' wzoa xol bishna' che'na' yell Sflona'
gana' gok lill xlatje' ladj beṅ' yell-lioni.

⁶¹ Na' bi'e latj jtoyo beṅ'ka' chakzi' chakzbani legake'
yiina' gana' yoo daa chonli daa bcheb Chioza' gone'
chegake' na' chli'n zoalene' legake'.

⁶² Na' daa le bllee beṅ'ka' nak yell che',
bi'e latj witgake' lo ni'a na' beṅ'ka' chakzi' chakzbani legake'.

⁶³ Bi' wew' che'ka' witgakb' lo wdi|a';

ina' kochno wzoa wshagna'len bi' nool wew'ka'!

⁶⁴ Na' bxoz che'ka' witgakile' yesyaka',
na' noolka' bzeb, bi got' latj kwellegakile' legake'.

⁶⁵ Per Xancho Chioza' gok che' ka chak che to beṅ'
chiban lo bishgal cheyin,

na' ka to wen wdi| beṅ' weej dii zil vino na' ba biyeenile'.

66 Na' bene' gan beṅ'ka' chakzi' chakzbangakile'ne'
na' bilagdoe' ḷegake'.

Na' biga biyoll bido yeḷ' zto'na' bsi'e ḷegake'.

67 ḷekzka' wchoonlallee xiṅ dia che dii Joséna',
na' ni bi wleje' xiṅ dia che dii Efraínna'.

68 San wleje xiṅ dia che dii Judána'
na' Yaa Siónna' gana' wyazlallee.

69 Na' bzoa lill xlatje'na' lo yaa siba',
na' bzoen' toshiizi, ka nzoacheche' yell-lioni.

70 Na' wleje' dii Davina', beṅ' wen llin che'na',
beena' gok beṅ' wap xil'.

71 Na' wleje'ne' kwenche lwaa gape' xil'ka',
gap wwie' beṅ' Israelka', beṅ'ka' nak xiṅ dia
che dii Jacoba',

beṅ'ka' nak yell che'.

72 Na' do yichj do lall' dii Davina' wdap bwie' beṅ'ka'
nak yell che Chioza',
na' gok wlo'e xnezi che beṅ'ka' kon yeḷ' sin' che'na'.

Salmo 79

1 Chios cha', beṅ' zit'ka' bi nombia' li' ba wdegake'
gana' mbanilo',

na' ba bnitgake' balaan che lill xlatjo'na',
na' ba bliayi' bliiadegake' yell Jerusalénni.

2 Ba bzoles bzollingake' kwerp che beṅ'ka' ben ka cheenilo',
kwenche gakgake' yeḷ' waw che lloodka' na' no ba zniaka'.

3 Ka beṅ' chlalj nis, ba blaljgake' xchene'ka' doxen Jerusalénni,
na' kono zoa wkwash' ḷegake'.

4 Beṅ' yellka' nllagnto' chtitj chtangakile' neto',
na' yog' beṅ' chxillgakile' neto'.

5 Chios cha', ¿Atoshiizin illoo neto', lla?

¿Atoshiizin gak yeḷ' chllaa cho'na' ka yi'na' daa chaḷ'niṅ?

6 Bli'gach yeḷ' chllaa cho'na' lao beṅ' zit'ka',
beṅ'ka' bi nombia' li' ni bi choe'ḷwillgake' li',

7 daa bliayi'gake' dia chento'na', neto' naknto' xiṅ
dia che dii Jacoba',

na' bliayi' bliiadegake' yell chento'ni.

8 Bi gono' ka neto'lə koo chixjznto' dii malka' ben
dii xozxto'nto'ka'.

Btalaloo yidyakleno' neto',
la' le nyesh' zoanto'.

⁹ Chios cha', ben' chisla neto',
goklengach neto', bisell biḷa' neto', na' wxi'xen chento',
kwenche shoo balaan.

¹⁰ Kwenche bi inaz ben' zit'ka' bi chajle' cho':

¿Gan Chios cho'na'?,
bengach ka ile'into', na' lekzka' ka ile'i ben' zit'ka',
yizi'o wzon che ben'ka' bet ben'ka' bzenag cho'.

¹¹ Bzenaggach ka chbellyesh' ben'ka' bche' ben' zit'ka'.
Na' kon ye! wak cho'na'
bislagach ben'ka' ba nchogbia'gake' guet.

¹² Chios cha', bizi'gach wzonna' lao ben'ka' bi chajle'
cho' axt gall shii
ni cheyi diika' bengakile' neto'.

¹³ Na' neto' naknto' yell cho' na' ka xil cho',
toshiizi we'la'onto' li' na' go! inento' li' zejli kani.

Salmo 80

¹ Ka ben' chap chwia xildo', chap chwio' neto' ben' Israel.
Li' chap chwio' xiin dia che dii Joséna',
na' llio' chnabi'o ladj anjlka' le kerubines,
bzenaggach chento',

² na' ble'shi'gachi xiin dia che dii Efraínna', dii
Benjamínna' na' dii Manaséza'.

Bi shagachilo' yidyakleno' neto' kon ye! wak cho'na'.

³ Chios cha', ¡bengach kwenche yizoanto mbalaz
ka wzoanto kana!
¡Bile'shi'gachi neto' na' bislagach neto'!

⁴ Chios cha', ben' liizelozi nap ye! wak choo ye! wak xen,
¿atoshiizin illoo?

¿abich wzenago' kat' we'llwill ben'ki nak yell cho' li'?

⁵ Lwaa dii nan yeej gaonto', wchellyesh'länto',
na' nis xchell chento'na' gokan dii zil.

⁶ Ba bi'o latj kwenche ben' yellka' nllagnto' chtitj
chtangakile' neto',

na' beṇ'ka' chakzi' chakzbani neto' chxillgake' čhento'.

⁷ Chios čha', beṇ' liizelozi nap ye! wak choo ye! wak xen,
 ;bengach kwenče yizoanto mbalaz ka wzoanto kana!
 ;Bile'shi'gachi neto' na' bislagach neto'!

⁸ Ka to beṇ' biḷall' to lba čhe uva na' biyaze'n lo yell-lio yoblə,
 ka' beno' bibejo' neto' beṇ' Israel yell Egíptona',
 na' bizo' neto' lo yell-lio čhe beṇ' zit'ka' bi beṇililall' li'.

⁹ Bixi biḷo' lo yell-liona' gana' biyazo' lbana',
 na' bde loinna' na' blliljan doxen latja' gana' benschawoo.

¹⁰ Yaa yaoka' wyoogakan xol čheyinna',
 na' xoz' xka'inka' axt lo yag ye!ka' wxoogakan.

¹¹ Ləkzka' xoz' xka'inna' blliljan axt cho'a niso'dna',
 na' axt cho'a yao Éufrateza' bllin diika' bigaa.

¹² ;Berəče bčhınjzo' leej čheyinna'
 na' be'zo' latj bshib beṇ'ka' ngoo nez uvaka'?

¹³ Kush yix'ka' chlliyi'gakban';
 na' baka' lle' yaa yaoka' cheej chaogakban.

¹⁴ Chios čha', beṇ' liizelozi nap ye! wak choo ye! wak xen;
 ben goklen bidagach.

Bwiagach neto' yabana' gana' lliatio';
 bwiagach yag uvani,

¹⁵ yag uvani dga kwino' biyazo',
 na' xoz' xka'inka' diika' bisgolo'.

¹⁶ Lo ye! chllaa čho'na' blliyi'gach
 beṇ'ka' chčhogan na' chzeygake'n.

¹⁷ Na' goklengach beena' ba wlejo',
 xiin beneča' beena' bzo' gone' daa cheenilo',

¹⁸ na' bichga wlaala'onto li'.

Beṇ' neto' ye! ga' ye! mbanna'
 na' toshiizi we'la'onto' li'.

¹⁹ Chios čha', beṇ' liizelozi nap ye! wak choo ye! wak xen,
 ;bengach kwenče yizoanto' mbalaz ka wzoanto' kana!
 ;Bile'shi'gachi neto' na' bislagach neto'!

Salmo 81

¹ ¡Li yiba yizaki goḷ inele Chioza', beena' chkwash'
chkweej cho' lao bittez dii nxoll!

Li yiba yizaki we'la'ole Chioza', beena' be'la'o dii Jacoba'.

² Li goḷ inie' kon pandéroka'
len diika' llia kwerd cheyin.

³ Li wkwell trompeta' kat' yizee beo' cheenna',
Na' kat' sin' yel, la' kanan' lla lni chechona'.

⁴ La' lënnan' bllia Chioza' bia' goncho,
Chioza' beena' be'la'o dii Jacoba'.

⁵ Na' lekzannan' bllie' bia' gon xiin dia che dii Joséna'
kana' bsak'zi' Chioza' ben' Egíptoka'.

Benid' shii to ben', na' bi nezid' non wne, na' wne':

⁶ “Ba bikwas' dii ziina' yaaxizo'na',
na' ba bibej' li' lo llinna' daa gokilo' zii zshab.

⁷ Kana' wxak'zi'o, wnio' nad' na' bisla' li';
na' billi'a xtilloona' loo bej bzana' kana' goshj wtin.
Na' Meríbana', gana' bla' nisa', bwia' shi lekzilo'
chonlilaloo nad'.

⁸ Israel, li' nako' yell cha', bzenag dga chsi'nid' li'.
Bzenaggach cha'.

⁹ Bi wxenilaloo diika' nxenilall' ben' zit'ka'
ni bi we'la'ogako'n.

¹⁰ Nadaan nak' Xano', na' Chios cho',
beena' bibej li' yell Egíptona'.
Bxa' choona', na' nad' wzesh wzeljid' li'.

¹¹ “Per ben' Israelka', ben'ka' nak yell cha', bi goklall'gake'
wzenaggake' cha';
jni bi bzoagake' xtillaa!

¹² Daan, bi'a latj bengake' kon daa nazan chegake',
na' wzoagake' kon ka goklall'gake'.

¹³ ¡Shej' yell cha'ni bzenagan cha'!
¡Shej' ben' Israelki wyoogake' lo xneza'na',

¹⁴ tolbe' nllëb blliyaa ben'ka' chakzi' chakzbani legake' na'
bsak'zi'a ben'ka' chdil-len legake', shej'ka'!”

¹⁵ Ben'ka' chakzi' chakzbangakile' Xancho Chioza', axt
gall illebgake'ne', shej'ka',

na' toshiizi tegake' lo yel' zak'zi'na'.
¹⁶Na' Chioza' wweej wwawe' yell che'na' trigona'
 daa zeelo nakch,
 na' gone' chochj chlaj shin' basera' daa yeejgake', shel'ka'.

Salmo 82

¹Chioza' ba wzollee yabana' ladj ben'ka' chchoglo che ben',
 na' le' chchogloe' chegake', chi'e:
²“¿Bat wsanle bich gonle yel' joschis daa bi nak shli,
 na' bich ta'zle ben' malka'?”
³¡Li gon yel' joschis che ben' wizebka' na' ben'ka'
 kono zoa gaklen legake'!
 ¡Li gon yel' joschis che ben' yesh'ka' na' ben'ka' chyallj chchini!
⁴Li yisla ben'ka' kono zoa gaklen legake' na' ben' yesh'ka';
 ¡li yislagake' lo ni'a na' ben' malka'!

⁵“Per le' ni bi nezile, ni bi chajniile.
 Chdale lo yel chola',
 na' ni chele kwiayi' leni daa nak wen na' daa nak shli.
⁶Nad' wnia' le' nakle chios;
 na' yog'le nakle xiin Chioza', beena' nak liizelozi
 ben' choo ben' xen.
⁷Na' la'kzi ka', wetkzle ka chet nottez benech,
 na' te chele ka chde che nottez ben' wñabia'.”

⁸Chios cha', btagach lalloo wchoglo che ben' yell-lioki.
 La' lin' xan yog'lo ben'ka' lle' to to yell.

Salmo 83

¹Chios cha', ¡bi soagacho' llizə!
 ¡Bi gono' ka ben' bibi chak gon na' soazo' llizə!
²Bwia ka chon ben'ka' chakzi' chakzbani li';
 chaklleshgakile' na' cheengakile' soshyi'gake' li'.
³Ba wloogake' xnezin nak gongake'
 wliayi'gake' ben'ka' nak yell cho',
 ben'ka' chap' chwio'.
⁴Nagake': “Li sho', lljalliayi'cho legake' kwenche
 yiyol yinit yell che'ka'
 na' kochno lljadin lljaza'lalii yell Israela'.”

5 Chios cha', ba nakgake' toz
 na' ba nongake' toz dill' ti-lengake' li'.
 6 Ben'ka' nak xin dia che dii Edoma'^a, xin dia che dii Ismaela',
 xin dia che dii Moaba', na' xin dia che dii Agara',
 7 na' ben' Gebalka', ben' amonítaka', ben' amalecítaka',
 ben' filisteoka' ben'ka' zoa Tírona',
 8 na' axt ben' Asíriaka' ba nakgake' legake' txen,
 chaklengake' xin dia che dii Lota' ti-lengake' li'.

9 Bengach chegake' ka beno' che ben' Madiánka',
 ka beno' che Sísarana',
 na' ka beno' che Jabínna' yao Cisónna',
 10 ben'ka' bliiyoo yell-lio Endora'
 na' biyakgake' ben' lo yell-liona'.
 11 Bengach che ben'ka' mbejlawin ladje'ka' ka beno'
che Oreba' len Zeeba';
 ben kwenche yogte' ben' wnabia' che'ka' gak chegake' ka
 beno' che Zébaná' len Zalmúnana',
 12 daa wnagake': "Gaki checho
 yell-lio che ben' Israelka' daa naki che Chioza'."

13 Chios cha', ben chegake' ka yix beb
 na' ka lag' bill daa choa' be'na'.
 14 Na' ka chon yi'na' daa chzey loo yagka'
 na' chlliayi'n yaa yaoka' kon bei yi' cheyinna',
 15 ka' blagdogach legake' na' bwall bshebgake' kon
 yejpe' wal cho'na'.
 16 iBsi'gachgake' yei' zto', Chios cha',
 kwenche yiyiljgake' li'!
 17 Si'shgagake' yei' zto' toshiizi;
 iyiyii yidoshgagakile' na' guettegagake'!,
 18 kwenche inezgakile' zeelo lin' nako' Xannto',
 na' li' nako' liizelozi ben' choo ben' xen,
 beena' chnabia' doxen lo yell-lioni.

Salmo 84

1 Le mbalaz nak lill xlatjo'na', Chios cha',
 ben' liizelozi nap yei' wak choo yei' wak xen.

^a 83:6 *Edoma'*: beena' wle Esau lekzka' bsi'gake'ne' Edom.

² ǃLe chzelall'chga' sho'a lesh' lill xlatj Chioza!
ǃDo yichj do lallaa goǃ inia' Chios yaa Chios banna'!

³ Axt byin yoodo'ka' na' bichbziw'ka'
chllel ga gon lillbka' gaoshosh gana' chzeygake'
bayix'ka' lawo'na',
na' na' chgooshao' xiindo'bka',
Chios cha', beñ' liizelozi nap yel' wak choo yel' wak xen,
beñ' chñabia' nad'.

⁴ Chakomba beñ'ka' zoatezi zoagake' lill xlatjo'na',
na' toshiizi choe'la'ogake' li'.

⁵ Chakomba beñ'ka' chakleno',
beñ'ka' zelall' koo nez shajgake' gana' zoa lill xlatjo'na'.

⁶ Kat' chdegake' leshaa gana' le Lesh' che nis xhell,
gana' nak yo bill,

daa chdegake' lawinna' chiyakan ga chal nis,
na' nis yeja' chbian loo xitjka'.

⁷ Na' shlak ngoogake' nez, zizikli chat'ch fuerz che'ka'
axt ki chllingake' lao Chioza' yell Siónna'.

⁸ Chios cha', beñ' liizelozi nap yel' wak choo yel' wak
xen, beñ' be'la'o dii Jacoba',

bzenaggach naa choe'lwill' li'.

⁹ Chios cha', li' nako' beñ' chkweej neto',
ble'shi'gachi beena' nzo' chñabi'e neto'.

¹⁰ Zak'techin soa' shlla lesh' lill xlatjo'na'
aga ka daa soa' ssha inlleb gan yoblə.

Wenchlan lljsia' gap' cho'a yoo che lill xlatjo'na'
aga ka daa lljsoa' ladj beñ' malka'.

¹¹ La' Xancho Chioza' nake' beeni' checho,
na' len' chkweeje' cho'.

Xanchona' chaklene' na' chgwee balaan beñ'ka' zoa
do yichj do lall'gake',

na' bibi dii wen chlilonile' legake'.

¹² Chios cha', beñ' liizelozi nap yel' wak choo yel' wak xen,
chakomba beñ'ka' nxenilall'gake' li'.

Salmo 85

¹ Chios cha', ba benlikzo' wen chento', neto' naknto' yell cho';
ba bislo' neto' naknto' xiiñ dia che dii Jacoba' lo
ni'a na' beñ' zit'ka'.

² Ba bizi'xeno' dii malka' bennto'
na' bisol binito' yog'lol saaxya chento'ka'.

³ Ba bzo' yel' chllaa cho'na' ka'lə,
na' bich chlloo neto'.

⁴ Chios, beñ' chisla neto',
j**ben**gach ka yiyak wen chento' sto shii,
na' bich illaagacho' neto'!

⁵ ¿Atoshiizin illoo neto'?
¿Abiga yiyoll yido yel' chllaa cho'na'?

⁶ B**en**gach neto' yel' ga' yel' mbanna' sto shii,
kwenche yiba yizakinto' lawo'na'.

⁷ Chios cha', j**bl**i'gachi neto' yel' chaki cho'na',
na' bislagach neto'!

⁸ Wzenag' daa iñ Chios cha'na';
l**e**' ch**che**be' yizoe' mbalaz yell che'na',
beñ'ka' nak lall' nee,
kwenche bich gongake' dii malka' ba bengake'.

⁹ Dii l**i**cha, Chioza' zoe' gal' gllin
che beñ'ka' chall chll**e**b l**e**', kwenche yisle' legake'
na' wli'e balaan xen che'na' gani mbanicho.

¹⁰ Na' gana' zoa Chioza', yel' chakina' len dill' l**i**na'
chidil' chillaggakan;
yel' zoa mbalaza' len daa nak dii l**i** dii shao'
nllagui l**j**wellgakan.

¹¹ Na' daa nak dii l**i** wli'lawin lo yell-lioni,
na' yel' l**i** yel' shawaa wli'lawin yabana'.

¹² X**an**cho Chioza' gone' wen checho,
na' gana' chazcho gat' kwe' daa yizi' yilapcho.

¹³ Daa nak dii l**i** dii shao' kwialon lawe'na'
na' l**en** wli'n ba zee.

Salmo 86

- ¹ Chios ɕha', bzenaggach ɕha',
 la' le nyesh' chak ɕha' na' kono zoa gaklen nad'.
² Wdap bwiagach ye! mban ɕha'ni, daa chon' ka cheenilo'.
 Li' nako' Chios ɕha',
 bislagach nad' daa nxenilallaa li'.
- ³ Chios ɕha', biyesh'lall'gachi nad',
 la' lin' choe'lwill' toshiizi.
⁴ Chios ɕha', nad' chzoa xtilloona', btipgach lallaa,
 la' lin' choe'lwill'.
⁵ Li', Chios ɕha', nako' beṅ' wen na' beṅ' chizi'xen,
 na' le chakchgailo' beṅ'ka' chṅab ye! goklen ɕho'na'.
- ⁶ Chios ɕha', bzenaggach naa choe'lwill' li',
 ꞑbenaggach dga chṅabid' li!
⁷ Llana' chle'id' ye! zak'zi'na' chṅabid' li' ye!
 goklen ɕho'na',
 daa nezid' lin' gakleno' nad'.
⁸ Chios ɕha', tozo' lin' nako' beṅ' chido! we'la'onto',
 kochno zoa ka li'.
 Na' kono zoa gak gon ka diika' chono'.
- ⁹ Chios ɕha', lin' bxe bsilo' beṅ'ka' lle' to to yell,
 na' yog'gake' yidgake' lawo'na' kwenɕhe we'la'ogake' li',
 na' koogake' li' balaan.
- ¹⁰ La' tozo' lin' nako' Chios;
 ꞑli' nako' beṅ' choo beṅ' xen' na' diika' chonleno' ye!
 wak ɕho'na' chonan ka chibani beṅ!
- ¹¹ Chios ɕha', bli'yi nad' nez ɕho'na',
 kwenɕhe gon' ka cheenilo'.
 Bengach ka soaɕheɕh yichjlall'dawaani lawo'na',
 kwenɕhe gall illeb' li'.
- ¹² Chios ɕha', li' nako' Xan',
 We'lawaa li' do yichj do lallaa
 na' toshiizi kwaa li' balaan.
- ¹³ ꞑDaa le chakchgailo' nad'
 ba bislo' nad' lo ye! wita!

¹⁴ Chios ɕha',
 xonj beṇ' chep cha'lall', beṇ' zesh' beṇ' zban,
 beṇ' bi ngoo yichjall'do'gake' li',
 ba ngoogake' xnezin witgake' nad'.
¹⁵ Per li', Chios ɕha', nako' beṇ' wen beṇ' shao' na'
 beṇ' chiyesh'lallii.
 Nako' beṇ' yel' chxenlall' xen,
 naplikzo' yel' chaki, na' nako' beṇ' chon ka chchebo'.
¹⁶ Bwiagach ka chak ɕha', na' jbiyesh'lall'gachi nad'.
 Bislagach nad', na' ben nad' wal,
 daa chzoa' xtilloona'.
¹⁷ Bengach ka gakbe'id' nako' beṇ' wen,
 na' beṇ'ka' chakzi' chakzbani nad' ile'gakile' chakleno'
 nad' na' yiyii yido'gakile'.
 Li' Chios ɕha', chakleno' nad' na' chiyonxenlalloo nad'.

Salmo 87

¹ Yell ɕhe Chioza' llian lo yaana' naki ɕhe'.
² Xancho Chioza' chakchile' yell Jerusalénna' daa
 llia lo yaa Siónna',
 aga ka yog'te yellka' sto, diika' naki ɕhe xiin dia
 ɕhe dii Jacoba'.
³ Li', yell ɕhe Chios,
 dill' wen inleeb cho'e ɕho', daa ne':
⁴ "Ladj beṇ'ka' nombia' nad'
 wzetj' beṇ' Egíptoka', beṇ' Babilóniaka'
 beṇ' filisteoka', beṇ' Tíroka', na' beṇ' Etiopíaka';
 na' nia' yog' beṇ'kin nakgake' yell ɕha'."
⁵ Na' ina Chioza':
 "Yog' beṇ'ki nakgake' beṇ' yell Sión."
 Na' Chioza', beena' nak liizelozi beṇ' choo beṇ' xen,
 gone' ka idia yell ɕhe'na' toshiizi.
⁶ Kat' wdee le yellka' lee libr ɕhe'na', Xancho Chioza' ine':
 "Yog' beṇ'kin nakgake' beṇ' yell Sión."
⁷ Na' wyaagake' na' golgake' inagake':
 "Lin' nako' lall lillnto'."

Salmo 88

¹ Chios cha', lin' nako' Xan' na' beena' chisla nad',
ka tella ka wa_l chnab' ye_l' goklen cho'na'.

² Wxi' wkaagach dga nia' li',
jbzenaggach dga chnabid' li'!

³ Ba jshyaid' yog' dii malka' chak cha',
na' ba zoa ile'id' ye_l' wita'.

⁴ Ba nontekz ben' lez guet',
daa bich chak chas ta'!

⁵ Na' ba mbej yichjgake' nad' ka to ben' ba wit;
nak' ka ben'ka' wit lo wdila'
ben'ka' ba bkwash'gake';
ka ben'ka' bich gokleno'
na' wlej yichjo' legake'.

⁶ Ba bza_loo nad' loo yecha' gana' zeelo nak zitj,
latja' gana' nak zitj na' shgashj shchol'.

⁷ Ba chsak'zi'o nad' lo ye_l' chllaa cho'na',
na' chak cha' ka chak che to ben' chchix chto_l bli che nisdo'na'.

⁸ Ba beno' kwenche ben'ka' nllaguid' wchoon_lall'gake' nad';
ba beno' nad' ka to dii chpani legake'.

Na' nak' ka to ben' de lillya ben' bi gak yila.

⁹ Axt ba chchol' jalaw'ki daa le chbell'.

Yog' lla chnabid' li' ye_l' goklen cho'na', Chios cha',
na' chlis na'ki lawo'na'!

¹⁰ Aben' wetka'lan wliilo' ye_l' wak cho'na'?

Awaktgui ben' wetka' we'la'ogake' li'?

¹¹ Awaktgui ben' wetka' we'gake' dill' che ye_l' chaki
cho'na' na' che dill' li cho'na'

loo bana' gana' chnabia' ye_l' wita'?

¹² Awle'i ben'ka' lle' loo bana', gana' shgasj shchol', diika'
chono' daa chon ka yibani ben'?

Alle'tgui no yiyombia' ye_l' ben' li ben' shao' cho'na',
gana' bichbi chjadingakile'?

¹³ Per nad', chnabid' li' gakleno' nad', Chios cha';
na' shzildo' choe'lwil' li'.

¹⁴ Biche chonzilo' nad' nakzi, Chios cha'?

Biche chllonzilo' nad' ye_l' goklen cho'na'?

15 Kana' naktia' bi wew' chzak'zi'a, na' toshiizi ni zoa'
dii nxoll lao yel' wita'.

Ba wzo wzakid' dii zan wal yel' zak'zi'ka' benilo' nad',
na' naa bich so sakida'n.

16 Yel' chllaa cho'na' ba bsak'zi'n nad' dii wal inleeb,
na' ba bden cha'.

17 Nakan ka nis zil dii nechj yoll nad' toshiizi.

18 Ba biloo nad' ben'ka' nllaguid',
na' toz yel' chola' chgaanlenan nad'.

Salmo 89

1 Chios cha', toshiizi kat' gol inia' li'
wi'a dill' che yel' chaki cho'na' daa nak dii xen,
na' toshiizi wi'a dill' chono' daa chchebo'.

2 Wi'a dill' nan yel' chaki cho'na' biga llia te cheyin;
na' daa toshiizi chono' daa chchebo', nakan ka
yabana' daa biga chinit.

3 Li' bchebo' lao Davina',
beena' wlejo' gone' ka cheenilo', gollo'ne':

4 "Nad' gon' kwenche xiin dia cho'ka'
inabia'gake' toshiizi."

5 Chios cha', yog' lol anjl cho'ka' zoa yabana'
choe'la'ogake' li' daa chono' daa chchebo' na' daa chono'
diika' chon ka chibani ben'.

6 Aga no zoa yabana' ben' saklebi li', Chios cha'.

7 Chios cha', yog' ben'ka' lle' yabana' gall illebgake' li',
na' ben' choo ben' xench nako' aga ka yog' ben'ka' nechjyob li'.

8 Chios cha', ben' liizelozu nap yel' wak choo yel' wak xen,
jkochno zoa ka li'!

Doxen yel' waka' nakan cho' na' yog' diika' chchebo' chontio'n.

9 Li' chnabi'o nisd' xenna' daa chas chat',
na' lin' chbekliio'n.

10 Blej bshoshjtio' Rahaba', ba znia xenna' chda loo nisd'na';
na' kon yel' wak xen cho'na' beno' gan lao ben'ka'
chakzi' chakzbani li'.

11 Yabana' na' yell-lioni nakgakan cho';
li' bxe bsilo' yell-lioni na' yog' daa de lawinna'.

12 Lin' beno' gana' chzolo yell-lioni na' axt gana' chiyollan;

na' yaaka' le Tabor na'ch Hermón choe'la'ogakan li'.

¹³Li' chono' yel' wak choo yel' wak xenka';

nako' beṅ' wal inleeb na' chono' gan lao bittezə.

¹⁴Li' chṅabi'o kon ka chiyal' na' chḡhoglo' che
beṅ' kon ka chidoḷee.

Daa napo' yel' chakina' na' daa chono' ka chḡhebo'
chli'gakan ka nako'.

¹⁵Chios, ḡa', chakomba beṅ'ka' ṅezi nakan we'la'ogake' li',
beṅ'ka' chda lo beeni' ḡo'na' daa chle'shiilo' ḷegake'.

¹⁶Na' ni ḡon' chiba chizak'gakile' toshiizi,
na' chibagakile' ka nak yel' ḷi yel' shao' ḡo'na'.

¹⁷Dii ḷicha, li' chono' ḷegake' wal na' chzoagako'ne' mbalaz;
na' chono' neto' yel' wak ḡo'na' daa nako' beṅ' wen.

¹⁸ḷLin' Chios ḡa', chkweejo' neto'!

ḷLin' chṅabi'o neto' na' lin' choe'la'onto', neto' beṅ' Israel!

¹⁹To shii bli'lawo' beṅ'ka' chon ka cheenilo',
na' gollo' ḷegake':

“Ba wlej' to beṅ' wal ladj beṅ'ka' nak yell ḡa',
na' ba goklenee benee beṅ' choo beṅ' xen.

²⁰Ba wlej' Davina', beena' chzoa xtilaana',
na' ba blaa set ḡa'na' yichje'na' daa ba bzoa'ne' inabi'e.

²¹Na' toshiizi gaklenee,
na' kon yel' wak ḡa'na' gonee wal.

²²Na' bi soshiyi' beṅ'ka' chakzi' chakzbani ḷe',
ni bi gon beṅ' malka' ḷe' gan.

²³Wlej' wshoshj' beṅ'ka' tiḷ-lengake'ne';
na' wsol wṅitgakee lawe'na'.

Na' wlliyaa beṅ'ka' chakzbangakile' ḷe'.

²⁴Toshiizi gakidee na' gon' diika' bḡheb' lawe'na',
na' nad' gon' ka illilj yel' wṅabia' ḡe'na'.

²⁵Gon' kwenḡe inabi'e
doxente cho'a nido'na' le Mediterráneo aḡt
yawa' le Éufrates.

²⁶ḷLe' ine' nad': Lin' nako' Ḳa',
na' nako' Chios ḡa', chislo' nad' na' chkweejo' nad'.

²⁷Na' nad' ḷekzka' wzoa'ne' ka bi' ḡa' bi' nech,
na' inabi'e lao yog'ḷoḷte beṅ' wṅabia'ka' lle' doxente yell-lioni.

²⁸Na' toshiizi gakidee
na' toshiizi gon' diika' bḡheb' lawe'na'.

29 Xiin dia che'na' inabia'gake' toshiizi,
ka chak che yabana' zoan toshiizi.

30 “Per shi legake' choonlall'gake' ley cha'na',
na' bi gongake' ka nllia' bia' gongake',

31 na' shi bi gapgake' balaan diika' goshgakee gongake',
na' bi wzoagake dill' che diika' nllia' bia' gongake',

32 na' wsak'zi'gakee ni che yel' widenag che'ka', na'
ni che dii malka' chongake'.

33 Per Davina' toshiizi gakidee,
ni biga wsan' gon' diika' ba bcheb' gon' che'.

34 Biga kwej yichj' daa ba bcheb' gon' che'
ni bi wshaa cho'a dill' cha'na' ba goshee.

35 Toshiizi gon' dga ba bcheb' gon' che' daa nak'
ben' li ben' shao',

na' biga siyaane'.

36 Xiin dia che'na' inabia'gake' toshiizi,
ka zoa wbilla' toshiizi.

37 jYel' wnabia' che'na' gataan toshiizi,
ka beo'do'na' na' yabana' zoagakan toshiizi!”

38 Per li', ba bzo' ka'lə ben' wnabia'na' wlejo';
na' ba benilo'ne' nakzi,
na' ba chllone'.

39 Ba bzo' ka'lə daa bchebo' lawe'na';
na' bikwaso' yel' wnabia' che'na'.

40 Ba bchinjo' zeena' daa chkweejan yell che'na',
na' yooka' diika' nan nongake' chech kwenche kono
bi gak goni legake'.

41 Na' yog' ben' chaj chde na', chzi' chbangake'
kon dii cheengakile';

na' ben'ka' lle' yellka' ndil nllagan chtitjakile' le'.

42 Ba bi'o latj kwenche ben'ka' wdil-lengake' le'
chiba chizak'gakile' daa bengake'ne' gan.

43 Bi bi'o latj bi gonlen yesyana' che'na'
na' bi gokleno'ne' lo wdila'.

44 Ba bisol binito' yel' zeyi che'na',
na' bich bi yel' wnabia' nape'.

45 Ba bzesho' yizka' nan zoe' wen
na' ba bsi'one' yel' zto'.

- 46 Chios cha', ¿atoshiizin bich gakleno' neto', lla?
¿Atoshiizin gak yel' chllaa cho'na' ka yi'na' daa chal'nin?
- 47 Chios cha', jadini shlollchgan mban';
na' benecha' beena' bxe bsilo' xtit shlollchgan mbane'.
48 ¡Biga zoa ben' soe' toshiizi na' bi guete!
¡Kono gak yila lao yel' wita'!
- 49 Chios cha', ¿biche bich chli'o yel' chaki cho'na'
ka beno' kani'yi,
ka bchebo' lao dii Davina' gono' che' toshiizi?
50 Chios cha', jadini ka chtitj chtangakile'
ben'ka' nak yell cho';
na' chzo chzakshazid' diika' chbell chne ben'
yell zit'ka chento'.
- 51 Chios cha', ben'ka' chakzi' chakzbani li' le chtitj
chtangakile' neto',
na' toshiizi chtitj chtangakile' beena' wlejo' chnabi'e.
- 52 Shajlaoshga Xancho Chioza' toshiizi.
¡Kan' gakan!

Libr wdapi

(Salmos 90—106)

Salmo 90

- 1 Chios cha', toshiizi ba gokleno' dia chento'ka' ba wde,
na' ka'kzə ni chakleno' neto' naa.
- 2 Kana' zi' xe silte yaa yaoka'
na' zi' xe silte yell-lioni,
kani'teyi na' zejli kani, li' nako' Chios.
- 3 Li' chiyono' benecha' bishte yell-lio
kat' chi'o legake': “Li yiyak bishte yell-lio, le' xiin benech.”
- 4 To mil yiz chle'ilo'n ka shllazə,
wa ka shon tap gor che shyel.
- 5 Lobe' chizi' chikoo yel' mban che ben' yell-lioni,
la' to ldezan chbangake', ka ben' chnezi yel.
Chak chegake' ka chak che yix' kwanna' daa chla' shzila'.
- 6 La'kzi chla'n shzila' na' chakshao'lalliin,
shlle'na' chkwedan na' chbillan.

⁷Yel' chllaa cho'na' chwall chsheban neto'
na' chlliyai'n neto'.

⁸Yog'loḷ dii malka' chonnto' nez nḷe'ilo'n kwasloḷ,
na' ni ton bi ngash' lawo'na'.

⁹Na' chsi chchogo' yel' mban chento'ni daa chshaanto' li'.
Ka to ben' chkaalall'zin, ka'zə chde lla yel chento'ka'.

¹⁰Guiyonshi yiz zeelo chbannto',
na' ben'ka' chon ben' walch chbangake' taplalj yiz.
Na' la'kzi to kat' chzoanto',
yizka' chbannto' nsa'n dii zen' dii zed na' yel' chjxaki.
Na' yizka' ḷobe' chdegakan,
na' ḷobe' chiyoll chidolennto'gakan.

¹¹Kono nezi ka to nak yel' chllaa cho'na'
kwenche gall illebe' li' ka chiyaḷ'.

¹²Bli' bsedi neto' kwenche gakbe'into' mbabzi
lla yel chento'kan'
kwenche sho' yel' sin' cho'na' ḷoo yichjlall'do'nto'ni.

¹³Bizi'xengach chento', Chios cha', na' bich sha'gachilo'.
Wdapgach yel' chiyesh'lallii chento', neto' naknto' xmoso'.

¹⁴Soalengach yel' chaki cho'na' neto' ka zi' solo llana',
na' yiba yizakinto' goḷ inento' li' shnon mbannto'.

¹⁵Bengach ka yizoanto' mbalaz,
ka to llaka' na' yizka' ba bsak'zi'o neto'
na' ben ble'into' dii mala'.

¹⁶Bengach ka neto' chonnto' ka cheenilo', na' len
xiin dia chento'ka',
yen ile'into' diika' chonleno' yel' wak cho'na'.

¹⁷Soalengach yel' goklen cho'na' neto', Chios cha'.
Bengach ka si'nto' banez llinna' chonnto'.
Ben goklen, bengach ka si'nto' banez llinna' chonnto'.

Salmo 91

¹Beena' zoa lo ni'a na' Chioza',
Chios, beena' nak liizelozi ben' choo ben' xen,
beena' liizelozi nap yel' wak choo yel' wak xen, gap wwie'ne'.

²Na' chi'e Chioza': "Lin' non' lez gap wwio' nad',

na' wkwash' wkweejo' nad' lao yog' dii nxoll.
Lin' nako' Chios cha', na' n̄xenilallaa li'."

³Len' yisle' li' lao dii nxollka',
na' yisle' li' lao yillwe'ka' daa nsa' ye! wit.

⁴Na' le' wkweje' li'
ka chon baka' chiyell xiinbka' xan xilbka',
kwenche bibi gak cho'.

Na' daa nchebe' gone' cho' wkweejan li'.

⁵Bi gall illebo' diika' chda wal chel,
ni xiska' chzal'lengake' xis wixit'ka' tellana',

⁶ni dii nxollka' chda wal chel,
ni dii malka' chlliyi'n ben' tellana'.

⁷La'kzi kwito'na' shlaa guet to mil ben',
na' kwito'na' zi shlaa guet zi shi mile',
na' li', aga bi gakilo'.

⁸Kontgui sio' wwio' ka gak che ben' malka'
kat' ikaagake' laxj dii malka' bengake'.

⁹Daa ba n̄xenilalloo gap wwia Xancho Chioza' li',
beena' liizelozu nak ben' choo ben' xen,

¹⁰aga bi dii nxoll cho' gat',
ni yillwe' bi sho' loo yoo lillo'na'.

¹¹La' len' wselee anjl che'ka' gap wwiagake' li' gattezə shajo';

¹²na' gox'gake' li' kwenche ki koo wchewo' yajka'.

¹³Wak shechj to' ladj bell zniaka' na' ladj be! zniaka'
na' wlej wshoshjgako'b na' bibi gongakib li'.

¹⁴Chioza' ne':

"Daa chaki beeni nad', yisla'ne',
na' gon' ka kono bi goni le' daa nombi'e nad'.

¹⁵Na' kat' inie' nad', na' wzenag' che',
na' gaklenee lao ye! zak'zi'na' chllagloe',

na' yisla'ne' lawi daa chak che',
na' gon' ka sho'e balaan xen.

¹⁶Na' wi'ane' to ye! mban xen

na' gon' ka yiba yizakile'
daa chisla'ne' lawi daa chak che'."

Salmo 92

¹ Chios cha', ben' nak liizelozi ben' choo ben' xen,
 ;le mbalaz we'la'onto' li',
 na' gol inento' koonto' li' balaan!

² Lle' zil we'nto' dill'
 ka nak yel' chaki cho'na' na' che daa chono' toshiizi
 daa chchebo'.

³ Na' gol inelennto' li' diika' llia kwerd cheyin,
 diika' chzill xochi.

⁴ Chios cha', ;Li' ba bzo' nad' mbalaz ni cheyi diika' chono'!
 ;Na' diika' chono' chongakan ka chiba chizakid'!

⁵ Chios cha', ;dii choo dii xen inleeb nak diika' chono'!
 Na' ;diika' chgoo xnezin gono' le lallj shajniinto'n!

⁶ Ben'ka' bi nteyi, bi chajni'gakile' dga:

⁷ la'kzi chesh chalj ben' malka' ka yix' kwan na'
le wen chak chegake',

wllin lla kwiayi'gake' toshiizi.

⁸ Per li', Chios cha', zejli kani nako' liizelozi ben' choo ben' xen.

⁹ Dii lica, Chios cha',
ben'ka' chakzi' chakzbani li' kwiayi'gake';
 na' ben' malka' ga gazə ikaa twej tweje'.

¹⁰ Li' chono' nad' ben' wal inleeb

ka to goon wal,
 na' choe'lawo' nad' daa chwazjo' set zixa' yichjii.

¹¹ Ile'teid' ka kwiayi' ben'ka' chakzi' chakzbani nad';
 ;na' yenteid' ka kwellyesh' ben' malka' ni cheyi
 daa gak chegake'!

¹² Ben' wenka' gak wen chegake' ka yag zinka'
 diika' zoa shi'a shga';

na' kwejlao'gake' ka mbejlao yag cedroka' lle' gana'
 mbani Líbanona'.

¹³ Daa zoagake' lesh' lill xlatj Xancho Chioza',
le mbalaz chak chegake'.

¹⁴ La'kzi ba nakgake' ben' gol, gak chegake' ka chak
che to yag dii chbiachga dii zix,
 na' toshiizi zoan shi'a shga'.

¹⁵ Na' we'gake' dill' inagake':

Xancho Chioza', beena' chap chwie' nad', nake'
 beṅ' li beṅ' shao'
 na' biga chone' daa bi nak shli.

Salmo 93

¹ ;Xancho Chioza' chṅabi'e!
 Na' ka xa beṅ' wṅabia'na' daa le nakə, kan' nak yel' beṅ' choo
 beṅ' xen che'na' len yel' wak xen che'na'.
 Le' bzoacheche' yell-lioni, kwenche bi ta iniban.
² Kani'teyi Chios cha', zo' chṅabi'o,
 na' zejli kani zo'.
³ Chios cha', niso'na' chonan sshag na' chas chataan
 daa choon bli'na'.
⁴ Per li', Chios cha', llio' yabana',
 naptecho' yel' wak choo yel' wak xench aga ka
 bli che niso'na',
 na' ka sshaga' daa chonan.
⁵ Chios cha', diika' nllio' bia' gonnto' nakgakan dii biga chlla'.
 ;Yel' li yel' shao' cho'na' toshiizi wli'lawin loo lill xlatjo'na'!

Salmo 94

¹ Chios cha', beṅ' chizi' wzon, bli'gach yel' chllaa cho'na'.
² Lin' nako' beena' chṅoglo che beṅ' yell-lioni.
 ;Bi shagachilo' wi'o beṅ'ki chep cha'lall' yel'
 zak'zi'na' chido!'gake'!
³ ;Bat, Chios cha', bat yiyoll yido yiba yizaki beṅ' malka?
⁴ Yog'!ol beṅ' malka' chbell chṅe ka nla' ka nte,
 nakgake' beṅ' chep cha'lall'
 na' le chshalj chshon che kwingake'.
⁵ Chios cha', chongakile' beṅ'ka' nak yell cho' kon
 da nazan chegake'.
 ;Chsak'zi'gake' beṅ'ka' nak lall' no'!
⁶ Chitgake' nool wizebka' na' beṅ' zit'ka';
 na' chsi chṅoggake' yel' mban che bi' wizebka'.
⁷ Na' nazgake' aga chle'i Chioza',
 aga chakbe'i beena' be'la'o dii Jacoba'.

- ⁸ ḡLi shajniḡ dga, le' beḡ bi nteyi!
 ḡBat illin lla shajniile?
⁹ ḡAchakile bi cheni beena' ben nagchokin?
 ḡAnti chakile' bi chle'i beena' ben jalaochokin?
¹⁰ ḡAchakile beena' chigoo shḡlilall' beḡ'ka' lle' yog'te
 yell bi wsak'zi'e le'?
 ḡAchakile de dii bi ḡezi beena' choe' beḡ yell-lioni yeḡ sin'na'?
¹¹ ḡXancho Chioza' ḡez ḡle'ile' yog'ḡloḡ daa chza'lall'
 beḡ yell-lioni,
 na' ḡezile' nakan dii bibi zakii.
- ¹² Chios ḡha', chakomba beena' chono' ka chigooshḡlilallee,
 na' chli' chsedilo'ne' daa nllio' bia' gone'
¹³ kwenḡche so sakile' yeḡ zak'zi'ka' llana' zaakan,
 shlak chlliyoo beḡ malka'.
¹⁴ ḡXancho Chioza' aga wchoonḡlallee beḡ'ka' nak yell ḡe',
 ni bi wsanḡlallee ḡegake'.
¹⁵ Na' yiyat' yeḡ josḡhis wen,
 na' yog' beḡ'ka' nak beḡ wen ḡogake'n.
- ¹⁶ ḡNora gaklen nad'
 wllone' nad' lao beḡ malka', lla?
¹⁷ Shel' ḡXancho Chioza' bi goklene' nad',
 ba dia' ladj beḡ wetka', shel'ka'.
¹⁸ Kana' wnia': "Ni bllin lla guet' ḡaa",
 yeḡ chaki ḡho'na' goklenan nad', Chios ḡha'.
¹⁹ Ladj diika' gok ḡha', diika' bzegakan nad' wḡeyi,
 lin' biyonxenlalloo nad' na' beno' ka biba bizakid'.
²⁰ Li' aga chidiḡ chillaguilo' beḡ'ka' bi chon yeḡ'
 josḡhis ka chiyal' gakan,
 ni bi chongake' diika' nllio' bia' gongake',
²¹ na' chakgake' toz chiyilḡlall'gake' ḡhe beḡ wenna',
 beena' bibi doḡ ḡheyin de,
 na' chḡhobia'gake' guete'.
²² Per ḡXancho Chioza', nake' ka to yoo dii nak ḡheḡ ga
 sho'a kwenḡche kono bi goni nad'.
 Na' nake' ka to yaj xen daa chkwash' chkweejan nad'.
²³ Na' gone' kwenḡche beḡ malka'
 kwiayi'gake' lawi dii malka' chongake'.
 ḡXancho Chioza' wlliyee ḡegake'.

Salmo 95

¹Li da, goḷ inecho Xancho Chioza' kon yeḷ' chiba chizaki.
Goḷ inecho beena' nak ka to yaj daa chkweej cho'
na' chisle' cho'.

²Li da, shajcho lawe'na' we'chone' yeḷ' choḵken,
na' goḷ inechone' koochone' balaan.

³La' Xancho Chioza' nake' beḅ' choo beḅ' xen,
na' nake' beḅ' liizelozi chḅabia',
na' chḅabi'e lao yog' diika' noni beḅ' chios che'.

⁴Na' nak lall' nee gana' zeelo nak zitj lo yell-lioni,
na' lekzka' naki che' yaa sibka'.

⁵Nisdo'na' nakin che', la' len' bxe bsile'n,
na' le' bxe bsile' yell-lioni.

⁶Li da, wchek' xibcho we'la'ochone'.
Wchek' xibcho lao Xancho Chioza',
beena' bxe bsil cho'.

⁷Len' nake' Chios checho, na' cho' nakcho lall' nee,
na' nakcho ka xil'do' che' bado' chap chwie'.

Li wzenag dga ne' naanlla:

⁸“Bi gakle beḅ' lall'do' wal ka gok dii xoxzto'leka'
gana' le Meriba,

na' lekzka' gana' le Masah, gana' bibi chashj chleb,

⁹gana' bi wyajle' dii xoxzto'leka' shi lekzid' gon' ka bcheb',
la'kzi ba ble'gakile' diika' ba ben' chegake'.

¹⁰Choa yiz blaa legake',

na' wnia': Toshiizi chon beḅ'ki kon ka nazan chegake'
lwaa wzenaggake' cha'.

¹¹Na' daa le blaa yichj' ni chegake', wnia':

Nezganž wi'a latj gaki chegake' yeḷ' wixi'lall' cha'na'.”

Salmo 96

¹Li goḷ to dii kob dii koon Xanchona' balaan;
li goḷ inie' yog'loḷtele le' zoale doxen yell-lioni.

²Li goḷ ine Xanchona', li kwee balaan.

Lla kon lla li' we' dill' ka chone' chisle' beḅ' lao dii nxollka'.

³Li we' dill' ladj beḅ'ka' lle' to to yell doxen yell-lioni,

ka nak balaan̄ xen che'na' na' ka nak diika' chone'
diika' chon ka chibani ben̄'.

⁴La' Xancho Chioza' nake' ben̄' choo ben̄' xen na'
chidolee we'la'ochone';

zeelo len' chiyal' gall illebcho lao yog' chioska' n̄xenilall' ben̄'.

⁵La' diika' noni chios che ben̄' zit'ka' nakgakan de yaj yag,
san Xancho Chiozan' bxe bsile' yabana'.

⁶De to ye! chey cheeni' xen gana' zoe' daa nake'
ben̄' zakii nleeb.

De ye! wak choo ye! wak xen na' ye! mbalaz latja' gana' zoe'.

⁷Le' lle'le yog'lol̄ yellka' llia yell-lioni,

li ye' Xancho Chioza' nake' ben̄' zakii,

na' nape' ye! wak choo ye! wak xen.

⁸Li koo Xancho Chioza' balaan̄ daa chidolee.

Li sho' lesh' lill xlatje'na'

na' li lljwa' daa chzanile we'lene'.

⁹Li we'la'o Xancho Chioza' lill xlatje'na' gana'
nak mbalaz inleeb.

li gall illebe', yog'tele le' zoale doxen yell-lioni!

¹⁰Li ye' ben̄'ka' lle' yell-lioni: “iXancho Chioza' chnabi'e!”

Le' bzoacheche' yell-lioni kwenche bi chxiz chdan;

le' wchogloe' che to to ben̄' kon ka chiyal' gakan.

¹¹Yabana' len yell-lioni, chiyal' yiba yizakgakin;

na' nido'na' chiyal' gonan sshag ye! chiba chizaki cheyinna'
len yog'lol̄ baka' lle' lla' lo'inna'.

¹²Lyixaa len yog'lol̄ dii lle' lla' lawinna' chiyal'
yiba yizakgakin.

Na' yagka' lle' lla' yaa yaoka' chiyal' gol̄ inegakan ye!
chiba chizaki cheyinka'

¹³lao Xancho Chioza', beena' za'.

La' ba zee zidchogloe' che yog'lol̄ ben̄' yell-lioni;

na' wchogloe' che to to ben̄' kon ka chiyal' gakan.

Salmo 97

¹iXancho Chioza' chnabi'e!

li yiba yizaki, le' lle'le doxen yell-lioni!

li yiba yizaki, le' lle'le yell zit'ka' llia cho'a nido'na'!

²Nechj bej gasja' le'.

Chnabi'e kon ka chiyal', na' chchogloe' che ben̄' kon ka nakan.

- ³Na' nkwaloe' yi'na' lawe'na'
na' wliayi' wliaden beṅ'ka' lliadia' lliagod' le', beṅ'ka'
chakzi' chakzbangakile'ne'.
- ⁴Na' kat' chashj chtin yi' wziw' che'na',
chzeeni'n doxen yell-lioni,
na' axt chxiz yell-lioni.
- ⁵Ka ser daa chiyon', kan' chak che yaaka' lao
Xancho Chioza',
beena' nak Xan doxen yell-lioni.
- ⁶Yabana' cho'en dill' nake' beṅ' li beṅ' shao',
na' yog'loḷ beṅ' lle' yell-lioni chle'gakile' nake'
beṅ' choo beṅ' xen.
- ⁷Na' beṅ'ka' choe'la'o diika' nak yaj yag,
chzi'gake' yeḷ' zto' daa chep cha'lall'lengake'n.
Yog' diika' nak yaj yag bibi zak'gakan lao Chioza'.
- ⁸Chios cha', beṅ'ka' lle' yell Siónna',
na' beṅ'ka' lle' yellka' sto diika' lli gana' mbani Judána',
le chiba chizak'gakile' diika' nllio' bia'.
- ⁹La' li', Chios cha', nako' liizelozi beṅ' choo beṅ' xen
na' chṅabi'o zbii zkaañ yell-lioni.
Nakcho' beṅ' choo beṅ' xen inlebbch aga ka yog'
diika' noni chios che beṅ'.
- ¹⁰Beṅ'ka' chakgakile' Xancho Chioza' chiyaḷ'
wwigakile' dii mala',
la' chap chwie' yeḷ' mban che beṅ'ka' chon ka cheenile',
na' chisle' legake' lo ni'a na' beṅ' malka'.
- ¹¹Yeḷ' goklen che Chioza' nakan ka to beeni' daa
chzeeni'n lao beṅ'ka' zej shḷi,
na' yeḷ' chiba chizakina' zoalenan beṅ'ka' zoa do
yichj do lall'gake'.
- ¹²iLi yiba yizaki lao Xancho Chioza', le' nakle beṅ' wen,
na' li we'la'o beena' nak dowalj beṅ' li beṅ' shao'!

Salmo 98

- ¹Li goḷ to dii kob dii koon Xanchona' balaan,
daa ba bene' diika' chon ka chibanicho;
kon yeḷ' wak choo yeḷ' wak xen che'na'

ba bene' gan lao beṅ'ka' chwigakile'ne'.

² Xancho Chioza' ba bli'e lao yog'loḷ yellka' ka bisle' cho',
na' ka chḥogloe' che beṅ' kon ka chiyaḷ'.

³ Ba bliile' cho' yeḷ' chaki che'na' na' ba bene'
daa bchebe' gone' che yell chechona',
cho' beṅ' Israel.

Axt gana' zeelo chiyoll chido yell-lioni ba nezgakile'
bisla Chios chechona' cho'.

⁴ Li yibayi, li goḷ ine Xancho Chioza',
yog'le le' zoale doxen yell-lioni.

Li goḷ zillj, li kap' na'lena'
na' li goḷ dii koon le' balaan.

⁵ Li goḷ ine Xancho' Chioza',
kon diika' Iliia kwerd cheyin.

⁶ Li yibayi li goḷ ine Xancho Chioza', beena' chṅabia',
kon yaka' chkwellichō.

⁷ Gonshga nido'na' sshag na' yog' diika' lle' Ila' lo'inna',
len yell-lioni na' beṅ'ka' lle' Ila' lawinna'.

⁸ Yaoka' gonshgagakan ka beṅ' chgap' na'yin;
na' yog' yaa yaoka' gongakan ka beṅ' chosyaa
daa chiba chizakile'

⁹ lao Xancho Chioza', beena' za'.

La' ba zee zidḥogloe' che yog'loḷ beṅ' yell-lioni;
na' wḥogloe' che to to beṅ' kon ka chiyaḷ' gakan.

Salmo 99

¹ Xancho Chioza' chṅabi'e.

Ladj anjlka' le kerubines Ili'e chṅabi'e.

Yog' beṅ' lle' to to yell gall illebgake'ne',
na' yell-lioni ixiz iniban.

² Xancho Chioza', beena' zoa yell Siónna', nake'
beṅ' choo beṅ' xen,

nake' Iiizelozi beṅ' choo beṅ' xen lao yog'loḷte yell.

³ We'la'oshga yog'loḷ beṅ' le', daa nake' beṅ' choo
beṅ' xen na' beṅ' gall illebcho.

¡Xancho Chioza' nake' dowalj beṅ' li beṅ' shao'!

⁴Li' nako' to ben' wñabia' xen
 na' li'kzan bllio' bia' çhogbi'a che yog'te ben' kon ka
 chiya! gak che', la' kan' chazlalloo.
 Chono' ye! josçhis ladj xiin dia che dii Jacoba'
 kon ka chiya! gak.

⁵Li we'la'o Chios chechona', beena' nak Xancho,
 na' li wçhek' xible lawe'na'!

Le' nake' dowalj ben' li ben' shao'!

⁶Dii Moiséza' na' dii Aarónna' wlengake' ladj bçozka',
 na' dii Samuela' wlene' ladj ben'ka' wñab ye!
 goklen che Chioza'.

Ka wñabgake' ye! goklenna',
 Chioza' goklene' legake'.

⁷Lo beja'te wne Chioza' bshaljlene' dii Moiséza'
 na' dii Aarónna',
 na' legake' bengake' ka golle'
 na' daa bllie' bia' gongake'.

⁸Chios, ben' nak Xannto', li' gokleno' dii çoxçto'nto'ka'
 na' bizi'xeno' chegake',
 per lekzka' bsak'zi'o legake' ni che dii malka' bengake'.

⁹Li we'la'o Xancho Chioza'!

Na' li lljaçhek' xiblena' lawe'na' lo yaa che'na'!

La' Xancho Chioza' nake' dowalj ben' li ben' shao'!

Salmo 100

¹Li yibayi go! inele Xancho Chioza',
 yog'le le' zoale doxen yell-lioni.

²Li yibayi we'la'ole Xanchona',
 li yiba yizaki kat' yidle lawe'na'.

³Li yiyakbe'i Xanchona' nake' Chios;
 len' bçe bsile' cho' na' nakcho lall' nee.

Nakcho yell che', na' nakcho ka xil'do' bado' chape'.

⁴Li sho' lesh' lill çlatje'na' we'lene' ye! choçken;
 li da, cho'a lille'na' go! inelene'.

Li wi'e ye! choçken na' li we'lawee.

⁵La' Xancho Chioza' nake' ben' wen,

na' yeḷ' chaki che'na' biga lliā te cheyin;
na' toshiizi gaklene' cho' ka ba bchebe'.

Salmo 101

¹ Goḷ inia' li', Chios cha',
wi'a dill' daa nako' beṇ' chiyesh'lallii
na' beṇ' chon daa nak shḷi.

² Na' gon' to dii byen gon' daa nak shḷi
kat' wliilo' nad' yeḷ' wak cho'na'.

Na' do yichj do lallaa wsa' cha' wen ḷoo yoo lilla'ni.

³ Na' bi gon' txen daa bi yejni'alallii.

Chwiid' diika' chon beṇ'ka' chiḷaalao' xnezo'na',
na' ni to daa chongake' bi gon' txen.

⁴ Bi wi'a latj xinj ḷen yichjlall'dawaani,
na' bi wi'a latj che dii mala' lo yeḷ' mban cha'ni.

⁵ Na' wliiyaa beena' do ngash'zə chyilj chzane'
che bish' ljwelle'na',
ni bi gap' yeḷ' chxenlall' che beena' choni beṇ' nakzi na'
chon kwine' beṇ' choo beṇ' xen.

⁶ Na' gaklen' beṇ'ka' nsa' cheyin wen gani nak lallnto',
kwenche soalengake' nad' txen.

Na' toz beṇ'ka' chon daa nak shḷi wzoagakee
gaklengake' nad' inabi'a.

⁷ Bat wi'a latj soa beṇ' wxiye'na' ḷoo yoo lilla'na'.

Na' ni to beṇ' choe' dill' wxiye' bi gak gone' nad' txen.

⁸ Yog' ḷa wliiyaa yog' beṇ' malka' lle' doxen lallnto'ni,
na' wtesh wḷoagakee gani nak yell che Chios.

Salmo 102

¹ Chios cha', bzenaggach dga choe'ḷwill' li',
be'gach latj ḷa' dga nia' li' lawo'na'.

² Bi wllonilo' nad' yeḷ' goklen cho'na'
kat' za' diika' chsak'zi'gakan nad'.

Bzenaggach cha',
na' btagach lalloo gakleno' nad' kat' chnia' li'.

³ ḷa' ba chiyol chinit yeḷ' mban cha'ni ka chinit llenna',

na' yi'zid' dii l̄ana'.

⁴Yichjlall'dawaani chakyeshiin daa bi chak wen ̄cha',
na' chak ̄cha' ka to yix' kwan dii ba chbill;
ni bich nan yeej gaw'.

⁵Na' axt ba billit biloz' daa chbellyeshaa.

⁶Chak ̄cha' ka chak ̄che bedkoka', bana' chda gana'
bibi chashj chleb,
na' ka dama', bana' chda ga kono beṅ' lle'.

⁷Bi chak gues'.

Na' chak ̄cha' ka to byin̄ ba chda tl̄ish' tyaj na'
chjshiab koll' dexka'.

⁸Ben'ka' chakzi' chakzbani nad' bi chsangake'
wtitjgakile' nad',
na' chzetjgake' nad' kat' chyishjgake' bia' blag' ̄che beṅ'.

⁹Lwaa dii nan yeej gaw', loo de nilə chi'a.

Na' daa chbell' lla yel, nis x̄hell ̄cha'ni chlloanan
loo nisa' cheej'.

¹⁰Daa chlloo nad' ba wdoyo' nad' bzaḷoo nad' ka'lə.

¹¹Lla yelka' chdia' nakan ka to xol dii chinit;
na' ba chde ̄cha' ka yix' kwan dii chbill.

¹²San li', Chios ̄cha', chṅabi'o toshiizi;
na' toshiizi lljadin lljaza'lall' beṅ' li'.

¹³Segacho' wṅeyi yiyesh'lallilo' beṅ'ka' lle' yell Siónna',
l̄a' ba bllinkz lla yiyesh'lallilo' l̄egake';
ba bllin llana' yizi'xeno' ̄chegake'.

¹⁴L̄a' beṅ'ka' chzoa xtilloona' chakyesh'gakile'
ka chwiagake' yajka' byinj̄ ̄che yell ̄cho'na'.

¹⁵Ben'ka' lle' yog'l̄ol̄ yellka' gall illebgake' X̄ancho Chioza',
na' yog'l̄ol̄ beṅ' wṅabia' ̄che'ka' gakbe'gakile' nake'
beṅ' beṅ' choo beṅ' xen.

¹⁶Kat' yix̄e yisile' yell Jerusalénna' sto shii,
na' wli'e nake' liizelozi beṅ' choo beṅ' xen.

¹⁷Na' wzenague' ̄che beṅ'ka' kono zoa gaklen l̄egake'
kat'ka' we'l̄willgake' l̄e',
na' bi wdegone' kat' inabgakile'ne' gaklene' l̄egake'.

¹⁸Na' dga chiyal' gakan yish kwen̄che yog' beṅ'
zi' za' in̄ezgakile'n,
na' beṅ'ka' zi' galj we'la'ogake' X̄ancho Chioza'.

- 19 Axt yabana' gana' chajla'o Xancho Chioza', bwie'
 beṅ'ka' lle' yell-lioni,
 20 kwenche gaklene' beṅ'ka' chakyeshii, beṅ'ka' nak lo
 na' beṅ'ka' chwiyi legake',
 na' yisle' beṅ'ka' ba nchogbia' guetgake'.
 21 Na'ch we'gake' dill' che Xancho Chioza'
 na' goḷ inegake'ne' yell Jerusalénna'
 22 kat' yidop yillag beṅ'ka' za' yog' yellka' kwenche
 we'la'ogake'ne'.
- 23 To gchoḷchga zoa' lo yell-lioni ba bzexje' fuerz cha'ni;
 na' ba bzeshee yiz che yeḷ' mban cha'ni.
 24 Na' wnia': "Chios cha',
 bi yikoo yeḷ' mban cha'ni ṅaa ni nak' beṅ' xkwid'."
- La' zejli kaṅi zo' li'.
 25 Lin' bxe bsilo' yell-lioni ka wzolon,
 na' li'kzan bxe bsilo' yabana'.
 26 Yog' diika' te chegakin,
 san li' zoakzo' zejli kaṅi.
 Na' yog' diika' yiyigakan ka chiyi to xalaan beṅ',
 na' chalje'n na' chchooṅe'n.
 27 San li', toz ka zo' zejli kaṅi;
 na' biga llia te cho'.
 28 Na' neto' chzoanto' xtilloona', gap wwio' xiinṅto'ka'
 na' soaleno' xiinṅ dia cheb'ka'.

Salmo 103

- 1 Do yichj do lallaa we'lawaa Xancho Chioza',
 do ka nak' we'lawaa beena' nak dowalj beṅ' li beṅ' shao'.
 2 Do yichj do lallaa we'lawaa Xancho Chioza';
 na' bi gal-lallaa ni to dii wenka' chone' cha'.
 3 Len' chizi'xene' yog'loḷ dii malka' chon',
 na' len' chiyone' bittezə yillwe' dii che'id'.
 4 Len' chisle' nad' lao yeḷ' wita',
 na' dii xen wal chakile' nad' na' chiyesh'lallile' nad'.
 5 Len' choṅe' nad' dii wen dii shao'ka' shnon mban',
 na' chikobe' yeḷ' mban cha'ni
 kwenche iban' ssha, ka chak che to bsia chbam ssha.

⁶ Xancho Chioza' chone' yel' joschis che ben'do'ka'
chchi' chsak' ben',

na' chone'n ka chiya' gakan.

⁷ Bliile' dii Moiséza' diika' ba ngwee xnezin gak,
na' bliile' ben' Israelka' yel' wakka' bene'.

⁸ Xancho Chioza' nake' ben' wen ben' shao' na'
ben' chiyesh'lallii.

Ben' yel' chxenlall' xen wal nake',

na' naplikze' yel' chaki.

⁹ Aga toshiizi gawe' xya checho,
ni aga toshiizi koolallee cho'.

¹⁰ Bi chonile' cho' ka chiya' gak checho ni che dii
malka' choncho;

ni bi chsak'zi'e cho' ka chiya' gak checho ni che
saaxya chechoka'.

¹¹ Ka to nlaa yell-lioni yabana',

ka't'kzan dii xen inleeb nak yel' chaki che'na' daa nape'
che ben'ka' chall chleeb le'.

¹² Na' ka to nlaa gana' chla' wbillla' gana' chxoaten,

ka't'kzan ba bilee cho' zit' wal dii malka' ba bencho.

¹³ Ka chon beena' chisgol chischoo, chiyesh'lallile' xiine'ka',
ka'kzan chon Chioza', chiyesh'lallile' ben'ka' chall chleeb le',

¹⁴ daa nezile' bishte yell-liona'zan wyaa wbinicho.

¹⁵ Yel' mban che ben' yell-lioni nakan toldezə

ka to yix' kwando' wa ka to yejdo' dii chyalj lyixaa.

¹⁶ Na' chde be'na' chshiban daa, na' chbiayi'n,

ni bich nakbia' gana' wllian.

¹⁷ San zejli kani chaki Xancho Chioza' ben'ka' chall chleeb le'.

Na' yel' ben' wen che'na' biga yiyoll yidon lao dia che'ka',

¹⁸ ben'ka' chon kon ka bchebgake' lawe'na',

na' zegake' wneyi gongake' yog' diika' nchogbi'e goncho.

¹⁹ Xancho Chioza' zoe' yabana' gana' chnabi'e,

na' chnabi'e lao yog'lo' dii de.

²⁰ Li we'la'o Xancho Chioza', le' nakle anjl che', na'

naple yel' wak xen,

le' chzoale xtilleena' na' chonle ka ne'!

²¹ Li we'la'o Xancho Chioza', yog'lo'le anjl, le' nakle

ka ben' wen wdi' che',

na' nakle wizoa dill' che' na' chonle ka cheenile'.

22 Y^og'lo^l daa b^xe bsil X^ancho Chioza' daa de
doxen gani chⁿabi'e
chiya^l' we'la'ogakan le'.

Do yichj do lallaa we'lawaa X^ancho Chioza'.

Salmo 104

1 ;Do yichj do lallaa we'lawaa X^ancho Chioza!
;Chios cha', lin' nako' liizelozi beⁿ' choo beⁿ' xen!
Chli'o ye^l' zakii cho'na' na' balaan xen cho'na';

2 na' ye^l' chey cheeni' cho'na' nechjan li'.

Lin' bshiljo' yabana' ka beⁿ' chshilj to lech'.

3 Li' beno' gana' zo' koll' yabana',
na' bejka' ze xan yabana' chchingako'n ka karret
kat' chgoo nez;

na' chlag be'na' len na' chdo' lo llazə.

4 Be'na' chjwa'n cho'a xtilloona',
na' yi' wziiwaa chonan daa chi'on.

5 B^xe bsilo' yell-lioni lo leninna'
kwenche bi illaa xishna'inna'.

6 Na' bwakwo' nisdona' yell-lioni ka xalaanin,
na' bkwasha'n yaaka'.

7 Na' ka gollo' nisdona' yiyon chelin, lii biyonte chelin.
Kon ka benin shi'ona', daa nen ka ga chashj chtin,

8 na' biyetjan lo yaaka' na' billinan lesh'ka' gana'
bllio' bia' illiljan.

9 Na' bllio' bia' gana' bich gak ten,
kwenche bich illiljan wkwashaan yell-lioni.

10 Li' chono' kwenche nisa' chal lo yell-lioni chiyakan
yao na' chden ladj yaaka'.

11 Na' lⁿannan' cheej bayix'do'ka' lle' yaa yaoka';
na' lekzka' lⁿannan' cheej burrka' lle' yaa yaoka' kat' chbilgakib.

12 Na' cho'a yaoka' chllia lill byindo'ka' chda xan yabana';
na' cho^l chxao'gakb lliagakb lo xoz' yagka'.

13 Lin' chyililo' yaa yaoka' nis yeja' daa chseloo
yabana' gana' zoatio'.

Na' nisa' chxop xan yabana' chzaallin yell-lioni.

14 Na' chono' ka chiyashj chileb yix'do'ka' gao bayix'ka',
na' chgolə daa chaz chaan ben' yell-liona',
kwenche yizi' yilape' daa yeej gawe',

15 kwenche gat' vinona' daa gonan ka yibaile',
na' set daa chebe' cho'alawe'na',
na' dii gawe' daa we'n fuerz che'na'.

16 Chiyaalli xan yagka',
yag cedroka' lle' gana' mbani Líbanona',
diika' goz Xancho Chioza'.

17 Na' lawinka' lia lill byindo'ka',
na' lo yag yechka' non lill garzka'.

18 Lo yaa yelka' lle' shib yix'ka',
na' lee yajka' non lill bxill'ka'.

19 Na' beno' beo'do'na' kwenche gat'bia' yilla' lla yelka';
na' wbilldo'na' ba nezin bat chiya' xoan.

20 Na' chono' ka chal, na' chak shgasj shchol,
na'ch chchej bayix'ka' lle' loo yix' dinka'.

21 Na' bellka' chosyaagakb chyiljgakb bana' gaogakb;
na' chnabgakib Chioza' wi'e daa gaogakb.

22 Na' ka chla' wbilldo'na' chiyajgakb gana' zoa blej
chebka' chjatesgakb.

23 Na'ch chchej ben' yell-liona' chjene' llin che'na',
axt nika chlle'yi.

24 ;Dii be dii zil nak diika' beno', Chios cha!
Yog'loiten beno' kon yel' sin' cho'na',
na' yell-lioni nakan tolla' diika' beno'.

25 Na' de nisdona', nakan dii choo dii xen,
gana' lle' ba be ba zil,
ka bado' ka ba yelə.

26 Na' chda barkwka' lawinna';
na' na' yoo Leviatanna', bana' beno' kwenche
chytjb loo nisdona'.

27 Na' yog'lo ba lle' lo yell-lioni na' loo nisdona' nongakb
lez wi'o dii gaogakb kat' ba chdongakb.

28 Li' ngoo daa cheej chaogakb,
na' legakb chyiljgakba'n.
Chzanilo' dii wenka' choe'gakoob,

na' cheej chaogakb ka chelj chlla'gakib.

29 Shi bi yiyesh'lall'gakilo'b, na' gakshejlall'gakb.

Shi yikoo bishbe chebka', na' guetgakb
na' yiyakgakb bishte yell-lio.

³⁰San shi we'gako'b bishbe cho'na' daa nsa' ye!
mban, na' ibangakb,
na' shesh shangakb yell-lioni.

³¹¡Sho'shga Xancho Chioza' balaan toshiizi!
Na' yiba yizakshgaile' ni cheyi diika' bxe bsile'.

³²Kat' chwie' yell-lioni, chxo' chniban,
na' yaaka' chchejgakan llen kat' chdi'e legakan.

³³Shlak mban' yell-lioni, gol inia' Xancho Chioza'.
Shlak ni de bishbe cha'ni, gol inia' we'lawaane'.

³⁴Gakshga daa zia' wneyi dii chazlall' Xancho Chioza',
la' tozen' chone' ka chiba chizakid'.

³⁵¡Yinitloshga ben' saaxyaka' lo yell-lioni,
na' bich soashga ben' malka'!

¡Do yichj do lallaa we'lawaa Xancho Chioza'!

¡Li we'la'o Xancho Chioza'!

Salmo 105

¹¡Li we'la'o Xancho Chioza'!

¡Li we' dill' daa nake' ben' choo ben' xen!

Li we' dill' lao yog' ben' lle' to to yell ka nak diika' chone'.

²Li gol inie', li kwee balaan.

Li we' dill' che diika' chone' diika' chon ka chibani ben'.

³Li wshalj wshon che beena' nak dowalj ben' li ben' shao'.

Yiba yizaki loo yichjlall'do' ben'ka' chiyilj Xancho Chioza'.

⁴Li ibig' lao Xancho Chioza', beena' nap ye! wak
choo ye! wak xen.

Toshiizi li yiyilj Xancho Chioza'.

⁵Li lljadini ye! wak choo ye! wak xenka' ba bene',
diika' chon ka chibanicho,

na' ka'kzə ye! joschisa' daa chone' che ben'.

⁶Li lljadini, ka le' nakle dia che dii Abrahama',
beena' bzoa xtilleena'.

Na' ka le' nakle xiin dia che dii Jacoba', le' ba mbeje'
nakle lall' nee, li lljadinin.

- ⁷Le' nake' Xancho, na' nake' Chios checho,
 na' chone' ye! joschis che yog' ben' yell-lioni.
⁸La'kzi te to mil dia chechoka',
 aga wal-lallee diika' ba bchebe',
⁹diika' bchebe' lao dii Abrahama'
 na' lao dii Isaaca'.
¹⁰Na' kwenche inezicho biga te cheyi daa bchebe'
 gone' checho, cho' ben' Israel,
 bizchope' dill' che'na' lao dii Jacoba',
¹¹kana' golle'ne': "Gon li' yell-lio che ben' Canaánka',
 gakin cho' na' che xiin dia cho'ka'."
- ¹²La'kzi dii xozxto'choka' bi nyangake'
 na' wle'gake' ka ben' zit' yell-liona' gana' bllingake',
¹³na' wdagake' xtit shloll wej to to yell,
 na' wde wdelə ben' wñabi'e legake',
¹⁴Chioza' bi bi'e latj no wsak'zi' legake',
 na' bsi'nteile' ben' wñabia'ka', chi'e:
¹⁵"Bibi gonile ben'ki ba wlej' nakgake' lall' na',
 ni bibi gonile ben'ka' chyixjee daa chepgakee."
- ¹⁶Na' bene' ka got' to wbin xen yell-liona' gana' wzoagake',
 na' bene' wbin yog'!o! dii cheej chaogake'.
¹⁷Na' zigaate bselee dii Joséna',
 beena' bet'gake' kwenche ljen lla ye!e xshin ben',
 kwenche wllialoe' lawe'ka'.
¹⁸Na' wllia ni'ena' we' daa bchejgake'n gdenka',
 na' wdixjgake'ne' lillyana'
¹⁹axt ka bllin lla gok daa wne' gak,
 daa bzajnii Xancho Chioza' le'.
²⁰Na' ben' wñabia' che Egíptona',
 beena' wñabia' lao ben' be ben' zil, bisane'ne'.
²¹Na' bzoe'ne' gok lall' nee doxen gana' chñabi'e,
 na' yog'!o! dii nape',
²²kwenche wli' wsedile' ben'ka' chñabia'
 na' ben' golka' zakii kon ye! sin' che'na'.
- ²³Na' bllin dii Israela', beena' wle Jacob, Egíptona',
 gana' jsoa dii Cama',
 na' wzoe' yella' lega ben' zit'.
²⁴Na' Xancho Chioza' bzesh bzane' legake',

na' wyanchgake' aga ka beṅ' Egíptoka'.

25 Na' Xancho Chioza' bi'e latj bllaa beṅ' Egíptoka' legake',
na' bsak'zi'gake' legake'.

26 Na'ch bseḷ' Chioza' dii Moiséza', beena' bzoa xtilleena',
len dii Aarónna', beena' wleje'.

27 Na' kon yel' wak che Chioza' bengake' dii chon
ka chibanicho

yell-lío Egíptona', daa lekzka' le yell-lío che dii Cama'.

28 Na' ben Chioza' ka biḥoḷ doxen Egíptona',
daa bi bzenag beṅ' Egíptoka' cho'a xtilleena'.

29 Na' biyone' niska' yoll yao che'ka' chen,
na' wit beḷdo'ka' lle' lo'inka'.

30 Na' goshj wḷeb bḷoll yinka' yell che'ka',
na' wyoogakb axt gana' ches beṅ' wṅabia'ka'.

31 Na' ka wṅe Chioza', goshj wḷeb no boḥj na' no bi'alesdo'
doxen gana' mbani Egíptona'.

32 Lwaa gone' yeja', bseḷee yaj yabana',
na' bene' ka wyep yes nall inlleb lo yell-lío che'ka'.

33 Na' blliyee yag uvaka' na' yag yiḡwew che'ka',
na' wdishj bxoxje' yagka' lle' doxen gana' mbanigake'.

34 Na' to ka wṅez Chioza', bllin ba be ba zil bish'zoka',
ba kono ibabkzi.

35 Na' bisto bisḷengakb yog'loḷ daa chigaa lyix' che'ka',
na' yog'loḷ daa goz wlekgake' lo yell-lío che'ka'.

36 Na' bete' yog'loḷ bi' byo nech che beṅ' Egíptoka',
yog'loḷ xiṅ neche'ka'.

37 Na' Chioza' bibeje' beṅ' Israelka' yell Egíptona',
zinoa'tegake' or na'ch plat che beṅ' Egíptoka',
na' yog'gake' bichejgake' shi'a shao'.

38 Na' beṅ' Egíptoka' bibagakile' ka billeshgake'
daa le bllibgake' ka ba gok chegake' ni che beṅ' Israelka'.

39 Chioza' bzie' to bej kwenche bkweejan legake' tellana',
na' bzie' to yi' waḷa' kwenche bzeeni'n gana' zjayaake'.

40 Na' wṅabgakile'ne' dii yeej gaogake', na' bseḷee
bto'ka' wdaogake',

na' bwawe' legake' manána' na' bzesh bzeljile' legake'.

41 Na' bene' ka gol nisa' lee yaja',

na' nisa' gokan ka to yao na' ben xṅezin gana'
bibi chashj chḷeb.

⁴² Goklene' l̥egake' daa bi goḷ-lallee daa b̥chebe'
lao dii Abrahamana', beena' bzoa xtilleena'.

⁴³ Na' ka bisheshe' beṅ'ka' nak lall' nee Egíptona',
na' axt chosyaayigake' daa l̥e biba bizakgakile' daa
bisheshe' l̥egake'.

⁴⁴ Na' bene' lall' na'gake' yell-lío daa naki c̥he beṅ'ka'
bi nxenilall' Chioza',
na' len daa goz wlekgake' lawinna',

⁴⁵ kwenche wzoa yichjgake' diika' bllia Chioza'
bia' gongake',
na' gongake' ka na ley c̥he'na'.

¡Li we'la'o Chioza'!

Salmo 106

¹ ¡Li we'la'o X̣ancho Chioza'!

Li we' X̣ancho Chioza' yeḷ' chox̣ken,
daa nake' beṅ' wen, na' yeḷ' chaki c̥he'na' biga yiyoll yidon.

² Kono saki we' dill' ka nak yeḷ' wak choo yeḷ' wak
xenka' chon X̣ancho Chioza'.

Kono saki we'laweene' ka chidoḷee shajlawee.

³ Chakomba beṅ'ka' chon daa nak sḥli,
beṅ'ka' toshiizi chongake' wen.

⁴ Jadingachi nad', Chios c̥ha',
goklen nad' kat'ka' gakleno' beṅ' wlall c̥ha'ki nak lall' no';
na' bislagach nad' kat'ka' yislo' l̥egake',

⁵ kwenche len' sia' banez yeḷ' shao'ka' gono' c̥he beṅ'ka'
mbejo' nakgake' lall' no',
na' yiba yizaklenid' beṅ'ka' nak beṅ' yell cho'.

⁶ Ba bx̣inj̣ ḅlennto', ka ben dii x̣ozxto'nto'ka'.

Ba bennto' daa bi chiyaḷ' gonnto',
na' ba bennto' mal.

⁷ Kana' wzoa dii x̣ozxto'nto'ka' Egíptona',
aga bzoa yichjgake' yeḷ' wak choo yeḷ' wak xenka' beno';
san goḷ-lall'gake' daa biyesh'lallilo' l̥egake',
na' ka bllingake' cho'a nido'na' le Nido' X̣na,
biyechj bibiigake' li'.

8 Na' Chioza' bisle' legake' daa bchebe' gaklene' legake',
kwenche bliile' legake' yel' wak che'na'.

9 Na' golle' nido'na' le Nido' Xna gakan choplə, na'
gcholinna' biyakan yo bill.

Na' bidie' legake' gcholinna' daa biyak ka to ga
bibi chashj chleb.

10 Na' bisle' legake' lo ni'a na' ben'ka' chllaa legake',
ben'ka' chakzi' chakzbani legake'.

11 Na' bkwakw nido'na' ben'ka' nlag legake',
na' ni togake' bi bila.

12 Kana'ch wyajle'gake' daa bcheb Chioza' gone' chegake',
na' bel wnegake'ne'.

13 Na' tolbe' gol-lall'gake' diika' ben Chioza',
na' bi wlezgake' ile'gakile' daa ngoo Chioza' xnezin
gone' chegake'.

14 Latja' gana' bibi chashj chleb bzoagake' Chioza'
gone' daa nazan chegake'.

15 Na' bzoe' xtilleeka', bi'e daa wnabgake',
per bselee to yillwe' dii betan zangake'.

16 Na' latja' gana' wchengake' gokxe'gakile' llinna'
gok lo na' dii Moiséza'

len dii Aarónna', beena' bzoo Xancho Chioza' goke' bxoze' che'.

17 Na' daan bxa' yell-liona' wdeban dii Datánna',
na' dii Abirama' len dii ben'ka' bengake'ne' txen.

18 Na' bzey yi'na' yog'lo' ben'ka' zi shkwen nakgake' txen.
Na' wvey ben' malka'.

19 Na' gana' zoa yaana' le Horeb bengake' to lwaa lsak' me'do',
na' bengake'b de or na' be'la'ogake'b.

20 Na' bzoagake' Chioza', beena' nak ben' choo ben' xen, ka'lə
na' be'la'ogake' to lwaa lsak' goon, ba chao yix.

21 Na' wlej yichjgake' Chioza', beena' bisla legake',
beena' ben yel' wak choo yel' wak xenka' Egíptona',

22 gana' lekzka' le yell-lío che dii Cama',
na' loo nido'na' le Nido' Xna.

23 Chioza' goklallee wlliyee legake',
per dii Moiséza', beena' wleje' gone' xshine'na',
be'lene' le' dill' kwenche bi bliiyee legake' lo
yel' chllaa che'na'.

- 24 Na' bi goklall'gake' sho'gake' yell-lio daa nak mbalaz,
 daa bi wyajle'gake' gaklen Chioza' legake' kon ka
 ba bchebe' gone' chegake'.
- 25 Na' gana' wchengake' wchell wnegake' che Xancho Chioza',
 na' bi bzoagake' xtilleena'.
- 26 Na' bchoglo Chioza' chegake' guetgake' latja'
 gana' bibi chashj chleb,
- 27 na' xiiñ dia che'ka' gakgake' lo na' ben'ka' bi
 nxenilall'gake'ne',
 na' wshesh wcheene' legake' ga gazə lljen lill
 xlatjgake' la'o lall ben'.
- 28 Na' gokgake' txen ben'ka' choe'la'o daa le Baal-peor,
 na' weej wdaogake' baka' betgake' ka choe'la'ogake' diika'
 noni chios chegake', diika' bi de yel' mban cheyin.
- 29 Na' daa bengake' ka', bshaagake' Xancho Chioza',
 na' bselee yel' wita' ladje'ka'.
- 30 Na' beena' wle Finees, bete' beena' bxinj bñen,
 na' ka', wlez yel' zak'zi' daa bsel' Chioza'.
- 31 Na' daa bene' ka', Chioza' ble'ile'ne' ben' wen,
 na' lao yog'lol' xiiñ dia che ben' Israelka' toshiizi wzeyi
 che' goke' ben' wen.
- 32 Na' lekzka' gana' le Meriba, gana' gol nisa' lee
 yaja', bshaagake' Chioza'.
 Na' ni chegake' bi gok wen che dii Moiséza',
- 33 na' wñie' daa bi chiyal' inie'
 daa bshaagake'ne'.
- 34 Na' lekzka' bi bliayi'gake' ben'ka' ben Chioza'
 mandad wlliyi'gake';
- 35 san bengake' txen ben'ka' bi nxenilall'gake'ne',
 na' wyoologake' bengake' diika' chon ben'ka'.
- 36 Na' daa be'la'ogake' lwaa lsak' chios che'ka',
 wzolo bengake' txen yog' dii malka'.
- 37 Na' bzani xiine'ka', ka bi' byo na' ka bi' noolə,
 betgake' legakb' kwence be'la'ogake' dii xiw'ka'.
- 38 Blaljgake' xchen xiine'ka', ka bi' byo na' ka bi' noolə,
 la'kzi bibi ben bdo'yesh'do'ka'.
 Bzangakile' legakb' witgakb' lao lwaa lsak' chios
 che ben' Canaánka';

na' b_xinjgake' yell-liona' daa weejan x_{chem}'ka'.
 39 Na' wda' wchengake' dii malka' bengake',
 na' gokgake' ka nool n_{lan} ye!_l wda daa bengake' ka'.

40 Daan, bllaa X_{ancho} Chioza' be_n'ka' nak yell che',
 na' gokzbanile' legake'.

41 Na' bene' legake' lall' na' be_n' zit'ka',
 be_n'ka' chakzbangakile' legake', na' w_nabia'gake' legake',
 42 na' bsak'zi'gake' legake',
 na' wzoagake' x_ni'eka'.

43 Chioza' bisle' legake' dii zan shii,
 per legake' bi bzenaggake' che',
 san zizikli b_xinj b_lengake'.

44 La'kzi chiya dii bengake', Chioza' biyesh'lallile'
 legake' ka to wxak'zi'gake',
 na' bzenague' chegake' ka w_nabgakile'ne' gaklene' legake'.

45 Na' jadinile' daa b_{che}be' gone' chegake',
 na' goklene' legake' daa nape' to ye!_l chiyesh'lall' xen wal.

46 Na' bene' kwenche be_n'ka' ch_nabia' legake'
 biyesh'lall'gakile' legake'.

47 Bislagach neto', X_{annto}' Chios.
 Bibejgach neto' yellki gani lle'nto',
 kwenche we'la'onto' li',
 na' yiba yizakinto' koonto' li' balaan.

48 Toshiizi shajla'oshga X_{ancho} Chioza', beena' nak
 Chios checho cho' be_n' Israel.
 Yog'lo_lcho chiyal' inacho: “Kan' gakan.”

¡Li we'la'o Chioza'!

Libr de gayii

(Salmos 107—150)

Salmo 107

1 Li we'la'o X_{ancho} Chioza' daa nake' be_n' wen,
 na' ye!_l chaki che'na' biga yiyoll yidon.

2 Kan' li ina yog'lo_l-le le' ba bisla X_{ancho} Chioza',

le' ba bisle' lo na' beṇ'ka' chakzbani le',
 3 le' ba jsoale yellka' lle' tap laate yell-lioni
 na' ba bitop bishague' le' tozga.

4 Dii xozxto'choka' wdagake' gana' bibi chashj chleb,
 na' bi billelgakile' galə yizi' yikaagake' lljayen lill xlatje'ka'.

5 Na' wbiḷ wdongake',
 zi' lat'zə ki witgake'.

6 Na' lo yel' zak'zi'na' bllaglogake'
 wṇabgake' gaklen Xancho Chioza' legake',
 na' bisle' legake'.

7 Na' bigwee legake' lo nez wenna',
 kwenche biyoogake' yella' gana' jazoagake'.

8 Li we'la'o Xancho Chioza' daa chakile' cho' benech,
 na' daa chone' yel' wakka' kwenche chaklene'
 cho' beṇ' yell-lio.

9 La' len' cho'e daa cheej beena' chbiḷ chdeyi,
 na' chone' ka yelj sha'yi beena' chdon.

10 Balgake' bchejgake' gdenka' na' bsejgake' legake'.
 Na' daa le gokyesh'gakile' gok chegake' ka beṇ' nej
 ga nak shgasj shchol,

11 daa bi bzoagake' xtill' Chioza',
 beena' nak liizelozi beṇ' choo beṇ' xen,
 na' daa bi bzenaggake' daa goklallee gongake'.

12 Na' Chioza' bene' ka bllaglogake' bengake' llin daa nak
 dii lallj nleb, dii bich nan so sakgakile';
 na' wzoagake' nyesh', na' aga no wzoa gaklen legake'.

13 Na' lo yel' zak'zi'na' bllaglaogake'
 wṇabgake' gaklen Xancho Chioza' legake',
 na' bisle' legake'.

14 Na' bibeje' legake' gana' nak shgasj shchol,
 na' bisell biḷee legake' gdenka' nchejgake'.

15 Li we'la'o Xancho Chioza' daa le chakile' cho' benech,
 na' daa chone' yel' wakka' kwenche chaklene'
 cho' beṇ' yell-lio.

16 Le' bxoxj btine' puert de yaka',
 na' bxoxj btine' yaka' ndegake' le'inka'.

- 17 Gokgake' beṅ' bi nteyi na' wxak'zi'gake'
ni che yeḷ' widenag che'ka' na' dii malka' bengake'.
- 18 Bich bi wxin' yeej gaogake',
na' ba nongake' lez guetgake'.
- 19 Na' lo yeḷ' zak'zi'na' bllaglaogake'
wṅabgake' gaklen Xancho Chioza' ḷegake',
na' bisle' ḷegake'.
- 20 Na' bene' mandad yiyakgakile';
na' bisle' ḷegake' lao yeḷ' wita'.
- 21 Li we'la'o Xancho Chioza' daa ḷe chakile' cho' beneḫ,
na' daa chone' yeḷ' wakka' kwenḫe chaklene'
cho' beṅ' yell-lío.
- 22 Li wit bayix'ka' lawe'na' kwenḫe we'lene' yeḷ' choḫken.
Li yiba yizaki, li we' dill' cheyi diika' chone'.
- 23 Beṅ'ka' chdalen barkw che'ka' lo nido'na'
chdagake' doxen lawinna' chit' chdegake' bi de chegake';
- 24 na' lo nido'na' ben ble'gakile'
daa ben Chioza' daa chon ka chibanicho.
- 25 La' to ka wṅez Chioza' wze to yejpe' xen wal,
na' wzolo chas chat' nido'na'.
- 26 Na' bsolla'n barkwka' cha' cha',
na' jache'tegakan lawinna' sto shii.
Na' bich bengake' lez yilagake'.
- 27 Na' gokyalgake' ka weezo,
na' la'kzi nzedgakile' chsa'gake' barkwa',
ni lat' bi goklenan ḷegake'.
- 28 Na' lo yeḷ' zak'zi'na' bllaglaogake'
wṅabgake' gaklen Xancho Chioza' ḷegake',
na' bisle' ḷegake'.
- 29 Na' biyone' yejpe' xenna' be'lesdo',
na' biyat'lli nido'na'.
- 30 Ka biyat'lli nido'na' ḷe bibagakile',
na' be' Chioza' latj bllingake' gana' chaklall'gake'
illin barkw che'ka'.
- 31 Li we'la'o Xancho Chioza' daa ḷe chakile' cho' beneḫ,
na' daa chone' yeḷ' wakka' kwenḫe chaklene'
cho' beṅ' yell-lío.

³²Li koo Xancho Chioza' balaan kat' chdi'a chllagle
choe'la'olene'.
Na' le' beṇ' gol, le' nakle beṇ' chṇabia', li we'lawee
kat' chdi'a chllagle.

³³Chioza' chzeeje' yaoka' len bejka' gana' chal niska',
na' chiyakgakan yo bill.
³⁴Na' chiyone' yell-lio wenka' yell-lio dii bibi chashj chḷeb,
ni che dii malka' chon beṇ'ka' lle' lawinna'.
³⁵Na' gana' bibi chashj chḷeb chiyone'n ga chbia yel,
na' yo billka' chiyone'n yell-lio ga chal nis.
³⁶Na' chzoe' lawinna' beṇ'ka' bibi de yeej gaogake',
na' na' chxe chsil lalle'ka' gana' soagake'.
³⁷Chaz chbekgake' lo yell-lio che'ka',
na' chaz chbekgake' uvaka',
na' chizi' chilapgake' dii xen.
³⁸Chonleeye' legake', na' chone' ka chesh changake',
na' lekzka' chone' ka chesh chan bayix' che'ka'.
³⁹Na'tech zej chiyesh'gake' na' le nyesh' gok chegake'
ni che beṇ'ka' chsak'zi' legake' na' dii lalljka' chen chle'gakile'.
⁴⁰Chioza' chwiile' beṇ'ka' chsak'zi' beṇ',
na' chte' legake' gana' bibi chashj chḷeb
gana' ni nez bi xoa galə si' ikaagake'.
⁴¹Na' chibeje' beṇ' yesh'ka' lo yel' zi' yel' yeshaa,
na' chzesh chzane' xiṇ che'ka' ka chesh chan xil'do'.
⁴²Na' beṇ' wenka' chiba chizak'gakile' ka chle'gakile'
ka chone',
na' beṇ' malka' bibi de inagake'.

⁴³Beena' nak beṇ' sin' chiyal' koo yichje' diiki,
na' shajniile' ka nak yel' chaki che Xancho Chioza'.

Salmo 108

¹Chios cha', toshiizi zoachech' nxenilallaa li',
na' do yichj do lallaa gol' dii koon li' balaan.
²Chiyal' se kwaslen' arpana' len saltériona'
na' ka ba chzoa xena', soloa' gol' inelengaka'n li'.
³Na' ladj beṇ'ka' lle' yog'te yellka'
we'lawaa li' na' gol' inia' li', Chios cha'.

⁴La' yel' chaki cho'na' na' daa toshiizi chono' yog'
diika' chchebo', Chios cha',
nakgakan dii xen inleeb ka yabana' daa bi nakbia'
gate chiyoll chidon.

⁵Shajla'oshgo' yabana' gana' zo', Chios cha!
Na' Doxen zbii zkaan yell-lioni sho'shgo' balaan!

⁶Bisla neto' kon yel' wak cho'na'
kwenche yiyell yila' ben'ka' le chakilo'.
Goklen neto'!

⁷Chioza' wnie' gana' nak lill xlatje', wne':
“Axt yiba yizakid' gon' lall' na'le yell-lio che ben' Siquemka',
na' lekzka' gon' lall' na'le lesh' daa le Sucot.

⁸Gana' mbani Galaada' nakan cha', na' lekzka'
yell-lio che dii Manaséza'.

Yell-lio che dii Efraínna' nakan ka to dii chkweejan yichjaa,
na' yell-lio che dii Judána' nakan ka yag bar cha'na'
daa chnabia'len'.

⁹Yell-lio che ben' Moabka' nakan ka sha' gana'
yoll nisa' chnaa,
na' lo yell-lio che ben' Edomka' wzaḷaa xel'ka',
na' yiba yizakid' daa ben' gan lao ben' filisteoka'.”

¹⁰Non wche' nad' na' gaklene' nad' til-len' ben'ka'
lle' yella' nechj zee wala'?

Non wche' nad' sha' Edoma'?

¹¹Lin' wchi'o neto', shel'ka' Chios cha',
per ba wchoonlalloo neto',

na' bich chakleno' ben' wen wdiḷ chento'ka'.

¹²Bislagach neto' lao ben'ka' chdiḷ-len neto',
la' aga bi de gon yel' goklen che ben' yell-lioni.

¹³Daa gaklen Chioza' chon' goncho gan lao ben'ka'
chdiḷ-len cho',

na' le' wsol wnite' legake'.

Salmo 109

¹Chios cha', lin' choe'lawaa,
bi wdegongacho' dga chnabid' li'.

²Ben' wxiye'ka' na' ben' malka'
chbell chnegake' zban cha',

na' yog' diika' nagake' cha' nakgakan de wxiye'.

³Na' diika' chbell chnegake' cha' axt nakgakan
ka dii nechji nad',

la'kzi bibi ben' chegake'.

⁴Nad' chongakidee wen, na' legake' chdil-lenlögake' nad'.

Per nad' choe'lwill' li' gono' wen chegake'.

⁵Lwaa dii nan ziyongakile' nad' wen ka ba ben' chegake',
chnit chdelögake' nad'.

Chongakidee wen, per legake' chakzbanlögakile' nad'.

⁶Bzoa tlish' ben' mal ka le', wchogloe' che',

na' wide dill' che'na'tez gawe' xya che'.

⁷Kat' yiyiljni'agake' daa chone' gakbe'shgagakile' nape' dol'.

Na' dill'ka' wi'e zizikli wxejshgagakan le'.

⁸Ibanshgue' shlollzə,

na' ben' yoblə yiyakshga lo nee daa nan gok lo nee gone'.

⁹Yigaanshga xiine'ka' wizeb

na' lekzka' xoole'na'.

¹⁰Tashga xiine'ka' ka'z na' inabgake' yiyeshii ben' legake'!

Na' wlagshgagake' legake' gana' byinj lille'ka'.

¹¹Yikaashga beena' bi'e le' mecha'

yog' diika' naki che'.

Na' nola ben' yizi' yilap

yog' diika' goz wleke'.

¹²Kono yiyesh'lall'kzi le',

na' xiine'ka', bi'ka' yigaan wizeb, lekzka' kono
yiyesh'lallii legakb'.

¹³Yiyol yinitshga xiin dia che'na'

na' koch no lljadini lie'ka'.

¹⁴Lljaminshgayi Xancho Chioza' dii malka' ben' xe'ka',

na' biga yisol yinite' dii malka' ben' xneeka'.

¹⁵Toshiizi lljaminshgayi Xancho Chioza' dii malka' bengake'

na' gonshgue' ka kochno lljadini legake' lo yell-lioni.

¹⁶La' biga wyoo yichje' yiyesh'lallile' ben',

san bsak'zi'e ben' bi chak wen cheyin, ben' yesh'do'ka',

na' ben'ka' kono zoa gaklen legake'.

Bsak'zi'e legake' axt ki wxenlallee bete' legake'.

¹⁷Na' daa le bibaile' wdishje' bia' blag' che ben',

ka' yiyakshga che'.

Daa bi bibaile inabile' Chioza' gak wen che ben', ka'kz
kono inab gak wen che'.

18 Bia' blagka' wdishje' che ben', lekze' yidobile'n
na' yiyeej yiyebe'n,
na' gakhshan ka set daa chyebe' daa chaz axt loo llita'.

19 Na' idobshgan le' ka ben' ndob to lech',
na' gox' wchejan le' toshiizi ka ben' nchel' to bachlee.

20 Ka' gonshgayi Xancho Chioza' ben'ka' chakzi'
chakzbani nad',
na' ben'ka' chbell chne cha'.

21 Per li', Chios cha', bengach wen cha' kwenche shoo balaan.
Bislagach nad' daa nako' ben' wen na' ben' chiyesh'lallii.

22 La' dii licha nak' ben' yesh', na' bi chak wen cha',
na' yichjlall'dawaani bi zoan wen.

23 Chak cha' ka chak che xola' chinitlon kat' chxoa wbillla',
na' ka chak che bish'zona', bana' choa' be'na'.

24 Daa bi cheej chaw' axt ba chxiz ni'aki,
na' ba chillit chiloz'.

25 Chtitj chtani ben' nad'.

Na' ka chle'gakile' nad', chta yichje'ka' chxillgakile' nad'.

26 Goklen nad', Chios cha', la' lin' nako' Xan'.
Bisla nad' daa nako' ben' chiyesh'lallii.

27 Na' inezgakile' nan lin', Chios cha',
ba gokleno' nad' kon yel' wak cho'na'.

28 Bibi gacid' chishjgake' bia' blag' cha',
kon shi li' gonleeyo' nad'.

Ben'ka' chsak'zi' nad' si'shgagake' yel' zto',
san nad', yiba yizakid'.

29 Na' ben'ka' chakzi' chakzbani nad' si'shgagake' yel' zto',
na' toshiizi yiyii yidoshgagakile'.

30 Kon cho'a lollaani wi'a Xancho Chioza' yel' choxken toshiizi.
We'lawaane' ladj lkwe' ben' zan,

31 daa chaklene' ben' yesh'ka'
na' chisle' legake' lo ni'a na' ben'ka' chchoglo
chegake' guetgake'.

Salmo 110

¹ X̄ancho Chioza' golle' X̄an'na':

“Wche' kwit' de sh̄l̄ini,^a

shlak wzoa' x̄n̄i'ona' beṅ'ka' chakzbani li'.”

² X̄ancho Chioza' gone' kwen̄che in̄abia'leno' yel'

wak xen cho'na',

aga to gana' mbanzi yaa Siónna'zə, san len beṅ'ka'

chle'zbani li' in̄abi'o.

³ Beṅ' wllall cho'ka', gongake' li' txen llana' shajo' lo wd̄ila'.

Na' ka chle'icho xelj zaga' daa chbia lo yix'do'ka' shzila',

ka'kzan ile'ilo' ibig' beṅ' xkwid' wew'ka' lawo'na' lo

yaaka' gana' nak latj che Chioza'.

⁴ Dga ba b̄cheb Chioza' na' aga wishaa cho'a

xtilleena' daa wne':

“Li' nako' b̄xoz zejli kaṅi, ka nak b̄xoz Melquisedeca'.”

⁵ X̄ancho Chioza' zie' kwito' de sh̄lina' chaklene' li',

na' wlliyee beṅ' wṅabia'ka' llana' wselee yel' zak'zi' che'na'.

⁶ Na' w̄chogloe' che beṅ'ka' lle' yog' yellka' llia yell-lioni

na' wzoles wzolline' beṅ' wetka',

na' wlliyee yog'lol beṅ' wṅabia'ka' lle' doxente yell-lioni.

⁷ Na' beena' bzo' ch̄n̄abi'e ka ngwee nez, illine' to cho'a yao,

na' yeeje' nisa' na' yiyakshao'lallee.

Salmo 111

¹ ḷi we'la'o X̄ancho Chioza'!

Do yichj do lallaa we'lawaa li', Chios cha',

gana' chdop chllag beṅ'ka' nak beṅ' li beṅ' shao'.

² Dii choo dii xen inleeb nak diika' chon X̄ancho Chioza',

na' beṅ'ka' chibain chzegake'n wṅeyi.

³ Diika' chonlene' yel' wak xen che'na' chli'n nake' beṅ' choo

beṅ' xen, beṅ' chidol' sho' balaan,

na' toshiizi nake' beṅ' li beṅ' shao'.

^a 110.1 *Kwit' de shli:* par beṅ' Israelka' sh̄laa de sh̄li zejlin sh̄laa gana' chbe' to beṅ' zakii.

⁴ Bene' ka chjadin chjaza'lall' yog' beṅ' yeḷ' wak choo
yeḷ' wak xenka' bene'.

Ḳancho Chioza' nake' beṅ' wen beṅ' shao' na'
beṅ' chiyesh'lallii.

⁵ Cho'e dii cheej chao beṅ'ka' chall chlleb le',
na' toshiizi chjadinile' daa bchebe' gone' chegake'.

⁶ Ba bliile' beṅ'ka' nak yell che' yeḷ' wakka' chone'
daa bi'e legake' yell-lio che beṅ'ka' bi nḡenilall'gake'ne'.

⁷ Diika' chone' nakgakan dii li dii shao',
na' wak wḡenlall'cho diika' nllie' bia' goncho.

⁸ La' nakgakan dii gon llin toshiizi,
na' nakgakan dii li dii shao'.

⁹ Bisle' beṅ'ka' nak yell che',
na' daa bchebe' gone' chegake' nakan dii gon llin zejli kaṅi.
Chioza' nake' dowalḡ beṅ' li' beṅ' shao' na' nake' beṅ'
chon ka gall illebcho.

¹⁰ Beena' cheeni gak beṅ' sin', chiyal' gall illebe'
Ḳancho Chioza'.

Beṅ'ka' chzoa xtilleena', legaken' nakgake' beṅ' chajni.
Shajla'oshga Chioza' toshiizi.

Salmo 112

¹ Ḳi we'la'o Ḳancho Chioza'!

Chakomba beena' chall chllebe' Ḳancho Chioza',
na' le chibaile' chone' daa nllie' bia' gone'.

² Xiin dia che'na' inabia'gake' yell-liona' gana' mbangakile',
na' Chioza' gone' ka gak wen chegake'.

³ Loo yoo llille'na' zoayaa zoallin yeḷ' wnia'na',
na' toshiizi chibayi Chioza' ka nsa' che'.

⁴ Beṅ'ka' chall chllebgake' Ḳancho Chioza' nakgake' beṅ' wen,
beṅ' chiyesh'lallii na' beṅ' li beṅ' shao'.

Na' nakgake' ka to beeni' daa chzeeni' lo yel chola'.

⁵ Beṅ' wenna' do yichj do lallee chbeje' shloll bi
dii chṅabi beṅ' le',

na' chit' chdie' ka chiyali.

⁶ Na' daan, biga gak ka'zə daa chone'.

Ḳeṅ' li beṅ' shawaa toshiizi lljadini beṅ' le'!

⁷ Na' bi gall illebe' kat' yenile' za' to dii nxoll;
 la' do yichj do lallee zoacheche' n̄xilallee X̄ancho Chioza'.
⁸ Na' bibi de dii wzen le' w̄neyi, ni bibi wwall wsheban le',
 na' ile'teile' kwiayi' beṅ'ka' chakzi' chakzbangakile'ne'.
⁹ Na' cho'e beṅ' yesh'do'ka' daa chyallj ch̄chingakile',
 na' dii wenna' daa chone' biga llia te cheyin.
 Na' daa chone' ka', chgoo beṅ' le' balaan.
¹⁰ Na' beṅ' malka' chllaa chlokgake' kat' chle'gakile'ne',
 na' zeelo chaoyaax̄aj̄ leye'ka' daa bibi chak gongakile'ne'.
 Na' daa zelall' beṅ' malka' gongake' bi gakan.

Salmo 113

¹ ĩLi we'la'o Chioza!
 ĩLi we'la'o Chioza', le' chonle ka cheenile'.

² Toshiizi shajla'oshga Chioza',
 naa na' zejli kaṅi.

³ Gana' chla'te wbilldo'na' axt gana' chxoaten,
 shajla'oshga Chioza'.

⁴ Chioza' ch̄nabi'e doxen yell-lioni,
 na' balaan̄ che'na' nakan dii xench aga ka yabana'.

⁵ Kono zoa beṅ' illin ka Chios̄ chechona',
 beena' zoa yabana' na' ch̄nabi'e.

⁶ Na' la'kzi yabana'te ch̄nabi'e, ch̄lex̄j̄ lawe'
 chwie' xan yabana' len yell-lioni.

⁷ Le' chaklene' beṅ' yesh'do'ka',
 na' beṅ' chyallj ch̄chini chibeje' legake' lo ye! zi' ye! yeshaa,
⁸ na' chbeke' legake' kwit beṅ'ka' zakii,
 beṅ'ka' ch̄nabia' yell che'ka'.

⁹ Na' nool willka', Chioza' cho'e legake' to ye! chiba chizaki
 daa ba bi'e latj wzoa xiingake'.

ĩLi we'la'o X̄ancho Chioza'.

Salmo 114

¹ Cho' beṅ' Israel, cho' nakcho xiin̄ dia che dii Jacoba',
 ka billeshcho lall beṅ' Egíptoka',

² Chioza' wleje' soa lill xlatje'na' lo yell-lío gana' mbani
 xiin dia che dii Judána',
 na' wñabi'e beñ' Israelka'.

³ Ka ble'i nisdona' cho' beñ' Israel gokan chop laalə,
 na' yao Jordanna' bich bxonjan.

⁴ Na' yaa yaoka'
 bxit'gakan ka xildo' na' ka me'do'.

⁵ ¿Bin gok cho', nisdó?
 ¿Bin bblebo?
 ¿Bin gok cho', yao Jordán?

¿Biçe bich bxonjo'?
⁶ ¿Bin gok chele, yaa yao?
 ¿Biçe bxit'zle
 ka chxit' xil'do' na' ka me'do'?

⁷ Chxo' chñib yell-liona',
 lao Xancho Chioza', beena' be'la'o dii Jacoba'.

⁸ Le' bene' kwenche yaja' gokan to ga yoll nis zil,
 na' biyone'n ka ga chal nis zil wal.

Salmo 115

¹ Chios cha', aga neton' chido!nto' shoonto' balaan,
 san lin' chido!oo shoo balaanna' daa napo' ye! chakina'
 na' daa chono' daa bchebo' gono'.

² ¿Berache inaz beñ' zit'ka':
 “Gani Chios chelena'?”

³ Chios chechona' zoe' yabana';
 na' chone' kon da cheenile'.

⁴ San legake' nongake' lwaa lsak' chios che'ka' de or na' de plat,
 na' nakgakan dii choni ni'a neeka'.

⁵ Zoa cho'agakin per bi chak wshaljgakan,
 zoa jalaogakin per bi chle'gakin;

⁶ zoa naggakin per bi chengakin,
 na' zoa xin'gakin per bi chla'gakin.

⁷ Zoa na'gakin per bibi chak gox'gakan;
 zoa ni'agakin per bi chak sa'gakan;
 ini to dill' bi chchej cho'ayinka'!

⁸ Ka beena' chone' legakan, na' ka beena' n̄x̄enilallee legakan,
lebi bi ntelengakile'n.

⁹ Le' beṅ' Israel, ḵ̄li w̄x̄enilall' X̄ancho Chioza'!
Leṅ' chaklene' cho' na' chap chwie' cho'.

¹⁰ Le' b̄x̄oz, ḵ̄li w̄x̄enilall' X̄ancho Chioza'!
Leṅ' chaklene' cho' na' chap chwie' cho'.

¹¹ Le' chaple X̄ancho Chioza' balaan, ḵ̄li w̄x̄enilallee!
Leṅ' chaklene' cho' na' chap chwie' cho'.

¹² ḵ̄X̄ancho Chioza' ba jadinile' cho'
na' gonleeye' cho'!

Gonleeye' cho' beṅ' Israel.

Gonleeye' beṅ'ka' nak xiin dia che dii Aarónna'.^a

¹³ Gonleeye' beṅ'ka' chall chlleb le',
ka beṅ' zakii na' ka beṅ' bi zakii.

¹⁴ ḵ̄X̄ancho Chioza' wzesh wzane' dia cheleka' na' xiin
dia che xiin cheleka'!

¹⁵ ḵ̄X̄ancho Chioza', beena' b̄x̄e bsil yabana' na' yell-lioni,
gonleeyshgue' le'!

¹⁶ Yabana' nakan lill x̄latj X̄ancho Chioza',
na' yell-lioni bene'n lall na' benecha'.

¹⁷ Beṅ'ka' ba wit na' ba billingake latja' gana' lle' beṅ' wetka',
bich gak we'la'ogake' X̄ancho Chioza'.

¹⁸ San cho' we'la'ocho X̄ancho Chioza'
naa na' toshiizi.

ḵ̄Li we'la'o X̄ancho Chioza'!

Salmo 116

¹ Le chakid' X̄ancho Chioza' daa ba bzenague' daa w̄n̄abidee.

² Daa ba bzenague' cha',
shnon mban' in̄abidee gaklene' nad'.

³ Yel' wita' wyeḵj wbiin nad'
na' gokyeshid' daa ba zoa sho'a loo bana',

^a 115:12 *Beṅ'ka' nak xiin dia che dii Aarónna'*: legaken' beṅ'ka' nak b̄x̄oz che beṅ' Israelka'.

na' yel' chlleba' len yel' zak'zi'na' btakw bchejgakan nad'.
 4 Na'ch wṇab' yel' goklen che Xancho Chioza',
 got'yoidee yisle' yel' mban cha'ni.

5 Xancho Chioza' nake' beṇ' li beṇ' shao' na' beṇ' chiyesh'lallii.
 Chios chechona' naklikze' beṇ' wen inleeb.

6 Xancho Chioza' chap chwie' beṇ'ka' kono zoa gaklen legake'.
 Kana' bi chak wen cha', le' goklene' nad'.

7 Na' ṇaa ba bizoa' mbalaz,
 la' Xancho Chioza' ba bene' wen cha'.

8 Daa ba bisle' nad' lao yel' wita',
 na' bi bi'e latj bi gak cha', bich chbellyeshaa.

9 Na' gak' beṇ' wizoa dill' lao Xancho Chioza'
 shlak de yel' mban cha' lo yell-lioni.

10 Nad' beṇ'ilallaa Chioza', la'kzi gokid'
 dii xen nak yel' zak'zi' cha'na'.

11 Lo yel' chakshejlallii cha'na' wnia':
 "Yog'loḷ beṇ' nakgake' beṇ' wxiye'."

12 ¿Naktgui gon' chixj' yog' dii wenka'
 ben Xancho Chioza' cha'?

13 Daa ba bisle' nad', wwazj' vinona' lawi daa chzanid' wi'ane',
 na' wi'ane' yel' choḵken.

14 Na' gon' diika' ba bcheb' lao Xancho Chioza'
 lao lkwe' yog' beṇ' yell che'ka'.

15 Le chjeḷi Xancho Chioza'
 kat' chet beṇ'ka' nak lall' nee.

16 Chios cha', nad' chon' ka cheenilo'.
 Nad' nak xiṇ noola' chon ka cheenilo'.

Lin' ba bxoxj btino' diika' btakw bchej nad'.

17 Na' wit' bayix'ka' lawo'na' kat' gon' li' yel' choḵken,
 na' we'lawaa li', Chios cha'.

18 Na' gon' diika' ba bcheb' lao Xancho Chioza',
 lao lkwe' beṇ'ka' nak yell che'

19 lesh' lill xlatje'na'
 daa zoa yell Jerusalenna'.

ḷLi we'la'o Xancho Chioza'!

Salmo 117

¹Li we'la'o Xancho Chioza', le' lle'le yog'loḷ yellka';
le' lle'le doxen lo yell-lioni, li we'lawee.
²La' yeḷ' chaki che'na' daa nape' checho nakan dii xen,
na' toshiizi zoalene' cho' na' chaklene' cho' kon ka nchebe'.

¡Li we'la'o Chioza'!

Salmo 118

¹Li we'la'o Xancho Chioza' daa nake' beḅ' wen,
la' yeḷ' chaki che'na' biga llia te cheyin.
²Le' beḅ' Israel, li ina:
“Yeḷ' chaki che'na' biga llia te cheyin.”
³Le' nakle xiiḅ dia che dii Aarónna', li ina:
“Yeḷ' chaki che'na' biga llia te cheyin.”
⁴Le' chall chlleble Xancho Chioza', li ina:
“Yeḷ' chaki che'na' biga llia te cheyin.”

⁵Ka wzoa nyesh', be'lwil' Xancho Chioza';
na' bzenague' cha' na' bisle' nad' lawi daa gok cha'.
⁶Xancho Chioza' zoalene' nad', na' bi gall illeb'
shi bi goni beḅ' nad'.
⁷Xancho Chioza' zoalene' nad', na' chaklene' nad'.
Daan, ile'teid' wliayee beḅ'ka' chakzi' chakzbani nad'.
⁸Wenchlan wxenilall'cho Xancho Chioza'
aga ka daa wxenilall'cho beḅ' yell-lioni.
⁹Wenchlan wxenilall'cho Xancho Chioza'
aga ka daa wxenilall'cho no beḅ' wḅabia'.

¹⁰Beḅ'ka' lle' yog' yellka' wche'nal' wche'nogake' nad',
per kon yeḷ' wak che Xancho Chioza' blliyaagake'.
¹¹Wyeḅhjobgake' nad',
per kon yeḷ' wak che Xancho Chioza' blliyaagake'.
¹²Wllagdiagake' nad' ka baser,
per yeḷ' zḅia che'ka' lobe' biyol binitan ka chak che xis
yesh' dii chaḷ' toldez lo yi'na'.
La' kon yeḷ' wak che Xancho Chiozan' blliyai'gakee.
¹³Bengakile' nad' zibia' na' goklall'gake' wlliyai'gake' nad',
per Xancho Chioza' goklene' nad'.

14 Cho! chnia' Xancho Chioza', daa chone' nad' ben' wal.
Na' len' ba bisle' nad' lawe'ka'.

15 Loo yoo lill ben' li ben' shao'ka' de yel' chiba chizaki daa ba
bengake' gan, na' axt chosyaagakile' nagake':
“Kon yel' wak choo yel' wak xen che Xancho
Chioza' ba bisle' cho'.

16 Yel' wak che Xancho Chioza' nakan yel' wak choo yel' xen.
Kon yel' wak choo yel' wak xen che Xancho Chioza'
ba bisle' cho'.”

17 Bi be' Xancho Chioza' latj guet',
san benche' yel' mban cha' kwenche wi'a dill' daa ba bene'.

18 Xancho Chioza' le ba bsak'zi'e nad',
per bin' wi'e latj guet'.

19 Li wsalj cho'a puert che lesh' lill xlatj Xancho Chioza',
kwenche sho'a wi'ane' yel' choxken.

20 Dgan puert che lesh' lill xlatj Xancho Chioza',
gana' sho' ben'ka' nak ben' li ben' shao'.

21 Chon' li' yel' choxken, Chios cha',
la' ba bzenago' cha' na' ba bislo' nad'.

22 Yaja' daa bi wyoolall' wen yooka',
leyen'lannan' yaja' daa ba nchejcha yoonaa'.

23 Dga ben Xancho Chioza'
nakan to dii chibanicho.

24 Llani zoacho naa ba goklen Xancho Chioza' cho',
na' chiya! yiba yizakicho.

25 Ben goklen, Chios cha', bislagach neto'.
Ben goklen, Chios cha', ben ka gak wen chento'.

26 ;Gonleeyshga Xancho Chioza' beeni bselee!
Loo lill xlatj Xancho Chiozi chnabnto' gonleeye' le'.

27 Xanchona' nake' Chios, na' ba goklene' cho'.
Li gak toz, li gox' zinka' shajlenle lawe'na' axt gana'
chzeygake' bayix'ka'.

28 Lin' nako' Chios cha', na' we'lawaa li'.
Lin' nako' Chios cha', na' wi'a dill' nako' ben' choo ben' xen.

²⁹Li we'la'o Xancho Chioza' daa nake' ben' wen,
la' ye!' chaki che'na' biga llia te cheyin.

Salmo 119

- ¹Chakomba ben'ka' bibi dol' chegake' de,
na' chongake' daa nllia Xancho Chioza' bia' gongake'.
- ²Chakomba ben'ka' chzoa dill' che daa nllie' bia' gongake',
na' chiyiljgake'ne' do yichj do lall'gake'.
- ³Biga chongake' daa nak mal,
san chdagake' lo xnez Chioza'.
- ⁴Li' ba bllio' bia' daa gongake'
kwenche gongake'n kon ka cheenilo'.
- ⁵;Zelall'chgaid' soachech'
gon' diika' nllio' bia' gonnto'!
- ⁶Na' bibi gat' dii wsi'n nad' ye!' zto'
kat' ba chon' yog' diika' nllio' bia'.
- ⁷Na' we'lawaa li' do yichj do lallaa
kat' ba wyajniid' nan chchogbi'o che ben' kon ka
chiya!' gak che'.
- ⁸;Gon' diika' nllio' bia' gonnto'!
;Bi wsanlall'gacho' nad'!
- ⁹;Naktgui gon bi' wewaa kwenche bibi xtol'b' gat', lla?
Kon daa soab' gom' ka na cho'a xtilloonan'.
- ¹⁰Nad' chiyilj' li' do yichj do lallaa;
bi wi'o latj wlaalawaa diika' nllio' bia' gonnto'.
- ¹¹Ba ngooshawaa cho'a xtilloona' loo yichjlall'dawaani
kwenche bi wxinj wlen' lawo'na'.
- ¹²;Choe'lawaa li', Chios cha'!
Bzajniid' nad' diika' ba nllio' bia' gonnto'.
- ¹³Cho'a lollaani we'lena'n dill'
yog'lolte diika' ino' gonnto'.
- ¹⁴Chiba chizakchid' chon' diika' na cho'a xtilloona',
aga ka to ye!' wni'a xen wal.
- ¹⁵Sia' wneyi diika' nllio' bia' gonnto',
na' gon' to dii byen noa' nez cho'na'.
- ¹⁶Yibachgaid' gon' diika' nllio' bia' gonnto',
na' bi kwej yichj' cho'a xtilloona'.
- ¹⁷Ben ka gak wen cha' kwenche ibanch'

na' gon' ka na cho'a xtilloona'.

¹⁸ Ben ka gakbe'id'

ka wen inleeb nak diika' nllio' bia' gonnto'.

¹⁹ Nad' nak' ka ben' zit' lo yell-lioni;

bzajni nad' diika' nllio' bia' gonnto'.

²⁰ Toshiizi chak cha' ka ben' chzak'zi'

ni cheyi daa chzelall'chga' gon' diika' nllio' bia' gonnto'.

²¹ Li' chsheshleno' ben'ka' chep cha'lall',

ben'ka' chla'la'o diika' nllio' bia' gonnto',

na' ba nakten kwiayi'gake'.

²² Bi wi'o latj kwel inegake' zban cha', na' gongakile'

nad' nakzi,

la' ba ben' ka nllio' bia' gonnto'.

²³ La'kzi ben'ka' le zakii chgoogake' xnezin gongake' mal cha',

nad' sia' wneyi cheyi diika' nllio' bia' gonnto'.

²⁴ Na' chibaid' diika' nllio' bia' gonnto',

la' legakannan' chzajni'gakin nad'.

²⁵ Ba zoa gaoshosh guet',

jbengach nad' yel' mbanna' ka ba bchebo' gono'!

²⁶ Ba bixoadolaa lawo'na' na' li' ba chakleno' nad'.

Bzajni'chi nad' diika' ba nllio' bia' gonnto'.

²⁷ Ben ka shajniid' bi zeji diika' nllio' bia' gonnto',

la' cheenid' sia' wneyi che diika' chono' daa chon

ka chibani ben'.

²⁸ Le chakyeshid'.

Goklen nad' gak' wal, kon ka ba bchebo' gono'.

²⁹ Bi wi'o latj gak' ben' wxiye';

na' lo yel' ben' wen cho'na' bli' bsemi nad' diika'

chiyal' gonnto'.

³⁰ Ba bchoglallaa noa' nez li cho'na'

na' chzelallaa gon' diika' nllio' bia' gonnto'.

³¹ Chios cha', nad' toshiizi chon' diika' na cho'a xtilloona';

Bi wsi'o nad' yel' zto'!

³² Chon' to dii byen chon' diika' nllio' bia' gonnto',

la' lin' chono' ka chiba chizaki yichjlalldawaani.

³³ Chios cha', bli' bsemi nad' gon' diika' nllio' bia' gonnto',

la' cheenid' gongaka'n shnon mban'.

³⁴ Ben ka shajniid' kwenche gon' diika' nllio' bia' gonnto',

na' gongaka'n do yichj do lallaa.

- 35 Ben ka wzenag' che diika' nllio' bia' gonnto',
la' legakannan' choagakan nad' mbalaz.
- 36 Bengach ka yibachid' diika' nllio' bia' gonnto',
aga ka yel' wni'ana'.
- 37 Bi wi'o latj koo yichj' diika' bibi zakii.
Ben nad' yel' mbanna' kon ka ba bchebo' gono'.
- 38 Bengach daa ba bchebo' gono' cha'
ka chono' che yog' ben'ka' chall chlleb li'.
- 39 Bkwasgach yel' zto'na' daa bi cheenid' gak cha',
la' diika' nllio' bia' gonnto' nakgakan wen.
- 40 Nad' ba wzelallaa diika' nllio' bia' gonnto'.
Ben nad' yel' mbanna', la' lin' nako' ben' li' ben' shao'.
- 41 Chios cha', bli'gachi nad' yel' chaki cho'na'
na' bislagach nad',
kon ka bchebo' gono' cha'.
- 42 Na' daa nxenilallaa cho'a xtilloonan',
gak yilli'a cho'a xtill' ben'ka' choni nad' nakzi.
- 43 Bi wkwasgacho' dill' li cho'ka' cho'a lollaani,
la' ba non' lez diika' nllio' bia' gonnto'.
- 44 Toshiizi, na' zejli kañi
cheenid' gon' diika' nllio' bia' gonnto'.
- 45 Na' kono gak wsej wllon soa' mbalaz,
daa ba chon' diika' nllio' bia' gonnto'.
- 46 Na' we'len' ben' wñabia'ka' dill' che diika' nllio' bia' gonnto'
na' bi yiyii yido'id'.
- 47 La' daa le chakid' diika' nllio' bia' gonnto',
chiba chizakid' gongaka'n.
- 48 Le zelallaa na' le chakid' diika' nllio' bia' gonnto',
na' le wneyi zia' chegakin.
- 49 Jadini daa ba bchebo' gono' cha',
la' ba bñeno' lallaa gono'n.
- 50 Daa nchebo' gakleno' nad', choñan yel' mban cha',
na' len chiyonxenlalliin nad' kat' chakyeshid'.
- 51 Ben'ka' chep cha'lall', tlizi le chtitj chtangakile' nad',
per nad' bi chla'lawaa diika' nllio' bia' gonnto'.
- 52 Chjadinid' diika' nllio' bia' gonnto' daa ba zeji,
na' lennan' chiyonxenlalliin nad', Chios cha'.
- 53 Chllaachga yichj' ni che ben' mal'ka'
daa chchoonlall'gake' diika' nllio' bia' gonnto'.

54 Choḷ chneid' diika' nllio' bia' gonnto'
lo yell-lioni gani zoa' lega beṇ' zit'.

55 Chios cha', waḷka' chjadinid' li',
na' cheenid' gon' diika' nllio' bia' gonnto'.

56 Dgan chidoḷaa gon':
wzoa' dill' cheyi diika' nllio' bia' gonnto'.

57 Kochno zoa cha', zeelo lin', Chios cha'.
Ba bcheb' gon' diika' na cho'a xtilloona'.

58 Do yichj do lallaa chon' ka chazlaloo.
Biyesh'lall'gachi nad' kon ka bchebo' gono' cha'.

59 Ba wzia' wneyi kwasḷoḷ nakan nsa' cha'
na' ba chonch' to dii byen chon' daa nllio' bia' gonnto'.

60 Ba btalallaa
ben' diika' nllio' bia' gonnto'.

61 Beṇ' malka' nechjyobgake' nad' kwenche wzapgake' nad',
per bi chsanlallaa diika' nllio' bia' gonnto'.

62 Waḷ chel chas' chon' li' yeḷ' choḷken
cheyi dii li dii shao'ka' nllio' bia' gonnto'.

63 Nad' nllaguid' yog' beṇ'ka' chall chleeb li',
beṇ'ka' chon diika' nllio' bia' gonnto'.

64 Chios cha', doxen lo yell-lioni chli'lao yeḷ' chaki cho'na'.
Bzajni'chi nad' diika' ba nllio' bia' gonnto'.

65 Chios cha', li' ba beno' wen cha',
kon ka bchebo' gono' cha'.

66 Bli' bsedi nad' gak' to beṇ' nteyi na' beṇ' nad'
yeḷ' sin' cho'na',

ḷa' nḷenilallaa diika' nllio' bia' gonnto'.

67 Kana' zi' gono' ka yexjlallaa, bi bzenag' cho',
san naa, ba chon' ka na cho'a xtilloona'.

68 Li' nako' beṇ' wen na' chono' daa nak wen;
bzajni' nad' diika' nllio' bia' gonnto'.

69 Beṇ'ka' chep cha'lall' chyilj chzangake' cho'a xtilaa,
per nad' do yichj do lallaa chon' diika' nllio' bia' gonnto'.

70 Legake' nakgake' beṇ' bi nteyi,
per nad', chibaid' ka nak diika' nllio' bia' gonnto'.

71 Le wen gok cha' daa wxak'zi'a,
kwenche wyajniid' diika' nllio' bia' gonnto'.

72 Zak'chi diika' nllio' bia' gonnto'
aga ka daa zoayaa zoallin mech de or na' de plat.

- 73 Lin' bxe bsilo' nad'. Lin' beno' ka wya wbin'.
Ben nad' yel' sin' cho'na' kwenche shajniid' diika'
nllio' bia' gonnto'.
- 74 Ben'ka' chall chlleb li' yibagakile' ile'gakile' ka
chakleno' nad'
daa non' lez cho'a xtilloona'.
- 75 Chios cha', nezid' diika' nllio' bia' gonnto' nakgakan
dii li dii shao',
na' daa bsak'zi'o nad', ka chiyal'kz gak chan'.
- 76 Bengach ka yiyonxenlall' yel' chaki cho'na' nad',
kon ka bchebo' gono' cha'.
- 77 Bli'gachi nad' yel' chiyesh'lallii cho'na' kwenche
gat'ch yel' mban cha',
la' chibaid' gon' diika' nllio' bia' gonnto'.
- 78 Si'gach ben'ka' chep cha'lall' yel' zto',
la' aga bi ben' chegake' na' chbell chnezgake' cha';
san nad', cheenid' sia' wneyi diika' nllio' bia' gonnto'.
- 79 Ben'ka' chall chlleb li' na' nombia'gake' diika'
nllio' bia' gonnto',
gonshgagake' nad' txen.
- 80 Gonshga' do yichj do lallaa diika' nllio' bia'
kwenche bi si'a yel' zto'.
- 81 Shlak chbez' yidslo' nad' zej chde cha',
per non' lez cho'a xtilloona'.
- 82 Zej chde cha' shlak chbez' gono' daa ba bchebo'
gono' cha'.
- Na' nia': "¿Bat yido' yidyenxenlalloo nad'?"
- 83 La'kzi ba nak' to ben' ba wde cheyin,
bi chsanlallaa diika' nllio' bia' gonnto'.
- 84 ¿Zi ka'k' chiyal' kwez' gakleno' nad'?
- ¿Bat wchogbi'o che ben'ka' chsak'zi' nad'?
- 85 Ben'ka' chep cha'lall', ben'ka' bi chon txen diika'
nllio' bia' gonnto',
ba wdengake' yechka' lo neza' gana' zyaa kwenche
ibix' lo'inka'.
- 86 Diika' nllio' bia' gonnto' nakgakan dii gak wxenlall'nto'.
Goklengach nad', la' chi'noz ben'ki nad' la'kzi aga
bi chon' chegake'.
- 87 Zi lat'zə ki chongake' gan wlliyi'gake' nad',
per bi chsanlallaa diika' nllio' bia' gonnto'.

88 Bēngach nad' yeḷ' mban daa nako' beṅ' chiyesh'lallii,
na' gon' diika' wno' gonnto'.

89 Chios ḡha', cho'a xtilloona' den zejḷi kaṅi
na' tlizi den yabana'.

90 Toshiizi chono' daa nḡhebo' gono';
lin' bḡe bsilo' yell-lioni na' zoan toshiizi.

91 Yog'te diika' beno' ni degakan kon ka bllio' bia' ḡhegakin,
na' yog'tegakan chongakan ka cheenilo'.

92 Shel' daa nllio' bia' gonnto' bi chonan ka yibaid'
yeḷ' chakyeshiina' ba blliai'n nad', shel'ka'.

93 Nezganz kwej yichj' diika' nllio' bia' gonnto',
ḷa' ni ḡheyinnan' nono' nad' yeḷ' mbanna'.

94 Bislagach nad', ḷa' lall' non' nak'
na' ba wnoa' diika' nllio' bia' gonnto'.

95 Beṅ' malka' chinogake' bat gat' latj wlliai'y'gake' nad',
per nad' zia' wṅeyi ḡhe diika' nllio' bia' gonnto'.

96 Ba gokbe'id' yog' diika' de kwiayi'gakan,
per diika' nllio' bia' gonnto' biga llia te ḡhegakin.

97 Chakchgaid' daa nllio' bia' gonnto'.
Do lla zia'n wṅeyi.

98 Diika' nllio' bia' gonnto' nonan nad' beṅ' sin'ch aga
ka beṅ'ka' chakzi' chakzbani nad',
ḷa' toshiizi zia'n wṅeyi.

99 Chajni'techid' aga ka beṅ'ka' chli' chsedi nad'
daa ḷe wṅeyi zia' ḡhe daa nllio' bia' gonnto'.

100 Chajni'chid' aga ka beṅ' golka'
daa chzoa dill' ḡheyi daa nllio' bia' gonnto'.

101 Ba bīlaalawaa yog'te nez malka'
kwenḡhe gon' ka na cho'a xtilloona'.

102 Bigaṅ' wḷaalawaa diika' nllio' bia' gonnto',
ḷa' kwino' chli' chsedilo'n nad'.

103 Cho'a xtilloona' chakchida'n zix siach
aga ka shin' basera'.

104 Diika' nllio' bia' gonnto' ba nonan nad' beṅ' chajni,
daan, chakzi' chakzbanid' yog' daa nak de wxiye'.

105 Cho'a xtilloona' nakan ka to beeni'
dii chzeeni' lo neza' gana' chiyaḷ' shaa.

106 De to dii bḡheb', na' chiyaḷ' gonan:

chiyaḷ' gon' diika' bllio' bia' gonnto', diika' nak dii ḷi dii shao'.

¹⁰⁷ Chios ḡa', ḷe nyesh'chga zoa';

bengach nad' yeḷ' mbanna', kon ka bḡhebo' gono' ḡa'.

¹⁰⁸ Chios ḡa', ixi' ilebgach diiki choḷ chḡnia' li',

na' bli' bsdgachi nad' daa nllio' bia' gonnto'.

¹⁰⁹ Toshiizi zoa' dii nxoll lao yeḷ' wita',

per bi chsanlallaa diika' nllio' bia' gonnto'.

¹¹⁰ Beḡ' malka' chyiḷjall'gake' nak gongake' wchixgake' nad',

per nad', bi chḷa'lawaa diika' nllio' bia' gonnto'.

¹¹¹ Diika' nllio' bia' gonnto' nakan dii bkwaan'leno'

nad' toshiizi,

na' chzoagakan yiḡhjlall'dawaani mbalaz.

¹¹² Ba bḡhoglallaa shnon mban' gon' diika' nllio' bia'.

¹¹³ Chakzbanchgaid' beḡ' wxiye'ka',

san chakid' diika' nllio' bia' gonnto'.

¹¹⁴ Lin' chkwash' chkweejo' nad' lao bittez dii nxoll,

na' non' lez cho'a xtilloona'.

¹¹⁵ ḷi kwas ka'lə, le' beḡ' mal,

ḷa' cheenid' gon' daa bllia Chios ḡa'na' bia' gonnto'.

¹¹⁶ Goklengach nad' kon ka bḡhebo' gono' ḡa', na'

gat' yeḷ' mban ḡa'.

Bat sia' yeḷ' zto' daa ba non' li' lez.

¹¹⁷ Goklen nad' yila' lao dii nxollka',

na' toshiizi gon' diika' nllio' bia' gonnto'.

¹¹⁸ Li' chbej yiḡhjo' beḡ'ka' chiḷaala'o diika' nllio' bia' gonnto',

ḷa' lillinzi chiyiljall'gake' de wxiye'ka'.

¹¹⁹ Beḡ' malka' lle' lo yell-lioni nakgake' ka yix beb lawo'na',

daan, ḷe chakid' diika' nllio' bia' gonnto'.

¹²⁰ Beli chen ḡa'ni chxizan daa chall chlleban li',

chap' balaan diika' nllio' bia' gonnto'.

¹²¹ Toshiizi chon' daa nak dii ḷi dii shao';

bi wsanlallo' nad' gak' lo na' beḡ'ka' chsak'zi' nad'.

¹²² Bengach ka gak wen ḡa';

bi wi'o latj ḡe beḡ'ka' chep cha'lall' wsak'zi'gake' nad'.

¹²³ Ba zej chde ḡa' shlak chbez' yislo' nad'

na' gono' daa bḡhebo' gono' ḡa'.

¹²⁴ Daa nako' beḡ' chiyesh'lallii, bengach ka gak wen ḡa';

bli' bsdgachi nad' diika' nllio' bia' gonnto'.

¹²⁵ Nad' chon' ka cheenilo'. Beḡ' nad' yeḷ' sin'na'

la' cheenid' shajni'chid' diika' nllio' bia' gonnto'.

¹²⁶ Chios cha', ba gol' wsak'zi'latoo

ben'ka' ba wdishj diika' nllio' bia' gonnto'.

¹²⁷ Daan, le chakid' diika' nllio' bia' gonnto';

chakchgakida'n aga ka ora' daa zeelo nakch wen.

¹²⁸ Daan, noa' yog' diika' nllio' bia' gonnto'

na' chakzbanid' yog' diika' nak de wxiye'.

¹²⁹ Diika' nllio' bia' gonnto' nakgakan dii wen inleeb;

daan, chon' ka nagakan.

¹³⁰ Kat' chzajniilo' neto' cho'a xtilloona' nakan ka to beeni',

na' axt beena' bi chajni chonan le' ben' sin'.

¹³¹ Le chzelall'chga' diika' nllio' bia' gonnto'.

¹³² Bwiagach nad', na' biyesh'lallii nad',

ka chono' che ben'ka' le chaki li'.

¹³³ Ben ka gon' kon ka na cho'a xtilloona';

na' bi wi'o latj inabia' dii mala' nad'.

¹³⁴ Bisla nad' lo yel' zesh' yel' zban che ben' yell-lioni,

la' cheenid' gon' diika' nllio' bia' gonnto'.

¹³⁵ Ble'shiigachi nad',

na' bli' bsemi nad' diika' nllio' bia' gonnto'.

¹³⁶ Ka to yao ba gok nis xhell cha'ni chchej jalaw'ki

daa kono chon diika' nllio' bia' gonnto'.

¹³⁷ Chios cha', lin' nako' ben' li ben' shao',

na' dii wen dii shao' nak diika' nllio' bia' gonnto'.

¹³⁸ Yog'te diika' nllio' bia' gonnto'

nakgakan dii wen dii shao' na' dii wxenlall'nto'.

¹³⁹ Chao chdiachga yel' chllaana' nad'

la' ben'ka' chakzi' chakzbani nad' ba wlej yichjgake'

cho'a xtilloona'.

¹⁴⁰ Cho'a xtillooka' chli'lawin nakan dowalj dii li,

daan, le chakida'n.

¹⁴¹ Nad' nak' ben' yesh'do' na' choni ben' nad' nakzi,

per bi chsanlallaa gon' diika' nllio' bia' gonnto'.

¹⁴² Toshiizi nako' ben' li ben' shao',

na' diika' nllio' bia' gonnto' nakan dii li.

¹⁴³ Chakyesh'chgaid' na' chzak'zi'chga',

per chibaid' gon' diika' nllio' bia' gonnto'.

¹⁴⁴ Diika' nllio' bia' gonnto' toshiizi nakgakan dii li dii shao'.

Ben nad' yel' sin'na' kwenche gat' yel' mban cha'!

- 145 Chios cha', do yichj do lallaa chnia' li;
goklengach nad', na' gon' diika' nllio' bia' gonnto'.
- 146 Chnabid' li' yislo' nad',
na' gon' diika' nllio' bia' gonnto'.
- 147 Ka ba chzoa xena', chas' na' chnabid' li' gakleno' nad',
na' ba non' lez cho'a xtilloona'.
- 148 Do yel bi ches'
daa cheenid' sia' wneyi che cho'a xtilloona'.
- 149 Chios cha', bzenaggach cha' daa nako' ben' chiyesh'lallii.
Bengach yel' mban cha' daa nako' ben' li ben' shao'.
- 150 Gaoshosh ba no ben'ka' cheeni wsak'zi' nad',
na' ba wlej yichjgake' diika' nllio' bia' gonnto'.
- 151 Gal' gllin zo' li', Chios cha',
na' yog' diika' nllio' bia' nakan dii li.
- 152 Ba wlla nombi'a diika' nllio' bia' gonnto',
diika' bzo' gon llin zejli kani.
- 153 Bwiagach ka chzak'zi'a na' bisla nad',
la' bin' gal'-lallaa gon' diika' nllio' bia' gonnto'.
- 154 Goklen nad' lawi dga chak cha' na' bisla nad'.
Bengach nad' yel' mbanna', ka bchebo' gono' cha'.
- 155 Biga yislo' ben' malka',
daa bi chongake' ka nllio' bia' gonnto'.
- 156 Chios cha', ben' chiyesh'lallii nllib nako';
ben' yel' mban cha' daa nako' ben' li ben' shao'.
- 157 Ben' zan nak ben'ka' chwiyi nad' na' ben'ka' chsak'zi' nad',
per nad' bi chla'lawaa diika' nllio' bia' gonnto'.
- 158 Ni lat' bi cheenid' yen ile'id' ben'ka' bi chzenag cho',
la' bi chongake' ka na cho'a xtilloona'.
- 159 Chios cha', bwiakachi ka chakchgaid' diika'
nllio' bia' gonnto'.
Daa nako' ben' chiyesh'lallii, bengach nad' yel' mban.
- 160 Doxente cho'a xtilloona' nakan dii li;
na' diika' nllio' bia' gonnto' nakan dii li dii shao'
na' gonan llin zejli kani.
- 161 Ben' wnabia'ka' chbe'nogake' nad' la'kzi aga
bi ben' chegake',
per chllebch' cho'a xtilloona' aga ka legake'.
- 162 Le mbalaz zoa' daa nezid' nchebo' gono' wen cha',
na' chibaid' ka chibayi to ben' chilleli to dii le zakii.

- 163 Chakzbanid' ye|' wxiye'na', na' chwichgidaan,
san chakid' diika' nllio' bia' gonnto'.
- 164 Gall shii choe'lawaa li' yog' lla
ni cheyi dii |i dii shao'ka' nllio' bia' gonnto'.
- 165 Le mbalaz zoa ben'ka' chaki diika' nllio' bia' gonnto',
na' aga bi de dii wchixan |egake'.
- 166 Chios cha', chbez' yidslo' nad',
|a' ba chon' ka bllio' bia' gonnto'.
- 167 Nad' chon' diika' nllio' bia' gonnto'
na' |e chakchgid'gakan.
- 168 Chon' ka nllio' bia' gonnto' na' ka na cho'a xtilloona',
|a' nez |le'ilo' yog' diika' chon'.
- 169 Ila'gach lawo'na' dga chnabid' li', Chios cha'.
- Ben' nad' ye|' chajniina', kon ka na cho'a xtilloona' gono' cha'.
- 170 Ila'gach dga chnabid' li' lawo'na'.
- Bislagach nad', kon ka nchebo' gono' cha'.
- 171 Cho'a |ollaani we'lawaa'n li',
|a' lin' chli' chsedilo' nad' diika' nllio' bia' gonnto'.
- 172 Cho'a |ollaani we'n dill' cho'na',
|a' yog'te diika' nllio' bia' gonnto' nakgakan dii |i dii shao'.
- 173 Wzegach wneyi gakleno' nad',
daa wyazlallaa gon' diika' bllio' bia' gonnto'.
- 174 Chios cha', zelallaa yidslo' nad',
na' chibaid' gon' diika' nllio' bia' gonnto'.
- 175 Bengach ka gat' ye|' mban cha' kwenche we'lawaa li',
na' diika' nllio' bia' gonnto' gaklenshgagakan nad'.
- 176 Ba gok cha' ka chak che to xil'do' ba wnit.
Biyiljgach nad',
|a' bin' kwej yichj' gon' diika' nllio' bia' gonnto'.

Salmo 120

- ¹ Chnia' Xancho Chioza' kat' zoa nyesh',
na' |e' chaklene' nad'.
- ² Chios cha', bisla nad' lo ni'a na' ben' wxiye'ka',
ben'ka' bi cho'e dill' |i.
- ³ ¿Bi ka chakile gon Chioza' chele, le' ben' wxiye'?
- ⁴ Witile' le' xisa' ntosh' lawinna' daa chchoon xis
wixit' che ben' wen wdilka',

na' wlliyai'lene' le' yi' galja' llia x̲na.

⁵ Nyesh'laz chak ch̲a' zoa' gani lle' beṅ'ki nak ka beṅ'
Mesecka', beṅ'ka' chbaya chsak'zi' beṅ',
na' ba wchen' ladj beṅ' zesh' beṅ' zbanki, beṅ'ki
nak ka beṅ' Cedarka'.

⁶ Ssha wal ba gok zoa' ladj beṅ'ki bi cheeni
soalengake' beṅ' mbalaz.

⁷ Kat' choe'lengakee dill' yillagui ljwellnto', wdila'lə
cheengakile' gongake'.

Salmo 121

¹ Kat' chwia' yaa yaoka', na'ch nia':

“¿Garan zoa beena' gaklene' nad'?

² X̲ancho Chioza', beena' b̲xe bsil yabana' len yell-lioni,
leṅ' gaklene' nad'.”

³ ¡Aga wi'e latj bi gak cho'!

La' ni shloll bi ches beena' chap chwia li'.

⁴ Dii l̲icha, beena' chap chwia cho' beṅ' Israel,
biga chde bishgal che'na', ni biga chese'.

⁵ X̲ancho Chiozan' chap chwie' li',
na' zie' kwito'na' chkweeje' li'.

⁶ Dii la che wbilldo'na' bibi gonin li',
ni beo'do'na' bibi gonin li' wałka'.

⁷ X̲ancho Chioza' gap wwie' li' lao yog'loł dii nxoll,
leṅ' gap wwie' yeł' mban cho'na'.

⁸ X̲ancho Chioza' gap wwie' li' yawi nez gana' zejo'
naa na' toshiizi.

Salmo 122

¹ Le chibaid' kat' nagake' nad':

“Sho' gana' zoa lill x̲latj X̲ancho Chioza'.”

² Yell Jerusalén,

ba yoonto' loo zee cho'ni, nechj li'.

³ Jerusalénna' nakan to yell dii wx̲e wzil
kwenche yidop yillagan beṅ'.

- ⁴ Na' na' chdop chllag yog' kwen beṅ'ka' nak lall'
 na' Xancho Chioza'
 kwenche we'la'ogake'ne' kon ka bllie' bia' gon beṅ' Israelka'.
⁵ Na' na' chak yeḷ' joschis che beṅ' Israelka',
 gana' chṅabia' xiin dia che dii Davina'.
- ⁶ Li inab gat' yeḷ' mbalaz yell Jerusalénna', li ina:
 "Beṅ'ka' chaki li', Jerusalén, soashgake' mbalaz.
⁷ Soashga beṅ'ka' lle' loo zee cho'ka' mbalaz;
 na' bibi dii nxoll gat' gana' zoa beṅ' wṅabia' cho'na'."
- ⁸ Na' ni che beṅ' bishaaka' na' beṅ'ka' nllaguid'
 inia' li', Jerusalén: "Soashgo' mbalaz."
⁹ Na' daa zoa lill xlatj Xancho Chioza' lawo'na'
 inabidee gak wen cho'.

Salmo 123

- ¹ Chlis jalaw'ki chwia' yabana' gana' zo' chṅabi'o, Chios cha',
 la' lin' non' lez.
² Ka chon beena' ndoo lla yel chone' xshin beṅ' chbeze'
 bin yee xane'na' gone',
 kan' chbezcho Xancho Chioza' axt ki yiyesh'lallile' cho'.
³ Biyesh'lall'gachi neto', Chios cha',
 biyesh'lall'gachi neto',
 la' bich chizointo' daa choni beṅ' neto' nakzi.
⁴ Ba jshyainto' ka chtitj chtani beṅ' cha'sibka' neto',
 na' chongakile' neto' ka beṅ' bibi zakii.

Salmo 124

- ¹ ¿Bila gok checho shel' bi goklen Xancho Chioza' cho'?
 Le' beṅ' Israel, li ina:
² shel' bi goklen Xancho Chioza' cho'
 kana' wdiḷ-len beṅ'ka' cho',
³ na' blliyai'gake' cho'
 kana' bllaa blokgage' cho', shel'ka'.
⁴ Na' bengake' checho ka chak che beena' chloḷ nisko'na',
 na' ka chak che beena' cho'a yawa', shel'ka'.
⁵ Na' gok checho ka beṅ' noa' yao dii chbiḷ chloḷ, shel'ka'.

⁶Shajla'oshga Xancho Chioza',
 daa bi bi'e latj wxoxj wtin ben'ka' cho' ka chon to ba znia.
⁷Ba bilacho lawe'ka'
 ka bado'na' ze xan yabana', bana' chila lao beena'
 cheeni sene'b.
 Ba bilacho lawi diika' goklall'gake' gongakile' cho'.
⁸Xancho Chioza', beena' bxe bsil yabana' len yell-lioni,
 chaklene' cho'.

Salmo 125

¹Ben'ka' nxenilall'gake' Xancho Chioza' zoachehgake',
 ka yaa Siónna' daa zoatip zoashosh toshiizi.
²Ka nechj yaaka' Jerusalénna'
 kan' chap chwia' Xancho Chioza' ben'ka' nak yell
 che' naa na' toshiizi.
³Aga toshiizin inabia' ben' malka'
 yell-lioni gani be' Chioza' ben' li ben' shao'ka',
 kwenche ki ben'ka' nak ben' li ben' shao'
 solo gongake' dii mala'.
⁴Chios cha', bengach ka gak wen che ben' wenka',
 ben'ka' zoa do yichj do lallgake';
⁵san ben'ka' zej lo nez mala',
 bengach chegake' ka chono' che ben' malka'.
 Ben'ka' lle' yell Israela' soashgake' mbalaz.

Salmo 126

¹Kana' bisla Xancho Chioza' cho' lo n'ia na' ben' zit'ka'
 na' billincho yell Siónna',
 gokicho yelzan chneicho.
²Na'ch le biba bizakicho
 na' axt besyaayicho, wditj bxillcho daa le bibaicho.
 Na'ch ben'ka' bi nxenilall' Chioza' wngake':
 "Dii xen inleeb nak daa ba ben Chios che ben'ki."
³Dii li, dii xen daa ba ben Xancho Chioza' checho,
 na' le chibaicho.
⁴Chios cha', bengach ka yiyak wen chento' sto shii,

ka chak che yao billka' de gana' bibi chashj chleb
kat' chak yeja'.

⁵ Ben'ka' chakyeshii kat' chaz chaangake',
yiba yizak'gakile' kat' yizi' yilapgake'.

⁶ La'kzi chakyesh'gakile' ka zej chazgake',
kat' ziza'gake' zinlengake' daa bizi' bilapgake' axt chol
chxao'gake' daa chibagakile'.

Salmo 127

¹ Shi Xancho Chioza' bi gaklene' sha' ibin yoonā'
bibi zjanayin chilali ben'ka' chonan.

Shi Xancho Chioza' bi gap wi'e yella',
bibi zjanayin lle' ben'ka' chapgake'n.

² Bibi zjanayin chascho ni bal goncho llinna' na'
wsancho ba wlle',

goktgui gat' daa gaocho,
len la' Chioza' none' guescho zix sia daa chakile' cho'.

³ Xiinchoka' chalj

nakgakt' bi' chzani Xancho Chioza' chone' cho'.

⁴ Ka xiska' chzal' xis wixit'ka' nox' beena' chaj lo wdila',
kan' nak xiinchoka' chalja kat' nakcho ben' wew'.

⁵ Chakomba beena' zoa zan xiine'!

Aga bi yel' zto' si'e lao ben'ka' chakzi' chakzbangakile'ne'
kat'ka' gakti-lengake'ne' lao ben'ka' chchogbia' che ben'.

Salmo 128

¹ Chakomba li', chall chllebo' Xancho Chioza'
na' chono' ka cheenile'.

² Si'o banez che llinna' chono',
na' so' mbalaz na' gak wen cho'.

³ Nool cho'na' gake' loo yoo lillo'na' ka to yag uva dii le lliachga
daa sane' zan xiino'ka'.

Na' ka xiin yag olivona' daa chila' xaninna',
ka' gak xiino'ka' kwe' cho'a mes cho'na'.

⁴ Ka' chonleey Chioza' ben'ka' chall chllebgake'ne'.

⁵ Xancho Chioza', beena' zoa lill xlatje'na' lo yaa
Sionna', gonleeyshgue' li',

na' si'o banez dii wen dii shawaa de yell Jerusalénna'
shnon mbano'.

⁶Yen ile'shgailo' xiin̄ xso'ka'.

Soashga ben̄' Israelka' mbalaz.

Salmo 129

¹Le' ben̄' Israel, li we' dill'
che yog' ye! zak'zi'ka' ba ben ble'i yell chechoni
dezd ka wxw wzilten.

²Ye! zak'zi' zan ba ben ble'i yell chechoni dezd
ka wxw wzilten,
per ni ton bi gok wlliyai'n daa.

³Blliyai' blliadegake' diika' de lawinna';
na' daa bengakile'n ka', gok cheyin ka chak che to ben̄' chit
chyine' kolleena' na' chyaljan we'.

⁴Per X̄ancho Chioza' nake' ben̄' wen ben̄' shao',
bisle' nad' lo ni'a na' ben̄' malka'.

⁵Ben̄'ka' chakzi' chakzbani ben̄'ka' lle' lo yaa Siónna',
si'shgagake' ye! zto' na' yixon̄jgake'.

⁶Gakshga chegake' ka chak che yixaa daa chla'
yichj yooka',
daa tolbe'do chbill,

⁷yixaa daa kono chitopə,
ni kono chonan xon̄j wej.

⁸Na' ben̄'ka' te gana' lle'gake' ni bi ye'gake':

“Gon̄leeyshga X̄ancho Chioza' le'.

Chn̄abinto' X̄ancho Chioza' gone' ka gak wen chele.”

Salmo 130

¹Choe'lwill' li', Chios cha',
daa chakshejlall'chgaid' na' chakyesh'chgaid' ni
che dga chak cha'.

²Bzenaggach dga nia' li', Chios cha'.
Bzegach nago' dga chn̄abid' li'.

³Chios cha', she! li' bi chizi'xeno' saaxyaka',
kochno ben̄' mban, she!ka'.

⁴Per li' chizi'xeno' çhento',
na' daan chiya! gall illebnto' li'.

⁵Lez choo lez xen non' Xancho Chioza',
na' n̄xenilallaa cho'a xtilleena'.

⁶Nad' zech' w̄neyi chbez' Xancho Chioza',
aga ka beñ'ka' chap yella' w̄ala' chbezgake' sheeni'.
Zech' w̄neyi chbez' li' aga ka beñ'ka' chap yella'
w̄ala' chbezgake' sheeni'.

⁷Lekzka' le', beñ' Israel, li gon lez Xancho Chioza'.
La' le' nape' ye! chaki, na' nape' ye! wak yisell
yilee cho' lao saaxyana'.

⁸Le' yisell yilee cho', cho' beñ' Israel, lao yog'lo!te
saaxya çhechoka'.

Salmo 131

¹Chios çha', bi nak' beñ' chep cha'lall',
ni bi chon' kwin' beñ' choo beñ' xen,
ni bi chon' to dii byen gon' dii bi sakid' gon'.

²San zoa' mbalaz,
ka zoa to bdo', bi' zi biyoll bwall' x̄na'ba' lēb' na' xoab' llizə.
Ka bdo'na' zi biyoll bwall' x̄na'ba' lēb' na' xoab' llizə, kan' zoa'.

³Le' beñ' Israel, li gon lez Xancho Chioza' n̄aa na' toshiizi.

Salmo 132

¹Chios çha', jadingachi dii Davina'
na' yog' ye! zak'zi'ka' wdie'.

²Chios, beñ' ye! wak choo ye! wak xen, beena'
be'la'o dii Jacoba',

jadingachi daa b̄cheb dii Davina' lawo'na':

³“Bi soakz' loo yoo lilla'na'
ni bi gataa lo'inna' yizi'lallaa,

⁴ni bi wshod' jalaw'ki,
ni shloll bi gues',

⁵shlak biñ' sha' ibiñ lill x̄latj Xancho Chioza',
beena' nak beñ' ye! wak choo ye! wak xen, beena'
be'la'o dii Jacoba'.”

⁶ Yell Éfratana' wyoo nagnto' che yiina' gana' yoo daa
chonli daa bcheb Chioza' gone' checho,
na' billelinto'n lyix' che yell Jáara'.

⁷ Li sho' gana' chi' yiina' daa yoo daa chonli daa bcheb
Xancho Chioza' gone' checho.
Li sho' lljachek' xibcho xni'ena'.

⁸ Dagach, Chios cha'; dalengach yiina' daa nsa'
yel' wak cho'na',
na' soagacho' gani nak lill xlatjo'.

⁹ Gakshga bxoz cho'ka' ben' li ben' shao',
na' ben'ka' nonlilall' li' gol inegake' li' lega ben' chiba chizaki.

¹⁰ Daa le gokilo' dii Davina', beena' ben ka cheenilo',
bi kwej yichjo' beeni ba wlejo' inabia'.

¹¹ Xancho Chioza' bchebe' lao dii Davina', golle'ne':
“Wzoa' to xiin dia cho'na' inabi'e.”
Na' daa bchebe' bi te bi gone'n.

¹² Na' lekzka' chi'e:
“Shi xiin dia cho'ka' gongake' ka ba bchebo' lawa',
na' wzenaggake' diika' nllia' bia' gongake',
lekzka' xiin dia che'ka' yizoagake' lo xlatjo'
inabia'gake' toshiizi.”

¹³ Xancho Chioza' ba wleje' yaa Siónni,
daa cheenile' soan lill xlatje'na'.

¹⁴ Na' ne':
“Lo yaanin cheenid' soa' toshiizi;
lawinnin soa' toshiizi, la' kan' ba wyazlallaa.

¹⁵ Na' gon' ka gat' kwe' daa yeej gao ben'ka' lle' ni,
na' len ben' yesh'do'ka' wzesch wzeljid'.

¹⁶ Wzenag' che bxoz cheleka' kat' inabgake' si'xen'
chele na' yisla' le',
na' ben'ka' nonlilall' nad' gol inegake' daa chiba chizakgakile'.

¹⁷ Na' nin gon' ka yixe yizil yel' wñabia' che dii
Davina', beena' wlej',
na' zejli kani inabia' xiin dia che'na'.

¹⁸ Ben'ka' chakzi' chakzbangakile'ne' wsi'gakee yel' zto',
san le', gon' ka inabi'e toshiizi.”

Salmo 133

¹ ¡Mbalaz inleban
 ben'ka' nonlilall' Chioza' gakgake' toz na' zoalen
 ljjwellgake' wen!
² Nakan ka set zixa' daa blaaagake' yichj dii Aarónna'
 na' bidinan lo loxe'na' axt yen xe'na'.
³ Na' lekzka' nakan ka xelj zaga' daa chxop lo yaa Hermónna',
 na' lo yaa Siónna'.
 La' gana' nakgake' toz, Xancho Chioza' chonleeye' legake'
 na' choe' yel' mban chegake' zejli kani.

Salmo 134

¹ Li da, we'la'ocho Xancho Chioza'
 yog'lo!tele le' nakle wen llin che',
 le' chap chwiale lill xlatje'na' walka'.
² Li wlis na'lena' loo lill xlatje'na'
 na' li we'la'o Xancho Chioza'.
³ Xancho Chioza', beena' bxe bsil yabana' len yell-lioni,
 beena' zoa lill xlatje'na' lo yaa Siónna',
 gonleeyshgue' li'.

Salmo 135

¹ Li we'la'o Xancho Chioza'.
 Li we'la'wee, le' ba wleje' kwenche koolene' balaan,
² le' lle'le loo lill xlatj Xancho Chioza'
 na' lesh' lill xlatje'na'.
³ Li we'la'o Xancho Chioza' daa nake' ben' wen;
 li go! to dii koon le' balaan, daa nake' ben' wen ben' shao'.
⁴ La' le' wleje' xiin dia che dii Jacoba', ben'ka' nak ben' Israel,
 kwenche gakgake' yell che'.
⁵ Nad' nezyenid' Xancho Chioza' nake' ben' choo ben' xen;
 ben' choo ben' xench nake' aga ka yog' chioska' nxenilall' ben'.
⁶ Xancho Chioza' chone' daa cheenile'
 yabana' na' lo yell-lioni,
 loo nido'na' na' axt gana' zeelo zitj.
⁷ Len' chizie' bejka' doxen zbii zkaan yell-lioni,

na' chone' kwenche chep yes na' chyixjeen gak yeja',
na' chbeje' be'na' gana' ngooshaween.

⁸Len' bete' yog'lol xiin nech ben' Egíptoka'
na' yog'lol xiin nech bayix' che'ka'.

⁹Na' bselee yell' zak'zi'ka' yell Egíptona' daa ben
ka bibangakile',

kwenche bsak'zi'e faraónna' len ben'ka' chon xshine'na'.

¹⁰Blliyee yell zan,

na' bete' ben' wñabia' xenka'.

¹¹Bete' Sehónna', ben' wñabia' che ben' amorreoka',

na' Oga', ben' wñabia' che gana' mbani Basánna',

na' yog'te ben' wñabia'ka' wzoa yell-lío Canaánna'.

¹²Na' bi'e ben' Israelka', ben'ka' nak yell che',
yell-lío daa goki che ben' wñabia'ka' bete'.

¹³Chios cha', zejli kani zo',

na' zejli kani lljadingakile' daa beno'.

¹⁴Xancho Chioza' chaklene' ben'ka' nak yell che',

na' chiyesh'lallile' legake' daa nakgake' ben' chon ka cheenile'.

¹⁵Diika' choe'la'o ben' yell zit'ka' nakgakan de or na' de plat,
na' nakgakan dii choni ni'a neeka'.

¹⁶Zoa cho'agakin per bi chak wshaljgakan;

zoa jalaogakin per bi chle'gakin;

¹⁷zoa naggakin per bi chengakin;

ni bibi bishbe yoogakan.

¹⁸Na' kon ka nakgakan

ka' nak ben'ka' chon legakan,

na' lekzka' nak ben'ka' chxenilall' legakan.

¹⁹Le' ben' Israel, li we'la'o Xancho Chioza'.

Le' xiin dia che dii Aarón, le' nakle bxoz, li we'la'o

Xancho Chioza'.

²⁰Le' xiin dia che dii Leví, li we'lawee.

Le' chaple Xancho Chioza' balaan, li we'lawee.

²¹Le' zoale Jerusalénna', li we'la'o Xancho Chioza'

beena' zoa lo yaa Siónna' gana' noni lill xlatje'.

Li we'la'o Chioza'.

Salmo 136

- ¹Li we'la'o Xancho Chioza' daa nake' beṇ' wen,
 la' yeḷ' chaki che'na' biga llia te cheyin.
²Li we'la'o beena' nak liizelozi Chios,
 la' yeḷ' chaki che'na' biga llia te cheyin.
³Li we'la'o Chioza', beena' liizelozi chṇabia',
 la' yeḷ' chaki che'na' biga llia te cheyin.
⁴Li we'la'o beena' zeelo chon yeḷ' wak xen dii
 chonan ka chibanicho,
 la' yeḷ' chaki che'na' biga llia te cheyin.
⁵Li we'la'o beena' bxe bsil yabana' kon yeḷ' sin' che'na',
 la' yeḷ' chaki che'na' biga llia te cheyin.
⁶Li we'la'o beena' bxe bsil yell-lioni lo nisdona',
 la' yeḷ' chaki che'na' biga llia te cheyin.
⁷Li we'la'o beena' ben diika' chzeeni' xan yabana',
 la' yeḷ' chaki che'na' biga llia te cheyin.
⁸Li we'la'o beena' ben wbilla' kwenche wzeeni'n tellana',
 la' yeḷ' chaki che'na' biga llia te cheyin.
⁹Li we'la'o beena' ben beo'dona' len beljdo'ka' kwenche
 wzeeni'gakan waḷka',
 la' yeḷ' chaki che'na' biga llia te cheyin.
¹⁰Li we'la'o beena' bet yog'loḷ xiin nech beṇ' Egíptoka',
 la' yeḷ' chaki che'na' biga llia te cheyin.
¹¹Na' bibeje' cho' beṇ' Israel yell Egíptona',
 la' yeḷ' chaki che'na' biga llia te cheyin.
¹²Kon yeḷ' wak choo yeḷ' wak xen che'nan' bibeje' cho',
 la' yeḷ' chaki che'na' biga llia te cheyin.
¹³Li we'la'o beena' bsalj neza' gchoḷ nisdona' le Nisdo' Xṇa,
 la' yeḷ' chaki che'na' biga llia te cheyin.
¹⁴Na' bidie' cho' beṇ' Israel gchoḷ nisdona',
 la' yeḷ' chaki che'na' biga llia te cheyin.
¹⁵Na' blliyee faraónna' loo nisdona', len beṇ'ka'
 nchi'e nan tiḷ-lengake' cho',
 la' yeḷ' chaki che'na' biga llia te cheyin.
¹⁶Li we'la'o beena' bide cho' nakcho lall' nee gana'
 bibi chashj chleb,
 la' yeḷ' chaki che'na' biga llia te cheyin.
¹⁷Li we'la'o beena' bet beṇ' wṇabia' xenka',
 la' yeḷ' chaki che'na' biga llia te cheyin.
¹⁸Bete' beṇ' wṇabia'ka' le zeyi cheyin,

la' ye! chaki che'na' biga lli te cheyin.
 19 Bete' Sehónna', beena' wñabia' amorreoka',
 la' ye! chaki che'na' biga lli te cheyin.
 20 Na' bete' Oga', beena' wñabia' beñ' Basánka',
 la' ye! chaki che'na' biga lli te cheyin.
 21 Na' biyone' yell-lío che'ka' lall' na'cho,
 la' ye! chaki che'na' biga lli te cheyin.
 22 Biyone'n lall' na'cho, cho' beñ' Israel, cho'
 chzoacho xtilleena',
 la' ye! chaki che'na' biga lli te cheyin.
 23 Li we'la'o beena' chzoa yichje' cho' kat' chsak'zi'
 beñ' cho',
 la' ye! chaki che'na' biga lli te cheyin.
 24 Na' chisle' cho' lo ñi'a na' beñ'ka' chakzi' chakzbani cho',
 la' ye! chaki che'na' biga lli te cheyin.
 25 Li we'la'o beena' chweej chwao cho' benech
 na' bayix'do'ka',
 la' ye! chaki che'na' biga lli te cheyin.
 26 Li we'la'o Chioza', beena' lli yabana',
 la' ye! chaki che'na' biga lli te cheyin.

Salmo 137

1 Shlak wzoanto' gana' mbani Babilóniana'
 chbe'nto' cho'a yaoka' chbellnto'
 daa chjadininto' yell Jerusalénna'.
 2 Na' bich wnan wsillnto' diika' lli' kwerd cheyin,
 san bwal'nto'n lo yagdo'ka' zoa yella'.
 3 Na' beñ'ka' bche' neto' lalle'ka', beñ'ka' bsak'zi' neto',
 wñabgakile' neto' go!nto', nagake':
 "Li go!to ka diika' chol-le yell Jerusalénna'."
 4 Per bi gak go!cho diika' choe'la'olencho Xancho
 Chioza' yell zitii.
 5 Shi illin to lla gal-lallaa li', Jerusalén,
 guetshga na' de sh!ini.
 6 Yida'shga lollaani loo lchichjii
 shi bich lljadinid' li',
 shi bich koo yichjz' li', Jerusalén,
 li' chono' ka chiba chizakid'.

⁷ Chios cha', jadini ka ben ben' Edomka',
kana' wliayi' yell Jerusalénna', besyaagake' wⁿagake':
“Li wliayi'tegan! Li wliayi'tegan axt yilenten!”

⁸ Li', yell Babilonia, ba nakten kwiayoo.
Chakomba beena' yizi'e wzon cho'
ni cheyi daa benilo' neto!
⁹ Chakomba beena' goxee xiino'ka'
na' chine' legakb' lee yajka'!

Salmo 138

¹ Chios cha', do yichj do lallaa we'lawaa li',
na' chwiate yog' chioska' choe'la'o ben', gol' to
dii koon li' balaan.

² Wchek' xiba'ni na' wwia' ka de gana' zoalə lill xlatjo'na',
kwenche gon' li' yel' choxken ni che yel' chaki cho'na'
na' daa chono' ka chchebo' gono'.

La' ba bli'o nako' ben' lli^lalote na' dii lli^lalote cho'a
xtilloona' lao yog'lol dii de.

³ Ka wnia' li', na' gokleno' nad',
na' bitipo' lallaa.

⁴ Yog' ben' wnabia'ka' lle' yell-lioni we'la'ogake' li'
ka yengakile' cho'a xtilloona'.

⁵ We'la'ogake' Xancho Chioza' ni che diika' chone',
la' le zeyi che' nake' ben' choo ben' xen.

⁶ La'kzi Xancho Chioza' zoe' yabana'te
chaklene' ben'ka' nak gaxjlall',
per bi chle'shiile' ben'ka' chep cha'lall'.

⁷ Kat' zoa' lao to dii nxoll,
li' chakleno' nad';
na' chli'o yel' wak cho'na' kat' chislo' nad'
lao yel' chllaa chlok che ben'ka' chakzi' chakzbani nad'.

⁸ Xancho Chioza' gonkze' daa cheenile' gone' cha'.
Chios cha', yel' chaki cho'na' den zejli kani;
bi kwej yichjo' neto' bxe bsilo'.

Salmo 139

- ¹ Chios cha', li' ba biya biyiljo' nad' na' nombi'o
nad' kwasloḷ.
- ² Nez nle'ilo' yog'loḷ bin chon';
na' la'kzi zo' zit', nez nle'kzilo' yog'loḷ daa chza'lallaa.
- ³ Nez nle'ilo' gana' zoa' na' gana' zyaa,
na' yog'loḷ bin chon'.
- ⁴ Zi' wxa'lə cho'ani kwenche wi'a dill',
bakzə nezilo' doxen bin inia', Chios cha'.
- ⁵ Gattezə zia', na'kzə zoaleno' nad',
na' chap chwio' nad' kon yel' wak cho'na'.
- ⁶ Daa nombi'o do ka nak' chonan ka chibanid',
na' nakan to dii bi shajni'kzid'.
- ⁷ Gattez sha' na'kzə zo'.
Aga wak inia' wxonj wkwashid' li'.
- ⁸ Shi shep' axt xan yabana', na'kzə zo'.
Na' shi sha' axt xan yell-lioni, na'kzə zo'.
- ⁹ Shi sha' gana' chla' wbilldo'na',
wa lljsoa' gana' chiyoll chido nido'na',
- ¹⁰ na'kzə soaleno' nad'
na' gaklenkzo' nad'.
- ¹¹ Shi gaklallaa wkwashid' li' lo yel choḷa',
wa gaklallaa beeni'na' yiyakan yel choḷ,
- ¹² ni yel choḷa' bi so sakin wkwasha'n nad',
daa gak waḷa' ka tella lawo'na'.
- La' yel choḷa' len beeni'na', toz ka nakgakan lawo'na'.
- ¹³ Lin' bxe bsilo' do ka nak',
na' beno' ka wya' wbin' loo lee xna'na'.
- ¹⁴ Choe'lawaa li' daa chibanid' ka nono' nad'.
Diika' chono' nakgakan dii wen inleeb,
na' nezyenid' kan' nakan.
- ¹⁵ Bi bgash' kwerp cha'ni lawo'na' kana' wxe wzil',
shlak wya' wbin' loo lee xna'na'.
- ¹⁶ Jalawo'na' ble'in nad' ka wzolo wxe wzil'.
Na' zi' galjtia', lee libr cho'na' ba cho'eten dill'
che yel' mban cha'ni na' che llaka'
nllio' bia' soa'.

17 ĵChios ĉha', mbalaz inleeb nak pensarka' chono!
ĵBiga llia yiyoll yido ibaban!

18 Shi gaklallaa wlab'gakan,
dii zanch nakgakan aga ka yoxa' chi' cho'a niso'na'.
Na' shi illin lla yiyoll wlab'gakan ni zoalenkzo' nad'.

19 Chios ĉha', bsol bnitgach yeĵ' mban ĉhe beĵ' malka',
na' bkwasgach wen xyaka' lawa'ni,

20 beĵ'ka' chbell chĉe ĉho'
na' chaklall'zgake' yizoshiyigake' li'.

21 Chios ĉha', chwiid' beĵ'ka' chwiyi li',
na' chakzbanid' beĵ'ka' chakzbani li'.

22 Chakzi' chakzbanid' ĵegake' aĵt ga zeelo,
na' chle'id' ĵegake' ka beĵ'ka' chwiyi nad'.

23 Chios ĉha', biya biyilĵgach nad', na' bembia'gach
yichĵlall'dawaani.

Bniĵ bllia nad', na' bembia' daa chza'lallaa.

24 Bwiagach shi zyaa lo nez mala',
na' bigoogach nad' lo nez daa nsa' yeĵ' mban zejĵi kaĵi.

Salmo 140

1 Chios ĉha', bislagach nad' lao beĵ' malka';
bi we'gacho' latĵ bi goni beĵ' zesh' beĵ' zbanka' nad',

2 beĵ'ka' chiyilĵlall'gake' naklĉ gongake' mal,
na' toshiizi chdiĵ-lengake' beĵ'.

3 Cho'a ĵolleeka' nakan ka ĉhe beĵa', bana' chyinyaa;
na' dill'ka' chcheĵ cho'a ĵolleeka' nakan ka yierb ĉheba'.

4 Chios ĉha', bislagach nad' lao beĵ' malka';
bi we'gacho' latĵ bi goni beĵ' zesh' beĵ' zbanka' nad',
beĵ'ka' chgoo xĉezin wlliaiyigake' nad'.

5 Beĵ'ka' chep ĉa'lall' ba chi'nogake' nad' yawi
neza' gana' ĉaj ĉdia'.

Ba chi'gake' xĉeza' kwenĉhe wzapgake' nad'.

6 Ba gosh' Xancho Chioza':

“Lin' nako' Chios ĉha',
bzenaggach dga chĉabid' li'.

⁷ Chios cha', lin' chislo' nad' kon yel' wak choo
yel' wak xen cho'na'.
Lin' chap chwio' nad' lo wdila'."

⁸ Chios cha', bi we'gacho' latj gak ka chzelall' ben' malka';
bi we'gacho' latj ikaa xnezi daa ba wlekni'agake',
kwenche ki shep sha'lall'gake'.

⁹ Na' ka nak ben'ka' doxenz china! chinogake' nad',
yidobshgagakile' diika' chbell chne cho'a lolleeka'.

¹⁰ Ixopshga yi' galja' wzeyan legake'.

Ixopshgagake' loo yech zitjka' gana' bich gak yichejgake'.

¹¹ Bi we'gacho' latj idia beena' chbell chne che
ben' lo yell-lioni;
gal' noshga dii mala' beena' nak ben' zesh' ben'
zban na' wlliyai'n le'.

¹² Nad' nezid' Xancho Chioza' chone' yel' joschis
che ben' yesh'ka',
na' chaklene' beena' chyallj chchini.

¹³ Ben' li ben' shao'ka' we'la'ogake' li';

na' ben'ka' chon ka cheenilo' soagake' gana' zo'.

Salmo 141

¹ Chios cha', lin' chnabid' yel' goklenna', jbi shagachilo'
yidyakleno' nad'!

Bzenaggach cha' kat' chnabid' li' gakleno' nad'.

² Dill'ki nia' li' gakshgan ka llen yal lawo'na',
na' daa chlis' na'ni gakshgan ka daa chongake' kat'
chzeygake' bayix'ka' lawo'na' shlle'ka'.

³ Chios cha', ben ka gak gox' cho'a lollaani;
bi wi'o latj kwell inia' ka nla' ka nte.

⁴ Bi we'gacho' latj sa'lallaa dii malka',
kwenche ki gonlen' ben' malka' diika' chongake',
ni bi lljengakee txen yeej gaolen'gakee lo lni che'ka'.

⁵ Naklan to goklen daa wsak'zi' beena' nsa' cheyin wen nad';
na' daa wsheshlene' nad' gone' ka yiyakbe'id' dii mala' chon'
na' gakan ka to set zix' dii chwazje' yichjaa na'
bat gakzbanida'n.

L̄a'kzi wzoazi'yaan nad', we'l̄willkz' Chioza'.

⁶ Ben̄'ka' ch̄n̄abia' ben̄' malka' ḡakgake' ka ben̄'
chxop to cho'a b̄d̄inj,

na' yiyakbe'ḡakile' cho'a x̄tillaana' nakan dill' l̄i.

⁷ Na' ḡuesles llit wet ch̄e'ka' cho'a ba ch̄e'ka',
ka chesles b̄chekw yona' kat' chaan̄ goon̄a'.

⁸ Chios ch̄a', lin' n̄xenilallaa.

Lin' non' lez gap wwio' nad'.

Bi ch̄oon̄lall'ḡacho' nad'.

⁹ Bislagach nad' lao dii n̄xollka' diika' ba ngoo ben̄'
malka' x̄nezin gongake' ch̄a'.

¹⁰ Yidobshḡayi ben̄' malka' daa cheengakile' gongake' ch̄a',
shlak nad' bibi ḡak ch̄a'.

Salmo 142

¹ Nad' chosyaa zillj ch̄n̄ab' ye'l' goklen ch̄e X̄ancho Chioza',
na' chosya'id' ch̄n̄abidee yiyesh'lallile' nad'.

² Na' lawe'na' chaw' xya daa chak ch̄a',
na' chseesaa ye'l' zak'zi'ka' chak ch̄a'.

³ Chios ch̄a', kat' zoa' nyesh' inleeb, li' n̄ezilo' ka chak ch̄a'.
Yawi neza' gana' chaj ch̄dia', ba chi'nogake' nad'.

⁴ Chwia' to ki to ka'l̄ə
per kono zoa ḡaklen nad',
na' kono zoa wllon nad'.
Kokzno ze w̄neyi ch̄a'.

⁵ Lin' ch̄n̄abid' ye'l' goklenna', Chios ch̄a',
na' nia' li': "Lin' nako' ka latja' gana' ch̄kwashaa
kwenche kono bi goni nad';
li'chgan non' lez shlak de ye'l' mban ch̄a'ni."

⁶ Bzenaggach dga ch̄n̄abid' li',
l̄a' l̄e chzak'zi'chga'.

Bislagach nad' lao ben̄'ka' chlagdo nad',
l̄a' nakchgake' ben̄' walch ka nad'.

⁷ Bisell b̄ilaagach nad' lawi diiki chak ch̄a'
kwenche ḡak we'l̄awaa li'.
Ben̄' wenka' yidi'a yillaggake' kwitii
kat' ba chiyono' wen ch̄a'.

Salmo 143

¹ Chios cha', bzenaggach dga nia' li';
 bengach ka chnabid' li'.
 Goklengach nad', la' li' nako' ben' li ben' shao' na'
 chono' ka chchebo'.

² Bi whoglogacho' cha',
la' kono nak ben' wen lawo'na'.

³ Ben'ka' chakzi' chakzbani nad' chlagdogake' nad';
 ba bengakile' nad' ka ben' blej bshoshje'
 na' zi lat'z ki betgake' nad'.
 Ni cheyi daa chongakile' nad' chak cha' ka ben' ba wit,
ben' ba de gana' nak shgashj shchol.

⁴ Nyesh' inleeb zoa',
 na' chakshejlall'chgayi yichjlall'dawaani.

⁵ Chjadinid' llaka' ba wde,
 na' chzia' wneyi che yog' diika' ba beno'.

⁶ Chlis na'ki lawo'na', Chios cha',
la' yichjlall'dawaani chzelall'chgain li', ka yo billa'
 daa chyalljchgayi nisa'.

⁷ Chios cha', jbi shagachilo' gakleno' nad',
la' ba chde cha'!
 Bi wllongachilo' nad' yel' goklen cho'na',
 kwenche ki guet'.

⁸ Bengach ka ile'id' yel' chaki cho'na' ka chzolo llana',
la' lin' ba nxenilallaa.
 Bliyi nad' nakan chiyal' wsa' cha',
la' lin' choe'l'will'.

⁹ Chios cha', bislagach nad' lo ni'a na' ben'ka'
chakzi' chakzbani nad',
la' lin' non' lez wkwash' wkweejo' nad'.

¹⁰ Bsedid' nad' gon' ka cheenilo',
la' lin' nako' Chios cha'.
 Na' Espiritu cho'na' kooshgue' nad'
 lo nez li cho'na'.

¹¹ Chios cha', ben ka gat'ch yel' mban' cha', ka
 ba bchebo' gono'.
 Daa nako' ben' li ben' shao' bibejgach nad' lo yel' zak'zi'ni.

¹²Daa chono' ka chchebo', bliiyi'gach beṅ'ka'
 chakzi' chakzbani nad'.
 Bliiyi'gach yog'loṭe beṅ'ka' chakzi' chakzbani nad',
 daa chon' ka cheenilo'.

Salmo 144

¹Choe'lawaa Ḳancho Chioza', beena' nak ka to yaj
 xen dii chkweejan nad'.
 Ḳen' chsedile' nad' tiḲ-len' beṅ'ka' chwiyi nad'.
²Ḳen' Chios cha'na', beena' Ḳe chaki nad',
 na' chkwash' chkweeje' nad' ka to yoo dii nak cheḡh gana'
 chkwashaa kwenḡhe kono bi goni nad'.
 Ḳen' chaklene' nad' na' chisle' nad'.
 Ḳen' chkweeje' nad', na' non' lez gap wwie' nad'.
 Ḳen' chone' kwenḡhe doxen gana' chṅabi'a chongake'
 daa chepgakee.

³Chios cha', ḡnora naknto' neto' beṅ' yell-lio,
 chi' yichjzo' neto',
 na' zezo' wṅeyi che neto' naknto' xiin beneḡh?
⁴Beṅ' yell-lioni nake' ka be' dii chde toldezə,
 na' lla yel che'na' nakan ka xol daa chinitlo.

⁵Chios cha', bsalj xan yaba cho'na' na' betjgach;
 bdi'gach yaa'ka kwenḡhe soagakan llen.
⁶Bengach ka gashj itin yi' wziw' cho'ka', diika' chḡhino'
 ka xiska' chchoon xis wixitaa,
 na' bshesh bḡheen beṅ'ka' chakzi' chakzbani li'.
⁷Goklengach nad' gana' lliatio',
 na' bisla nad' lawi dii lalljka' nak ka to yao xen.
 Bislagach nad' lo na' beṅ' zit'ka',
⁸beṅ'ka' choe' dill' wxiye'
 na' axt chḡhebgake' nan dill' Ḳin choe'gake' kat' chziye'gake'.

⁹Chios cha', gol' to dii kob dii koon li' balaan,
 na' gol' ineid' li' kon daa lia' kwerd cheyin.
¹⁰Lin' chono' kwenḡhe beṅ' wṅabia'ka' chongake'
 gan lo wdilka'.
 Lin' chislo' nad' lao yesyaka'.
¹¹Bislagach nad' lo na' beṅ' zit'ka',

ben'ka' choe' dill' wxiye',
na' axt chchebgake' nan dill' lin choe'gake' kat'
chziye'gake'.
¹²Igolshga bi' byo chento'ka' ka yagdo'ka' chonshiigake';
na' bi' nool chento'ka' gaxshgagakb' xochi ka yaja'
daa chpaagake'
na' chli'n xochi lill xlatj ben' wñabia'na'.
¹³Gana' chillaanto' diika' chizi' chilapnto' gaxshgan tolla';
soayaa soallinshgan yog' kwen dii cheej chaonto'.
Shesh shanshga bayix' chento'ka' lle' lyix' chento'na'.
¹⁴Na' bayix' chento'ka' gaxshgagakb' ba wal kwenche
sogakib diika' wwa'nto'gakb.
Bat yid ben'ka' wchinjgake' zeena' nechj yell chento'ni
na' sho'gake' til-lengake' neto'.
¹⁵¡Chakomba yella' chle'i yog' dii wenki!
¡Chakomba ben'ka' noni Xangake' Chios chechona'!

Salmo 145

¹Chios cha', li' nako' ben' wñabia' cha',
na' wi'a dill' nako' ben' choo ben' xen,
na' toshiizi we'lawaa li',
²Lla kon lla gol inia' li',
na' zejli kani na' toshiizi we'lawaa li'.
³Xancho Chioza' nake' liizelozi ben' choo ben' xen
na' chidolee koochone' balaan xen.
¡Ni to kono illin shajinii doxen ka nak ye! ben' choo
ben' xen che'na'!
⁴Yog'lolte dia che ben'ka' lle' yell-lioni we'gake' dill'
che yog' diika' chono';
we'gake' dill' che diika' chonleno' ye! wak xen cho'na'.
⁵Na' we'gake' dill' che ye! zakii cho'na' daa nak
dii xen inleeb,
na' nad' sia' wneyi cheyi diika' benleno' ye! wak
choo ye! wak xen cho'na'.
⁶We'gake' dill' che diika' chonleno' ye! wak choo
ye! wak xen cho'na',
na' nad' wi'a dill' nako' liizelozi ben' choo ben' xen.
⁷Na' we'gake' dill' dii yisa'n lall' ben' daa naklikzo'
ben' wen inleeb,

na' goḷ inegake' li' inagake' nako' beṅ' li beṅ' shao'.

⁸ Xancho Chioza' nake' beṅ' wen beṅ' shao' na'
beṅ' chiyesh'lallii.

Beṅ' yeḷ' chxenlall' xen wal nake',
na' naplikze' yeḷ' chaki.

⁹ Xancho Chioza' chone' wen che yog'loḷ beṅ',
na' chiyesh'lallile' yog'loḷte diika' bxe bsile'.

¹⁰ Yog' diika' beno' we'la'ogakan li', Chios cha';
na' beṅ'ka' nak lall' no' koogake' li' balaan.

¹¹ Na' we'gake' dill' che yeḷ' wṅabia' xen cho'na',
na' che yeḷ' wak choo yeḷ' wak xen cho'na',

¹² kwenche inēzi yog'loḷte beṅ' ka nak yeḷ' wak choo
yeḷ' wak xenka' ba beno',

len yeḷ' wṅabia' xen cho'na'.

¹³ Yeḷ' wṅabia' cho'na' biga llia te cheyin;
na' zejli kaṅi inabi'o.

¹⁴ Xancho Chioza' chaklene' beṅ'ka' bi chak wen cheyin,
na' chiyesh'lallile' beṅ'ka' zoa nyesh'.

¹⁵ Yog'loḷ bayix' na' yog'loḷ beṅ' nongake' li' lez,
na' kat' chbiḷ chdongake', chweej chwawo' legake'.

¹⁶ Chono'n axt chchoch chlaj,
na' chelj chlla'i yog'loḷ beṅ' na' yog'loḷ bayix'.

¹⁷ Xancho Chioza' toshiizi chone' daa nak shli,
na' yog' daa chone', chone'n kon yeḷ' chiyesh'lallii.

¹⁸ Xancho Chioza' zie' gaḷ' gllin chzenague'
che yog' beṅ'ka' chṅabgake' yeḷ'
goklen che'na',

beṅ'ka' do yichj do lall'gake' chṅabgake'n.

¹⁹ Chone' ka gag diika' chzelall' beṅ'ka' chall chlleb le',
na' kat' chṅabgake' gaklene' legake', chisle' legake'.

²⁰ Xancho Chioza' chap chwie' yog' beṅ'ka' chaki le',
san wlliaeye yog' beṅ' malka'.

²¹ Nad' goḷ inia' Xancho Chioza'.

¡Kooshga yog'loḷ beṅ' le' balaan zejli kaṅi na' toshiizi!

Salmo 146

¹ ¡Li we'la'o Xancho Chioza'!

We'lawaa Xancho Chioza' do yichj' do lallaa.

² We'lawaa Xancho Chioza' shnon mban'.

Shlak de yel' mban cha'ni gol' diika' chgoogakan
Xancho Chioza' balaan.

³ Bi wxenilall'zle ben'ka' nak ben' zakii,
ni nottez ben' yell-lioni, ben'ka' bi gak yisla le'.

⁴ La' kat' chetgake' chiyakgake' bishte yell-lío,
na' llana' chetgake' chde cheyi daa wloo yichjgake'
gongake'.

⁵ Chakomba beena' chaklen Xancho Chioza'ne'.
Chakomba beena' none' lez Chios, beena' be'la'o
dii Jacoba'.

⁶ Len' bene' yabana', yell-lioni na' nido'na',
na' yog' daa de lawinka',
na' toshiizi chone' ka ne'.

⁷ Chone' yel' joschis che ben'ka' chzak'zi',
na' cho'e daa yeej gao ben'ka' chbił chdon.

Xancho Chioza' chisell chilee ben'ka' nak lall'
na' ben' zit'ka'.

⁸ Xancho Chioza' chone' ka chile'i ben' lcholka'.
Xancho Chioza' chaklene' ben'ka' bi chak wen cheyin.
Xancho Chioza' le chakile' ben' li ben' shao'ka'.

⁹ Xancho Chioza' chap chwie' ben' zit'ka' zoa lill lill ben',
na' chweej chwawe' bi' wizebka' na' nool wizebka'.
Per chone' ka bi ikaa xnezi daa ngoo yichj ben'
malka' gongake'.

¹⁰ Le' ben' yell Jerusalén,
Chios chelena' inabi'e toshiizi.
Xancho Chioza', inabi'e zejli kani.

¡Li we'la'o Xancho Chioza'!

Salmo 147

¹ ĴLi we'la'o Xancho Chioza'!

ĴLe wen na' le mbalaz nakan gołcho diika' koogakan
Xancho Chioza' balaan!

La' len' chidolee goł inehone'.

² Xancho Chioza' chixe chisile' yell Jerusalenna' sto shii,
na' chiti'a chishague' ben' Israelka' nesles.

³ Len' chizoe' mbalaz ben'ka' chakyeshii yichjlall'do'eka',
na' chizoe' legake' shi'a shao'.

⁴ Len' bllie' bia' ka'k' beljdo'kan' kwia
na' mbeje' le to togakan.

⁵ Ben' choo ben' xen nak Chios chechona', na'
nape' yel' wak xen,

na' yel' sin' che'na' biga yiyoll yidon.

⁶ Xancho Chioza' chaklene' ben'ka' nak ben' gaxjlall',
na' chone' ka si' ben' malka' yel' zto' axt ga zeelo.

⁷ Li goł ine Xancho Chioza' na' li wi'e yel' choxken.

Li goł-len diika' llia kwerd cheyin to dii koon Xancho
Chioza' balaan.

⁸ Len' chitop chishague' bejka' xan yabana',

na' chselee yeja' lo yell-lioni,

na' chone' ka chiyashj yix'ka' yaa yaoka'.

⁹ Chweej chwawe' bayix'ka'

len xiin bechjka' kat' chosyaagakb.

¹⁰ Aga yel' wal che kabaykan'

ni aga yel' wal che ben' yell-lionin chazlall' Chioza'.

¹¹ San ben'ka' chall chlleb len' chazlallee,

ben'ka' nxenilall' yel' chaki che'na'.

¹² Le' ben' Jerusalén, li we'la'o Xancho Chioza'.

Li we'la'o Chios chehena', le' ben' yell Sión.

¹³ La' len' nzoacheche' daa chsej puert che zeena'
daa nechj yell chehena',

na' chonleeye' xiinleka' lle' na'.

¹⁴ Len' chkweeje' le' lao ben' zit'ka',

na' chzesh chzeljile' le' daa chwawe' le' trígona'
daa zeelo nakch wen.

¹⁵ Chselee cho'a xtilleena' yell-lioni

na' lobe'do' chlliljan.

¹⁶Len' chletje' beyaa na' chlliljan ka yish' xa xil' ba llyish,
na' chletje' xelj zaga' ka ben' chis de.

¹⁷Len' chletje' yaj yabana' daa nak ka yaj bixj;
na' dii zaga' chselee chiyonan nisa' bey'.

¹⁸Na' ka chnie', chiyakan nis sto shii.

Chone' ka chze be'na' na' nisa' chixonjan.

¹⁹Len' bzajniile' ben' Israelka', ben'ka' nak xiin dia che
dii Jacoba', cho'a xtilleena',

na' bi'e legake' diika' bllie' bia' gongake'.

²⁰Na' ni tlish' ben' yell zit'ka' bi bene' chegake' ka',
ni bigan' gombia'gake' diika' bllie' bia'.

¡Li we'la'o Xancho Chioza'!

Salmo 148

¹ ¡Li we'la'o Xancho Chioza'!

Li we'la'o Xancho Chioza' le' lle'le yabana',
li we'lawee.

²Li we'lawee le' nakle anjl che'.

Li we'lawee le' lle'le yabana' nakle wen wdił che'.

³Li' wbill na' li' beo'do', li we'lawee.

Li we'lawee, le' belj dii chey cheeni'.

⁴Yaba, li' zio' daa cha' wal,

na' li' nis, llio' koll' yabana',

li we'lawee.

⁵Li we'la'o Xancho Chioza',

la' to ka wnezen' wxw wzil yog'lołte.

⁶Na' bene' kwenche zoagakan tozga toshiizi,

na' bllie' bia' daa gongakan na' bi illaa daa bllie' bia'.

⁷Li we'la'o Xancho Chioza' le' lle'le lo yell-lioni,

na' le' nakle ba yelə wal lle'le loo nido'na', na' lekzka'

li' nido', li' nako' zitj wal.

⁸Li' yi' wziw', li' yaj yaba, li' bey', li' gop',

na' li' yejpe' wal, le' chonle ka bllie' bia' gonle,

li we'lawee.

⁹Le' yaa xen na' yaa nesh',

na' yog'lol-le le' yag cedro na' yag dii chbia dii zix,
li we'lawee.

¹⁰ Le' bayix' ba chisgol ben', na' le' bayix' ba lle' yaa yao,
le' zele lo llazə na' le' chxobi leelena',
li we'lawee.

¹¹ Le' chnabia'le lo yell-lioni, na' yog'tele le' lle'le to to yell,
yog'lol-le le' naple yel' wnabia',
li we'lawee.

¹² Le' ben' byo na' le' noolə,
le' bi wew' na' le' ben' gol,
li we'lawee.

¹³ Yog'lol-le, li we'la'o Xancho Chioza',
la' zeelo len' nake' ben' choo ben' xen.
Bibi de yell-lioni ni yabana' dii illin ka balaan che'na'.

¹⁴ Ba bi'e yell che'na' yel' wak.

Li kwee balaan, le' nakle lall' nee, le' ben' Israel, ben' chakile'.

Li we'la'o Xancho Chioza'!

Salmo 149

¹ Li we'la'o Xancho Chioza'!

Li gol to dii kob daa koon Xancho Chioza' balaan.
Li we'lawee gana' chidop chillagle, le' nakle lall' nee.

² Le' ben' Israel, li yiba yizaki lao beena' bxe bsil cho'.
Le' lle'le yell Siónna', li yiba yizaki lao beena' chnabia' cho'.

³ Li wyaayi we'la'ole Xancho Chioza',
li gol daa chgoon le' balaan, na' li wchin pandéroka'
na' diika' llia kwerd cheyin.

⁴ La' Xancho Chioza' chibaile' ben'ka' nak yell che';
na' ben'ka' nak ben' gaxjlall' sho'gake' balaan daa
chisle' legake'.

⁵ Le' nakle lall' nee, li yiba yizaki daa chisle' le'.
Axt lo daa lo blag chelena' li gol inie' daa chiba chizakile.

⁶ Li gol ine Chioza' kon cho'a loll'lana' na' gox'tele
twej spad dii nlatit chop laate,

⁷ kwenche yizi'le wzon che ben' zit'ka', ben'ka' bi nxenilall'
Xancho Chioza', na' wsak'zi'le yog'gake'.

⁸Na' w̄chẽjile gdenna' beṅ' w̄nabia'ka' na' beṅ'ka' zakii
⁹kwenche gonle chegake' ka ba n̄hoglo Chioza' gak chegake'.
 Na' daa gonle ka', gakan to balaan̄ che yog' beṅ'ka'
 nak lall' nee.

¡Li we'la'o X̄ancho Chioza'!

Salmo 150

¹¡Li we'la'o Chioza'!

Li we'lawee loo lill x̄latje'na'.
 Li we'la'o beena' zoa yabana' daa chli' yel' wak choo
 yel' wak xen che'na'.
²Li we'lawee, daa chone' yel' wak choo yel' wak xenka'.
 Li we'lawee, daa nake' liizelozi beṅ' choo beṅ' xen.
³Li we'la'olenile' trompeta'.
 Li we'la'olenile' diika' lia kwerd cheyin.
⁴Li we'lawee axt wyaalenile' pandérona'.
 Li we'la'olenile' b̄lleja' na' diika' lia kwerd cheyin.
⁵Li we'la'olenile' platy daa chzill.
 Li we'la'olenile' platy daa chon sshag.
⁶¡Yog'!o!-le le' de bishbe chele, li we'la'o Chioza'!

¡Li we'la'o X̄ancho Chioza'!